

БЕНЬЯМИН САФАНОВ



БОГЪДОРГЪО

БЕНЬЯМИН САФАНОВ

БОГЪДОРГЪО

ИХДИЛОТГЪО

эз зиндегуни колхозчигъой Дербенд

Сутьфдеи книг

Дагестанское
книжное издательство
Махачкала 1982

Сафанов Б.

С 21. Богъдоргъо: Ихдилогъо эз зиндегуни колхозчигъой Дербенд. Суьфдеи книг. — Махачкала: Даг. кн. изд — во, 1981. — 176 с.

с (Тат)
ББК 84 Тат.

Э и книг дешенде оморетгъо ихдилотгъой эн нуувуьсдегор тати Беньямин Сафанов гьисдуьт эз товун богъдоргъой Дербенд. Эз нуувуьсдеигъой эн у ведини, ки автор хуб дануьсде сенигъат, зиндегуни ве гьеррузине верзуьшлуье жофой эн богъдоргъоймуре, ниетгъо ве войгъгой энугъоре. Б. Сафанов ю хуьшдению эз лап жовоне вьгъдо омбаре салгъо бири колхозчи — богъдор. Ижире куьнд шинох бирей э кор ве зиндегуни колхозчигъой Дербендевоз дори уре минкини эри э дананиревоз нуувуьсде жофо, усдоети, зиндегуни, фикиргъо, ниетгъой энугъоре чуьтам э суьфдеи салгъо, колхозгъо гуьнжунде оморенге, гьемчун э гурунде салгъой Келе довгъой Ватаниш.



ПУШОЙГОФИ

Те довгюгьо ме не Шевеньё э е класс хундембирим. Довгю сер гирденте, иму школере шенде рафдим эри кор сохде. Ме э завод консервгьо сохденигьо кор сохдембируым, оммо Шевеньё екем вэхд э колхоз, песде э совхоз кор сохдембу. Довгю варасденге гьердуйму сер тирдим эри хунде э шевине школа, оммо дие, неки э е класс, э е школеш нисе хундембирим. Гьеркиму э е школе хундембирим. Эхирки э гьечиревоз ме не у эз еки евош-евош дур бисдорим. ГПэре-бир эеки вохурденте, хьол-руз екире пуьсире-жусдембирим, оммо гьевелигьоре хуно куьнд небирим эз еки.

И пушогоьо, е руз эдембируым э куче гешде, э ме омо вохурд Шевеньё.

— Руз туь эхэйр бу! — мугу у эз ме. — Туь эхи э кучегьош веде нисе бире, кеш екем гешдим гьери, хэйли мэхьэл туьре недирем...

Ме «руз эхэйрбуй» энуре вогордунде бэгьдо, дуй хьол-руз екире пуьрсире бэгьдо, гешде-гешде рафдим вадарафдим э богъчей шегьер. Е хэвлете скамейка гешде офде, нуьшдим.

— Пой ебо, — мугу Шевеньё, хэндее тегьер, — ме шиновусдем туь «писатель» бирей, ихдилотгьо нуьвуусде гуфдире. Неки писатель, «шогоьириш» гьисди, стихигьош нуьвуусдени гуфдире...

— Туь э ме руьхшенд сохде, «Гээзи холу»?

— НэгI э жун туь, ме эдем эз расдеки пуьрсире, эге туь нуьвуьсде дануьсдениге, мере э туьревоз е гьул-лугьи.

— Пой ебо, дие туь чуьжире тати, туь альманах татиреш нисе хунде, эхьисобевоз, михундиге, пуьрсиреш нипуьрсири ме чуь нуьвуьсденуьмге, непуьрсирекиш мидануьсди.

— Дие у гофгьоре бигьил-о, гу бура нуьвуьсдениге?

— Эри, нуьсденуьм, чуь бу песде?

— Дануьсдени чуьни?

— Гу, гьери винуьм чуьниге дие?

— Мере воисдени эритуь екем ихдилотгьо сохум эз зиндегуни колхозчигьо, туь у ихдилотгьоре екем гьуьч сохде, э книг нуьвуьсдиге, е хубе ихдилотгьо мибу, хундегоргьоре эз угьо хьэз миёв...

— Пой ебо, туь мунош Шевеньё, туь колхозчи кей бирей? Екемлей жор сохди э колхоз довгю сер гирдебугьо сал, песде э совхоз рафди эри кор сохде...

— Эле, гьечуниге туь эз зиндегуниме гьичиш нисе дануьсде. Ме колхозчи омбар бирем, ченд ве ченд салгьо бирем. Дануьсдени эз коми салевоз ме колхозчи биремге?

— НэгI! Эз коми салевоз бирей? — пуьрсируьм ме, хэндуьсде-хэндуьсде.

— Туь мэхэнд-гьо, ме зарифетсуьз эдее гуфдиренуьм. Ме колхозчи бирем эз у салебез, кейки жовоне гIэйлгьоре э солдати рафдебируьтгьоре, рэхь сохдебируьт э духовой оркестревоз...

— Эжун туь, Шевеньё, — мугум, диеш хэнде гирде мере, — те довгю сер гирде, жовоне гIэйлгьоре э солдати гьемишеш э музикгьоревоз рэхь сохдембируьт, неки духовой оркестр, гьовол-зурновчигьош ченд десдегьо бирембируьт. Келе межлуьсгьо сохдембируьт бебегьо-дедегьо эз шори гIэйлгьошу э солдати рафедеи. Энжэгъ э салгьой довгю, хэлгъ э довгю рафдеки, гIэрс

э чум вери рэхь сохдембируйт одомигьоре э довгю. Довгю варасде бэгъдо, е-дуь салигеш дуьл хэлгъ екем гурунд бирембу, жовоне гӀзилгьо э солдати э рафдеки, оммо эз песигьо ве гьеймогьоиш жовоне гӀзилгьо э солдати э рафдеки келе межлуьсгьо сохденуьт. Имогьой э гуфдирей туьревоз, ээже мибу дануьсде коми салиге у туь гуфдиренигьо сал, гӀзилгьоре э духовой оркестревоз рэхь сохдигьо сал, егӀни эз коми салевоз туь колхозчи бирейге?..

— Пой тэгӀди месох. Те довгю сер гирде эри колхоз иму духовой оркестр омурдебу, э ёр туь гьисдиге. У оркестр у сал суьфделе сер гирдебу эри музик зере, гьейсэгӀэтире хуно, лап хуб э ёрме мунди гьемме. Белки е ёрме мундеш нимунд. Э ёрме эйчуь мунди дануьсдени!? КукгӀэмлеймеш э колхоз кор сохдембу э бебеймуревоз. У шохьонгумгьо э духовой оркестр эри музик зереире хуте бире рафдембу. У сал уш э солдати рафдебу, эзу товуне э ёрме гьемме лап хуб мунди. Эз колхоз иму э солдати рафдебугьо гӀзилгьоре, колхоз, э е десде поюнде бэхшгьош дореву ве песде э духовой оркестревозиш рэхь сохдебу. Эз расдекиш э ёртуь немунди? Туьш унжо бирики, э вокзал оморебирики гӀзилгьоре эри рэхь сохде...

— У кор э ёрме гьисдигьо, уре туь дуз гуфдире, оммо туь мунош, Шевеньё, у коми сал буге э ёрме нисди. Песде, пой ебо, туь у салгьо э школа хундембирики...

— Эри, гьелбет хундембируьм, ме не туь э е класс дебирим дие.

— Дие туь эз у салевоз колхозчи чуьтам бире?

— Э школе хуну гуфдире, беге колхозчи нисе бире?

— Э колхоз кор несохденге, колхозчи чуьтам бире?

— КукгӀэмлейме э солдати рафденге, бебейму берд мере э духовой оркестр но, музик зере хуте бошум гуфдире. Ме эз школа оморенге, гьемме руз, шохьонгумгьо рафдембируьм э духовой оркестр колхоз. Туь увэхди-

гъо э Хуней пионери э художественни кружок рафдем-бири...

— Имогьой э гуфдирей туьревоз туь э духовой оркестр музик зере хуте бирей гуфдире, бега туь колхозчи хьисоб бире?

— Духовой оркестр эн колхоз биренге, ме колхозчи хьисоб небире, дие ки хьисоб биренуьм? Гьеле те умэхьэлиш, туьре дануьсде воисдениге, ме эзуш пушо колхозчи бирем, чуьнки бебейму бири еки эз биненорегоргьой колхоз. У мере гьеммише э гуьрдлемегьо ве мигидгьой колхози э хуьшдеревоз миберд...

— Гьечу гу дие. Гьечу биренге, э гуфдирей туьревоз, туь эз глэнилиревоз колхозчи бирей. Оммо уреш гуюм эритуь, ки туь колхозчи небирей, энжэгъ кук колхозчи бирей.

— Бугу дие, колхозчи бисдо, кук колхозчи бисдо чуь бешгъэи? Эзуш бэгъэй, довго сер гирденге, ме школере гьишеде, э колхоз рафдем эри кор сохде. Бил зерем, гьупи зерем, капарус шендем, чуьш сохдем э колхоз.

— Ме эдее диренуьм, э и гофгьоревоз туьре гуфдире воисдени, эз колхоз иму бине норе оmore вэхдевоз, туь колхозчи бирей гуфдире?..

— Гьелбет бирем. Гьеммей энү салгъо э колхоз кор несохдемгеш, ме зиндегуни колхозчигьоре лап хуб дануьсденуьм. Ме эз зиндугуни энугьо гирошеде рузгьоре эритуь ихдилот сохдумге, туь угьоре екемлей гьуьч сохдиге, лап хубе ихдилотгьо мибу, гьеле туь эзме согъбошиш мигуи.

Эхирки, глэзизе хундегоргьо, сер ишмуре дорд недуьм, Шевеньё, коргьой гуфдиренигьоре хуно, «Эз гьугъ догъ оворде мере, э кун догъ нушунд», ме рази бисдорум эри гуш доше ихдилотгьой энуре ве, угьоре шиновусденге, эрима норумки эришмуш ихдилот сохум гуфдире, гьич е гофеш дегич несохде, гье гьечу чуьтам Шевеньё эрима ихдилот сохдиге.

ДУЪМ ГЪУПИИ

Суьфден салгьо колхозгьо гуьнжунде оморетгьо, э шегьер Дербенд омбаре чуйкле колхозгьо бири. Бири ужире колхозгьо, э комигьоки дебирет дегь енебуге бисд кифлетгьо. У салгьо коргьой колхозгьо гьеле унгьэде хуб небируьт. Колхозгьо гуьнжундеи эри хэлгъ тозе кор бу. Унегуьре э кор гуьнжундеи колхозгьо кими вэгІдо егІэлмишигьош бирембу. У егІэлмишигьоре кулакгьо ве жуьгьне гІоширгьой Дербенд хьэрекет мисохдуьт эри чарунде э тараф ишу, эри гировунде дуьшменигьоре э гьэршуй колхозгьо. Угьо эз хуьшде гуьнжунде жуьрбежуьре гофгьо э товуней колхозгьо, лов мисохдуьт э гІэрей хэлгъ.

Евдо, бебей Шевеньейгьо, эз расдекиш, бири еки эз биненорегоргьой колхоз. Суьфде э колхоз энугьо дебируьт гьеме дегь кифлетгьо. Оморе-оморе жергей энугьо зиьд бире ве е ченд чуйкле колхозлегьо гуьрд бире э е колхоз чаруьсд, э дуьруьжде колхоз, комики гьеле э симиуьн салгьо э сал ю е миллион монет зиьдте гелуьр вегирдембу эз боггьо, зимигьо ве бисдугьо.

Е руз шохьонгум Евдо не Шемей хьэрмэхь ю, гьупигьо э душгьошу вери, эз богъ колхоз эз кор эдембируьт оморе. Угьо миденишуьт мивинуьт э пушой гьопушу, гІэилгьо десде поисде, чубуггьгьоре э дес гирде, тик вокошире, егІни бейдоггьгьоре хуно, эдет рэхь рафде-рафде мэгІни хунденуьт:

« — Бейдогъ власть э дес фэхьле.
Дуьм гьупии э сер фэхьле.»

Евдо и гофгьоре шиновусденге, мэхьтел мунд, э лой гІэилгьо чаруьсде, пуьрси эз Шемей:

— Шиновусдени чуй хунденуьтге и гьурумсоггьгьо?!

— Эри, — мугу Шемей, — и гофгьо эз гІэилгьо ведироморе гофгьо нисди, угьоре гьобоне шуьггьэме дуьшменгьо дешендет э лэгІэй энугьо...

Ёвдо мивинуъ э десдей гІэилгьо Шевеньё кук юш дери. У гьеебо рафде эз гуш Шевеньё гирде, пуърси:
— Ки хуте сохди ишмуре ижире гофгьоре эри гуфдире?

Шевеньё сер мигируъ эри гирисде ве гирисде-гирисде э энгуъшдевоз мибирмуну э тараф эн е гІэил:

— И-и-и...

У гІэилгьойге екигьо мивирихуът, екигьойге, э гирисдей Шевеньё езугъ оморе, мибирмунуът э тараф эн у гІэил, Шевеньё бирмундебугьо, ве э е лэгІэ мигуют:

— Содугъ поюнди имуре э десде ве гьишди «мэгІ-ни» хунде...

И гофгьоре шиновусденге, Шемей мирав мигируъ эз гуш Содугъ:

— Гьери гу гьурумсогъ эзки шиновусдейге и гофгьоре?

Содугъ жугьоб нидуъ, не гирисдеш нигируъсуъ. Содугъ бу кук Нисим гьунши Ёвдойгьо. Бебей Нисимигьо келе гІюшириш небириге, юре е гьэдер богьгьо ве э дуъ жиге хунегьо бири. Э еки эз хунегьо ишу зигьисдембириуът, унигере дорембириуът э кирочигьо эри пул гьэзенмиш сохдешу. Хьуькуьмет Совети оморенге, богьгьой энугьош ве еки эз хунегьош вегирде оморебириуът. Бебей Нисимигьо Мигьир омбаре дуьшменигьо гировундембу э гьэршуй большевикгьо ве кук хуьшдереш хуте сохдембу э рэхъ ю бурав гуфдире. Те ю согьинде Мигьир не кук ю гировундембу дуьшменире э гьэршуй хьуькуьмет Совети. Мигьир муърде бэгьдо, Нисим эдембу рафде бебешу рафде рэхъэ. У э дуьл хуьшде эхи сохде нисе дануьсдембу дерд богьгьо ве хунешуре вегирдеире. Беде чини девлет. Девлет бугьо одоми, гьелбет, евэхдиш нидануъ э дуьл хуьшде эхи сохде девлет эз дес ю вадарафдеире. Омбаре инсонгьо бирет, эз сэгьэтишу ве эз девлет омбар хосдеишу, жун ишуре э негьогьи пуч сохдетгьо. Нисим денишире, виниренге, ки дие колхозгьош бисдо ве хьуькуьмет Совети руз-беруз

эдее гужлуй бире, колхозгьош, эз егІэлмишигьоре, э кор гуьнжундеи энугьо дебирембируьтгьоре очмиш сохде бэгъдо, эдее муьхькем бире, сер гирд эри лов сохде э гІэрей хэлгъ жуьр-бежуьре зобуне ве руьхшендиe гофгьо э товуней хуькуьмет Совети ве колхозгьо.

Содугъ, денишире, виниренге, ки Ёвдо не Шемей еки гуш юре, екиге гьул юре гирде, эз ю дес нисе вегирденуьт, э угьо минет сохде, юре хьэрзо дуьт гуфдире, гирис-гирисде, мугу:

— Ме эз бе-бе-й-му шиновусдем...

Ёвдо не Шемей гьэгьрелуй бире, гье э гьупигьоревоз дарафденуьт э хьэет Нисимигьо. Нисим нуьшдебу э гьейву, эдембу чой хурде. Угьо э хуьршевоз э сер Нисим оmore э е лэгІе гуфдируьт:

— Туьре гьич гІэйб-гІор оморени, номуссуьз? Ижире лонгьсуьзе гофгьоре эричуь дешендей э лэгІэй гІэйилгьо?..

— Чуй гофгьоре? Номуссуьз ишму, хуьшденишмунит, богъгьой мере вегирдейт, недирегьоре дирейт, дирегьоре фурмуш сохдейт. Гьеле э сермеш дироморейт мере эри куфде э гьупигьоревоз? — Нисим сер мигируь э жуьр-бежуьре нифригьоревоз эри нифри сохде Ёвдоре, Шемее, колхозгьоре...

Ёвдо не Шемей тоб нидуьт, сер мигируьт э дуьм гьупигьоревоз эри куфде Нисиме: «Иш эритуь дуьм гьупии э сер фэхьле». — гуфдире-гуфдире. Гьеркишу е-дуь дуьм гьупии зере эзу, туф дешенде э сифет энугу, миравт.

Ёвдо не Шемей дес-руй хуьшдере шушде, партал хуьшдере дегиш сохде, миравт э милиция эри мэгІлуьм сохде, ки Нисим э лэгІэй гІэйилгьо герексуьзе, нум колхозгьоре беднум сохденигьо гофгьоре дешенде гуфдире.

Угьо э милиция оморенге, миденишуьт мивинуьт Нисимиш э милицияи. У нуьшдебу э рачей дежурный, эдембу чуьниге гуфдире.

Ёвдо не Шемей медан Нисим омори э милиция эри

эз дес энугьо шуькеет сохде, юре куфди гуфдире. У гьетте Ёвдо не Шемее дире, гоф хуьшдере бурра, вада-рафде эз милиция видов-видов рафдени э хуне.

КЕМЕДИЕ ЭЖИГЕЙ НИМАЗ

Ёвдо омбар хосдембу хуькуьмет Советире, тозе гІэдотгьоре ве эз гьемме у омбар шор бирембу эз кор-гой колхозгьо. Чутьам шор небу у, имисал э хуней энугьо дуь гІэребе гІорд гендуьми омори, дуь серегови шороб декирдет, э вэхд емишгьо фундугъ, бэгІли ве де емишгьойге вегирдет. Эзуш бэгъэй эри гиросдигьо сал э угьо хэйли пул ве шоробиш расирембу.

Руз мэгІлуймей «Нисону» бу. Ёвдо эз Шевеньё мугу:

— Шохьонгум э меревоз э клуб колхоз биё биёй.

— Чуьни беге э клуб колхоз шохьонгум? — пуьрси Шевеньё эз бебешу.

— Митинги.

— Э хьисобевоз митинг варасде бэгъдо, концертиш мибу?!

— Эри, концертиш биренини.

— Ме э туьревоз ниём, туь мере концерте дире нисе гьишде.

Шевеньё дануьсдембу эри чуй кор бердеге бебешу юре э хуьшдерево. Увэхдигьо э клубгой колхозгьо, шевгой мигІидгьо, колхозчигьо э нумаз неравт гуфдире, мисохдуьт митинггьо, мибирмундуьт концертгьо. Гьевел гировунде оморембу митинг, э комики еки эз зверте идоре оморе одоми мисохд доклад, песде гоф сохдембириуьт активистгьо-агитаторгой колхозгьо. Угьо, очмиш сохде мигуфдируьт эричуй товуне рабигьо гьишденуьтге гирде мигІидгой дин-догІотире. Докладгьо ве гоф сохдеигьой активистгьо варасде бэгъдо, бирмундембириуьт э хэлгъ концертгьо э гьувот художественни

самодетельности колхозгьоревоз, комигьоки суьфделе сер гирдебируйт эри гуьнжо оморе э колхозгьо. Э у концертгьо хундембируйт е ченд мэг҃нигьо ве бирмундембируйт эз е перде биренигьо пьесагьо, э комигьоки бирмундембируйт дургунигьой диндо҃лоте, шефдигьой рабигьо ве куьгьне г҃лоширгьоре. Э концертгьо хэлгэ лап хэз оморембу, унегуьре клубгьой колхозгьо одоми пур бирембируйт, э клубгьо эри нуьшде, неки эри г҃э-илгьо, эри келегьош жиге вес нисе сохдембу. Г҃эилгьо мипоисдуйт э пой э г҃эрелугь куьрсигьо, минуьшдуйт э сер пенжерегьо енебуге э хори чорзани зере лап э пушо э ён сегьне.

Э ён дер клуб нуьшдембу еки енебуге дуьдуь эз активистгьой колхоз, комигьоки нуьвуьсдембируйт фамилегьой э митинг оморегоргьоре. У колхозчигьо, комигьоки э митинг ниомо, пуьрсуьш энугьоре норембируйт э гуьрдлемей колхозчигьо, эжеки угьоре, номус доре, г҃эйблуть сохдембируйт. Эге дуь-се бо неоморегоргьо мибисдоге, угьоре гьеркире дуь-се трудоден штрафиш сохдембируйт.

Шевгьой миг҃идгьо э ижире митинггьо Ёвдо Шевеньёре миберд гьеммише э хуьшдеревоз. Оммо Шевеньё гьич бегьем те эхир у концертгьоре нисе дирембу. Ёвдо мидоно э зир пинжек Шевеньё сисид хуьшдере, чуьнки юре сисиде гирде г҃эйб оморембу эз колхозчигьо. У мигуфди эз Шевеньё: «Митинг варасде бэгьдо, ме мивадарам э вогьней папрус кеширеревоз, песде туьш ведиро, э нимаз бурайм. Угьо миоморуьт э нимаз, эжеки гьемме мердгьо, сисидгьоре дегирде, нимаз ишуре михундуьт. Оммо Шевеньё мипоисд э ён дер нимаз. У, гьелбетте, нисе варасирембу, чуь хундембируьтге у мердгьо. Уре эз корсуьзи хов оморе, миводо хуьшдере э дер ененге минуьшд э ён дер нимаз, михиси...

— Имбуруз месуьз бура э митинг, — мугу Шевеньё э бебешу.

— Эричуь? Туь эричуь нисе оморе?

Шевеньёре воисдембу гуу э школеш гуьрдлеми гуфдире, оммо э дургуни гуфдире у хуте не биребу.

— Туь мере концерте дире нисе гьише. Дие ме чуй сохум оmore э туьревоз?..

— Имишев екем концертеш миденишим, песде мирайм...

— Мере екем эйчуьни, гьуй... гьуй... Эзу хуби э ху-не хисуьмгьо...

— Гьеле эз хори невероморейки э гоф бебе эри неденишире... Гуфдируьм миёй, дие зирти-пирти зере герек нисди...

Ёвдо нуьшдебу э гьирогьи жигей эн жергей куьрсигьо, комики бу э куьнди дер клуб. Шевеньё сисиде э гьултугъ деноре, поисдебу э ён бешу. Митинг варасденге, сер гирде омо концерт. Бэхшвегиргьой художественни самодеятельность, се-чор мэгъни хунде бэгъдо, сер гирдуьт эри бирмунде чуькле пьеселегьо. Э суьфдеи пьеса бирмунде омо чуьтам е колхозчи, э дин-догъот бовор сохденигьо, руз орине шохьонгум эз кор оморенге, мивинуь сер гирди эри торик бире, у эри хуьше мигую: «Эри руш чире вэхд дир бири, мигуиге шобот гьэриш бирере хунои, гьери бурам эз раби пуьрсуьм, гьэмел миёвге руш чире». У миёв э нимаз, мивинуь раби э хьэёт нимаз лампей дегьиреш норе э сер тапаретке, гобоеш нушунде, эдее э серчиревоз сер энуре чире. У мипуьрсуй эз раби:

— Эри руш чире вэхд дир небири раби? Гьэмел миёв руш чире?

Раби, гьевел э гьово, песде э досю деbugьо серчи денешире, мугу:

— Эри, хэлефме, гьэмел миёв, гьеле вэхд дир нисди, шобот гьеле дури.

Э дуьимуьн пьеса раби нуьшдебу э хьэёт нимаз, мэгълуьмей мигид «Кипур» бу. Е жогьиле зен овурд до э у керггьой «недовоире» эри куьше. Оммо у зен зен небу, еки эз жогьиле гьэилгьой колхози бу. Увэх-

дигъо гъеле гІэруьс-духдер э художественни самодея-
тельность бэхш нисе вегирдембируьт, эз хэлгъ гІэйб
оморембу ишуре ве екиге угъо терсирембируьт эз бебе-
дешу ве гуфди-мугуй зенгъо. Жогьилле зен керггьоре
доренге э раби, у ведешендени эз гъултугъ серчире ве
сер гирдени эри куьшде жерггьоре. Э керггьоре куьш-
деки эз зир лов эй хуьшде, хэндуьсде, гуфдирени:

— Зи хъэлепоти, зи кополоити,
«Хьюькуьмет эн Совети»,
Керглегьоре микуьшуьм,
Э нумазлейме минуьшуьм.

Раби бугъоз керггьоре бурра, шендени э хъэет ни-
маз. Зен рафдени керггьоре эри вегирде. У гъуз бире
сэгІэт, эз сер энү офдорени сефгию. Гъеебо еки эз зал
нуьшдегоргъо, хъэрой дешенде, гуфдирени:

— Эле, эле Мемри зен бири. Эри эни «зен» е жо-
гыле «кук — одохлу» офде гереки...

Гъе э и теретэгІди, Ёвдо, эз душ Шевеньё десе евош-
лей зере вадарафдени, егІни уш ведиров гуфдире э юре-
воз. Оммо Шевеньё эз гуж хэнде э гъэвл нисе офдоре
бешу юре огол зереире. Унгъэде уре хъэз ъморембу
эз пьесагъо, бирмунде оморебируьтгъо э сегьне, у эз
хъэвес энугъо бешу э клуб недериире, э жигей бешу
екиге нуьшдеиреш сечмиш несохд.

Э сеимунь пьеса бирмундени дуь жовоне мердгьоре.
Угъо биренуьт гъем пиёнискегъо ве гъемиге гъуморбаз-
гъо. Угъо пулгъошуре э гъумор норе, нуьшденуьт
э куьнж куче эри фикир сохде, чуй гІэмел офутге, чуй
чоре сохутге эри пул офдешу эй ичку хурде ве гъу-
мор возирешу. Гъе ебо еки эз угъо гуфдирени:

— Офдем!

— Чуй офдей? Пул офдей? Эзже офдей?

— ГІэмел офдем. Дануьсдени чуй сохим?

— Чуй сохим?

— Туь э зени геймиш бош, э шуьгъэштуь дени лемболуше, бурайм э духдир. Ме мигуюм, ки туь зен мени, гІэил мундей гуфдире, мивегириим справке. Справкере миберим э собес, мивегириим эритуь пособие.

Увэхдигьо гІэил мунде зенгьоре собес пособие до-рембу.

Угьо миёвт экин духдир. Э зени геймиш биребугьо мерд шем гирдебу, егІни духдир, сифет юре дире, мерд бирей юре недануь гуфдире. У мердиге сер гирдени эри мэгІни хунде:

— Ой духдир, жон духдир,
И гІэруьс гІэилле мунди...

Духир вэхишдени э пой, оморени экин э зени геймиш биребугьо мерд, э шуьгъэм ю дес зенуь гуфдире, лемболуш эз шуьгъэм эну офдоре, расирени э хори. Э зал офдорени келе хэнде. Ингъэде Шевеньё хэндуйсдени, эз гуж хэндей эну, сисид эз гьултугъ эну офдорени э сер пойгьой ю. Энжэгъ ивэхд оморени э ёр эну бебешу э куче э ю денишири гуфдире. У зури-зури, сисиде вегирде, денорени э гьултугъ, ведироморени э куче. Э куьнж куче расиренге, Ёвдо э гъэгъри-гІосириевоз, гуфдирени эзу:

— Текей денишуьм э туь, гьурумсогъ?! Имогьой вэхд нимаз ведиромореш эдее биреки. Гьи? Чув? «Сэхь эз сопу келеи?!» — У миёв э хьуршевоз э сер Шевеньё.

— Бебейме муно, эз ёрме фурмуш бири. Небуге ме теимэхъэли ниведироморум беге? Гьуь... Гьуь... — гирисдени бирере хуно, сохдени хуьшдере Шевеньё.

— И чуьни, туь гьеле незереки эдее гирисдеки. «Те хонохо дуьзде гирде, — гуфдире э метелегьо, — дуьзд вэхишдебу хонохоре гирде». Хуби дие зирти-пирти мезе. Э нимаз эри рафде дие вэхд немунди. Хубтейки бурайм э хуне хурек мигІидимуре журим.

ГЪИМЕТ ЭН СЕ ЭЛУЪЧЕ

Суьфдегьо э еки эз колхозгьой Дербенд е кор гировунде миомоге, у коре гьемме колхозгьо гировундембируйт. Меселен, э еки эз колхозгьой Дербенд правление гъэрор норебу, ки колхозчигьоре ихдиёр нисди гІэилгьоре эри э богъ берде э хуьшдеревоз эз рузгьой выходнойгьо бэгъэй. И гъэроре гьобул сохдебируйт гьемме колхозгьой шегьер. И гъэрор норе оморёбу, еГни, эзу товуне, ки гІэилгьо школере шенде, э богъгьо неравт гуфдире. Руз выходной мибисдоге богъгьо гІов-гІэил пур бирембируйт.

Е руз выходной Евдош бердебу Шевеньёре э хуьшдеревоз э богъ. Вэхд тутгьо, бэгІлигьо ве элуьчегьо бу. У руз Шевеньё те сурои хуьшеде тут, бэгІли, элуче хурде, согъ руз вози сохд э богъгьо. Шохьонгум у пенж келе элуьчегьоре чире дено э куьф хуьшеде. Уре имид бу у эз у элуьчегьо мидуь дедешуре, бироргьо ве хэгьерлей юре, гьеркире еки ве екигере мигьилуь себэхь э школе эри бердей ю. Оммо Шевеньёре хэбер небу, ки колхозчигьоре ве гІэилгьой энугьоре э хуне емишгьо берде ихдиёр нисди гуфдире. Увэхдигьо гьемме емишгьоре колхоз чире, кура сохде, е бэхш сохдембу эри колхозчигьо, енебуге фуьрсорембу э тукугьой колхоз эри фурухде. Эге емиш мибисдоге эри колхозчигьо бэхш сохде гІэмел оморенигьо гъэдер, бэхш мисохдуьт. Эге кем мибисдоге, эри бэхш сохде гІэмел ниомоге, ми-фуьрсоруьт эри фурухде э туку. Кими емишгьо бэхш сохде оморембу э трудовень хьисоби, кимигьойгере э кифлет хьисоби. Меселен, тут-бэгІлире бэхш мисохдуьт сери кифлет, пенж, шеш, хьэшд кило, кими вэхдгьо зиёдтеш, оммо фундугъэ, бодоне сери трудовень пенжогъ-сад грамм. Эзу товуне правлениегьой колхозгьо гъэрор норебируьтки, комини колхозчи э хуне емиш бердге, уре штраф сохдени се трудовень.

Шевеаё элуьчегьоре чире э куьф денореире Евде

недиребу, оммо уре дирербу е сэгъэте мерд колхози, Овхьоил гуфдиренигъо. У кор сохдембу э звеной эн Ёвдойгъо ве гъемин гъе у руз дебердембу эри Ёвдо ве хьэрмэхьгъою глов капарус. Овхьоиле глов-гIэил небу ве екиге лап зобуне одоми бу гуфдире, гъеле э девр гIоширгъош хуышдере эри ехши-киши сохде эри гIоширгъо, э песой фэхьлегъо тешдембу, у омбаре чугъулигъо сохди эри энугъо. У рафдебу гуфдиребу э гъэреулчи Шевеньё элуьчегъоре э куьф денореире.

Гъэреулчи колхоз, лелей Гъомуил, хубе мерд бу, согъ гIуьмуьр хуышде, кемер хуьрд сохде, жофе кеширебу э богъгъой гIоширгъо. Овхьоил оморе экин энугуфдиренге, ки кук Ёвдо э куьф элуьчегъоре декирди, у мугу:

— Дуй-се элуьче бердге гIэил, чуй биренини? Беgezу гелуьргъой колхоз кем мибу?

— Дие правление гъэрор эйчуй нори? Гъечуниге гу э гъемме куьфгъошуре емиш пур соху беруй э хуне...

Омбар гъэгър омо Гъомуиле эз Овхьоил, оммо уре дие чоре небу куьфгъой гIэилгъоре негешде, чуйнки дануьсдембу, эге негешдге, у коре ёгъин правление мидануй, песде э юш гоф миёв.

Гъомуил, гIэбе-гIэйб, эз куьф Шевеньё элуьчегъоре вегирденге, Ёвдо э гъэгъревоз, мугу:

— Уф, гъурумсогъ, гъеммише э сереботи туй э серме е кор оморени. Эски пурьсирей элуьчегъоре чирей э куьф денорей? Дие туй э богъ ниёй..

Шевеньё гирисдени бире, чорей ю мибисдоге сенгъэ мивегирд мизе эз сер гъэреулчи. Уре унгъэде дерд бешу э серю хъэрой дешендеиш негирдебу, чендгъэде дерд ю эз богъ э хуне дес тигъи рафдеи ве бешу юре эзинбэгъдо э богъ ниёругъо гирдебугъо. Бебей энугъо э фикир имогъой юре правление штраф мисоху гуфдиребу, чуйш бисдоге се трудодень кем нисди эхи, руз ю е трудодень, лап э зарбевозиш кор сохдгеш дуй трудодень зиёдте сохде нисе бире, оммо Шевеньё э фикир

э хуне дес тигьи рафдеи бу. Коргой гуфдиренигьо:
«Буыз э хээрэй жун бу, — мугу, — гэзсоб э хээрэй гушд».

Гьомуил виниренге Ёвдо эдей э сер гІэил хээрэй дешенде, мугу:

— Э сер гІэил хээрэй медеше. У тэхсиркор нисди. ГІэилгьоре нисе хосденуьтгьо гьэмсоне одомигьо тэхсиркоруьт, — у гофгьоре Гьомуил э гуфдиреки э илгьомевоз дениширебу э тараф Овхьоил. Уре воисдембу, чумгьоре буюхь сохде э угьо дениширебугьо Овхьоил варасуь ю дузе кор несохди гуфдире. Беге зобуне одоми гэдуьр хубе гофгьоре дануьсдени?! — И элуьчегьоре мигьилуьм уре берде, оммо э правление мэгІлуьм несохде чорейме нисд, бэхшлемиш сох буйронгьулинуьм...

Э правлений колхоз пуьрсуьш Ёвдо норе оморенге, членгьой правление гоф сохде, екигьо Ёвдоре гІэйблуж сохдуьт эри э гІэил гэдэггэ незереи, э хуне емиш берде гІэмел нисе оморе гуфдире, екигьойге, тараф Ёвдоре гирде, гуфдируьтки, э гІэилгьо чуьш гуфдиге, гене э гоф дениширенуьтгьо гьурумсоггьо нисдуьт. Эри гІэилгьо бебегьоре тэхсиркор сохде нибу... Тараф Ёвдоре гирдегоргьо кемте бу, уре гІэйблуж сохдегоргьо омбарте. Еки эз членгьой правление, ГІэмил гуфдиренигьо, денишире диренге, ки кор Ёвдо зобуни, уре эри пенж элуьче гІэил эз богъ овордигьо ёггын штраф мисохут, гоф вегирде, мугу:

— Хьовиргьо, гьеммешмуш дануьсденит, ме эз гІэилиревоз эри гьобонешуьггэмгьо э боггьо кемер хуьрд сохдемгьоре. Ме жоггил бируьмгьо мэхьэлгьо э серме е кор оморебу, у кор эри имишевине ихдилот лап гуьнжолуьни, ихдиёр дит ме уре эришму ихдилот сохум.

— Сох, — мугу членгьой правление гьержи эз ело.

— Е руз э вэхд капарус шендеигьо, ме гІов капарус дебердембируьм э богъ. Пишнеи, гьизггын герми гьисдики эз э видов-видовиревоз гІов деберде, мере гьечи тешне буребу, бугьозме эз тешнеи хуьшги зеребу. Э хиёвон э дор элуьчегьоре диренге, мере диеш тешне бисдо.

Норум бедрегой капарусе э зир элуьчедор, дуь элуьчере чире хурдум, сеимуьн элуьчере э лэгIэ денуьм гуфдире, е гьэмчил эз кемерме расире, офдорум э сер бедрегой капарус, комигьоки офдоруьт тигьи бисдо. Сэхьиб богь диренге, эз се элуьче бэгьэй э ю дуь бедре капарусиш зарал бири, сер гирд мере эри куфде, неки э гьэмчилевоз, гьемчуьн э тепуькьгьоревозиш. Ме увэхди дануьсдем чуьниге «гьимет» эн се элуьче. Энжэгь уники умогой девр эн тьобонешуьгьэме девлетмендгьо бу. Изму, кейки богьгьо дарафдет э дес гьэгьигьэте сэхьибгьошу, беге э иму лоигьи э еки эз хубе хьовиргойму, комики э колхоз эз дуьли-жуни жофо кеширенигьо, пенж элуьчере э се трудодень «фурухде»?..

Членгой правлениере омбар хьэз омо эзи ихдилот, келе-келе хэндусдуьт, дие Евдоре штраф несохдуьт.

Э ШКОЛА

Сал-бесал эдембу параменд бире зиндегуни колхозчигьой Дербенд. Богьгьо дорембируьт буле бегьергьо. Косибирез-беруз эдембу вир бире эз гIэрей хэлгь. Зиёд бирей гелуьргьой колхоз дорембу минкини, неки эри гуьлишонлуь сохде зиндегуни колхозчигьоре, гьемчуьн эри параменд сохде культура ве данани энугьореш. Омбаре активистгьо, жовонгьоре фуьрсорембируьт эри хунде э рабфакгьо, институтгьо ве техникумгьо. Э колхозгьо гуьнжо овурде оморебируьт ликбезгьо ве экуьнди гьемме колхозчигьо эдембируьт хуте бире десхэтире. Небу колхозчигьо, гIэилгой комигьоки нисе хундембируьт э школагьо.

Изму гIэилгьо гьеле те э школа рафде сер гирденуьт эри хуте бире десхэтире э богьчегьой гIэили ве эз бебегьо-дедегьошу, чуьнки изму нисди кифлетгьо, э комики недебу хундеире дануьсдегоре одоми. Оммо гIэилгой увэхди не богьчегьой гIэилиреш недирет, не эз бебегьо-

дедегьош хуте небирет десхэтире, чуьнки угьо ишуш десхэтире нисе дануьсдембируьт. Кими десхэти дануьсдембируьтгьо бебегьо бируьтгеш, гене угьо э кор гІэилгьоре э кифлет десхэти дореи фикир нисе дорембируьт. Эзуш бэгъэй угьо гьич ниденишируьт э дефдергьо-книггьой гІэилгьо, нивинируьт ве нидануьсдуьт угьо чуьтам хунденуьтге. ГІэилгьо ишу эз эгъуьл хуьшде эз фегьмгери ве э жумеки тербиедорегоргьой школагьоревоз эдембируьт хунде ве вегирде тербией девр советире.

Ёвдо, неки хундебу э нубохунде экин раби, у гьемчуьн те э суьфдеи довгІой гІуьломи рафде, хундебу е-дуй сал э реальни училищеш. Эзуш бэгъэй у биребу э лешгер падшогьети ве э есири э Германия. Унегуьре хунденуьвуьсдеи зугьун урусире дануьсдембу. Гене уш э нубохундей гІэилгьо кумеки нисе сохдембу. У энжэгъ эз учитель, э класс комики хундембу келеи кук ю Шолум, гІэре-гІэре мипуьрси:

— ГІэил чуьтам хунде?

— Зобу нисе хунде, — жугьоб мидо учитель.

Шевеньё гьеле шеш сале небиребугеш, уре эз хундеи ве нуьвуьсдеи хьэз оморембу. Шолум нубогьоре э сохдеки, у миомо мипоисд э ён бирор ю, кем-биш семе хуте бу гуфдире, оммо Шолум мигуфди эзу:

— Чуьни? Хьэж туьре ворди эзинжо, мешет месох, бигьил нубогьой мере хунум...

Чорей Шевеньё нисе бирембу, гирисдени бире, у мивадарафд э у хунейге. Оммо метлеб хундеи — нуьвуьсдеире хуте биреире у нисе шендембу. У мивегирд гозите ве э келе хьэрфгьо денишире, угьоре шекуьл микеши э дефдер. Шохьонгум Ёвдо оморенге, Шевеньё мипуьрси эз бебешу мэгІэной эню хьэрфгьоре. Омбаре вэхдгьо Ёвдош уре пиш сохде, мигуфди:

— Бигьил мере нуьшуьм, мере дуьлтуь нисди...

Оммо кими вэхдгьо у андуьрмиш мисохд э Шевеньё мэгІэной хьэрфгьоре. ГІэре-гІэре Шолумиш, кеф ю хуб

бирембугьо мэхьэл, андуърмиш мисохд э у мэгІэной хьэрфгьоре.

Э гьечиревоз Шевеньё екем хуте биребу десхэтире ве лап домунде-домунде жем-биш гофгьой гозитеш хунде дануьсдембу.

Шевеньё суьфделе э хьофди пой доноребу, кейки хьэлово бисдогьо э бебешу, юре э школа нуь гуфдире. Ёвдо, гьеле-меле э герде невегирде, мигуфди эзу: «Туь гьеле чуьклеи, хэлефме, туьре гьеле нивегируьт э школа».

Ёвдо, денишире виниренге, ки Шевеньё эдее сер-гуш юре берде, огол зере Шолуме, мугу:

— Ги митрик энире, ире бер себэхь э школа ни.

Себэхьимуьн Шолум гьул Шевеньёре гирде, берд э школа. Шори Шевеньёре гьэдер небу. Чорей энү мибисдоге, эз хуне э школа э рафдеки, вежегьисде-вежегьисде мирафд. У э сара балай хуьшдеревоз хуьшдере вешенде-вешенде эдембу рафде рэхьэ.

Шолум Шевеньёре э кабинет директор школа дирувунденге, гуфдиренге метлеб хуьшдере эйчуь овурдиге уре, директор дениши гьевел э Шолум, песде э балай Шевеньё, гьич э метрикиш неденишире, мугу:

— Дедешмуре, хэлефме, э гуфере дие гІэил дери?

Шолум неварасире метлеб гофгьой директоре, жугьоб до:

— Дери.

— Гьечуниге, бура у гІэйллереш биёр, песде гьердуьре эеки мивегирим, хэлефме.

Энжэгь имогьой вараси Шолум мэгІэной пуьрсуьш директоре. У могьбул бире, гьул Шевеньёре гирде, ведиромо эз кабинет.

Эз школа э хуне э рафдеки, Шевеньё зар доно гирисд. Э гІэрсгьой Шевеньё денишире, чумгьой Шолумиш гІэрси бисдоруьт. Угьоре е биней коре недануьсдегоре одоми мивиниге, гьечи мидануьсд угьоре гьерки-бисдош деаори куфде гуфдире.

Пушой э богъчирегъо дарафде бу. Увэхди э богъгъо унгъэде кор нисе бире. Омбаре колхозчигъо корсуыз би ренуът. Ёвдо э гъейву нуьшдебу эдембу чой хурде, кей-ки Шолум не Шевеньё э чумгъой гьердуьшу гӀэрсгъо вери, оморе э пушой гъейву поисдуътгъо.

— Чуьни, ки куфди ишмуре?

— Екиш, — мугу Шолум ве ихдилот сохд эри бебешу чуь гуфдириге э ю директор школа.

Ёвдо, пейлей чой хуьшдере норе, гъул Шевеньёре гирде, рафд э школа. У э школа оморенге, директор э кабинет недебу. Угъо поисдуът э гъейвуй школа э гузет, те директор оморе. Зингиле зенг зеренге, эз классгъо ведироморуът суьфде гӀэилгъо, песде учительгъош.

Эз е класс ведиромо е дуразе балае мерд, э дес ю дефдергъой ученикгъо дери. У, куьнд оморе, руз эхэйр-бу доре Ёвдоре, пуьрси:

— Хэйр гердо туь инжо поисдей?

И мерд бу куьгъне дусд Ёвдо, еки эз суьфдеи учительгъой Дербенд Юханан Пинхасович Пинхасов. Ёвде ихдилот сохде бӕгъдо гъозие-гъэдере, мугу:

— ГӀэил зиреке гӀэили, кем-биш хунде-нуьвуьсдеш дануьсдени, эз гозитгъо хуте бири, сер-гуш мере берди, э школа ни эдей гуфдире.

— Гъери кешит э мерево, — мугу Юханан Пинхасович.

У деберд угъоре э класс, нуьшунд Шевеньёре э парт ве гъишд нуьвуьсде гьерчуь-бисдош.

— Гъери нуьвуьс, чуь дануьсдеге туь нуьвуьсде.

Шевеньё, гӀэйбе-гӀэйб, десгъо лерзире-лерзире э дир-дириревоз эз келе хьэрфгъой гозити нуьвуьсд: «ВАТАН СОВЕТИ».

— Молодец! — мугу Юханан Пинхасович, — Туь бура Ёвдо э кор туь, эри гӀэил книг-дефдер, гъэлем-ручкеюре восдо, себэхь э гьемме герекиревоз фуьрс э школа. Э директоревоз ме гоф мисохум, туь олхонн бош. Имбуруз мунугу экиме, э класс ме михуну...

КНИГ ЕНЕБУГЕ ТУРО

Пушоте гуфдире оморигьоре хуно, Нисим не Ёвдо гьуншигьой еки бируът. Угьо эз у руз э товун «Дуьм гьупии» женг гирде бэгьдо, эеки гофи небируът.

Коргьой гуфдиренигьоре хуно: «Келе-келеи, гІэил-гІэили», келетегьо гьэгьри бу гуфдире эз еки, бега гІэилгьо варасирени биней энугь коргьоре. Бирени ежирейгеш, гІэилгьо гьэгьри биренге эз еки, келетегьо э гуш нисе гирденуът, не гирдеш герек нисе бире, чуьнки гьэгьри бирей гІэили «е дэгьдэгьэини», эзило гьэгьри мибошут, эзилойге, тейте екире дире, гоф сохде, э метегьо чуй гуфдирегори: «хое мисохут». Оммо келетегьо гьэгьри бисдоруьтге эз еки, гьэгьрин энугьо омбар кешире, жими вэхдгьо те келе женггьо расиренуът, тейте э гІэре е хубе дусд — боришмишсохдегор недарав.

Бебегьошу гьэгьри бируьтгеш эз еки, Содугь не Шевеньё эз еки гьэгьри небируът, гьеммише эеки возигьо мисохдуът, э хунегьой екиш дарафде-дироморе мисохдуът.

Нисим Содугьэ норебу эри хунде э нубохунде экин раби. Гьеле умэхьэлигьо кем-биш нубохундеигьо экин раби мундебируът. Оммо Содугь, виниренге хьэрмэхьгьою омбардекиш э школа хунде, хьэлово бисдо э бебешу, юре э школа нуй гуфдире. Содугь — Содугь бисдо, Нисим — Нисим, оммо Содугьэ генеш Нисим э школа не но. Содугь э нубохунде рафдембугеш, дуьл ю э хунде небу. У гьичиш нисе дануьсдембу. Рабире хундеи ве дануьсдеи Содугь герек небу. Эге уре мивоисдге Содугь хуб хуну, у мигуфди э Нисим э товун зобу хундеи Содугь. Уре герек бу пул, жомиреки гьемме мегь омурдембу Содугь. Унегуьре Нисим нисе дануьсдембу зобу хундеи Содугьэ. Бебешу э хуне дебирембугьо мэхьэл Содугь мивено э гьужогь туроре, сере жумунде: «новорих» сохдере хуно, ловгьореш мижумунд, мигуиге эз расдекиш эдее нубогьоре хунде, оммо ю гьичиш нисе

дануьсдембу. У гьемме руз эз нубохунде оморенге, мидарафд экин Шевеньё. Шевеньё э нубогьоре сохдеки Содугъ минуьшд э ён энуге хуте мибисдо хунде-нуьвуьсдеире. Э гьечиревоз эри энуге хундеи эдембу руз-беруз лап ширин бире.

Содугъ, денишире виниренге, жи ю чуйш сохдге, бешу юре э школа нисе норе, чорею небисдо, минет сохде э Шевеньё, мугу:

— Гу э лелей Ёвдо э ме кумеки соху, нуь мере э школа.

И ихдилоте Шевеньё гуфдиребу эри Шолум. Шолум нуьшдебу э ён бешу эдембу ихдилот Содугъэ сохде, Шевеньё, сумке э дес дери эз школе омогьо, э уревоз э хуне диromo Содугъиш. Эз герден Содугъ дуллу бу тогьор «тельмуьди», э гъэриш комики дебу е келе туро. Э пойгьой энуге вебу куьгьне, жундуре пойвокугьо, э тен ю пелуь-пелуье парталгьо. Сер-сенбол Содугъэ диренге, Ёвдо мугу:

— И чуйни, и кук Нисими э и жундуре парталгьоревоз?!

Гьеебо, гоф энуре бурра, Сенем зен ю мугу:

— Угьо гьеймогьой косибуйт.

— Пулгьой энигьоре чуй бири, эз бешу мундигьоре?

— Туь нисе дануьсде беге, э сер чи — чи неомоге, темиз мибугьоре...

Гуфдиренуйт зенгьо женгесуре одомигьоют. Эз е тараф у гоф дузи, эз е тарафиге, вегирде виниримге, е мердиш не е хэгьер-бирориш э гъэвл дуь-еки нисе биренуйт унгъэде, чендгъэде э гъунши еки зигьисденуйтгьо зенгьо биренуйтге. Э негьогъ нисе гуфдиреки э метелегьо: «Эз дуре хэгьер-бирор, куьнде гъунши зиёди» гуфдире. Хэгьер-бирор гьер мерд э хуней хуьшдеи. Мердгьош согъ руз э кор ишунни, себэхь рафденуйт, шохьонгум оmore. Оммо гьеле увэхдигьо шуьверлуье зенгьо э кор нисе рафдембируйт. Мирафдуьтгеш энжэгъ э вэхд

богъчирегъо, чуьнки герек бирембу бегъере эри зу вечире, зенгъош варасирембируът чендгъэде бегъер зу вечире миомо, унгъэде э хунешу гелуър мидировгъоре. Гъечиниге шуьверлуье зенгъо э кор мирафдге, эри мердгъо у келе номуссуьзе кор хъисоб бирембу. Э жолхозгъо ве корхонегъо увэхдигъо энжэгъ жофо микешируът элмунее зенгъо. Энжэгъ тек-тук бирембируът, зенгъо кор сохдембируътгъо. Угъош ужирегъо бируът, хундегоргъо енебуге дуз варасирегоргъо метлеб дегишуьгигъой девр Советире. Унегуьре согъ руз зенгъо бирембируът эеки. Угъо эри глов овурдеш, э базар-гуьзориш эеки мирафдуьт, ихдилот сохде-сохде, дуь эри еки фикир-хэел екире гуфдире-гуфдире. Бирембируът ужире гъуншие зенгъо, эз еки гловиш зиьди нихурдуьт, хурекеш эеки михурдуьт. Э минжи хъэет мидешендуьт полхоло, э сер энусифроре, э иловлей сифро нимдергъоре ве гЭилгъореш нуьшунде, михурдуьт нун пишнейнере.

Эвдо не Нисим эз еки гъэгъри бируьтгеш, зенгъой энугъо Сенем не Мирвори э еки женги не бируьт, оммо эз песигъо угъо лап дусд бисдоруьт эеки, дерд-фикир екиреш эри дуь-еки ихдилот сохдембируьт.

Нисим нисе дануьсдембу эхи сохде дерд богъгъо-хунегъошу эз дес ю вадарафдеире ве у эри хуьшде хуьрди хъисоб сохдембу эри Хуькуьмет Совети э е жерге э фэхълегъо, «косибгъоревоз» жофо кеширеире. Екиге у жофо кешире хуте небиребу, не хундеиюш небу уре, бурав жор десхэтире соху. Суьфдеи салгъо Хуькуьмет Совети оморегубуьо у хурде гешдембу ве имид бу уре, ки гьоргой бисдош тозе хуькуьмет венгесде миьв ве богъгъо-хунегъо гене э ю мирасуь. Песдегъо пулгъо ве суьрхгъой бебешу варасденге, у вараси, ки нисди гуфдире ужире гъувот, комики дануь чарунде девр севетире. У домунд э фикир чуь соху — чуь несоху. Варасирембугеш, уре фэхъле бире нисе воисдембу. Оммо кифлет эдембу эз дес рафде.

— Пери Мирвори е гъоб глорд эри гъэрд сохде ди-
роморему, — мугу Сенем, ихдилот хуышдере варасденге.

— Дори?

— Эри, нидуь?!

— Лап хуб сохдей, э Нисим гуьре сохде герек нисди,
эри энугу глэилгъо тэхсиркор нисди. Чутьтам сохим? Ку-
меки сохде герэки небуге глэилгъо эз дес миравт. Оммо
э уревоз гоф сохде четини, мивэхизуь женг мигируь.

— Женг гирдге, миведирой миёй.

— Гъери винуьм э сернуьш колхоз имуревоз меслэ-
хъэт мисохум...

Себэхьимуьн эз кор оморенге, Ёвдо э хуне недараф-
де, дарафд э лой Нисимигъо.

— Глэмел миёв дироморе, — мугу у эз Мирвори.

— Эри, эйчуь глэмел нисе оmore, диросу глэилгъойтуь
муно, Нисимиш э хуне дери.

Гоф энугъоре шиновусденге, Нисим э гъейву ведиро-
more, мэхьтел бирере хуно, мугу:

— Ёвдо, чуьни, беге эз ме гене зобуне гоф-чи шино-
вусдей?

— Нэгл, нэгл, ме эри энугу коргъо недироморем, мере
э туьревоз де гофигеи, глэмел миёвге...

Э хуне дарафде нуьше бэгъдо, Ёвдо ихдилот сохде
эри Нисим метлеб ю диромореире, мугу:

— Ме э сернуьш колхозевоз гоф сохдем, биёругу эр-
зо дуьгу, мугу, мивиним, гоф мисохим э членгъой прав-
лениеревоз, пезде миним пуьрсуьше э жэглме гуьрд-
лемей колхозчигъо.

Эз э хуьше домундеи Нисим, Ёвдо варасики, уре хъэз
нисе оmore э колхоз дарафден.

— Туьре э хуьше езугъ нисе оmoreге, э глэилгъо
семе езугъ биёвгу, угъо келе биренге э беде рэхь офдо-
реире эз екиш нижуру, туьре тэхсиркор хысоб мисохут...

Э жэглме гуьрдлемей колхозчигъо хуьжетгъо ом-
бар бисдоруьт. Екиш е хубе гоф негуфди, эз зобунигъоре



бэгзэй. Гоф сохдеигьо евош бире бэгдо, сернуыш колхоз, гоф вегирде, мугу:

— Хьовиргьо, иму одомигьой советиним. Иму имбуруз Нисиме э колхоз невегирдимге гІэилгьо эз дес мравт. ГІэилгьо чуй тэхсиркори эри бебегьо сохде коргьо. Эз елойге вегирде виниримге Мигьир бебей Нисимигьо у ишму гуитгьо зиёдие гІошириш небири, миёнее одоми бири. Ме э жогьилигьо э богъгьой энун кор сохдем, у э фэхьле гуж несохди. Дузи, богъгьо-хунегьоре эз дес ишу вегирденге, Нисим не бебешу екем шулухигьо сохдет, уш э гофгьой эн е парагьо гуьре. Оммо изму иму эдее диреним Нисим варасири у дуз небу гуфдире ве дануьсдени чуй хуби ве чуй зобуниге...

Эз гуьрдлеме оморенге, Ёвдо мугу эз Сенем:

— Дара эз гьомбор е гирфинке шороб дировун, Мирвориреш огол зе екем хурим эз шори эни кор. Э сес энугьо эз доғуни хуне ведироморуьт Содугъ не Шевеньё.

— Туь чуй сохде инжо? — мугу Нисим эз Содугъ.

— Эдей нубогьо хунде, — мугу Ёвдо, — э Шевеньё-ревоз.

— Беге Шевеньёш э нубохунде рафдени?

— НэгІ, э школе.

— Содугъ экин раби хундеки...

— Содугъ, гьери биёр е-дуй гоф хун эзу туройтуь, — мугу Ёвдо.

— Ме туро хунде нисе дануьсденуьм, лелей Ёвдо, — мугу Содугъ, терсе-терс э лой бебешу денишире, — воисдениге книг хунум.

— Дие ме рабире пул эйчуй доренуьм эзи хьол-рузме бурра, — мугу Нисим екем хьуьршлемиш бире.

— Рабире пул кеми гуфдире, — мугу Ёвдо. — Э гІэил гоф месох. Туьре вою гуфдире, гьеймогьой девр гІэиле э нубохунде норей? Руз-беруз экин раби эри нубохунде рафдегоре гІэилгьо эдете кем биренуьт. ГІэиле э школе норе гереки.

ГЮВЧИГЬО

Гье эз суьфдеи рузгьоревоз, кейки Нисим сер гирдебу э колхоз эри кор сохде, у вараси ки ю келе егІэлмиш бири гуфдире, теимогьоиш э колхоз эри недиромореи. У эдембу дире э чум хуьшдеревоз, чутьам колхозчигьо эз дуьли жофо кеширембируьтге, деде гІэиле доругьоре хуно дошдембируьт угьо тегьенгьоре. Тегьенге дошде, онгур веровундеи, гьелбет, асанте кор нисди.

Гье эз поизи сер гирде оморе гьовхо бердеи эри бегьер эн биёвгьо сал. Эн суьфде сер гирде оморени эз богьгьоре гІов дорени, песте тегьенгьоре бурраи, тегьенгьечиреи, бил зерей ведиеш. Ижире тегьер гьуллугь сохдеиш гене дур нисе сохдембу эз тегьенгьо гІэзоргьоре. Увэхдигьо дермугьой химиен эз капарус не гугурт бэгъэй гьеле гьичиш небируьт. Унегуьре суьфдеи гІэзоргьой тегьенгьо сер мигирдуьт э тегьенгьо зарали зерейре гьеле эз сер васал, пушой чьюмегьо лов бире эз хори куьрмгьо миварафдуьт э льюгьей тегьенгье михурдуьт чьюмегьоре. У тегьенгьо э комигьоки куьрмгьо варафдембируьт, эзугьо е гуьле онгуриш вегирде нисе бирембу.

Колхозчигьо кутукгьой тегьенгьоре михорусдуьт э тихъэе кордегьоревоз ве мизеруьт клей, э клей вогосире куьрмгьо зеверо неваравт гуфдире. Клей кумеки мисохд те хуьшг бире. Клей хуьшг бире бэгъдо куьрмгьо гене сер мигирдуьт эри варафде зеверо ве хурде чьюмегьоре. Увэхди колхозчигьо сер мигирдуьт эри э десевоз вечире куьрмгьоре эз чьюмегьо. И кор гурунде кор нисди, оммо лап четине кори. Э и кор фикир дорегор миварасуь ченд десгьо ве ченд чумгьо герекиге эри фегьм сохде гьер чьюмере ве вечире куьрмгьоре э партал духденигьо дерзегьоревоз.

Неденишире э четинигьо, колхозчигьо мивеноруьт гьемме хъэрекетишуре эри гьовхо берде э гъэршуй гІэзоргьой тегьенгьо. Эри куьрмь вечире угьо мибердуьт

э богъгъо, неки зенгъоре, гъемчуьн гІэйлгъореш. У салгъо, кейки э тегъенгъо куьрм омбар дебирембу, правлениегъой колхозгъо руй бирембируьт экин герекие идорегъой хуьркуьмети, гІэйлгъой школеире фуьрсуьт гуфдире э кумеки эри куьрмгъоре вечире. Учителгъо, гІэйлгъоре э десде поюнде, миберд э богъгъой колхозгъо эри кумеки сохде. Колхозчигъо чуь хъэрекетигъош мисохдуьт эри зиьд сохде бегъер онгуре. Ижире жофогъо, гъелбет, омурдембируьт буле софогъоре. Э негъогъ небуки, гъеле дегъ салиш небу колхоз Ёвдойгъо бине норе оmore, колхоз — миллионер биреbugъо.

Нисим диренге э чуьжире хъэрекетиревоz жофо кеширенуьтге колхозчигъо, уре гІэйб оmoreмбу эри ю пушоте сохдебугъо коргъо. Кими вэхдгъо у, эз гІэйб, э сифет колхозчигъо денишире нисе дануьсдембу. Эзуш бэгъэй у желе пешмуни кеширембу эри гъе эз суьфдеи салгъоревоз э колхоз недиромореи. У хъэрекет сохдембу эри хуб кор сохде ве бирмунде дуьлтемизи хуьшдере. Колхозчигъо варасирембируьт, ки Нисим хуьшдере кеширени гуфдире ве унегуьре хъэрекет мисохдуьт эри дорихмиши недоре уре ве хъисоб сохдембируьт чуьн куьнде хъэрмэхъ ишу. Ижире тегъер юре гъобул сохдире дире, у мивено гъемме хъэрекету хуьшдере э кор.

Е салиш небу э колхоз кор сохде, у бисдо еки эз жорборде ударникгъой колхоз. Хъэрекету энуре дире, правлений колхоз но уре эсер гІовгъо. У неки миьсд денишире э кор гІовчигъо, хуб гІов дуьт гуфдире богъгъоре, гъемчуьн миьсд денишире э вэхд ю гІов хъэрзо доре биёв гуфдире.

Рузгъой поиз бу. Нисимигъо эдембируьт богъгъоре гІов доре. Е руз гъе эз хуьшде гІов бурри. Нисим вагафд э берей гІов. У мивинуь киниге берей богъгъоре селт сэхд сохди. У, берере вокурде, вогошд. Себэхьимуьн мивинуь гене гІов бурри. Гъечи гирошд се руз, у мивокурд гІове, киниге сэхд мисохд. У э и кор мэхътел мунде, ихдилот сохд и коре эри агроном колхоз.

Агроном колхоз эшкенеzi бу, Арон Гринзайд. Уре пушой академией хориггуллугъсохире варасде, эри бэхш вегирдеи э революционни кружокго эз Петербург фуьрсоребируьт э ссылка э Кавказ. У гьисмет биребу э Дербенд. Э Дербенд у зу хуте бисдо тегьергой зиндегуни татгьоре ве жофо кешире э богъгой гюширгьо, бисдо еки эз хубе богъдорго. Э у гьемчуьн кумеки сохдембируьт э академие хунде нубогго, чуьки до уре минкини эри бире дананде богъдор. Увэхди гьеле агрономго небируьт. Унегуьре Ароне, чуьн дананде богъдоре, бэхшвегир коргой революциеире ве еки эз биненорегоргой колхозе правлений колхоз норебу агроном. Эзуш бэгъэй у бу жигегир сернуьш колхоз. Арон Гринзайд э гъэриш ченд салго э глэрей татго зигьисдеи, неки хуте биребу глэдотго ве хосиетгой энугьоре, гьемчуьн дануьсдембу зугьун татиреш. Энжэгъ кими гофгьоре екем дуз нигуфди, ширин зугьун мигуфди. Меселен, эжигей ченэх, мигуфди чонох, эжигей глэребе — араба. Оммо омбардеки гофгьоре лап темиз дануьсдембу. Арон Гринзайд, хэйли фикир сохде бэгдо, мугу:

— Хуби Нисим, себэхь мирайм гьердуьйму...

Себэхьимуьн, торики-товуши, Нисим не агроном э глэсбго венуьшде офдоруьт э рэхь. Угго оморе э ён берей глов расиренге, мивинуьт еки э кул глэсб вери эз ён бере эдее фураморе. Нисим шинохд у мерде. У бу гловчи колхоз, богъгой комики бируьт э гьунши богъгой колхоз Нисимигго. Нисим, руй бире экин эну, мугу:

— Гьунши, тьни глов имуре и рузго сэхд сохденигго?!

— Гьелбет менуьм, — мугу гьунши э гьуччиетиревоз.

— Эйчуь эхи?

— Ебо иму глов дим варасим, песде ишму глов мидит.

— Нэгл, — мугу Нисим, — э гьечуревоз кор нибу, бэхш сохим глове, ние э лошму буравгу, ние э лойму, ишмуш глов дит евош-евош, имуш.

— Туь эз кеевоз сэхьиб колхоз бирей, — мугу гловчи энү колхоз э хуьршевоз, — куьгьне кулак?

И гофгьо э Нисим лап гурунд кори сохд. У гъэгьр вечире, уре воисд эз кул глэсб фурав ве е-дуь синле венуь эзу. У пое эз зенгу ведешенуь гуфдире, эз лерз жендек ю, пою чемуьсде, офдо эз кул глэсб э гъэд малад, руй зверо. Гъеебо эз сер энү сэглэт рафде, ранг ю бисдо зим-зерд. Гловчи энү колхозиге не Арон оморуйт э ён Нисим мивинуьт у меите хуно дегешди э гъэд малад. Арон э сер Нисим гъуз бире мугу:

— Э Насим, мурди, имогьой мере гловчи эзже миёв. Мурди Насим...

Гъунши рафд эз ерх э дуь пенжеиревоз глов овурде, декирд э сифот Нисим.

— Видов, глов биёр, — мугу у эз Арон, — мурди, мурди, ире гьеле дерд мерд негирди, дерд гловчи гирди...

Нисиме э хуьшде дирувунде, гъунши эз гъул ю гирде, э пой вэхизунде, мугу:

— Бэхшлемиш сох, нэхэбереки вадарафд эз лэглэйме...

Угьо глове э дуь бэхш сохде вогошдуьт. Эз у рузевоз э сер Арон лэггэм варафде, колхозчигьо эзу э зарифетевоз мигуфдируьт: «Э Насим мурди, мере гловчи эзже миёв». Ароне эзу зарифетгьо гъэгьр нисе оморембу, уре юреш хэнде гирдембу э гофгьою.

Э ГЪЭНОВГЬО

Эз расдекиш ихдилот глов дореи боггьоре четине ихдилот бу. Боггьой колхозгьо сал-бесал эдембируьт зиёд бире, оммо эз куьгьне ерхгьой глоширгьо оморембугьо глов лап кем бу, вес нисе сохдембу. И кор кеме четини нисе овурдембу эри гловчигьой колхозгьо, э глэрей энугьо омбаре хуьжетгьо бирембируьт э товун глов. Кими вэхдгьо Нисим, неки рузгьо, шевгьош э хуне нисе оморембу.

Е руз шохьонгум Нисим, вомунде эдембу эз богъ э хуне вогошде, агроном колхоз, э кул гӀэсб вери, омо раси э у. У эз кул гӀэсб фураморе, дес Нисиме гирде, мугу:

— Шохьонгум эхэйрбу, Нисим, чуй хэбери, чуйтами коргьо?

— Четини коргьо, бирор, гӀов лап кеми, эдете екире хурденуьт гӀовчигьой колхозгьо. Текей мибу гьечи?

— Нисе дануьсденуьм чуй биё сохде биёвге, чуй чореиге эри эни кор?..

— Ме дануьсденуьм чуй сохде герекиге, — мугу Нисим, — оммо терсиренуьм, мере дуз ниварасуьт...

— Чуй сохде гереки гу дие, э ме гу, меки туьре дуз миварасуьм...

— Эри эни кор энжэгъ е чореи, эз Самур те Дербенд тозе гъэнов векенде гереки, небуге еклей-дуьи гьеммише мибу...

— Гьуй, у келе кори, омбаре зэхьмет гереки эри эну. Унгъэде гьувот эзже омори имуре?

— Гьувот нисди, меш дануьсденуьм, гуфдиреш эзу гуфдиренуьм ме, ки мере дуз ниварасуьт гуфдире. Оммо уреш гуьм и лап герекие кори. Эз Самур гӀов овурде омоге, шегьереш гӀов мибу. Экин колхозчигьой шегьеруй бисдоримге, е гъэмминон гьемме колхозчигьой шегьер кор сохдуьтге, бегьем мибу мирав.

— Гьери виним, — мугу Арон, — норе гереки и меслэхьэтире э пушой горисполком...

Герме рузгьой гьеминон бу. И рузгьо э боггьо кор кем бирембу. Омбардеки колхозчигьой корсуьз бирембируьт. Угьо кура мибисдоруьт э хьэьтгьо, э зир тутдоргьо мидешендуьт полхолгьо, нимдергьо, минуьшдуьт э чой хурде, ихдилотгьо сохде, дуь эй еки овосунегьо хунде...

Е руз пишнеи Ёвдо не Нисим нуьшдебируьт э хьэьт Ёвдойгьо э зир тутдор, эдембируьт чой хурде. Е жогьиле колхозчи, э хьэьт дироморе, мугу:

— Э лелей Нисим не лелей Ёвдо, ишмуре э хьэьт контор колхоз оголи.

— Хэйр гердо, чуьни? — мугу Ёвдо.

— Нисе дануьсденуьм, гьемме кура бирет, «гъэнов-гъэнов» эдете гуфдиренуьт.

Угьо э хьэёт контор диromоренге, мивинуьт хьэёт одоми пури. Сернуьш колхоз э гьейвуй контор поисде, эдембу гуфдире, чуьтам богъгьо гловсуьз эз дес рафденуьтге, чуь хуьжетгьо эри глов колхозгьоре биренуьтге ве екиге эри хурдей могьлугъиш э шегьер глов кем гьисдиаре, чуьтам зенгьо межбур биренуьтге э совугьоревоз эри глов овурде эз билогъгьой «Микри» ве «Шихсэлэхь». Пушой гоф хуьшдере варасде, у мугу:

— Хьовиргьо, лап мэгIэнолуье ве герекие кори эз Самур э Дербенд глов овурдеи. Колхозчигьой Дербенд биё венуьт гьемме гьувот ве хьэрекетишуре, чендгъэде эз дес ишу верома зу векенуьт гъэнове эз Самур те Дербенд!!!

«Зу векенуьт!» Асанти эри гуфдире. Уш увэхди, кейки не эксковатор, не гъэнов векеденегьё мошингьо гьеле небируьт. Э куьндигьой дигь Магьарамкент, Ерэгь Гъэзмелер гуфдиренигьё е чуькле дигьи. Есер эз ён энусер гирде дуз те Дербенд миёсд гъэнов векеде оморе.

Себэхьимуьн себэхьмунде эз зу-сери колхозчигьой Дербенд, хьэлов-болушгьошуре, бил-лапаткешуре э гIэребегьё веноре, офдоруьт э рэхь. И кор асанте кор небу. Колхозчигьё уре дануьсдембируьт. Оммо угьо шори сохдембируьт, чуьнки дануьсдембируьт, ки и кор гьемешуре герекие кори гуфдире. Унегуьре угьо, мигуиге эри кор сохде нэгI, эри мигIид гирде эдембируьт рафде э гъэновгьо. Музикгьо эже, зерегорчигьё эже, ижире шор бу жэгIмет Дербенд у руз. Бейдогъгьё э десгьошугирде, вадарафдуьт колхозчигьё эз шегьер.

Э чум хуьшдеревоз невинуьгьё одоми, гьелбет, нидануь э чуьжире хьэвеслуьиревоз жофо кеширембируьтге колхозчигьой шегьер Дербенд у рузгьё э гъэновгьо. Э билгьо, лапаткегьё, ломгьо, дуьсеригьоревоз векеде омуруьт ченд ве ченд гьозор тоннгьой хок, комики э не-

силкегъоревоз веберде омо зверо э гъирогъ гъэнов. Дуй мегиш некеша, гъэнов векеде омо.

У руз, кейки гъемме корго варадебируйт, хэлгъ эдебу кура буре э ён чой Самур, эже миёсд хьэрзо доре оmore глов э гъэнов. Ёвдо не Нисимиш ихдилот сохде-сохде, эдембируйт рафде унжо. Гъебо кибуге эз лой кемер э десгъоревоз чумгой Нисиме сэхд сохде, мугу:

— Э Насим мурди, мере имогъой гловчи эже миёв!

Насим эз сес шинохд Севире, гловчи эн гъунши колхоз ишу бугъо колхозе. Чуйн куьгъне дусдгъо вохурде угъо эеки, екире гъл гирдуйт. Севи э зарифетевоз куьгъне хуьжете э ёр овурдебугеш, у бу эз шори, чуйнки угъо дануьсдембируйт, ки дие э глэрей колхозгъо у хуьжетгъо нибу гуфдире, имбуруз сер мигируь эри рафде омбаре глов чой Самур эз тозе гъэнов, комики векеде омори э гъувот гъл одомигъоревоз.

Угъо гъеле эз Самур куьнд небиребируйт, мивинуйт унгъэде одоми унжо гъисди, эз гъэнов эри куьнд рафде жиге нисди. Суьфделе угъо гъэриш биребируйт э жэглмет, кимигъо гъеле оmore не расиребируйт, хэлгъ гъеле десде-десде эдебу куьнд буре эз жэглмет, кейки э сес музыка гъэриш буре, ведиромогъо келе сес:

— Ура! Ура! Ура!!!

У сесе гъово вегирде гъемме э лов гъэнов поисде колхозчигъо, вешендуйт э келлей догъгъо.

У бу сес шори келе бесгъуни азаде жофо!

МИГИД

Дуьлшор бугъо одомире, дуьлпесо бугъо одомире хуно, гъелемеле хов нисе оmore. У шев Ёвдо зуте дегешдебу эри хисире. Уре воисдембу зу хисуь, себэхь зуте эри вэхашде, э контор колхоз э вэхд ю бурав гуфдире эри э мигид рафде. Оммо уре хов неомо, чуьш омо э ёр эну имишев.

Гирошде рузгьо, э довгю рафдеи, э есири офдореи э хоригьой Австрия ве э унжо гьисди э хьовир жовони хуьшдеревоз, мэгІлұымлұье революционер, изму Секретарь Верховни Совет Догъисту гьисдигьо Ехьиил Мата-товевоз вохурдеи ве ченди-ченди гирошде рузгьо ве гьознегьо.

«Миёв бу себэхь э мигІид иму Ехьиил», — мугу э дуьл хуьшде Ёвдо. Имисал эри колхоз Ёвдойгьо севойне мигІид бу: себэхь дуз дегь сали эз колхоз энугьо бине норе оморе эйло, дуьимуьн мигІид ве келе шори у бу, ки имисал колхоз энугьо е миллион монет зиёдте гелуьр вегирди эз богъгьо, сеимуьн мигІид уни — колхоз энугьо, чуьн колхоз — миллионер биё бэхш вегируь э Гьем-месоюзиe выставкей хоригьуллугьсохи э Масков.

Эзуш бэгъэй шори Ёвдо эзу товуне бу, ки изму у миьтожи чуьниге нисе дануьсдембу. Изму Шолумиш кук эну кумек бебен. У гьем хундени, гьемиге гьеминон э вэхд каникулгьо э колхоз кор сохде. Комсомолгьой колхоз э Шолум ихьдибор сохде, хуьурмет гирде уре, вихдет рэхьбер ишу. Коргьой гуюгьоре хуно: «Богъ Ёвдош оводуни, богъчейюш...» Ёвдо э дуьл хуьшде эдембу фикир сохде: «Эз е-дуь салиге бэгъдо Шолумиш мирав э солдати, дуь сал гьуллугь мисоху, гъэрд хуьшдере доре мивогошду, песде эри эну зениш михогьум, э хунеймуш гІэруьс мидиров...»

Песде у хьэрекет сохд эри чуме э хов веберде, оммо чум эну э хов нерафд. Гене э ёр эну омо Ехьиил бироргилию. «Хьохмолуье куки Ехьиил, — мугу Ёвдо э дуьл хуьшде, — гьеле жогьил гьисдиш э эгьуьлмендиревоз гоф сохдембу, биней гьемме коргьоре дануьсдембу. Хьовир-хьэрмэхь е четине кор бире сэгІэт, экин Ехьиил мирафд эри меслэхьэти вегирде».

Кеме салгьо нерафди эзумогьоевоз. Ёвдо эз есири оморегубгьо сал дие Ехьиил э Дербенд небу, у бири э ченд шегьергьош, имогьой э Махачкала кор сохденигеш, э Дербенд оморе-рафде сохдени. Оммо егилеш гьечу

гъисмет небири Ёвдо винуь гуфдире. «Себэхъ миомоге, лап хуб мибисдо, у хэйли шори мисоху...»

Суьфделе чум Ёвдо э хов варафдебу, хурузгьой хьэёт гIуьгIуь зере, уре хэбер сохдуьтгьо. Хосиет Ёвдо бу, э сес себэхъмундеине хурузгьо хэбер биренге, дие у ни-хиси, кеиш мидегешдге. Ёвдо вэхуьшд чой вено э пилетей сиро, пезде дарафд э хуне, серчире эй вегирде, руш хуьшдере чире, мивинуь Шевеньё, кук ю, э зири парталгьоревоз поисди э миглей хуне, эдей э е десевоз песоь сере совусде, э е десигеревоз шуьгъэме.

— Чуьни, эйчуь вэхуьшдей?

Шевеньё дануьсдембу имбуруз э куьнде богъгьой колхоз мигIид дегъ сали колхозе бине нореи биренигьоре. Уш эз шори шову бегъем нэхисиребу: гье хисири, гье хэбер бири, винири бебешу гьеле не вэхуьшдеире, гене дегешди э жигей хуьшде...

— Ме... мереш... бер... дие...

— Бошгу, гьеле хис, гьеле зуни, ме туьре хэбер мисохум.

Ёвдойгьо гьеле э сер суьфре эри чой себэхъмундеире хурде нуьшдебируьт, Содугъ диromогьо э хуней энугьо.

— Э лелей Ёвдо, — мугу у, — бебе э ишму денишири...

— Туь руз Екимуьн Мае хуно геймиш бирейки? — Мугу Ёвдо эз Содугъ.

Сере тик гирде, Содугъ э келегедиревоз жугьоб до:

— Мереш эдей берде бебейму э хуьшдеревоз.

Шевеньё пейлей чой хуьшдере норе, минет сохдере хуно, дениши э сифет бебешу.

— Хуби, хуби, чой туьре ху, партал туьре воку.

Эз Дербенд э илчи э тараф Боку рафденигьо вада-рафденге, суьфде э одоми вохурдени э тараф расд гьисдигьо эзи е ченд сал пушо вокурде омorigьо фабрик холибофи. Эз фабрик екем дурте рафденге э тараф чеп поисди есиёв «Соруханов» гуфдиренигьо. Сэхьиб эни есиёв те революцие бире бири еки эз Гоширгьой Дер-

бeнд — Соруханов. Э диворгъой энy есиёв дениширитге, гIэзизе хундегоргъо, ишму е доне согъ-хэтосуыз мунде сенгъ нивинит. Э гьер сенгъ диворгъой есиёв е чeнд ярай гунилен вери. Гунилегъо расире э сенгъгъо, тилиш ишуре гъэлпе бердет. Э у сенгъгъо веруытгъо гунилегъо гъисдуыт лoле шогъодгъой гирошде гъовхогъо. Энжэгъ эз 1917-муын сал сер гирде те Хьюккуьмет Советире бине норе е чeнд жире гъушунгъой дуьшменгъо оморет э сер гъэдимие шегьер Дербeнд. Аллагьерди, тюркгъо, англичангъо, Деникин, Бечирахов... Гьер оmore гъушун дуьшме суьфдеи гунилегъоре, э сер шегьер шендетгъоре, зeрет эзи есиёв ве энжэгъ борж берде бэгъдо э гъэд есиёв э гъэлхэнди поисде десдере, дарафди дуьшме э шегьер. Гуфдиренуыт, Аллагьерди се мегъ гъовхо берди э гъэршуй э есиёв дебиретгъо игиде кукгъой шегьер, оmmo гeне э шегьер дарафде недануьсди. Энжэгъ гIоширгъо ве рабигъой шегьер э жансуьзи ве хогъиниревоз э ю кумеки сохденге, дануьсди вегирде Аллагьерди шегьерe.

Эге у яралуье сенгъгъой есиёве зугъун мивебисдоге, угъо ихдилот мисохдуыт, неки э товун гирошде довгIогъо, гъемчуын э товун омбаре коргъойгеш. Угъо гъемчуын гъисдуыт лoле шогъодгъой эн ижире коргъош. Себэхь-мунде торики-товуши богъдоргъой Дербeнд, е кесег хуьшге ловоше э чейтен доноге, чейтене э душ дуллу сохде, эз ён эни есиёв гирошде, рафдет э богъгъой гIоширгъо эри кор сохде ве энжэгъ шохъонгум торики гъе эз у рэхъ хэсде-менде э тие чейтеневоз вогошдет э хуне. Омбаргъоре э хуне эри вогошде дуьлиш нисе бирембу, чуьнки кифлет гисне бу, угъо хуьшдере гIэйблуть хъисоб сохдембируыт эри кифлет э михътожи дерии.

Гъе эзу илчи, гъе эз ён энy есиёв э фейтунгъо нуьшде, э духдергъо-гIэруьсгъоревоз рафдет эри кеф сохде э богъгъо гIоширгъой Дербeнд ве шохъонгум вогошдет э пура бедрегъой емишгъо ве хуб-хубе кегъробое онгургъоревоз. Гъе эзу илчи пура гIэребегъой эз жофокеше богъдоргъо веровунде оmore буле бегьергъо жарунде

оморе ширере гІоширгъо бердет ве декирдет э гъомборгъошу.

Оммо имбуруз яралуе сенгъгой есиёв бисдоруыт шогъодгъой шоре кор, угъо винируыт, чуытам автомашингъой колхоз, гІэре недоре, берденуытге колхозчигъоре э мигІид дегъ сали колхоз.

Гъе эз ён есиёв сер гирде э гъердуы тараф илчи бируыт онгурбогъгъо, комигъоки изму бируыт богъгъой колхозгъо. Эз есиёв е-дуы верс э тараф Боку рафде бэгъдо, бируыт куынде богъгъой колхоз Ёвдойгъо. Эз гъопуы сенгъи дарафденге, екем эз хиёвон руе дерьёгъ рафденге, сер гирдембу дереи, э дереи вокурде оморебу хъэвуыз, э иловлей комики вебируыт жуыр-бежуыре гуылгъо-гъуызуылгуылгъо. Э минжи хъэвуыз норе оморебу эз мармардаш гъуыч сохде бюст буызуырге сервор жофокешгъой гІуылом В. И. Ленин. И хъэвуызе колхозчигъо вокурде бируыт чуын нишоней тозе гуылишонлуе зиндегуни. Екем дурте эз хъэвуыз бу мейдузи. Э и мейдузи э вэхд богъчирегъо норе оморембируыт гъэтгъэгъо, новгъо, пирис, тирозу ве де карасдигъойгей кори, комигъоки герек биренуыт э вэхд богъчирегъо.

Имбуруз э мейдузи зере оморебируыт эз тозе тэхдегъо сохде оморе столгъо ве скамейкагъо, эри гІэруыси норенигъоре хуно. Зенгъой колхози, сипре хэлетгъо вокурде, эдембируыт сер столгъоре вараюнде. Екем дурте э келе гъэжгъуыгъо эдембу дуышире егъни нэхуыт дери ве дем кешире гІош дунеи. Э минжи мейдузи кура биребируыт жогъиле кукъго-духдергъой колхози ве зерегорчигъо. Угъо эдембируыт зере рач-раче вежегъисденигъо гъовогъо, хунде мугъумлуе мэгІнигъо. ГІэре недоре, мида рафдуыт э минжи эри вежегъисде жуыфд э песой жуыфд. Шори жовонгъоре гъэдер небу. Белки угъо э е гІэруысиш гъечи дуылшор небирет, имбуруз бируытгъоре хуно.

Гъе э и вэхд э илчи э ён гъопуы богъи колхоз поисдебируыт е десде колхозчигъо. Угъо бируыт келете одомигъо, членгъой правление, бригадиргъо, звеноводгъо...

Э гIэрей энугьо дебируйт Нисим не Ёвдош. Угьо дениширебируйт э гъуногъгьо, жомигьоки миёсдуйт оморе эз зверте идорегьой шегьер ве республике э и гуьзетлуье мигид колхоз. Гьемин гье э инжо э ён бебегьошу поисдебируйт Шевеньё не Содугъиш. Угьореш воисдембу винуйт оморегоре гъуногъгьоре.

Эз чуйкле ковре мошин ведироморуйт чор одоми. Эз чор одоми Шевеньё энжэгъ екире шинохдембу, у бу сернуьш колхоз, лелей Ишей, э дес комики э нуьшдеки, э гешдекиш гьеммише гъэйле дебу. Гъуногъгьо гирдуйт десгьой инжо поисдебируйтгьо жолхозчигьоре. Е мерд эз чор гъуногъгьо, чуйкле бигълегьо, раче обурлуье сифет ве фирегье пушони вебугьо, эн гьемме колхозчигьоре десгьошуре гирд, оммо Ёвдоре гъэл гирд, моч сохд, песде, эз гъэл хуьшде ведешенде уре, екем дурте гирде эз хуьшде, эз сер те пой томоше сохде, гене дубьореш гъэл гирд...

«Кини бу и мерд, — мугу Шевеньё э дуьл хуьшде, тигъэтевоз денишире э бебешуш, э у мердиш, — ме и мерде эжеиге дирем...» Гьеммееки эз гъопу гиросше, дарафдуьт э богъ. Шевеньё, эз бебешу дур немунде, эдембу рафде э угьоревоз ве фикир сохде, эже дириге ю и мерде. Бебей энугьо не у мерд, гъуле-гъул доноре, ихдилот сохде-сохде, евош-евош эдембируйт рафде. Бебешу чуй гуфдирембуге Шевеньё нисе шиновусдембу. Оммо кими гофгьой эни мерд э гуш Шевеньё дарафдембу. У э зенглуье, раче тек-тек шиновусде биренигьо сесевозз мигуфди:

— Лап хуб, омбар хуби, ме омбар шор бисдорум...

Шевеньё екем пой вечире, пушо рафде, гене дениши э сифот мерд. «Гъо, — мугу э дуьл хуьшде, — э ёрме омо, и Ехьиил Мататови, ме сирот энуре дирем э гозит. Эзуш бэгъэй сирот энугу вебу э верэгъ, вогосунде оморобугьо э дивор школейму, вихденгьо гиросшедебугьо вэхд».

Энжэгъ ивэхди вараси Шевеньё Ехьиил, екиреш гъэл негирде, бебешуре эричуь гъэл гирдебуге, чуйнки Ёвдо

омбаре ихдилотгъо сохдембу э кифлет э товун Ехьиил ве игиде коргъой энугу.

Мигиде вокурде, сернуыш колхоз суьфде гоф до Ехьииле. Инжо митинг небу, не гуьрдлемей колхозиш небу. Гьемме нушдебируьт э иловлей вараюнде столгъо. Э сер столгъо вебируьт хурекгъо, емишгъо, ширинигъо, пура чорекегъой шороб... Унегуьре инжо докладгъо ве омбаре гоф сохдеигъо небу. Ехьиил, омборекбу сохде колхозчигъоре э шоре гъуьзетлуье мигидевоз, мугу:

— Гъезизе бироргъо-хэгъергъо! Ини у шоре гуьлишонлуье зиндегуни, эри комики ченд салгъой гъуьлом гъовхо бердет жофокешгъой Ватан иму, эри комики жун хуьшдере норет омбаре игиде кукгъой жофо. Ме имбуруз шинох бирем э омбаре коргъой колхоз ишмуревоз. Зиндегунишму ве жоборде жофошму ебойгеш эдее гуьфдире, чуй мисохуге, чуйжире гъинорменди мидануй бирмундеге эз зир муьрс ве зулмоти хилос бире жофокеше хэлгъ... Колхоз ишму гъисди еки эз суьфдеи бэхшвегиргъой Гьеммесоюзиэ выставкей хоригъуллугъсохи. Ме омбар шорум, кукгъо-духдергъой Гъезизе хэлгъме, эз жоборде софолуье жофогъошму, эз ижире буьлуьнде барасигъой зиндегунишму...

Шевеньё, лэгъэре вокурде, тиж денишире, эдембу э тигъэтевоз гуш дошде гьер Ехьиил гуьфдире гофе. Нэгъ, нэгъ не и гофгъоре, не и гуьзеле хьохмолуье чигърете у гъич дие фурмуш нисоху...

Гьеммеики, сессуьз нушде, эдембируьт гуш дошде Ехьииле, гофгъой энуре, комигъоки широре хуно сес сохдембируьт ве ведироморембируьт эз лугъонди дуьл энугу.

— Изму имидлуьним, ки нисди гуьфдире э гъуьлом ужире гъувот, комики дануй мешет бире э азаде зиндегуни хэлгъгъой Гъезизе Ватан социалистиму...

Ехьиил эдембу тоф сохде э колхозчигъоревоз, оммо очугъэ палаше чумгъой энугу э тигъэтевоз дениширебируьт пушово э тараф горизонт, гуйге э пушой чумгъой

хуьшде эдембу дире диеш хубте, диеш ворлуьте зиндегини эни одомигьоре.

— Эзимбэгьдойге биёвгьо зиндегуни, гІэзизе хьовиргьо, мибу диеш шоре-хуьроме зиндегуни. Азаде жофо доре буле софой хуьшдере, миёру эри кукгьой жофо диеш хушбэхде рузгьой зиндегунире...

Э РЭХЬ МАСКОВ

Поезд Боку — Масков эдембу э жуьргІэтиревоз рафде э тараф Масков. Э купей вагон нуьшдебируьт Ёвдо не Нисим. Угьо эз пенжерей вагон эдембируьт денишире э боггьо, бисдугьо, вишегьо, комигьоки, гІэре недоре, гиросдембируьт эз пушой вагон.

— Ки мигуфди, — мугу Нисим, рушгьой хуьшдере тимор сохде-сохде, — миёв гуфдире девр Совети, мизигьим гуфдире э шори ве хуьромиревоз, михьтожи неда нуьсде, гуьнжунде миёв гуфдире колхозгьо, мивегирим гуфдире эз боггьо буле бегьергьо ве ме не туьни, десхэтиш недане одомигьо, э колхоз мибошим гуфдире дананменде боггьодоргьо, жофой иму гьечи гІуьзетлуь бире, иму чуьн ударникгьо мирайм гуфдире э Масков э выставкей хоригьуьллугьсохи? Хубе хуькуьмети, э жун «худо»! «Худо» кумек гердо эри эни хуькуьмет! Дес дуьшме меёво э сер ю.

Эри, эз расдекиш Нисим лап шор бу изму. Суьфдегьо келе пешмуни кеширембугьо Нисим, э дуьл хуьшде эхи сохде нисе дануьсдембугьо боггьо ве хуней бебешу эз десю вадарафдеире, изму дие гьич у Нисимиш немундебу. Эже рафдуьт у гьэгьерегуьнигьой эну. Гьони у диеш пешмуни кеширембу э товун эну жор эри эз сер бошденевоз, э гофгьой рабигьо ве е паре одомигьо бовор сохде, ю э десдин хуьшдерезов боггьоре э колхоз доре, юш э колхоз недарафдеи. У изму эдембу дире э чумгьой хуьшдерезов, чуьниге азаде жофо кеширеи, чуьниге

тенихдиёрлуыи одомигъо, комигъоки очмиш сохденуът данани хуышдере, овурденуът буле софоре, дусди ве бирорире эри одомигъо. Э ёр Нисим омо е ихдилот, е гъозие-гъэдер, комики оморёбу э сер энэ эзи е ченд сал пушо.

— Ёвдо бирор, гуш вени эритуь е ихдилот сохум.

— Сох дие, — мугу Ёвдо, — рэхъ э ихдилотевоз кутэхъ бире, бирор.

— Ё руз, э у косибе салгъойме, ме корсуьз бируьмгъо вэхдгъо, эдембируьм э куче тешде, сергъуз фикирлуь. Омо э ме вохурд кук эн е куьгъне гЮшир. У, э душе десе веноре, мугу: «Чуьни, Нисим, фикирлуь бирей, омбар фикир мекеш, миёв вэхд имуш, э кучеймуш мигИд мибу, гъечи нирав гУьлом, дануьсде бош: «Овол-чуьол гІэсбгъо — хэргъоре бори...»

— Туь чуь жугъоб дори уре? — Пуьрси Ёвдо, гоф Нисиме бурра.

— Ме гъичиш негуфдируьм, у гофгъой энуре эзи гуш дешендуьм эзу гуш ведешенд. Оммо изму у э ме мивохурдге, ме эзу мипуьрсируьм: «Қини, куклей куксег, хэр ве киниге гІэсб!?» ве эз дуьли е синле микешируьм эзу. Увэхди дерд-фикирме омбар бу, унегуьре ме э гофгъой энэ тигъэте фикир недоруьм, чуьнки мере дуьл энэ небу, усуьзиш дуьлме эдембу шэгІр бурра...

— Дануьсде бош, Нисим бирор, у туь гуфдиренигъо одомире ме лап хуб шинохденуьм, у не хэриш нисди, не гІэсбиш. Хэр не гІэсб жофокеше хъйивонгъоют, угъо одомире э жофошуревоз хэйр семе доренуът. Оммо у одоми лербей эри жендек хэлгъ. Песде раби бисдо у эри э дургунигъоревоз хэлгъэ фурмунде, куьф хэлгъэ темиз сохде. Ме не туьниш туро хундейм...

Гьелбет, хундейм, темизи туроре дануьсденуьм ме. Екиш мере хуно туро хунде нидануь.

— Дузи, Нисим, туь омбар туьрохуне одомини. Унегуьре туь эз гьемме хубте биё дани, ки э у туро веригъо гофгъо гьемме дургуне овосунегъоре хунои. Ме и ченд

сали э нумаз нисе рафденуым, оммо туь имогьоиш э нумаз рафдени. Гу гьери винуым чуй хэйр дирей туь эзу кор. Эричуй гереки у дананигьой турои туь, чуй кумеки сохде угьо э туь. Комини гуфдирейгьой туро эжиге оморейре дирей туь?..

— Гьечи хуте бирем дие эз зуревоз э нумаз рафде, дие и вердишимере шенде нисе дануьсденуым.

— Хуби, бура туьре воисдениге, ме эри эну нисе гуфдиренуым-гьо. Мере уре гуфдире воисде: туь гуфдиренигьо одоми раби биренге, э у нумазгьо-турогьо чуй боворинлуьини? У раби те воисде шефде коргьо сохди, алишвариш сохди, э дигьгьо рафде, хуьрдевогьо фурухдембу. Песде раби бисдо, «темиз-хьэллол» бисдо нуьшд. Оммо раби гьисдикиш у гьич темизи хуьшдере не бирмунди, гье шефде коргьо сохде, энжэгь хэлгьэ фурмунди. Рабиети мисохд, керг микуьшд, гов микуьшд, мило мисохд. Эз гьемме жиге эдембу, муше-кураре хуно, пул вечире. Гьеле угьош вес несохде юре, гене зен-зероре, гьеле э есири дин-догьот дерие одомигьоре, фурмунде эри пул ведешенде, куьф энугьоре темиз сохде, тефилогьо михунд, питик-хьэйкелгьо мисохд. Бега у питик-хьэйкелгьо э туро веруьт, ужире хэлгьэ фурмунде, куьф хэлгьэ темиз сохдеигьо нуьвуьсде омори унжо? Дузи, э туро веруьтгьо гофгьо дорени ихдиёр ве минкини эзунн шефде одомигьоре сер хэлгьэ эри пучунде, фурмунде угьоре э дургунигьоревоз. Оммо чуй бисдо эз куьф хэлъ ведешенде пулгьой энуре? Юре чуй бисдо? Эхир ю эже вадарафд? Зен хуьшдере ведекирде, бие жогьиле зене хосд эрию, жогьил бире воисдембу юре. Юре э алишвариш сохдеки гирде, э гьэземет дешендуьт. Се салиш некеша э гьэземет нуьшде, хэбер омо муьрди гуфдире...

Гьемме пул-мол ю, э эрэгь пушони хуьшдеревогьо нэгь, э эрэгь пушони хэлгьэвогьо, кесгьоревоз, кура сохдегьо, мунд эри жогьиле бие зен. Уш э шуьвер рафд э е ширвони. Имогьой э кеф, э хьэз дери э ширвониревоз. Гьем-

ме шефде коргьо эз чум энү ведеримо ве эхир ю пучи бисдо.

— Гьемме гофгьой туь дузи Евдо, — мугу Нисим, екем фикир сохде бэгъдо, — оммо эри гуфдирей, ки туро ихдиёр доре гуфдире угьоре эри ижире шефде коргьоре сохде, туь дуз нисди, бирор. Э коминжой туро вери, меселен раби алишвариш биё соху, дургунигьоре гую, хэлгъэ фурмуну? Угьо эз беднефси одомигьоют. Угьоре беднефсе рабигьо сохденуьт эришу хэйри гуфдире, туро чуй тэхсиркори эри эзуни шефде одомигьо?

— Э туро гьечу невери-о. Оммо э туро вери: «муьди бош э худойтуь, э рабитуь, сох гуфдирей энуре, сер зе э у». Беге туро нисди ихдиёр доренигьо мерде, ченд зениш юре воисдге эри вегирде? Э гуфдирей туроревоз хэлгъ биё соху гуфдирейгьой туроре. Гье э у туро вери, ки э худой хуьше гюси бисдоге, гуфдирей энуре несохдге, егъни э туро верие коргьоре несохдге, биё тембихь доре биёв. Эге гуфдирейгьой туро дузиге, гьэгъи ве герекиниге, дие эйчуь невери унжо, ки хэлгъэ фурмундениге, ки жофой хэлгъэ э куьф хуьше декирдениге, биё тембихь доре биёв гуфдире? Беге э туро нуьвуьсде неомори гюшири не косибн эз худонини гуфдире. Егъни, гюшир хуругу, кеф сохугу эри хуьше чендгъэде воисд, жофой хэлгъэ декинуьгу э куьф хуьше, фэхьле жофо кешуьгу, эз себэхь те шохьонгум эрэгъ пушонире тигъи сохугу, кемер хуьшдере хуьрд сохугу эри гюшир, софой жофой хуьшдере гюшире дуьгу, оммо ю косиб муну, эри е лугъэ нуниш михьтож бу кифлет энү? Туро не Телмуд тараф гюширгьоре гирде, оммо гюшир ки бири гьевел, ки фурмунде, жофой хэлгъэ талаш сохде дануьсдиге. Ме имогьой лап хуб э сер офдорем, у турогьо, гоморегьоре гуьнжундет, равгьо, рабигьо, куьгъингьо эри хэйришу, хэлгъ э ишу муьди бире, метлеб ишуре веровуну гуфдире, могоьлугъэ дануьт э дес хуьше гирде, гьул хуьше сохде.

— Ме э туь гуюм дузире, меш э у турогьо, гоморе-

гъо дие бовор нисе сохденуым, оммо гуфдируымки: хуте бирем э нимаз рафде-оморе, у вердишимере шенде нисе дануьсденуым.

— Меш гъечу бируым, гъеле э колхоз кор сохдембируымгъо салгъош хэйли вэхд рафдембируым э нимаз, оммо эз песи варасируым, ки и кор вэхде э гъовой пуч сохденигъо кори, хубтеи у вэхде э нимаз не туро хэржи сохденуымгъоре э де хэйрлуье кориге хэржи сохумгъо. Оморе-оморе туьш мишени, гъеммеш мишенуь, олхоин бош. Изму данани хэлгъ, культурей хэлгъ эдее руз-беруз зиёд бире, хэлгъ эдее варасире чуй хэйрлуьниге, чуй хэйрсуйзиге, ки дузиге, ки шефдиге, чуй герекиниге, чуй герексуьзиге ве унегуьре могоьлугъ сохдени у коре, комики эрию ве э иловлею бирегоргъо герекиге. Изму у гъевелине овомигъо руз-беруз эдее нисд бире. Гъевел хэлгъ, хундеи ве данани чуьниге нисе дануьсдембу ве уре бу энжэгъ данани туро, комики уре огол зерембу э зир муьрскеши ве ветовусдеи э ю веноре гужгъоре. Олхоин бош де у девргъо немунди эри э у серпучинигъо бовор сохде могоьлугъ. Ини имогъой вегирим виним туьре, туь эдее э Масков рафде. Имогъой де чорей туь нисди биё вадарай эз рэхъ дин гирдеи. Унжоки туь дин гирде нидани.

— Чуьтам? Эйчуь нидануым?

— Эричуь нидани? Гъевелимуьнжи э диневоз туь шобот хор ние сохи, дуьимуьнжи гушд «хьэруьми» ние хури. Гъеле гъе иллегъоре гуюм эритуь. Туьре э Масков гушд хьэлоли ки мидуь? Э Масков руз шобот э трамвай мивенуьши, оммо унжо гьэтош дери, шоботтуь ёгъин хор мибу. Песде чуй мисохи? — мугу лове э хэнде веберде Ёвдо.

— Эгъ, бигъил зарифетгъой туьре-о! Меш мугум унжо дин гирде нисе гъишдеге. Масковиш э дингирдегоргъо мешет небири евэхдиш ве нисе бире. Э товун гушд «хьэруьми» гуфдирениге, ме гушд «хьэруьми» омбар хурдем. Чуь бешгъэи ки веноре кордере э бугъоз гов,

раби веноге енебуге еките. Уре дануьсде воисдениге э гъэсоб куьшденигъо гушд хъэлолтеи эз э хунегъо куьшде оморенигъо. Э гъэсоб гушде духдир хуб фегъм сохдени, гъэзорлуье моле нисе гъишде фурухде. Оммо э хунегъо куьшде оморенигъо моле ки фегъм сохде. Е гофигереш гуюм эритуь, гъеймогъоине рабигъо, моле неки, жергеш э тегьер ю нисе куьшде. Руз першобот хунеигъойму е керге гирде, пойгъойюре беседе, экин раби фуьрсо эри куьшде. Гъэил эз кин раби оmore бэгъдо, зен рафд эри керге вегирде, темиз сохде, миденишуь мивинуь куьшде керг э гъэриш гъэрзинке эдее вежегъисде. Раби бугъоз юре бегъем небуррабу. Ме керге вегируьм гуфдире, жерг вэхишд, пиёне хуно, лой-лум хурде, э бурра бугъозевоз сер гирд э иловлей хуне эй видовусде. Мугум эз зен: «Ди ме бурум хуб бугъоз энуре». «Нэгъ, — мугу у, — у хъэлол нибу дие». Берди жерге э хъэет нимаз шенди, э рабиревоз женг гирди вогошде. Э товун э гъэтош дес зерей гуфдирениге, уреш туь эдее зарифет сохде. Уре гуфдиримге руз шобот, э дин туроревоз кориш сохде гъэмел нисе оmore. Оммо иму гъемме рузгъой шоботгъо э кор биренимки. Уш овосунеи, эзуни овосунегъо омбар вери, гъелбет, э туро...

— Дирири, ме чуь гуфдируьм, туь хуьшденитуь евеш-евош эз дин ве рабигъо эдее дур бире. Раби некуьшде гушде туь хурденге, руз шобот кор сохденге, дие у чуь дин гирдеи бире? Туь хуьшдени туьш эдее дире, дануьсде, ки гъемме коргъой эн дин-догъоти хъэсуьл оmoreт эри хэйр рабигъо, гъоширгъо, хэлгъэ фурмунде дануьт гуфдире...

«РУШБУРРА»

Се руз рэхъ кешире, э чоримуьн руз себэхъмунде Ёвдо не Нисим расируьт э Масков. Э угъо бу адрес гостиница, эже миёсдуьт фурамореге. Э гостиница оmore,

дес-руи хуьшдере шушде оэгъдо, еоо суьфде рафдуьт э Гъирмизине Мейду. Угъо омбаре ихдилотгъо шиновусдет э товун буьзуьрге сервор жофокешгъо Владимир Ильич Ленин ве гьемчуьн дануьсдембируьт, ки у э мовзолей дери гуфдире. Унегуьре угъо эри хуьшде норерируьт, ки гьетте э Масков оморе, эн суьфде э Мовзолей рафдени, руй Ленине эри дире. Угъо э пушой Мовзолей оморенге, миденишуьт мивинуьт хэлгъ еки-еки э нубот поисде, эдете дарафденуьт э Мовзолей. Оммо нуботе эхир небу, ингъэде одоми унжо бу. Экуьнди е верс бу дурази нубот. Угъо э эхир нубот оморе расиренге, милиционер мугу:

— Дие мепоит, вэхд гиросди, имбуруз дие нидегъилим.

Ёвдо сер гирд эри гуфдире э милиционер, ки ишу эз дури оморе одомигъоют, ишуре бигъилуь поисде гуфдире э нубот. Эз Ёвдо не Нисим бэгъэй гъеле одоми омбар бу эри э нубот поисде. Угъо гьерки е гоф эдембу гуфдире э милиционер.

Увэхди милиционер келе-келе, гьемме шинову гуфдире, мугу:

— Имбуруз дие нидегъилим, себэхь, себэхь биёйт!

Нисим не Ёвдо, сере гъуз гирде, вогошдуьт. Себэхьимуьн угъо, торики-товуши вэхуьшде эз хов, зу рафдуьт э Мовзолей. Угъо миёвт мивинуьт гъеле э у зуриш экуьнди е гъозор одоми гъисди эри э Мовзолей дарафде. Угъо нубот гирде поисде бэгъдо, е жогъиле бисд-си сале кук, оморе эз Нисим пуьрси:

— Келебебе, ишмунит песини?

Нисим э кук хуни-хуни денишире, мугу:

— Эри.

Угъо э Мовзолей дарафденге, сифот Ленине диренге. Нисим поисд ве э тигъэтевоз эдембу денишире э гъезизе чигърет, хьохмолуье фирегъе пушони эню. Гъе у туьтем е зен эз гъуллугъчигъой Мовзолей мугу эз Нисим:

— Келе мерд, келе мерд, непоисдеки, непоисдеки...

Нисим рэхь рафде-рафде дениши э сифот зен, эз ю келе мерд гуфдиреbugьo, миденишуь мивинуь, у эз ю дегь салиш келетей эз г1уьмуьр. Эз Мовзoley ведироморенге, у мугу эз Ёвдо:

— Дирири?

— Эри, зурбое фирегье пушони вери мерде, эз чигьретиш ведини, ки келе хьохмолуье одомини гуфдире, — жугьоб до Ёвдо.

— Эри, — мугу Нисим, чигьрет Ленине э ёр овурде. У гуйге гьеймогьoиш э пушой чумгьoй энy бу. — Ме лапшорум, эз дьулимени ме инжо, э Мовзoley омореи, Ленине эри дирей.

— Меш, — гье у туьтем жугьоб до Ёвдо.

Е гьэдер вэг1до угьo рафдуьт гьечи гоф несохде, э ёр ишу гирде поисде гьэд Мовзoleyе, чуьтам Ленин, десгьоре веноре э сине, гуйге хисириге, э чуь муьгьбет, г1эзизиревоз хэлгь дениширембуге э у, э сифот энy. Песде Нисим, э ёр ю гоф оморере хуно, мугу эз Ёвдо:

— Дирири, мере зен э Мовзoley чуьтам «келе мерд» хундге? У дьумбуьрра кукиш, э нубот гирдеки, эз ме мугу: «келебебе».

— Эгь, эде эзу гофгьo одоми гьэгьри нибу. Соки туьрушверие одомини гуфдире, туьре эдете хьуьрмет гирденуьт.

— Беге ме гьечиш, келе мерде хуно веди биренуьм, эз ме «келебебе», «келе мерд» эри гуфдире?..

Эжеш мирафдуьтге угьo, э гьемме жигеш, еки «келе мерд» огол мизе Нисиме, екиге «келебебе». Уре эзи кор лап гьэгьр оморе, мигуфди э дуьл хуьшде: «Кара вешено игьo, ме гьеле энжэгь чуьлпенж сале бэгьэй нисдуьм, мере келе мерд сохдет норе». Ёвдо, винире гьэгьр кеширей энуре, мигуфди эзу:

— Эде, э негьогь гьэгьр эйчуь кешире туь, угьo гуьгуфдире, туь келе мерд нисе биреки?!

Чуьш мисохдге Ёвдо, Нисиме хоши гирде нисе да-нуьсдембу. Қими вэхдгьo Нисим лап гьэгьрлуь бире эз

ю «келе мерд» мигуфдики, э у одоми хуни-хуни денишире, мигуфди: «Туй хуышденитуыни келе мерд». У одоми э сифот Нисим мидениши, суыпуыле хэнде мисохд, оммо жугьоб нидо.

Чоримуын руз бу угьо э Масков оmore, Ёвдо себэхь-мунде, эз хов хэбер биренге, миденишуы мивияуы Нисим э хьэлов недери, у дес-руй хуышдере шушд, руш хуышдере чи, партал хуышдере вокурд, хьозур бисдо, оммо генеш Нисим веди небисдо. Хэйли вэхд гиросше бэгьдо, кибуге, дер утогьэ куфде пуьрси:

— ГІэмел миёв?

— Эри, — жугьоб до Ёвдо.

Дере вокурде э утогь диromo е жогьиле чуыл салере хуное мерд. У бу Нисим.

— Эле, бебейме жон, — мугу Ёвдо, — ме ингьэде мэхьэл нуышдем э туй дениширем, ме медан, туй эри руш чире рафде бебей, чуй сохдей туй эде? Имогьой туй э нимаз чуытам мирай рушсуыз?

— Мирам, — мугу э келегедиревоз Нисим. — Эйчуы нисе рафденуым? Руш неверигьореш дегьышдени э нимаз.

— Эде, — мугу Ёвдо, хэнде-хэнде э зарифетевоз, — и чуьжире одомни, эри эз ю е «келе мерд» гуфдиреи, рафди руш хуышдере чире.

— Чуыни? Бирач бирем? — мугу Нисим, чуней хуышдере тимор сохде-сохде.

— НэгІ. Рац бирей, жогьил бирей, бегьем культурни бирей. Э негьогь нисе гуфдиреки э метелегьо: «Дуылшори пиргьореш жогьил сохде, рач сохде гуфдире».

— Э гуфдирей туьревоз ме пир бируым, имогьой жогьил бирем дие?

— НэгІ, эжунтуы, эзу нисе гуфдиренуым-гьо. Эз шори э Масков оmoreи рушеш чиреири. Имогьой э шегьер оmoreнге, гІэйлгьо дануысдуытге гьозие-гьэдер эни коре, туй руш туьре эйчуы чирейге, ингьэде михэндуыт те унгьэдейгеш.

— Хэндуьтгу, дерд хэндей энугьо жире гирди.

Эз расдекиш угьо э Дербенд оморенге, гьемме колхозчигьо дануьсденге эз Ёвдо Нисим руш хуьшдере эйчуь чириге, угьо э у хэндуьсдембируьт ве веноребируьт э сер энугьо лэггэм «Рушбурра Нисим».

И лэггэм э сер энугьо вомунд е ченд салгьо, дуз те келе довгьой ватани сер гирде. Нисиме эзи кор гьэгьр нисе оморембу, оммо уре рушсуьз гьейб оморембу э нимаз рафде. Гье э у гьейб оморейревоз, у дие э нимаз нерафд.

ЗЭГИФИ

Шевеньё не Содугь, неки бируьт эеки гьуншигьо, хьэрмэхьгьо, угьо гьечи эекиревоз хуте биребируьт, дуь бироре хуно. Угьо эеки мигешдуьт, эеки мирафдуьт э школа, эеки вози мисохдуьт. Бирембу шевгьо угьо эеки михисируьт. Эге дедей Шевеньейгьо, Сенем, мивиниге Шевеньё эз куче недиромори, у дануьсдембу ээже миофуге уре. У мидарафд э хуней Нисимигьо ве мипуьрси Шевеньёре эз Мирвори. Мирвориш нисе гьишдембу э гьейлгьо мешет бу ве унегуьре мигуфди:

— Бигьил нуьшуьт, чи хурдет гье э инжо михисуьт.

Кими шевгьойге гьердуьй энугьо михисируьт э хуней Шевеньейгьо. Эхирки сер ишмуре дорд недуьм, гьезизе хундегоргьо, Шевеньё не Содугь гьеммише бирембируьт эеки, дуь сигьде бироргьоре хуно.

Э чоримуьн класс дерики гьердуьй энугьо рафдембируьт э Хуней пионергьо э кружок шекуьлкеша. Шевеньёре лап хьез оморембу кор шекуьл кеширеи.

Художник, комики э угьо шекуьлкешире хуте сохдембу, лап хубе мерд бу. У, гьич когьли несохде, э тегьними ве фегьмгериревоз мибирмунд э гьейлгьо тегьергьо ве фендгьой шекуьл кеширеире. Хьэрекетигой энугьо зу зендембируьт хьэвеслуьире э дуьл гьейлгьо экин шекуьл кеширеи. Е-дуь мегьиш небу, угьо э кружок дироморе, оммо дануьсдембируьт кими шекуьлгьоре кеширеи.

Художник миберд угьоре э догъгьо, минушунд э савзегей, хуте мисохд, чуйтам эвлогъире, тэхьное доргьоре, кулегьоре шекуыл кешире герекиге.

Гъечи Шевеньё не Содугъэ хъэз оморембу эз шекуыл-кеши, ки угьо кими вэгдогъо эз школе гъич э хуне не рафде, дуз мирафдуьт э Хуней пионери ве мимундуьт унжо те шохьонгум.

Художник — рэхьбер кружок энугьо Пётр Михайлович, е лэгъэре мерд бу. У урусиш буге, зугьун татире лап хуб дануьсдембу. Едес, фамилей Шевеньёре хунденге, у мугу:

— Туь кук Ёвдои?

— Эри.

Бешембу куьгъне шинох мени. Ме не у эеки э солдати рафдейм, э довго дебирейм ве э есириш эеки бирейм. Чуйтами изму хьол-руз ишму?

— Хуби, — мугу Шевеньё.

Эз у рузевоз Шевеньёре диеш хъэз омо эз художник ве у э диеш тигъэтлуьиревоз гуш дошдембу гофгьо ве тербиегьой энуре. Эз лэгъэри ве зерди сифет Пётр Михайлович ве ди бу, ки у зэгифе одомини гуфдире. Эзуш бэгъэй, кими вэгдогъо, э дерс дореки, у гъеэбо мипоюнд гоф хуьшдере ве э десевоз эз шуьгъэм гирде, минуьшд э сер куьрси. Е хэйли вэхд гирошде бэгъдо, у гене мивэхшд э пой ве евош-евош зиёд мисохд дерс дореире.

Е руз, уре гъечи эз шуьгъэм гирде бэгъдо, у э хуьшде дигоморенге, мугу:

— Лербей шулдуйме, гёзилгьойме, эз довго ве есири омонети мунди эриме. Иму, дербендигьо, е ченд одоми бирим э есири э е жиге. Экуьнди гьеммейму эзунжо зэглиф оморейм. Лихъэе гловгьоре хурдеи, э ченд рузгьоревоз гисне-тешне мундеи, тогъ хурдеи ве гьогъ нехурдеигьо сохдет хэтолуье кор хуьшдере ве гьеммейму ниежунгьоим. Жогьил биреки гъеле унгъэде кори

нисе сохдембу лербейме. Салгьо giroшде-giroшде уш эдее бирмунде хушдере...

Бирембу вэхдгьо Пётр Михайлович э Хуней пионери миомо лап могъбул, лап дуълхуърде одомире хуно. Эзини вэхдгьо у, тейте дерсе сер гирде, сер мигирд эри ихдилот сохде еки эз гъозие-гъэдергъой довгюире, меселен, чуьтам десдешу е орине э гъэд више гисне мундиге, песде эз више ведироморе, часть ишуре офде, чуьтам гогьмогьире хуно хурек хурдетге. Э эхир ихдилот хушде у мигуфди:

— Эзини бедигъой довгюини имуре зэгиф, глэзорлуь сохдигъо. Ини еки эз хьэрмэхьгъоймуре имбуруз гъовре сохдим. Фэгъире Менэхьим гъеле пенжогъиш небири. У эз глэйлиревоз сер гирди эри жофо кешире, кеме хуърд сохде, песде бири э довгю, э есири. Е бегъеме руз невинири. Энжэгъ имогъойле сер гирдебу эри азад жофо кешире, хуб зигъисде ве нике рузгъоре винире. Лербей шулду эз довгю овурдигъо гъеле э нимегуьмуьриш не расире, берд уре эз зиндегуни...

Эзини ихдилотгъо омбар сохдембу Пётр Михайлович, веди буки, омбаре дерд ве гъэм дори гуфдире и зэгифе, нимелитежуне мерде довгю ве есири.

Е руз Шевеньё не Содугъ, гьеммишеинере хуно, э хуне не рафде, оморуйт э Хуней пионергъо. Угъо омореbugъо гъеле Пётр Михайлович неоморебу, глэйлгъош гъеле кем оморебируйт. Кими глэйлгъо зу оморуйт ве угъо дарафдуьт э ишуре дерс доремbugъо утогъ ве сессуьз нуьшде, денишируйт кей миёвге тербиедорегор ишу. Эз екемиге Пётр Михайлович омо. У бу лап гъошгъобогълуь, лап келе дердименде одомире хуно, ранг ю зердов... Ижире гъовой энуре диренге, Содугъ евошлей э гуш-гуши Шевеньё мугу:

— Пётр Михайлович фикирлуьни, эхьисобевоз, гене е кор бири.

Евошлеиш гоф сохдге Содугъ, сес энугу дарафд э гуш художник, у чаруьсд э тараф Шевеньё нен Содугъ ве

гьетте Шевеньёре дире, огол зере берд уре экин хуьшде. Екем фикир сохде бэгъдо, сер Шевеньёре совусде, пуьрси:

— Туь, эхьисобевоз эз школе гьич э хуне нерафде, оморей инжо?

— Эри. Ишму эзже дануьсдит? Беге гӀэмел нисе оморе?

— Ме э лошму бируьм. Бебе екем кефсуьз бири, эй сер кешире рафдебируьм...

— Чуьтам кефсуьз? У э кор буки эй богъ бурра.

— Дузи, имбуруз себэхьмунде уре гьеебо эз шуьгъэм гирденге, омурдет эз богъ э гӀэреберевоз. Духдир дермугъо доре бэгъдо, гьовой ю хуб бири. ГӀэдоти, хэлефме, зобуне хэбер зу лов бире, э шегьер гьемме хьовирхьэрмэхь иму дануьсденге, э меш хэбер раси. Ме э лошму рафденге, мивинуьм гьовойо зобу нисди, нуьшди эдее чой хурде...

Э гуш Шевеньё дие гофгъой Пётр Михайлович нисе дарафдембируьт. Э пушой энунде эдембируьт ченд жире коргъо оморе. У суьфде вини бебешуре, Пётр Михайловиче хуно, десе э сер шуьгъэм веноре, ёново э сер куьрси нуьшде, дуьгъэди бирере хуно. Песде э пушой энунде омо бебешу ранг ю зердов, э хьэллов дери. Гене у вини чуьтам э зерде ранглюе сифетевоз бебешу хьэрекет сохдениге пейлей чое эри вегирде, омо нисе дануьсде вегирде... Шевеньёре божэхьэт хэбер бисдоге эз хуьшде, чуьтам эз Хуней пионери, чопологъэ хуно, ведироморе, э лой хуне видов-видов рафдге. Эз Шевеньё екем дурте эдембу видовусде Содугъиш. Чендгъэдеш хьэрекет мисохдге Содугъ э Шевеньё расуь гуфдире, расире нисе дануьмсдембу.

Ёвдоре хоснет небу эри гӀэилгьоре э хуьшде хуте сохде. Оммо Шевеньёре у куьнд хуте сохдебу эз хуьшде. «Шевеньё, — мигуфди у, — эз ченд тургъо гирошди. Нединжи, эз нединжию э сер ю чуьш оморени. Е дес у, э мошинкей нефтиревоз э вози сохдеки, суьхде ченд

мегъгъо э хъэлов домунди, е десиге эз буз наргов десе куьнд берде, наргов эз сифот ю суьрггъоре зеренге, кеф-суьз бири...»

Унегуьре у хотур Шевеньёре нисе гъишдембу, гъем-мише уре э хуьшдеревоз миберд э концертгъо, киногъо, гъемме сал уре мифуьрсо э лагерь пионергъо... Шевеньёш бебешуре омбар хосдембу. Эриме оморенигъо гъемме кукгъош омбар хосденуьт бебегъоре.

Шевеньё не Содугъ дуь э песой еки, шуш нефес гирде, э хуне дироморуьтгъо Ёвдо ранг ю зим-зерд, дегешдебу э хъэлов ве чумгъой ю рафдебу э хифлет. Нисим, Мирвори ве Сенем, десгъоре э чуне веноре, нуьшдебируьт э иловлей хъэлов Ёвдо. Гъетте Шевеньё не Содугъ дироморе, Нисим дуь энгуьше э ён ловгъой хуьше берде, бирмунд э угъо, ки сес несохут гуфдире. Шевеньё евошлей рафд нуьшд э ён бонилей бебешу. Эз екемиге Ёвдо чумгъоре вокурде, гъэрси бугъо чумгъой Шевеньёре виниренге, э расди дес хуьшдеревоз сер энуре совусде, мугу:

— Чуьни? Гъичиш нибу, хэлефме, бебе екем кеф-суьз бири, себэхь-персебэхь хуб мибошум мирам.

Шохьонгум гене омо духдир. Духдир оморебугъо гъовой Ёвдо хуб бу. Гъе увэхди экин Ёвдо нуьшдебируьт сернуьш, бригадир ве шоробсох колхоз энугъо, комигъоки оморебируьт эри э Ёвдо сер кешире. Ёвдо э сер хъэлов нуьше, кемере э болуш ведоре, эдембу э оморе-горгъоревоз ихдилот сохде. Духдир ижире гъовой Ёвдоре диренге, екем шор бисдо. У гене э тигъэтевоз пуьрси, чуьтамиге гъовой энугъо гъеймогъой, чуьтам суьфде дорд дорей э ю мэгълуьм бириге...

Хэйли фикир сохде бэгъдо, духдир мугу:

— Себэхь иму, анализгъоре вегирде бэгъдо, диеш ёгъинлуьире миданим, оммо гъеймогъоиш мэгълуьми, ки шулдушму лербе гъисдигъо. Унегуьре эри хуб бире ёгъин э е хубе курорт рафде гереки. Колхоз ишму гъошире колхози, туьре е путёвка доруьтге, гелуьргъой

колхоз кем нибу. — Песде у э тараф сернуыш колхоз чаруьсде, мугу, — эриме оморенигьо правлений колхозиш рази мибу э гофме.

— Гьелбетте, — мугу, жугьоб доре духдире, сернуыш колхоз, — Ёвдо еки эз биненорегоргьой колхози, иму мивеним гьемме хьэрекетимуре эри уре соф сохде.

ГЪЭРЕУЛЧИ

Эри гьеймогьоине медицинай Совети лербей шулду одомире соф сохде гьич е четиниш нисди. Энжэгь герек бирени е гиле операция сохдеи шуьгьэм одомире, у одоми соф бирени тозе эз деде бирере хуно. Оммо э симуьн салгьо медицина гьеле нисе дануьсдембу чуй сохуге эри лербей шулдуре соф сохде. Эге гьеймогьой шулду лербелуье одомире операцие сохдеи суке операция хьисоб биреге, увэхди ижире операция лап гурунде операция хьисоб бирембу ве гьер хирург и коре эгерде нисе вегирдембу. Шулду лербелуье одомире увэхдигьо операция сохдембируьт энжэгь чоресуьз биренге. Унегуьре духдиргьо норуьтки Ёвдоре операция сохде герек нисди гуфдире. Угьо уре э дермугьоревоз екем эхуьшде цировунде, гуфдируьтки у биё ёгьин э курорт бурав гуфдире, эжеки э у хубе кумеки мисохут. Эзуш бэгьэй угьо э у гьэдэгьэ сохдуьт, ки энжэгь темизе хурек хуру гуфдире, меселен сипре ну, г^эсел, кере ведиеш. Эри энуг^эмел нисе оморембу не емуьш, не хьэвуьж, не г^ов гирде чи, не шуре чи, не туьнде чи...

Четин бу эзуни салгьо эри э курортгьо гьисмет бире, чуьнки курортгьо гьеле кем бируьт, оммо эзг^ифгьо омбар бируьт. Неденишире э ижире четинигьош, сернуыш колхоз Ёвдойгьо гьэрорномей правлений колхозе э наркомат хоригьуьллуьгьосохи Догьисту берденге, уре эри Ёвдо доруьт путёвка эри рафде э курорт Ялта э Крым.

Экуьнди е мегь мунд Ёвдо э курорт Ялта. Духдиргьо

чуь хьэрекетигьош сохдуьт уре эри соф сохде. Оммо гIэзор энугене селт соф небисдо. Э негьогъ нисе гуфдиреки э метелегьо: «Нечогъи вегирде асанти, оммо соф бире четин». Эз ранг-руй у екем э хуьшде диromорегубу, гьовой юш хуб бу, оммо эрию гьег хуреке хурде гIэмел нисе оморембу. Эзуш бэгъэй, духдиргьо э у гуфди-ребируьт, ки гьерчу-бисдо гурунде коре несоху гуфдире.

У руз шохьонгум, Евдо эз Ялта оморегубгьо, Нисим эз кор оморенге, диromо экин Евдо эри хьол-руз юре пуьрсире.

— Хьол зобуни, Нисим бирор, — мугу Евдо, лап дердименде тегьер ох кешире, — гушд меху, хэмире дерие нун меху, емиш меху, хьэвуьж меху, э юхе, чой, ширевоз чендгъэдер мизигьуь одоми? Гьеле дерд чи хурдеш нисди-о...

— Дие гене чуьни? — Пуьрси Нисим, гьеебо гоф энуре бурра.

— Дерд у дерди, ки кориш сохде гIэмел нисе оморе. Энжэгъ, мугу, суке корлегьо гIэмел миёв эритуь. Меш мугум: «Суке кор чуьтам егIни». «Кем гешденигьо, — мугу, — омбаре вэхд э е жиге нуьшденигьо кор». Мугум: «Ме инженер нэгI, хундегор нэгI, э ежиге нуьшденигьо кор эзже миофум?» «Миофит, — мугу, — эге зигьисде воисдениге...»

Нисим, сере гьуз гирде, думитлуь бире, эдембу э тигъэтевоз гуш дошде гьер гоф Евдоре. Евдо, хэйли фикир сохде бэгъдо, гене эз кон дуьл ох кешире, мугу:

— Экуьнди се мегъ эдее бире ме нечогъ биремгьо. Э се мегъ ченд трудодень мисохдум ме, гIээзи Нисим? Туь эдее дире э чум туьревоз чуь зарали расириге эзи кор э ме не кифлетме. Эзимбэгъдойге чуьтам мидорум ме и гIэилгьоре? Мундем э мэхьтели. Гене «худо» рази гердо эз правлений колхоз путёвкарэ эз пул колхоз гьишдуьт восдоре. Ижиреи овхьолет, мундем э думит, чуь сохум, чуь несохум...

Ихдилот э лэггэй Ёвдо дери, дере вокурде, э хуе ди-
ромо Шолум, келей жук Ёвдо. У шохьонгум эхэйрбу
доре Нисим не Ёвдоре, дарафд э доруни хуне. Увэхд
Ёвдо, чум зере Нисиме, дуь энгуьшде э ловгьой хуьшде
вено. У эдембу гуфдире э Нисим, егИни, Шолум э хуне
дери, гоф неверовуну гуфдире. Унегуьре угьо, те Шолум
э хуне дебуьго, гофсуьз нуьшдуьт. Эз екемиге Шолум,
эз доруни хуне ведироморе, эз Ёвдо мугу:

— Ме эдем э кружок рафде, имуре имбуруз репити-
циен, белки дир оморуйм, э дедей гу дуьлпесо небу.

— Бошгу, хэлефме.

Ёвдо дануьсдембу, ки Шолум э школеш хундембуге,
бу еки эз активлуье жовонгьой колхоз. У чуйн секретарь
идорей комсомоли колхоз, неки ю бэхш вегирдембу э
кружок художествени самодеятельность, гьемчуьн ве-
норембу хьэрекети хуьшдере эри кор энуре э дузе рэхь
фуьрсоре ве зиёд сохде жергегьой бэхшвегиргьой энуре.

Шолум рафде бэгьдо, Нисим э мэхьтелиревоз пуьр-
си эз Ёвдо:

— Чуьни, туь эхи мере эдебири чум зере?

— Хьэлово бири, ки эдем хундеире шенде, э колхоз
э кор рафде, — мугу Ёвдо, гене ох жешире. — Ме, Нисим
бирор, недануьсдем хунде, девр иму чуьтам бириге туьш
дануьсдени, мугум и гІэиллере семе хундегор мисохум.
У эдее э шешимуьн класс хунде, эри хунде лап зиреки,
хьэвеслуьни, чуьтам бигьилуьм шешимуьн классе шенде,
э колхоз э кор рафде. У дерики иму гоф веровунде тер-
сиреним. Чуь гуфдиреге дануьсдени?

— Чуь гуфдире?

— Гьевел гуфдирембу: «Ёгьин михунум, агроном
мибошум». Имогьой гуфдирени: «Гьемме одомигьо хун-
дегоргьо бисдоге, песде бил ки мизенуь, у коргьойгере
ки мисоху?»

— Дениш, Ёвдо бирор, — мугу Нисим, — не гІэиле
эз хундеиш мевеги, не дуьл туьреш меху. Нуьвуьс эрзо
ди э правление, эриме оморенигьо колхоз кумеки не-

сохде нибу. Е чоре офд миёв, олхоин бош. Небисдоге мегири гъэреул мипои...

— Улле хуби эриме. Э е жиге нуьшде поисде, дуьлме хьэл мибуки... Ме согъ гIуьмуьрме жофо кешире одоми и се мегъ корсуьзуйм гуфдире, эдем дуьл мере хурде. Ме гъэреулире ветовусде нидануьм...

— Уни Шемерьё, кефсуьзи гуфдире, нуьшди хьэёт колхозе эдее гъэреул сохде. Гьечиш-гьечуш гьерки бисдош э хьэёт колхоз гъэреул биё буки. У кефсуьзе одомини гуфдире, уре норет. Эритуьш правление е кор нефде нибу, олхоин бош. Суьфде гурунд миёв эритуь, омор-оморе хуте мибоши...

Эз расдекиш е оринеш не гирошдебу Ёвдо эз курорт оmore, е руз уре огол зеруьт э правление берд. Сернуьш колхоз правлениере сер гирденге, мугу:

— Хьовиргьо, и пушогьо, экин ме руй бире, еки эз колхозчигьойму, мугу: «Ёвдо и ченд мегъ корсуьзи, зэ-гIифи гуфдире, уре ишмуш дануьсденит, эри эну гурунде кор сохде гIэмел нисе оmore. Э у е кумеки сохде, уре е суке кор доре гереки...» Меш фикир сохдем эриме, ки э у кумеки сохде гереки гуфдире ве унегуьре и пуьрсуьше норенуьм э пушошму, биёйт э кумеки екиревоз эри энц кор е чоре офим...

Гофе-гофгьо омбар бисдоруьт э правление, гьерки мигуфди ежире гоф: еки мигуфди — «Ёвдоре бригадир норе гереки»; — екиге — «Э сер гIовгьо норе воисде»; — униге — «Эри шороб фурухде фуьрсоре гереки э де шегьергьойге». Эхирки гьерки ежире меслэхьэти, эгьул ю варасирере хуно, эдембу доре.

— Хьовиргьо, — мугу сернуьш, — ме когьозгьой нечогьи Ёвдоре хундем. Эри эну не бригадири, не э сер гIовгьо ве э де шегьеригеш рафдеи гIэмел нисе оmore. Эриме оморенигьо, уре гъэреул норе хубте бу. Оммо эже нимге гъэреул нисе дануьсденуьм. Э хьэёт колхоз имуре дуь гъэреулчигьо гьисдуьт. Эз угьо комире мивегири, угьош гьердуь зэгIифе одомигьоют...

Гъебо гоф сернуьше бурра еки эз членгьой правление, нум комики бу Унетен, гоф вегирде, мугу:

— Хьовиргьо, мере вегирит эз гъэреули, Ёвдоре нит э жигейме.

Унетен не Шемерьё э нуботевоз гъэреул сохдембируйт хьёт колхозе, е сутке еки мибисдо, е суткейге — екиге.

— Хьолме унгъэде гурунд нисди эн Ёвдоре хуно, — гоф хуьшдере зиёд сохде, эдембу гуфдире Унетен, — эрме гурунде кор гІэмел нисе оmore, суке кор гІэмел оморени, ме гъупи зере, тегьенг вечире, де коригеш сохде мидануьм, оммо эри Ёвдо гешдеш гІэмел нисе оmore...

И гофгьой Унетене шиниренге, сернуьш колхоз, э сифет энү денишире, эдембу фикир сохде: «Хубе зиндегунини, хубе чини дусди ве бирори... Дениш ебо чуьтам одомигьойму дуь-екире хосдегоргьо биретге. Ю зэгІифе одомини, энжэгъ пор омори эз соф сохдеи, оммо у фикир хуьшдере унгъэде нисе кешире, чендгъэде фикир хьовир хуьшдере кеширениге. Э эзинигьоревоз чуь кориш миверов эз дес иму...»

У эз фикиргьой хуьшде тоймиш бисдо энжэгъ увэхд, кейки шиновусд, э жуьргІэтлуьиревоз, гуфдиреи Унетене?!..

— Ни э дес вокоширеи, эки дениширей?

Э РЭХЬ ЖОФО

Эге ишму э Дербенд бирейтге, гІээзизе хундегоргьо, ишму ёгъин гирошдейт эз пушой кинотеатр «Ватан». И кинотеатр вокурде омори э сиюмуьн салгьо. Гъэдимие боругьой Дербенд шогьодуьт эри энү кор, чуьтам суьфде, и кинотеатр вокурде оmoreбугьо вэхд, э звер энү веноре оmoreбуге келе-келе гоф сохденигьо радио.

Гъеле увэхдигьо э хунегьо лап кемлей радиогьо дебируьт. Радиоре мибисдо шиновусде энжэгъ э келе кучегьой шегьергьо, меселен, э кучей Ленин э Дербенд, енебуге э кучей Буйнакски э Махачкала... Эзуш бэгъэй,

гъеймогъоире хуно, увэхди радио согъ руз гоф нисе сохдембу. Радио гоф мисохд себэхъгъо те вэхд коре сер гирде ве шохъонгумгъо эз сэгІэт чори зуло.

Кинотеатр «Ватан» э кучей Ленин гъисдигъо оди-
нончовлуьни, неки э хотур энун кор, ки у гъисди еки эз
суьфдеи вокурдеигъой куьлтури девр совети, гъемчуьн
э хотур энун кор, ки гъемме руз шохъонгумгъо э пушой
энун кура бирембу могълугъ эри радиоре гуш дошде.

Унжо вебугъо радио келе радио бу, сес энун шиновус-
де оморембу есер э у кучегъойгеш. Могълугъ шегьер
Дербенд эз умогъоевоз хуте бири шохъонгумгъо эри ку-
ра бире э пушой кинотеатр «Ватан». Дербендигъо имо-
гъоиш нисе шенденуьт и пишере. Гъеймогъоиш гъемме
шохъонгумгъо э пушой кинотеатр кура бирени омбаре
могълугъ. Эзунжо бирени дуь эз еки дануьсде жуьр-бе-
жуьре хэбергъоре.

Е руз шохъонгум Нисим не Ёвдош эдембируьт гешде
э пушой кинотеатр, кейки э гуш энугъо дарафдгъо сес
радио:

— Изму гуш дорит передачере э зугъун тати, — мугу
диктор э зугъун азербайджани. Песде омо сес жовоне
кук: — Шохъонгум ишму эхэйрбу, гІэзизе радиогушдош-
дегоргъо. Гуш дорит эз песини хэбергъо...

— Э шинохэ сес ухшеш зере, — мугу Нисим гъеebo.

— Сес Шолуме хунои, — мугу Ёвдо.

— Эри, эри Шолуми, эхъисобевоз и коре э у тап-
шуьрмиш сохдет, комсомолгъои дие...

Оммо э гуш Ёвдо дие сес радио не гофгъой Нисим
нисе дарафдембируьт ве у эдембу энжэгъ э товун Шо-
лум фикир сохде. «Эз ме непуьрсире чуьтам шенди у
школере, — мугу у э дуьл хуьшде».

Нисим дениширенге еново э тараф Ёвдо, вараси фи-
кирлуь бирени энуре.

— Чуьни, Ёвдо, туь фикирлуьни?

— Э хъисобевоз, Шолум шенди школере, — мугу Ёв-
до, ох кешире.

— Нибу, эде! Беге э школе хундеки, э радио гоф сохде нисе бире?!

— Гьелбет нэгI!..

Сершев бу, Ёвдо суьфделе эз куче оморебу, Шолум омогьо. У, э Шолум хуни-хуни денишире, мугу:

— И чуй кори?

— Чуй кор? — Пуьрси Шолум э нубот хуьшде эз бебешу, э мэхьтелиревоз.

— Эз ки пуьрсирей туь эри школере шенде, э радио э кор дарафде.

— НэгI, бебе, ме школере не шендем гьеле, — мугу Шолум, э хэнделуье ловгьоревоз, — э радио ме шохьон-гумгьо биренуьм, эз школе оморе бэгьдо. Оммо гуьм эритуь дузире, мере воисдени школере шенуьм, э колхоз бурам эри кор сохде.

— Эйчуй эхи? Эйчуй, хэлефме? Чуйжойтуь кеми? Хурдейтуь гьисд, вокурдейтуь гьисд. Екем вэхд ме, зэгIиф бире, корсуьз мундем гуфдире, школере шенде? Ини правлений колхоз мере кориш дори. Дие чуйни инжой эни эри школере шендей туь?

— Эзу нэгI-эй. Гуш вени, бебе, ме гуьм эритуь.

— Гьери гу винуьм чуй михуниге.

— Гьечиш-гьечуш ме школере варасде нисе дануьсденуьм, чуйнки эз е сал е салнимиге биё э солдати бурам. Хубте нибуми э у хундеигьо вэхде пуч сохдеинжон, э колхоз э кор бурамгьо.

— НэгI, нибу, — мугу Ёвдо э жуьргIэтлуьиревоз, — эриме оморенигьо хунде хуби, эз хундеи э солдати рафдиге, песеде вогошденге гене мидани хундей туьре зиёд сохде...

— НэгI, бебе, эме бэхшлемиш сох, туь эз гьеймогьине овхьолет бейхэбери, гье белки имбуруз-себэхь довго сер мигируь. Э шегьергьо ве дигьгой Испания су донорет фашистгьо. Чуй имидлуьни имуре, ки э Испания довго варасде бэгьдо фашистгьо э сер иму ниёв гуфдире. Негьогь, бебе, туь э лекциегьо нисе оморе. Ди,

лелей ГІэсоил э лекция гуфдиреbugьo гофгьoре мишиновусдиге, туь гьеммере мидануьсди, гьечиш гоф нисохди.

— Коми ГІэсоил?

— ГІэсоил Бинаев дие, беге туь уре нисе шинохде?

— Чуьтам нисе шинохденуьм, э нубо хунде эеки бирембирим иму.

Ёвдо и гофгьoй Шолуме шиновусденге, дуьл ю диеш гурунд бисдо. У нисе дануьсдембу чуь жугьoб дуьге Шолуме, комики гоф хуьшдере зиёд сохде, эдембу гуфдире:

— Омбаре одомигьoйму рафдет э Испания эри гьовхо берде э гьэршуй фашизм, э эшолонгьoревоз эз зир бомбгьo вирихунде гІэйлгьoре омурдет э вилеет... Туь эдее дире чуьтам эз гьово буй дурей барут оморениге. Мибуми эзини вэхд э школе нуьшде поисде, кейки гьер руз жофон келе кумекини эри гьувот Ватане зиёд сохде?..

Э гуш дердлуь ве фикирлуь биреbugьo Ёвдо дие гофгьoй кук нисе дарафдембириуьт. У эдембу фикир хуьшдере сохде. Э ёр энуну ому суьфдеи руз екимуьн довгІoй гІуьломи сер гирдеbugьo. Полк Ёвдойгьo увэхди бу э шегьер Хасавюрт. У руз довгІo сер гирдеbugьo угьoре, э деседе поюнде, буйругь доруьт, ки зу хьозур бошут гуфдире эри юклемеш бире э эшолон э довгІo эри рафде. Чуьтам себэхьимуьн э эшолон э юк биреки, ю эри эз билогь гІов вегирде рафдеки, эз билогь гІов вегирде эз гІэрей вагонгьo э гирошдеки, эшолониге э рэхь офдоре, юре э зир вагонгьo венгесдебуге, ю э гІэрелугь черхгьoй вагонгьo э шугьoмо дегешдебуге, тейте согь эшолон гирошде. Песеде, эшолон рафде бэгьдо, хьэрмэхьгьoй ю, видовусде, юре, суьсдгьoлок биреbugьoре, э пой вэхизундебириуьтге, шувунде э хуьшде дировундебириуьтге... Э ёр энуну эдембириуьт оморе еки-еки бедигьo ве зулумгьoй довгІoи. Божэхьгьoй дедегьo, зенгьo, гІэйлгьo, дешендембириуьтгьo у руз, солдатгьo э довгІo э рафдеки, эзун-

бэгъдойге э рэхъгой довгои дире гъэзобгъо, яралуьгъо, муърде лешгой инсонгъо, десдегъой вирихдегоргъо...

Э ёр эну омо чуйтам довго сохдетге э гъэршуй немцгъо, австро-венгрго, чуйтам э есири офдоребуге ю не хьэрмэхъгой ю ведиеш. Гьемчуьн э ёр эну омо эз ю келете бугъо бирор ю, комики куьшде оморигъо э граждандански довго, ве дуь кукгъой эну э еtimi ве есириревоз келе биретгъо. Гьердуьй энугъош э колхоз жофо кеширет ве изму гьердуьшу э солдатинуьт, еки э хоригъой Финляндия э ён серхъэд, екиге э Украина э куьндигъой Киев...

И фикиргъо э дуьл ю дери, Ёвдо, эз дорун дуьл е келе ох кешире, нуьшд э сер тэхд, комики бу э куьнж гьейвуй энугъо. Шолум, зердов зере ранг бешуре диренге, нуьшд э ён бешуе.

— Бебе, чуьни? Ранг туь зерд бисдо?! Ме мидануьсдуьмге нигуфдируьм...

— Нэгі, хэлефме, туь тэхсиркор нисди. Э дедешму гу е пейле чой дуь мере.

«Довго, хунризе довго, — зиёд сохде фикиргъой хуьшдере, мугу Ёвдо э дуьл хуьшде, — э иму гъэзоб сохдейгъо кеми, овлодгъоймуреш динж нисе гьишде? Оммо Шолум дузи. Меш тоб нидорум эзини вэхд э школа эри рафде. ГІэдот гІуьломи, бебегъо эз дезде ведироморенге, жигей энугъоре кукгъо биё гируьт...»

ДУСДИ

Вэхд гъупи зерегъо бу, Шолум эз бригадир эн бригада, э комики Ёвдо кор сохдигъо, куьнд бире, гІэйбегІэйб мугу:

— Мере эй гъупи зере оmore воисде, лелей Авдалим, э коми звено бурам?

— Школере шендей беге? — Пуьрси бригадир, э мэхьтелиревоз.

— Гьеле имуре хьэрзо дори эри фори́гъэти гьемино-
нире вегирде, песе мивиним дие.

— Гьечуниге э звенон лелей Шафадьё бура, хэ-
лефме.

Гье у руз шохьонгум у рафд э лой Шафадьёйго ве
гуфди э у, ки ю себэхь эдее э кор оmore гуфдире.

Эз у рузевоз сер гирд Шолум э кор рафдеире э богъ-
го. У суьфде эз гъупи зере сер гирд жофо кеширеире,
песе Гов капарус мидеберд. Э гьечиревоз у бисдо еки
эз пушолуье жовоне колхозчигъо, комики неки э жобор-
диревоз жофо кеширембу, гьемчуьн э эшгълуьиревоз
бэхш вегирдембу э гьемме коргъой жовонгъой колхоз.

Жовонгъо ве комсомолгъой сиимуьн салгъо, ки неди-
риге эшгълуьи ве жуьргIэтлуьишмуре, божэхьэт дануь
э товун энун ишму сохде хубе корго. Согъ руз жофо ми-
кешируьт угъо э богъго. Шохьонгум миоморуьт эз кор,
зури-зури партал дегиш сохде, мирафдуьт э кружок-
гъой жовони ве комсомоли. Э гъувот ве гъуьнер энугъо-
ревоз гировунде оmoreмбируьт омбаре коргъой куьл-
тури.

Гуьнжунде оmoreбириуьт кружокгъой зерегорго, те-
атри, мэгIнихуни ведиеш. Сервор ве пушобер гьеммей
эни корго бируьт комсомолго, э рэхьбери комитетевоз.

Эзуш бэгъэй э гъувот комсомолгъоревоз гировунде
миомо фегьм сохден коргъой колхозире, меселен темиз
гъупи зереире, хуб капарус шендеире ведиеш. Жовонгъо
лап хуб дануьсдембириуьт, ки гьеммей энун корго гьис-
дуьт гуфдире бинеборуй биёвго хушхьоллуье зиндегуни
ве унегуьре эз е жориш песо нисе поисдембириуьт.

Шолуме лап хьэз оmoreмбу эз гьеммей энун корго,
чорей энун мибисдоге шевиш э хуне нирафд. Э эшгълуьи
секретарь комитет комсомолишу гуьре пой микешируьт
экуьнди гьемме комсомолго ве жовонгъой колхоз. Угъо
э келе хьэвеслуьиревоз бегьем сохдембириуьт гьер э ишу
тапшуьрмиш сохде оmore коре. Бирембу вэхдго шев эз
нимешев мигирошд, оммо э комитет комсомоли колхоз

товуш нисе муърдембу. Унжо дебирембируът членгьой комитет, комигьоки фегьм мисохдуът четине ве герекие пуърсуьшгьоре. Гьеле увэхдигьо четине пуърсуьшгьо лап омбар бируът. Ини, меселен, угьо э кружок художественни самодейательность миёсдуът норе пьесай мэгI-луьмлуе композитор азербайджани Узеир Гаджибекове «Аршин мол алан». Оммо пьесаре эри норе э кружок духдергьо кем дебируът. Э томоше миёсд бэхш вегирде чор духдергьо, оммо э кружок дебируът гьеме се духдергьо, чоримуьне эзже вегируътге нисе дануьсдембируът. Художественни рэхьбер кружок бу увэхд режисер театр государствои тати бугьо верзуьшлуе артист Догьисту Зэхэрё Авшалумов.

Зэхэрё, руй бире эжин Шолум, мугу:

— Чоре эз туьни комсомол, фикир сох е фенд оф, небуге иму томошере норе ниданим.

У шев членгьой комитет ченд жире фикиргьо сохдуът, оммо е чоре офде недануьсдуът. Шев эз ниме гиросше бэгьдо, угьо, фенд эни коре не офде, рафдуът э хунегьошу.

Шолум и фикир э дуьл дери, эдембу э хуне вогошде. Э ён хуней Нисимигьо расиренге, э ёр энуморе, у э дуьл хуьшде мугу: «Лелей Нисим гьэгьри нибисдоге, Гьуьзуьлгуьле, хоши мигирдуьм, миберд...»

Себэхьимуьн себэхьмунде Шолум торики-товуши вэхуьшд, чейтен нуни хуьшдере эз гьул дуьлу сохде, поисд э ён гьопу ве дениши, кей Нисим миведировге, эри э уревоз э богь рафде.

Гьеймогьой, вегирде виниримге, э шегьергьо себэхьгьоймунде эз хов хэбер биренуът э сесгьой автомашингьоревоз. Оммо увэхди хэбер мибисдоруът э гьуьгьуь зерей хурузгьоревоз. Шолум э пушой гьопу поисдебугьо мэхьэл, гогь эзи хьэёт, гогь эзу хьэёт эдембируът оморе сесгьой гьуьгьуь зерей хурузгьо. Одомигьош сер гирдебируът еки-еки эри варафде э тараф илчи э богьгьо эри рафде. Шолум, сере гьуз гирде, эдембу фикир сохде,

чуьтам гофе сер гируьге э Нисимевоз, чуьнки у дануьс-дембу, ки четин мибу гуфдире эри межбур сохде Нисиме у рази бу гуфдире духдер ю э кружок эри бэхш вегирде бурав, э сегьне вадарав эри томоше возире, чуьнки гьеле умэхьэлигьош омбаре бебегьо-дедегьо терсирембируьт эз гуфди-мугуй хэлгь, егІни, духдер ишу нуми-лэгьэми небу гуфдире. Эге суьфдегьо бебегьо-дедегьо кукгьореш нисе гьишдембуге э сегьне варав, соки томошечи бу эри могьлугь, оммо э сиюмуьн салгьо эри кукгьо э сегьне варафдеи бебегьо-дедегьо унгьэде фикир нисе дорембируьт, чуьнки угьо мигуфдируьт: «кук-куки, чуй нум мидануь бире э песой кук, оммо эри духдер э сегьне варафдеи гьич гІемелие кор нисди». Соки угьо хьисоб сохдембируьтки, эге духдер э сегьне варафдге, э сер энунум миварав гуфдире. Эзини вэхдгьо угьо мигуфдируьт: «Нум одоми вадарафдеинжон, жун одоми вадаравгьо хубтеи»...

Шолум э и фикиргьо муьхшуьл гьисдики, гьеебо э гуш энусес Нисим дарафд:

— Себэхь эхэйрбу, Шолум хэлефме! Чуьни туь фикирлуьни? Хэйр гердо! Эки дениширей?

— Суьфделе ведироморем, мугум ишмуш ведиройт, эеки бурайм гуфдире...

— Гьечуниге, кеш.

Угьо евош-евош сер гирдуьт эри рафде э тараф илчи. Ченд жире фикиргьо сохд Шолум, оммо нисе дануьс-дембу чуьтам гофе сер гируьге. Нисим эдембу дире фикирлуьни Шолуме, у вараси э дуьл энунум е гоф дебиреире ве уре гІэйб оморейре эри гофе сер гирде. У э лой Шолум ёново денишире, мугу:

— Эз расдекиш эдее диренуьм, Шолум хэлефме, э дуьлтуь е гоф дери, туь лап фикирлуьни, оммо туьре э хьисобевоз гІэйб оморейре, нисе гуфдире эме. Гу чуй гуфдире воисдеге, гІэйб меевгу.

— Дузи, мере е гоф гуфдире воисдени, оммо терсиренуьм эз ишму.

— Чув? Терсирени чувтам? Е зобуне кор биё бу дие, небуге эйчув биё терси туь эз ме?

— Зобуне кор нисди-о, оммо терсиренуьм ишму рази нибошит гуфдире.

— Дие гу бура-о, чув гуфдиреге гьич метерс, эз десме вероморенигьо кориге рази мибошум, олхоин бош.

— Гьелбет миверов, ишмуре воисдге, невоисдге нэГ. Ихдилот ижиреи, иму э кружок эдее нореним пьесей «Аршин-мол алане»... — сер гирд, эз дур гоф сохдере хуно, Шолум ве, асталей эз зир чум э тараф Нисим денишире-денишире, — оммо эри возире чор духдер гереки, имуре сесе бэгъэй нисди...

— Гьи? Чув? Эле туьре воисдени Гьуьзуьлгуьле бери? — Пуьрси Нисим, екем хуьршлемиш бирере хуно.

— НэГ, гьелбет, лелей Нисим, ишму рази небире ме э Гьуьзуьлгуьлевоз э товун эни кор гоф нисохум. Оммо ишму негьогъ рази нисе биренит. Ини вегирим виним суьфдеи артисткей театр татире Эхсо Шалумове. Уш эз ижире кружокле сер гирди э театр возиреире. Оммо изму биё виниш еки эз дананменде артисткегьой республикеи, тэГрифи энэ э лэгъэй хэлгъ дери. Э товун хуб возиреи энэ э омбаре гозитгьой республикеи нуьвуьсденуьт, нум ю келе хуьрметлуь бири э гЛэрей жэгИмиет, неки шегьер иму, гьемчуьн республикеймуш...

— Имогьой туь гуфдиренигьо Гьуьзуьлгуьлиш тэГрифлуь мибу дие?

— Белки биреш бисдо, ки дануьсде, эз шувгъэм дедей екиш нисе оворде данани ве хэзвеслуьире...

— НэГ, Шолум хэлефме, мере гьеме е духдерлеи, уреш ме э кружок фуьрсоре нисе дануьсденуьм. Гьелбет, нисе бире дануьсде, белки у тэГрифлуьш мибу, оммо эз елойге вегирде виниримге, мидануь бире, ки беднумигьош миварав э сер ю. Мере не у тэГрифлуьш нисе воисде, не у беднумигьош...

— Негьогъ, мере э ишму лап имид бу, ме эз ишму ижире жугьобе гузет не сохдебируьм.

— Чув гуюм э тув ме, Шолум бирорзере, ишму жогылгъо песой коре нисе гешденит, энжэгъ виниренит имбурузине метлеб ишмуре. Тув куки, эритув гIэмел миёв, э сер кук чув нум миданув варафде. Эге тувре воисдениге Содугъэ бер, оммо э Гъувзуьлгуьл мешет мебош. Мере нисе воисде нумме нен духдерме э лэгIэй хэлгъ офдону...

— Бэхшлемиш сохит эме, лелей Нисим, ишму изму дуз гоф несохдит. Эн сувфде иму песой коре гешденим, э биёвгъо рузгъо эдее дениширеним. Параменди культурей хэлгъ иму гъеймогъой э жовонгъо бендуьт. Эри кини биёвгъо рузгъо? Эри жовонгъо нисди? Унегуьре иму биё веним гьемме хъэрекетимуре эри параменди культурей хэлгъ иму эри биёвгъо диеш гуьлшоне рузгъой хэлгъ иму. Мере имиди, ки миёвт рузгъо, иму михътож нибошим эри минет сохде э бебегъо-дедегъо гIэйлгъоре э школа фуьрсуйт гуфдире, э кружокгъо бигьилуьт бэхш вегирде гуфдире. Зиндегуни эдее пушово рафде, у ёгъин мивегируь юре воисдере. Ме данувсденуьм, ки миёв гуфдире ужире вэхд, комики межбур мисоху, неки гIэйлгъоре, гьемчуьн бебегъо-дедегъореш, комигъоки минет мисохут ве михоют вегирим гуфдире гIэйлгъошуре э жергегъойму. Оммо увэхди иму мивегирим гьеммере, мивихим ве мивегирим энжэгъ лоигълуь гьисдуьтгъоре...

Нисим, сере гъуз гирде, эдембу э тигъэтевоз пуш дошде гьер гоф Шолуме. Шолум у гофгъоре э гъэршуй энущ гуфдирембуге, уре эз гоф энущ лап хъэз омо. У шори сохд эз Шолум, эз ижире варасигор ве дананменд бирей энущ. Нисим э дуьл хуьшде муту: «Игъо дузи, земоне э песмундеигъой инсонгъо ниденишув, гIэдот гIуьломи зиндегуни песево нивогошду энжэгъ пушово мирав. Чув рач гуфди эде «Зиндегуни мивегируь юре воисдере»... Хэйли фикир сохде бэгъдо у э Шолум тиж денишире, мугу:

— Уреш данувсде бош бирорзере, ме рази бисдорумгеш, Мирвори зенме э и кор божэхъэт рази бу. Коргъой

гуфдиренигъоре хуно, «Эгъуъл ме нисе бурра» у ишмуре ихдиёр мидуь гуфдире Гъуьзуьлгуьле эри э кружок берде.

— Эге ишму рази бисдоритге, э холей Мирвориревоз иму гоф мисохим.

— Гъуь, ме рази бисдорумге, игъо гоф сохденинуьт э зенмеревоз, — мугу э илгъомевоз Нисим, — хубе девргъои э жун ишму! Ме рази небисдорумге чуй мисохит?

Шолум домунд э хуьшде. У мугу э дуьл хуьшде: «И екем нерм бирере хунои. Коре сер гирденге те эхир берде гереки. Э эзини жигегъо иму борж небердимге, имуре борж миберуьт. Ёгъин борж берде гереки». Хэйли фикир сохде бэгъдо, у мугу:

— Винишит, лелей Нисим, инжо гъэгъри бире герек нисди. Эге ишму эриме кес мибисдоритге, гъунши ве куьнде дусд иму нибисдоритге, ме и меслэхъэте гъич э ишмуревоз нисохдум. Ме гъич эз ишму непуьрсире, Гъуьзуьлгуьле, хоши гирде, мибердуьм э кружок. Ишму куьнде одоми ме бирей, ме у коре ишмуре рази небире нисохум...

— Э гуфдирей туьревоз ме эдее диренуьм, туь Гъуьзуьлгуьлеш хоши мигири, Мирвориреш мигъили рази бире, теки ме рази бошум дие?..

— Эри, гьелбет, — мугу э шориревоз Шолум.

— Пой, пой гъеле шор мебош, ме гъеле рази небирем, эри шор бирейтуь.

Угъо гъечи э дуь-екиревоз ихдилот сохде-сохде, недануьсдуьт кей омуруьт расируьтге э богъгъой колхоз. Эз гъопуй богъгъо гирошде бэгъдо, Нисим, э тегънимиревоз мугу:

— Ме себэхъ жугъоб мидуьм туьре, хэлефме.

Себэхъимуьн Нисим эз гъопу ведироморенге эри э кор рафде, миденишуь мивинуь Шолум гье э у дигъне жиге поисди, сере гъуз гирде. У себэхъ эхэйрбу доре Шолуме, гьердуьшу рафдуьт э тараф илчи. Хэйли рэхъ рафде бэгъдо, Нисим э сифот Шолум денишире, мугу:

— Эхирки, ме эдее диренуым, Шолум хэлефме, туь эз ме дес ниветири, тейте Гъуьзуьлгуьле э кружок небери. Хуби ме разинуым, оммо э и игъролевоз...

— Э чуй игъролевоз? — Пуьрси Шолум, гоф Нисиме бурра, лап бегьем пар вероморе одомире хуно.

— Эвелимуьнжи э хуьшдеревоз мибери, э хуьшдеревоз миёри, дуьимуьнжи э Мирвориревоз гоф сохдеки, небу гуи ме рази бирем гуфдире. Бигьил суьфде ю рази бу, варасири?

— Эри, эри, ишму олхоин бошит.

У руз шохьонгум Шолум, дир несохде, дарафд э хуней Нисимиго. У дироморевуго, Мирвори нуьшдебу э хори, эдембу э тешде хэми сохде.

— Шохьонгум ишму эхэйрбу, холей Мирвори! — Мугу Шолум, гьетте эз дер дироморе.

— Эгъубебттуь эхэйрбу, хэлефме, хэйр гердо туь э лойму веди бирей? Гирор нуьш, хэлефме, э сер нимдер, туьре э лелей Нисимевоз гьуллугьи, эхьисобевоз, имогьой уш миёв.

— Мере э ишмуревоз гьуллугьи, холей Мирвори, — мугу Шолум, гЭйбе-гЭйб, э сер нимдер чорзани зере нуьшде бэгъдо, ве асталей ихдилот сохд метлеб диромореи хуьшдере.

Гофгьой Шолуме шиновусденге, э ёр Мирвори омо у орине шев орине э театр дириго томошей «Пери-хонуме». Нисиме эз колхоз дуь билет доребируьт. Э ёр энумо, чуйтам хэлг э келе чеке-чекгьоревоз вохурдебируьтге э сегьне ведиромореи Эхсоре, комики возиребу Перире. Песде э ёр энумо жогьилию. «Чуй дирейм иму, — мугу у э дуьл хуьшде, — иму недирейм-недирейм, гЭилгьойму семе бигьил винуьт дие...» Песде э ёр энумо чуйтам гЭилгьоре, Содугъ не Гъуьзуьлгуьле э школе норебируьтге. Суьфде гЭилгьоре эри э школе норе нуьвусдегорго э хуне оморенге, Нисим рази небисдо, песдего Содугъэ эз нубохунде вегирд, уш э гужгьой Ёвдоревоз, но э школе. Оммо Гъуьзуьлгуьле э школе нореи-

ре гыч э герде нисе вегирдембу. Энжэгъ ченд салгьо giroшде бэгъдо, гириденгьой Гъуьзуьлгуьле дире, рази бисдо эри норе уре э школе. Гъуьзуьлгуьл изму э чори-муьн класс дери, лап хуб хунде, учительгьош шори сохденуьт эз ю, оммо чуьнтойгьой энугъ нугьгьомуьн-дегьгьомуьн классгьо деруьт «Токи э гоф Нисим нидениши, хэре серме, — мугу э дуьл хуьшде Мирвори, диеш фикир-луь бире, — теимогьой гъилме хуб дануьсдегор мибисдо...»

Омбар фикир сохдеи Мирворире дире, Шолум терси, рази нибу гуфдире ве уре воисд пушой гофе гируь:

— Бебейме муно э е нэхуьй энущ локо нигьилуьм расире, туь олхойн бош, э меревоз миберуьм, э меревоз миёрум. Э ме ихьдибор нисе сохденит ишму, ме кес нисдуьмки?!

— Нэг, нэгI туь мунош, — мугу Мирвори эз фикиргьой хуьшде очмиш бире, — ме э товун энугъ фикир нисе сохденуьм, э дуьлме де фикир-хээлиге дебу, хэлефме. Эге ю не бебешу рази бисдоруьтге, ме мешет нибошум, шориш мибошум...

Эз у рузовоз сер гирде, Шолум эз кор миомо, партал хуьшдере дегиш сохде, мидарафд э хуней Нисимигьо, Гъуьзуьлгуьле вегирде э хуьшдеревоз миберд э кружок. Эз кружокиш угьо эеки миоморуьт э хуне. Е шевиш нисе бирембу Шолум бигьилуь уре тэхьно оmore э хуне.

Суьфдегьо Гъуьзуьлгуьле гъиб миомо эри э кружок оmore. Оммо оmore-оmore у гьечи хуте бисдоки, э хунешу оmore хуно, миомо э клуб колхоз. Гъуьзуьлгуьл зиреке духдер бу, гофе зу вегирдембу. Эзи хосиет энугъ лап хьэз омо Зэхэрьёре. Омбаре вэхд негирошде Зэхэрьё сер гирд эри доре уре главни рольгьоре ве гьеммише, чуьн нишоне бирмунде Гъуьзуьлгуьле, эз бэхшегиргьой кружок у мигуфди: «Артисте биё ижире хосиетгьой Гъуьзуьлгуьл дебу, э у е гофе дуьбо гуфдире герек нисе бире, гьем зиреки, гьем фегьмлуьни, гьемиге э ёр ю гьемме гоф мундени...»

Гъуъзуългуъл эз Шолум чор сал чуьклеш буге, гьемме духдегьоре хуно зу буй вешенд ве угьо гьеле эз гІэилиревоз возигьо омбар сохдет эеки э «Гъинд-гъинчу», «ГІэбеков», «Гирдеки» ведиеш. Гьеле гІэилгьо ве духдергьой мэхъэлешуревоз. Угьо мивозиреуьт увэхдигьош хьэз оморембу уре эз Гъуъзуългуъл, оммо у уре хэгьер хуьшдере хуно хьисоб сохдембу, чуьнки кифлетгьой энугьо эз песигьо, гьечи дусд биребиреуьт, е кифлете хуно зигьисдембиреуьт.

Суьфдеи мэхъэлгьо, э кружок рафдембиреуьтгьош, угьо эекиревоз хэгьер-бироре хуно биреуьт. Оммо оморе-оморе дусди энугьо эдембу муьхькем бире. Шолум эз гъирогъ денишире э буй-балай Гъуъзуългуъл, э дуьл хуьшде мигуфди: «Жейрони-жейрон, мозолллуьни и гьисмет бугьо одоми...» Песде э ёр ю миомо, ки ю э и зуригьо биё э солдати бурав гуфдире, ох кешире сере гъуз мигирд. Уре гьечи хьэз оморембу эз Гъуъзуългуъл, чорей ю мибисдоге, гье имбуруз мигуфди э бебе-дедей ю уре хогьуь гуфдире эрию.

Гъуъзуългуьлиш э нубот хуьшде, чум ю нуьшдебу э Шолум. Гъуъзуългуьле хьэз миомо эз Шолум омбардекиш увэхд, кейки у гоф мисохд э гуьрдлемегьой комсомоли енебуге э меслэхъэти гировундеки э жовонгьоревоз. У, э гоф сохдеки, гьечи э боворинлуьиревоз гофе мигуфди, гуйге ю эз зуревоз хьозур бири гуфдире эри эни гоф сохдеи.

Шолум эри гоф сохде сер мигирдки, гьемме сессуьз э тигъэтевоз э у денишире, гуш мидошд у чуь гуфдиреге. Гъуъзуългуьлиш э тигъэтевоз мидениши э чумгьой энугьо. Оммо эз екемиге, уре гІэйб оморе, сере гъуз мигирд. У гьечи дануьсдембу Шолум, э гоф сохдеки гье э ю денишире гуфдире.

Ченд гилегьо, эз кружок э омореки, Гъуъзуългуъл э имидлуьиревоз мидениши э сифот Шолум, у гьерчуьбисдош мигую гуфдире э ю. Оммо эзу е гоф нисе ведироморембу. Шолумеш воисдембу гуь метлеб хуьшдере

э Гъуъзуългуъл. У ченд гилегъо хьозуриш биребу эри гофе сер гирде, оммо гене гъичиш нисе гуфдирембу.

Ки муъгъбетлуъ бириге дануъсдени, ки муъгъбетлуъе одомире нисе воисде очмиш сохде муъгъбет дуъл юре гъеле-меле. Муъгъбетлуъгъо лап гӀэзиз дошденуът муъгъбет дуъл ишуре. Очмиш сохдеи муъгъбет дуъле угъо хьисоб сохденуът лап мозоллуъе дэгъдэгъэй гӀуъмуър хуъшде, комики верзирени э гъозор салгъош, ве унегуъре уре дошденуът эри е лап шоре вэхд ишу.

Гъе э у тегъер дошдембируът муъгъбет дуъл ишуре Шолум не Гъуъзуългуъл, нисе очмиш сохдембируът эри еки, мигуиге гьердуъй энугъо дениширебируът э е шоре мигӀидлуъе руз, кей гӀэмэл миёвге эри муъгъбет дуъле очмиш сохде.

БОГЪБУР

У сал э колхоз э кор рафдебугъо, Шолум суъфде сохдембу суке коргъоре, оммо поиз оморенге, у сер гирд бил зерере. Увэхди э звено дебирегоргъо гъемме эеки кор сохдембируът. Келете мердгъо богъ буррамбируът, жогъилгъо бил зерембируът, зенгъо тегъенгъоре вечире, богълуъ бесдембируът. Гъеймогъой тегъенгъоре богълуъ нисе бесденуът. Угъоре кура сохденуът э гъирогъ, песе хуъшг биренге, су доноренуът сухунде. Оммо увэхди е тегъенглеш пуч нисе бирембу. Угъоре богълуъ мибесдуът, песе бэхш мисохдуът эри колхозчигъо, сери кифлет е гӀэребе, кими салгъо дуъ гӀэребеш. Чуънки омбардеки могълугъ татгъо умэхъэлигъо нун тонуи буржундембируът, тегъенгъо герек бирембуъруът эри э тону сухунде.

Суъфде богъбургъо мибурри тегъенгъоре, песе зенгъо мивечируът угъоре. Эзунбэгъдойге сер гирде миомо бил зерей. Пушой пишней бире, зенгъо э хиёвон богъ гӀэтош мивеноруът, чой мидушундуът, песе огод мизе-руът мердгъоре: «Ведиройт, гӀэйилгъо, эри нун хурде, чой дуъшири».

Гьемме э звено дебирегорго минушдуэт э иловой гІэтош, эз тогъоргошу ведешенде нун ве гъофуне, сер мигирдуэт эри нун пишнеинере хурде. Э нун пишнеинере хурдеки, еки эз келете одомигъо сер мигирд ихдилот сохдере. У ихдилот мисохд е эз бире гъозие-гъэдергъо енебуге овосунетго. Звеногъо гъечи гуьнжо оморебируьтки, э гьер звено дебирембу е ихдилотсох енебуге овосунехун. Гьемин э звеной эн Шолумигъо дебу мэгІлуьм-луь мэгІнихун-овосунечи Хъызгъий-Эмин (Дадашев). Уре гьемме колхозчигъо, эз келегъо сер гирде те жогьилго вадарафде «Лелей Хъызгъий» огол зерембируьт.

Лелей Хъызгъий, неки бу хубе мэгІнихун-овосунечи, у гьемчуьн бу хубе усдо-богъдорш. У лап хуб дануьс-дембу гьем коргъой онгурбогъдорире, гьемиге коргъой бисду веровундеире ве гьемчуьн де коргъойгей хори-гъуллугъсохиреш. Эз гьемме уре хъзз оморембу гуьлгъо веровундеи. Э хъэт энугъо жуьр-бежуьре жинсгъой гъуьзуьлгуьлгъо вебируьт, комигъоки дуь эз еки рачте бируьт.

Пишнеи э богъ эри нун пишнеинере хурде нуьшденге, Лелей Хъызгъий ёгъин е хубе ихдилот мисохд енебуге е хубе овосуне михунд эри гІэилгъо. Гьер ихдилот у сохдембугъоре, овосуне хундембугъоре е метлеб бу. У е тэгІриф мидо э ихдилот хуьшде хубе жорсохгъоре, нум ишуре не гирде, енебуге э килитлее тегъеревоз очмиш мисохд шефдигъой тембелгъоре, кор колхозе э гуш нисе гирдембируьтго одомигъоре. У гьем хубе несигІэтчи ве гьемиге хубе рэхъбирмуь жовонгъо бу.

Е руз нун пишнеинере э хурдеки, Шолум гъисмет бире нуьшдебу э раче-берачей Лелей Хъызгъий. Эз пей-ле е-дуь дугъ чой хуьп зере бэгъдо, Лелей Хъызгъий мугу:

— Бийт гІэилгъо ме эришму е хубе мэгІэси ихдилот сохум. Бири не бири е падшогъ бири. ГІошири ве девлет энугу лап омбар бири. Оммо уре бири энжэгъ е теке кук, де ферзендиге небири уре.

Ю падшогъ лап эгъуылменде, фегъмгере одоми бири, оммо кук эки оморевуге нисе бирембу дануьсде. У эз себэхъ те шохъонгум гъичиш нисе сохдембу, энжэгъ михурд мигешд. Эзуш бэгъэй у бу пиённиске ве гъуморбаз, те нимешевгъо мундембу рафде э лути-путигъоревоз.

Суьфдегъо падшогъ э и кор унгъэде фикир нисе дорембу, у мигуфди э дуьл хуьшде, жи эвленмиш бисдоге хуб мибу мирав гуфдире. Вэхд омо раси, падшогъ зениш хосд эри кук, духдер эн е падшогъигере, гІэруьси сохде овурд. Куке гІэилиш бисдо, оммо пиённискеи не гъуморбази эзу кем небисдо. Увэхди чорей падшогъ небисдо, огол зе лап куьнде везир хуьшдере ве пуьрси эзу, чуь чоре сохуге эри куке э дузе рэхъ дешенде. Везир, хэйли фикир сохде бэгъдо, мугу:

— Ихдиёр дит ме уре усдо сохум.

Падшогъ рази бисдо. Везир буйругъ до, гъишд овурде е туморе фундугъ ве но уре э ён дер. Э ён туморе поюнд е жолледеш ве мугу эзу:

Э руз ю мигъили кук падшогъе дуь фундугъле вегируь, де екиреш нигъили дес зере.

Эз у рузевоз кук падшогъ, гъемме себэхъ э куче э рафдеки, дуь фундугъ мивегирд эз туморе ве песде мирафд э гешдегъой хуьшде. Оморе-оморе туморей фундугъ варасд. Оммо кук падшогъ хуте биребу э руз ю дуь фундугъ хурде. Туморей фундугъ варасденге, кук дарафд экин бебешу э шуькеет. Гъелэгъи везириш дебу экин падшогъ. Везир шуькеети кук падшогъе шиновусденге, пуьрси:

— Гъери гу, хэлефме, э у туморе ченд фундугъ дебу?

— Гъуь, — мугу кук падшогъ, — кидан, у келе туморей фундугъэш шуморде бирени беге!?

— Дирей, хэлефме, — мугу везир, — унгъэде фундугъ э туморе дебу э шумордеревоз нисе варасденигъо. Оммо туь э руз ю дуь фундугъ бэгъэй нехурдей эзу туморе, генеш туморей фундугъ варасди. Эйчуь эхи? Э сер ю дие фундугъ декирде неомори гуфдире. Мол-девле-

тиш гъечуни, хэлефме, э сер чи—чи неомоге зу миварасуь. Изму бешму келе мерди, оммо туь эдее кучегьоре хурде-гешде. Бешму чендгъэдериш гюшир гъисдиге, эге эри девлет энун хубе сэхьиб небисдоге, э сер энун девлет тозе девлет декирде неомоге, уш зу миварасуь.

И гофгьоре шиновусденге, кук падшогъ домунд э хуьшде, фикирлуь бисдо. Оммо эз у рузевоз куке берд еккере овурд. У гьемме себэхь мидиромо экин бешу ве мипуьрсн эзу чуь сохуге, чуь гьуллугъ энуре веровунде герекиге. Евош-евош у сер гирд эри сэхьибьети сохде падшогъети бешуре.

Лелей Хьизгъийэ э ихдилот сохдеки, омбариш дениширебу э лой Шолум, чуьнки угьо руй-беруй нуьшдебируьт. Шолум мэхьтел мундебу эйчуь Лелей Хьизгъийэ э тараф ю дениширеге ижире ихдилоте э сохдеки. У суьфде и коре э хуьшде кеши, сифот энун бисдо гъип-гъирмизи, уре гъайб омо. Лелей Хьизгъийэ виниренге гьовой Шолуме, мэгълуьмсуьз эз угьониге уре чум зе.

Шолум э чепи тараф хуьшде дениширенге, вараси мэгъэной ихдилоте, лове э суьпуьле хэнде веберд. Э ён Шолум нуьшдебу Довид. Бебей Довидигьо бу еки эз жоборде колхозчигьо. У омбар жофо кеширембу. Оммо Довид бу тембел, у е руз э кор миомо, се рузиге э кучегьо мигешд.

У руз шохьонгум чуьтам биребуге, белкем э гьосутевоз сохдебуге и коре Лелей Хьизгъийэ, эз богъ э хуне вогъшедеки, Шолум не у гъисмет биребируьт эки. Шолуме воисдембу пой вечинуь бурав зуте э хуне, оммо виниренге, ки э юревоз э е жерге Лелей Хьизгъиеш эдее оmore, у евош сохд пой вечиреи хуьшдере.

— Чуьни, недан нисди, — мугу Лелей Хьизгъийэ, — гъечи дануьсдембири ме э товун туь гуьфдиренуьм?!

— Суьфде ме мэхьтел мундум, ишму э тарафме дениширенге э ихдилот сохдеки, мугум белки ишмуреш рази нисди, е парагьоре хуно, иму шохьонгумгьо э репитициегьо кура биреи, оммо песде варасиренге, мере

хэнде гирд. Эриме оморенигьо Довидиш вараси метлеб ихдилот ишмуре, гьип-гьирмизи биребу, чугьундуре хуно.

— Эри, варасири, ме гьеймогьой эз кор э ведиромореки, омори гирди пушой мере: «Мере биёбур, — мугу, — эйчуь сохдит Лелей «Хьизгьийё». — Мугум: «Ме нум туьре негирдемки, хэлефме.» «Негирдейтгеш, гьемме варасируьт, мугу.» Мугум: «Гьемме варасиреи мэгIэнолуь нисди, энжэгь туь варасириге мэгIэнолуьни.» «Меш варасирем, — мугу, — согь бошит». Белки имогьой семе эзу одоми бисдо...

Екем вэхд угьо рафдуьт гоф несохде, песде чуьниге э ёр оморе хуно, Лелей Хьизгьийё мугу.

— Э товун репитициегьошму гуфдирениге, у лап хубе кори, ишму сохденитгьо. Гьевелимуьнжи, жем-жогьил э герексуьзе гешдеигьо, ичкухуригьо мундеинжон, э репитициегьо бэхш вегируьтгьо хуби, дуьимуьнжи у ишму бирмунденитгьо томошегьо келе кумеки сохде э кор не-сигIэт дорей могьлугьэ. Оммо мере э туьревоз э товун е кориге меслэхьэт сохде воисде.

— Э товун чуь, Лелей Хьизгьийё?

— Ме эдем дире туь тегьенге омбар хосде. Эз ки хуте бирей гьечи раче бил зереире?

— Бебе хуте сохди. Э хьэёт иму эхи тегьенгьо вери. Угьоре э бил зереки бирмунди бебе э ме.

— Дануьсденуьм, хэлефме, богьчешму хубе богьчөи. Бебе хубе богьдори, уш тегьенге омбар хосде. Бебе эз ме гьуьзуьлгуьлгьо хосди. Руз шобот миём э лошму, гьуьзуьлгуьлгьош миёрум эри кошде. Ме гуфдиренуьмгьо хуб мибисдо эге туь агрономи михундиге, эз туь хубе агроном миведиромо. Оммо эдем дире туьре гьеймогьой муьгьлет хунде нисди, чуьнки бебе кефсуьзе одомини, э у кумеки сохде гереки эри кифлете дошде. Эге туьре воисдениге, биё ме э туь кор богьдорире хуте сохум. Гоф сох э беберевозиш, фикир сох эритуь. Богьдорире дануьсде хубе кори, гьеммише герекини...

Шохьонгум Шолум меслэхъэти Лелей Хьызгъиёре ихдилот сохденге, Ёвдо, шор бире, мугу эзу:

— Туь биё шор боши, чуьн Лелей Хьызгъиёи богъдор рази бири туьре экин хуьшде э шегуьрти эри вегирде. Уре хуно кор богъдорире ки дануьсде!? Имбурузинере эри себэхьиш мегьил, хэлефме.

Себэхьимуьн Шолум поисдебу э звересер лелей Хьызгъиё ве эдембу томоше сохде, чуьтам у, гьер шив тегьенге тимор сохде, э мушаревоз буррамбуге герексуьзе шивгьоре. Чуьтам гъэйчи э дес дананменде доллок, э сер одомире дуз сохдеки, вежегьисдениге, гьечу эдембу вежегьисде мушар э дес Лелей Хьызгъиё. У, э кор сохдеки, эдембу гуфдире:

— И бошшиви, хэлефме, и дибшиви, и балац, и — деде, иниге гьич герексуьзи... Ире гьечи мибуррим, инигере — гьечи. Имогьой дениш, виниш чуьтам жогьил бисдоге тегьенг...

Гье у руз пушой шохьонгум бире, Лелей Хьызгъиё э Шолум мушаре доре, мугу:

— Гьери имогьой винуьм чуь хуте бирейге туь имбуруз, ги бур е ченд тегьенге.

Шолум, небеледе-небелед, вегирд мушаре.

— Гьечу нэгI, хэлефме, — мугу Лелей Хьызгъиё, — мушаре сэхд мешиш, у энтуь дуьшментуь нисди, туь уре эри тасунде. Мушаре буш ги, кор асант мибу гьечу...

Дуь чуькле тегьенглегьоре бурри Шолум, Лелей Хьызгъиё, рази бире, мугу:

— Ёшше, зиреки туь, зу хуте мибоши.

Оммо э пушой Шолум бутьо сеимуьн тегьенг дуьруьжде тегьенг бу. Шолум домунд э хуьшде.

— ТэгIди месох, хуб фикир сох, вараудуз сох эритуь, комини шив хуб бегьерлуьниге.

Шолум, екем фикир сохде бэгъдо, мугу:

— Ини бошшив... ини и дибшиви...

— Дузи, кор туьре сох.

Эз е-дуь оринейге бэгъдо, Лелей Хьызгъиё ихдиёр

до Шолуме эри тэхьно кор сохде. Гье э е богъ гьерки энугьо е вер вегирде, сер гирдуът эри богъэ бурра. Шолум омбар песо мундембу. У хуышдере кеширембу эзи кор.

— Фикир мекеш, хэлефме, эри песо мундеи. Хуб хуте бисдориге, мере мизени мигирори, — дуъл мидо уре Лелей Хьызгъиё.

Лелей Хьызгъиё гIэре-гIэре миомо мипоисд э зверсер Шолум ве фегъм мисохд, чуьтам у кор сохдениге ве эге мивиниге э кор энугьо е егIэлмишире, гье у туьтем мибирмунд фенд коре.

Э гьечиревоз Шолум хуте бисдо богъбурраре. Дуъл энугьо эдембу тэгIди сохде, кей миёвге вэхд гъэлем зерейгьо, чуьнки Лелей Хьызгъиё имид дорембу уре тегьенг ве доре гъэлем зерейреш хуте сохдени.

ЭЗ АСМУ БУИ ДУРЕ ЭДЕЕ ОМОРЕ

Ёвдо гъэреул бирембу э хьэът контор колхоз. У е сутке э гъэреули мибисдо, е суткейге э хуне дебирембу. У э хуне дебиренбугьо руз евош-евош кор мисохд э богъчей хьэът ишу. Э у эри э богъче кор сохде омбариш Шевеньё кумеки сохдембу, чуьнки Шолум э хуне нисе дебирембу. Руз у э кор бирембу. Шогъонгум эз кор миомо, мирафд э клуб колхоз енебуге эри коргъой комсомолуре гировунде.

Шевеньё эз школе миомо, нун пишнеинере михурд, мидарафд э богъче эри э бешу кумеки сохде. Эз дес ю вероморембугьо коре, Ёвдо ю мисохд, эз дес ю нисе вероморембугьоре, мибирмунд э Шевеньё, уш евош-евош мисохд бешу луддирере. Кими вэхд э Шевеньё эри кумеки сохде мидиромо Содугъиш.

У не Содугъ э нуботевоз бил мизеруът, гIов мидоруът, гъупи мизеруът. Евош-евош угъош эдембируът хуте бире кор богъдорире.

Вэхд поиз бу. Поиз бугеш, руз хубе руз бу. Офтон эдембу шевгъ доре руз васале хуно. Руз шобот бу, Ше-

веньё не Содугъ эдембу э богъче кор сохде. Эри гьердуй энугъо е бил бу. Шевеньё бил мизе, Содугъ мидениши, Содугъ бил мизе, Шевеньё мидениши э у. Ёвдо нуьшдебу э сер скамейка э зир тутдор, комики вебу э миглей богъче, эдембу эз бирорзерей ю, э солдати бугъо, омориго когъозе хунде. И вэхд, дер гъопуре вокурде э хъэет диromo Хъызгъией Эмин. Ёвдо гьетте уре дире, вэхуьшд, когъоз э дес дери, рафд э пушорэхьи энугу.

— Руз туь эхэйрбу, хэлефме, — мугу Лелей Хъызгъийе ве норе э хори э десю дебуго э неме лугуй туморей депичунде бугъо гъуьзуьлгуьлдоргъоре, зиёд сохд.— Эритуй дуь жире гъуьзуьлгуьлдоргъо овурдем, еки зерде гъуьзуьлгуьли, екиге ойдебитени, тух-гъирмизи, мовуте хуно, эз гьердуй энигъо хубе буй оморе. Оммо эз ойдебитен холисе буй етир оморе. Эзуш бэгъэй у эз сер гьеминон сер гирде дуз те эхир поиз гье гуьл дорени. Хубе жинсгъои. Гэилгъо дери э хуне? Огол зе бигьил кошде.

Ёвдо руз эхэйрбуй энуре вогордунде, теклиф сохде, мугу:

— Нуьш ебо, Лелей Хъызгъийе. Омбар согъбоши эри гъуьзуьлгуьлгъоре овурдеи. Туь эйчуь инжимиш бирей овурде, ме миоморум миберд дие.

— Чуь бешгъэй ки овурдге, гурунде чи нисдики... Сусенгуьлгъойме чуьтами? Вероморет?

Гьердуй энугъо э дуьлхоширевоз денишируьт э тараф э жергеревоз э гъирогъ богъче вебируьтгъо сусенгуьлгъо, комигъоки, неденишире э вэхд поиз бирей, гьелеш сип-савз бируьт.

Лелей Хъызгъийе огол зе Шевеньёре ве бирмунд чуьтам векенде герекиге чолекире эри гъуьзуьлгуьлгъоре кошде ве сер гирд эз гъэд неме лугу эй ведешенде угъоре еки-еки...

Шори Шевеньёре гъэдер небу. Уре гьеммише эз гуьл хъэз оморембу. У не Содугъ, пар вероморе одомигъоре хуно, зури-зури чолекигъоре векендуьт.

— Имогьой, хэлефме, — мугу Лелей Хызгъиё, — е
бедре гIовиш биёр.

Содугъ зури-зури рафде гIов оворденге, Лелей Хызгъиё гъишд тар сохде рагъгой гъуэзуьлгуьлгъоре вею э десдин-дес хуьшдеревоз кошде угъоре, гъишд Шевеньёре рач э иловлей энугъо нерме пепелее хоке декирде. Энжэгъ гъуэзуьлгуьлгъоре кошде варасде бэгъдо, у кере тик гирде, мугу:

— Имогъой нуьшдеш гIэмел миёв, хэлефме.

У не Ёвдо нуьшдуьт э сер скамейка. Ёвдо Шевеньёре огол зере, мугу:

— Дара э дедешму гу эриму е пейле чой ведировуну, — песде э тараф Лелей Хызгъиё чаруьсде, пуьрси. — Чутьтами хьол-овхьол туь?

— Лап хуби, хэлефме. Энжэгъ мере игъо кор сохде нисе гъише дие. Вэхд кор сохдей туь нисди, мугу, пери эз ме сернуьш колхоз. Ме кор несохде тоб нидуьм. Мере пишиш сохдге, гене э кор нерафде нибошум... Хьол туь чутьтами? Инжимиш сохдени шулду?

— Гъейгъомой хуби, оммо чи хурде нисе дануьсденуьм дие. Чуьш хурдумге, сер гирдени эри дорд доре.

— ГIэмел нисе оморенигъо чире меху.

— Меш нисе хурденуьм. Оммо генеш гIэре-гIэре дорд дорени...

Сенем ведировунд эз хуне дешенд э пушой энугъо перзине ве но чой, ширинигъо, емуьшгъо.

— И чуй когъози? — Пуьрси Лелей Хызгъиё, эз пейле е-дуй хуп чой хурде, пейлере норе бэгъдо.

— Эз бирорзерейме омори, эз Хьэим кук эз ме келете бугъо бирорме. Э солдатини гIэил, э колхоз иму дебуки, нисе шинохде беге?

— Чутьтам нишиноху? Кук Менешир бирортуь дие. Э граждански довгIо муьрдигъо.

— Эри, эри шинохди.

— Бэхдевере кук бу Менешир. Хуне-хэреб нисди гIэзроиле хуно бу, гъич эз екиш нисе терсирембу. Е руз

э шегьер туркгьо деbugьo мэхьэл, эдембируым эз пушой хунегьой Мухоил Овшолум э лой хуне рафде. Е турк, чумгьоре чарунде, омо пушой мере гирд. У, буйругь дорере хуно, эзме мугу: «Мере хурде воисде, ди э куьф деригьo пулгьоре эри шороб восдоре?!» «Мере пул эзже овори, — мугум, — пул мибисдоге меш михурдум». «Омбар гоф месох, — мугу, — оф эз гьержой туьре воисд». Пушой мере гирди, мере рэхь нисе доре, юш хурде, кефлуьни. Мугум э дуьлме: «Хьизгьийе инжо гуйге энтуь эхир эдей веде бире, чуйтам сохум, чуйтам несохум эз дес эни гьэретикон хилос бошум...» Э куьфмеш е кепик пул недери, фэхьлее одоинуым, мере пул бендегьo неки, худош недори. Гьеебо эзже омо ведиромоге эз диш куче ведироморе, экин иму омо бирортуь ве э хьуьршевоз э сер турк рафде, мугу: «Ме туьре шороб нидуьм, гьэним мидуьм». Ме диеш терсируым, мугум игьo гьеймогьой женг мигируьт, э сереботиме э глэил хэлгь хэто мирасуь. Дарафдуьм э глэрелугь энигьo. Оммо эз хьуьршэну туркиш терси, песово рафд. Песде Менешир эз ме мугу: «Кеш туьре рэхь сохум, Лелей Хьизгьийе, э и сегьo ихьдибор нисди». Дуз берд мере те хунейму рэхь сохд. Мугум: «Кеш дарайм, гьуногь бош». «Нэгл, — мугу, — согь бошит, ме бурам, бебейгьo дуьлпесо мибошут». Мугум: «Дуз э хуне бура-о». «Туь олхоин бош, Лелей Хьизгьийе, — мугу». Оммо ю э тараф хуне нерафд, э лой вокзол рафд. Эзме жейле биренге, миденишуьм мивинуьм эз куьф ю дуьм тапинже ведини. Мугум э дуьлме: «Ерэгь-седэгь эни э жигейюни, унегуьрей и эз туркгьо нисе терсиренигьo...»

— У, неки эз туркгьо, эз молкомутиш нисе терсирембу, — мугу Евдо.

— Хуне оводу, коргьой гуюгьоре хуно, не эз глов терсирембу, не эз глэтош.

— Нетерсирере хуно э глов не глэтошиш рафд, — мугу Евдо, эз кон дуьл ох кешире.

— Уре зеригьо вэхд э шегьер недебируым, э Муыш-гуыр бируым. Унжо хэбер раси э ме Менешире офицер-гьой Бичерахов зерет гуфдире. У э десдей партизангьо дебу дие...

— Ме э есири бируым увэхди. Митой энуре, хээр-мэхьгьою шев эз пэхьники оурдет э хуне. Бебейму э гьомбор гьовре сохди, песе душмегьо эз шегьер вада-рафденге, эз гьомбор векеди э гьоврегьо гьовре сохде...

— Чув г'ов-г'эили эзу?

— Дуь куки, гьердуь э солдатинуьт, еки э хоригьой Киёви, екиге э хоригьой Финляндия, э серхьэд гьуулугь сохде.

— Чув нувьуьсди г'эил э когьоз?...

— Зобуни, Лелей Хьизгьийё, овхьолет...

— Эри, хэлефме, мэг'луьми. Эз асму эдее буй дурей барут оmore. Э угьош гьелбет мэг'луьми дие...

— Э угьо омбарте мэг'луьми. Угьо эдете э чумевоз диренуьт. Хьэим нувьуьсди, ки коргьо зобуни гуфдире. Гье имбуруз-себэхь деди-медеди мибу. Угьо лап омбаре товгьо кура сохдет, хьисоб юре гьэдериш нисди. Омбарिश шефде хоч веригьой. Шефде хоч чьуниге варасирени?

— Чьуни?

— Хоч фашисти.

— Веди бирени, ки куксеге Гитлер угьореш э лой хуьшде чарунди.

— Эри, согъэ Европаре э зир дес дешенди вэхьши, чепгуьзе гьудугь... Оммо уреш гуюм эритуь, Лелей Хьизгьийё, э солдат урус эри вероморе четини. Гитлер нэг'и, келебей Гитлериш эз гьовре вэхуьшде омогеш, урусэ эри борж берде гьуьнер сохде нидануь. Ме эз солдатгьой урус одгьо дирем. Хуне оводугьо эз гьичиш нисе терсиренуьт, гье э миглей г'этош дешенденуьт хуьшдере. Гуниле варасдге э штик не дуьм туфенгевоз женг бер-

денуът. Иму э есири офдоребиримгьо вэхд, туь мивини-риге, чуьжире женг бердембируьтге солдатгьойму! Немцгьо, эз лой расд чеп зере, шев вадабуррабируьт иловлей ротаймуре. Себэхьмунде, мивиним, чор тараф иму вадабурраи, мужинере хуно, немцгьои. Эдете хьэрой дешенденуът, дит гуфдире хуьшдере э есири. Командир иму буйругь до е доне одоми эз окоп неведиров гуфдире. Угьош терсиренуьтгьо нисдуът, вэхьшире хуноют. Шиширенуът оmore, суруй гуьрггьоре хуно. Омбаруът эхи. Эге угьо кем мибисдоруьтге, гьелбет угьо э иму ниверомо, лап омбар бируът. Генеш е доне одоми эз окопгьо невадарафд. Те песини гуниле бугьо додорим. Гунилегьо варасденге, командир буйругь до: «Хьозур сохит штикгьоре». Эз согьэ ротайму энжэгь чуьл одомиле мундебу. Генеш э есири ниофдорим... Э сер гьеркиму се-чор одоми омо, гирдуът имуре, векендуът туфенггьоре. Увэхди чуь мисохи?! Гьеле увэхди девр Николай бу. Солдатгьо чуь одомигьо бируът, жукгьой ко-сибгьо, фэхьлегьо, ранжбергьо... Генеш бегьеме игиди бирмундембируът. У девргьо чуь девргьо бируът, имогьой чуь деври. Э жун гьилгьойме эдее гуфдиренуьм, эге немцгьо э сер иму омоге, гьемме мивэхизуьт — эз келе сер гирде те чуькле вадарафде.

— Э у гоф невери-о... Эге вэхьшиие Гитлер э сер Советгьо омоге, инжо гьэжел хуьшдере миофу. Э метелегьо негьогь нисе гуфдире, ки: «Ки чол векедге, э у чоле ю миофдону» гуфдире. Оммо иники омбаре заралигьо ве бедигьо мибу, омбаре гьов-гьил пуч мибу... Хуней эни вэхьшигьоре «худо вачаруно. Суьфделе сер гирдебирим эри нике рузгьоре дире. Согь гьуьмуьр иму эри гьобонешуьгьэмгьо кемер хуьрд сохдейм. Эзуш бэгьэй гье довгьо бири, гье деди-медеди бири. Еки вадарафди, еки дироморе. Энжэгь э девр Совети сер гирдейм эри динже рузгьоре дире, евош-евош эдембирим э руй вероморе. Нисе гьишденуът дие...

МУЫГЪБЕТЛУЪЕ ДУЫЛГЪО

Суыфдеи мегъ васал бу. Бодондоргъо гуыл лов сохдебируыт. Э богъгъой Дербенд бодондоргъо омбар невебируытгеш, э гьер богъ е-дуй бодондор зиѣдте невебугеш, вергъирмизие гуылгъой энугъо сер гирдебируыт эри вараюнде богъгъоре. Колхозчигъо эдембируыт богъгъоре гъупи зере. И бу суыфдеи гъупи зерей — гъиребир сохдеи. Э вараюсде бодондоргъо денишире, одомиш э хъэ-весевоз кор сохдембу.

Звенон Шолумигъо эри нун пишнеинере хурде нушьдебу. Бригадир Шолумигъо омо до э Шолум не дуй гЪэилиге чуйкле когъозлегъоре.

— Имбуруз омурдет э контор доре, — мугу у.

Звенонвод гъебо дуылпесо бирере хуно, пуърси:

— Угъо чуй когъозгъой?

— ГЪэилгъоре э солдати огол зери, — жугъоб до бригадир.

— Иш гъечи, — мугу, пешму бирере хуно, звенонвод, — гъечинигеш одоми вес нисе сохде эри богъгъоре гъупи зере, хори эдей э логъ офдоре...

Кулокгъой васали сер гирденге, хори богъ, хок ю хуышг бире-бире, сер гирдени эри чэх бире. Эзуни вэхдгъо колхозчигъо мигуфдируыт: «Хори богъ э логъ дери». Э логъ деbugъо хорире гъевелимуынжи четин бире эри гъупи зере, дуймуынжи э логъ дерие хори омбаре зарали зере э бегьер онгур. Чэх бугъо хори зу хуышг бире, э хок энунеми нисе демунде...

Екем вэхд эз екиш гоф неведиромо, гъемме нушьдебируыт сессуыз, могъбул бирере хуно.

— ТэгЪиди сохде гереки, — мугу бригадир, — гъиребире эри варасде те гЪэилгъо рафде. Угъо гъеле эз дегърузиге бэгъдо эдете рафденуыт.

— Рафдени, Шолум, хэлефме? — мугу звенонвод, — имогъой эриму гозитгъо ки михуну?

И гофгъой Шафадъере шиновусденге, гъемме хэн-

дуьсдуьт. Шафадьё зарифетчие мерд бу. Е дэгъдэгъэш нисе giroшдембу, у е килитлеее енебуге зарифете гоф негуфдире. Унегуьре, кими вэхдгьо, у гьич зарифет не-сохдекиш, э гоф энугьемме хэндугьдембируьт. Гьеймо-гьоиш гьемме гьечи дануьсд у эдей зарифет сохде гуф-дире.

— Эйчуь хэндугьсденит?!, — мугу звеневод, ме эдее эз дуьли гуфдиренуьм. Меселен, ме хуте бирем э Шолум гозит хунде ве себэхьоймунде э кор э оморекки гуф-диренуьм э дуьлме: «Гьери виним имбуруз чуь хэбер миёруге Шолум эриму». У, неки хуб хунде гозите, дузе жире андуьрмишиш сохдени...

Шафадьё э суьфдеи довглой гуьломи бэхш вегирде одоми бу. У диреху бедигьой довгоре э чум хуьшдере-воз. Унегуьре гьер э гозит вебирембугьохэбере у э тигьэтевоз гуш дошдембу.

— Туь мивегири, михуни, — мугу бригадир.

Гье Авдалим и гофе негуфди, гьеммеекки шэгъгъэ зере, хэндугьсдуьт. Авдалимиш эри зарифет сохде эз Шафадьё демунденигьохэнебу. У дануьсдембу Шафадьё десхэти нисе дануьсденигьохере, у эри хэнде гуфдиреху у гофе.

— У эри хуьшде, — мугу е зен, — «Гуьл чире, эриму Гуьлверд мичинуь...»

— У дуваздегь пилоконе giroшди, э сиздегьимуьн дери, — мугу екиге.

— Э мэхсере не зарифет кор офдоге, — мугу бригадир, — ишму те шохьонгумиш гоф миофит эри гуфдире. «Ихдилот данани гьурте веруьр», гуфдире э метелегьохэ. Вэхизит кор ишмуре сохит. Меш бурам евош-евош...

У руз шохьонгум Шолум эз кор оморенге, Евдо уре диреху сэгьэт эз гьовой энугьвараси, ки е кор гьисди гуфдире. Нэгь, Шолум могьбул небу, диеш хэндехуь бу. Оммо Евдо лап хуб дануьсдембу хосиет энуре ве унегуьре пурси эзу:

— Чуьни, туь шоре хунои эхи?

— Э ёр туь мунди, туь гуфдиребиригьо: «Кем биренуьт гуфдире кужгьо, э бебе гешдуюгьо жигегьо негешдуюгьо?!»

— Э солдати огол зери?

Шолум сере жумунд «эри» гуфдирере хуно.

— Ме дануьсдуьм, хэлефме, туь э негьогъ нисди гьечи шор гьисдигьо. Гъэйгъу нисд, хэлефме, у гъэрд эн мерди. Дуь сал «е килэхь черх дорей», мирай гъэрд туьре миди, могорди...

Ёвдо эз Шолум эдембу гуфдире ижире гофгьоре, оммо фикиргьой энэ э елойге бируьт. У эдембу фикир сохде э товун гьеймогьоине овхьолет. Э ёр энэ омо гофгьой Хъэим, комигьоки вебируьт э поиз оморевугьо когъоз энэ. Дуьл энэ лап дорихмиш бисдо. Э пушой чум энэ оморуйт поисдуйт ю э довгю дире гьозиегьо. Дуь э песой еки эз пушой чум энэ эдембируьт гьирошде шекуьлгьой бедигьой гьирошде, оммо гьич фурмуш небошугьо хунризе довгю. «Гьу, — мугу э дуьл хуьшде, Ёвдо, — э бебе гешде жигегьо, кукиш биё гешдуй. Гешд, хэлефме, гешд, эри туь гьэруьси оморей...» Ёвдоре хэбер небисдо, кей эз чум ю дугъ гьэрс тигьы бисдоге. У зуризури гьэрсэ покурд э десевоз, Шолум не винуй гуфдире ве тик гирд сере. Шолум небу э пушой энэ. Уре эз фикиргьой дуьл ю хэбер небиребу, кей Шолум э хуне дафадебуге.

Себэхьимуьн, шохьонгум, Шолум, кура сохде комсомлгьоре, гировунд гуьрдлемей комсомолире, эжигей ю секретарь эри вихде. Гуьрдлеме варасде бэгъдо, у гьемме когъозгьой комсомолире э тозе секретарь доре, эз клуб ведироморенге, миденишуь мивинуь Гьуьзуьлгуьл э ю э куче денишири. У хэйли шор бисдо, Гьуьзуьлгуьле э куче диренге.

Гьердуйь энугьо эдембируьт рафде эз ён еки, гоф несохде, э сифет еки неденишире. Чуй фикир сохдембируьт угьо, гьерки эри хуьшде, чуй гьирошдембу увэхд

эз дуьлгьой энугьо. Божэхэт бошуге дануьсде фикиргьо-хэёлгьой муьгьбетлуьгьоре, уш пушой эз еки жейле бире. Ки муьгьбетлуь небириге гьич вэхд нидануь чуьниге эри муьгьбетлуье дуьлгьо эз еки жейле биреи. Э пушой чумгьой муьгьбетлуьгьо шевиш-рузиш бирени чигьрет муьгьбет ишу, э дуьл ишу дебирени энжэгь фикиргьой биёвгьо еклуьгие зиндегуни. Оммо чуь фикир мидебу э дуьл энугьо пушой эз еки жейле бире? Фикиргьо-хэёлгьо эзини вэхд лап омбар биренуьт, ченд ве ченд жирегьою. Екигьо овурденуьт могьбуллуьире, екигьойге имидлуьире.

— Туь гьечи омбар фикир эйчуь кешире? — пуьрси, хэйли рэхь рафде бэгьдо Гьуьзуьлгуьл, гьеебо денишире э сифет Шолум. — Дуь сал чуьни? Эзило мирай, эзилгойге могошди.

— НэгI, бебейтуь муно, ме беге эри энугьо фикир кеширенуьм. Пенж сал зиёди ме секретаруьм, дуьлме екем гурунд бисдо. Асант нисди эз хуте бире кор-пишей хуьшде эри тоймиш бире, эз хьовир-хьэрмэхь хуьшде эри жейле бире...

И гофгьоре шиновусденге, Гьуьзуьлгуьл могьбул бисдо, уре екемлей гьэгьриш омо эз Шолум. «Эз хьэрмэхьгьо, — мугу у э дуьл хуьшде, — ире дердме негирди, энжэгь дерд хьэрмэхьгьо гирди... Ме э куче поисдем тэхьно, э ю денишире, оммо юре дердме гирдеш нисе гирде, гьич е гофлеш нисе гуфдире. «Хосдегоре ки хосди» — гуфдире э метелегьо. Гьэйгьу нибу, гене гьеммише э дуьлме туь мидебоши...»

Гене хэйли мэхьэл угьо рафдуьт гоф несохде, гьер мерд жейле-жейле э фикиргьой хуьшде батмиш бире. Воисдембу ми Шолуме гую э Гьуьзуьлгуьл э товун э дуьл ю деригьо муьгьбет? Гьелбет воисдембу, оммо у нисе дануьсдембу чуьтам сер гируьге гофе. Энжэгь у дануьсдембу, ки э дуьл ю эри гьеммишелуьги жиге гирди гуфдире чигьрет Гьуьзуьлгуьл. Эз елойге у уреш дануьсдембуки, гьич е гофиш негуфдире Гьуьзуьлгуьл ра-

зи мибугьоре. У очугъ мэгІлуым бу эз гьовогьой Гъуь-
зуьлгуьл.

Гъуьзуьлгуьл суьфде екем гъэгьриш бисдоге эз Шолум, гІэдот денилегьои зу гъэгьри биренуьт, эз гьер-чуь бисдо гофиш гъэгьри мибошут, дуьл энугу вогошд. Чорей энугу мибисдоге, угъэл мигирд Шолуме ве гьич евэхдиш эз хуьшде жейле нисохд, хьэрзо нидо.

Гьечи фикир сохде-сохде, угьоре хэбер небисдо кей оморугьт расируьтге э лов дерьегь. ГІэзизе пире Каспиейму, кь мидануь хьисоб сохде, ченд ве ченд муьгьбетлуье жуьфдгьо гировундетге шевгьошуре э сер гьумгьой ловтуь. Ченд ве ченд одомигьо офдетге гьисмет хуьшдере э унжо. Э дуьлгьой ченд ве ченд муьгьбетлуье одомигьо венгесдетге мугьум шаргьойтуь нике фикиргьо ве эшгь хосдеире. Туь шогьод омбаре нике коргьои. Оммо шогьод омбаре бедигьош гьисди. Беге кем бирет бедкоригьо, гировунде оморетгьо э ловгьой туь енебуге э сер сипре шаргьой туь? Дербендигьо эз зуревоз хутеют е могьбуле кор енебуге шорие кор э сер ишу оморенге, оmore нуьшде э лов туь ве ихдилот сохде эри шаргьой туь э товун шори хуьшде енебуге гуьфдире дерд дуьл хуьшдере. Энжэгь сес шаргьой дерьегье шиновусденге, Шолум эз фикиргьой хуьшде тоймиш бире, мугу:

— Эле, иму инжо эйчуь оморейм? Эжигей э хуне рафде, иму э дерьегь оморейм?!

— Эри тен шушде, — жугьоб до э зарифетевоз Гъуьзуьлгуьл, — веке партал туьре, дара тен туьре гІов зе, гьебелкине увэхди семе, фикиргьоре гьишде, екем очмиш бисдори?!

— Эле туь хэрики, гьеймогьой мэхьэл э дерьегь тен шушдеи беге?

Дие Гъуьзуьлгуьл тоб недо. У гьуле деноре э гьуьл Шолум, мугу:

— НэгІ, нэгІ, ме туьре гьечи нигьилуьм вогошде эзинжо, кеш ебо тен туьре шу, екем ишьёр бош эз нэхурдеки пиён бирейгьой туь...

Е-дуй луынг мунде эри э глов расире, Гъуьзуьлгуьл, чорзани зере, нуьшд э сер жигъжигъэгыь, гъул Шолуме кешире нушунд э ён хуьшде.

— Пой ебо, чуй зобуни сохдем ме э туй, мере туй эз хуьшде гъэгыри сохдени? — мугу у, тиж денишире э сифет Шолум.

— Гъэгыри эйчуй? Чуй гъэгырие гоф гуфдирем ме э туй?

— Эз гофгъой туй мэглуьм бирени, эз хьэрмэхьгъо жейле бирени эритуь гурунд оmore, эз ме жейле бирени нэгI...

— Бебей туй муно, эз гоф — гоф меведеше, туй гьеле келе зен небирейки, туйре гьеле невегъо неки, гIэйлгъош нисдики, гьер гофе эри э вор вегирде. Туй эн ме кини, туйш хьэрмэхь мени, лап куьнде дусд ве хьэрмэхь гIумуьрме, эге туй рази бисдориге... — Шолум гъуле дено эз тараф кемер Гъуьзуьлгуьл, эз базуй энугирде, куьнд овурд эз хуьшде.

Гъуьзуьлгуьл сер хуьшдере э гъултугъ Шолум вогосунде, е гофиш негуфди. Шев товуше шев бу, оммо э лов дерьёгъ екиш небу. Шогъодгъой энугъо энжэгъ бируьт гIэре недоре лов дерьёгъе шушдембириуьтгъо гъумгъой ловдерьёгъире глов зере, вогошдембириуьтгъо шаргъо ве э зверсер энугъо поисдебугъо гиргине товуше менг, комики, мигуиге, тигъэт дениширебу э угъо ве эдембу гъэреул сохде угъоре ве гьемчуьн муьгъбет хосдеи дуьл энугъоре, екиш саташ небу гуфдире.

— Виниш асму чуй темизиге, — мугу Гъуьзуьлгуьл.

— Эри, менгиш эдей шевгъ доре, туйре хуно. — Шолум диеш куьнд овурд Гъуьзуьлгуьле эз хуьшде. — Эле туй эдее лерзиреки?! — У, пинджек хуьшдере векенде, дегирд э сер душгъой Гъуьзуьлгуьл. Песде вегирд е ченд жигъжигъэгыьоре, сер гирд еки-еки эри дешенде э дерьёгъ.

Дерьёгъ евош бу, шаргъой энугъо евош-евош, ненуй хундере хуно, эдембириуьт гуйге гьемине мугъумгъоре зенде.

Гьемине кулоксуьзе гьово бу. Ижире гьемине шевгьо, чуй мэхэлиш бисдоге, дуьл одоми хош бире, одоми рэхьэт нефес вокошире.

— Эриме когъоз семе минуьвуьси? — пуьрси Гьуьзуьлгуьл, эз кон дуьл ох кешире, юш вегирде е пенже жигъжигъэгьоре дешенде э дерьегъ.

— Гьелбет минуьвуьсуьм, туь жугьоб дориге, гьем-мише минуьвуьсуьм те серме согъ бугьо. Вэхи бурайм э хуне, дедешму дануьсдге, «эхиртуь — пэхуьри.»

— Чуй? Чуй? — мугу Гьуьзуьлгуьл, хэндуйсде-хэндуйсде, туь гIэилики!..

— ГIэил эйчуьнуьм ме?

— Туь гьечи дануьсдени дедейму нисе дануьсде, иму екире хосдеире? Эз ме не туь, хуне оводу, у зуте дануьсде. Дедейму неки, бебеймуш дануьсдени. Бебе-дедей туьш дануьсденуьт, олхоин бош, хьовир догъи! Бебейму чуй гуфдири дануьсдени эз дедейму и коре дануьсденге?..

— Чуй гуфдири?

— Гуфдири Шолум бэхдевере куки, эзу хубте домор мере нивою, энжэгъ иники бигъисмет мегердо...

— Чуй? Чуй?

— Бигъисмет, егIни гъисметсуьз мегердо.

— Чуй антигъэ гуфдири эде!.. Бигъисмет мегердо! Гъисмет! Гъисмет! — е лугъонде ох кеши Шолум, песеде зиёд сохде, мугу. — Ки дануьсде эжеиге гъисмет ю. Гьелбет э одомиш кор вери, оммо одоми дануьге, чуй-там мибуге себэхьине гъисмет ю, у омбаре коргьо ми-соху...

— Уш дузи... — Мугу Гьуьзуьлгуьл ве домунд э хуьшде. Уре воисдембу гене чуйиге гую, оммо негуфди, фикирлуй бире.

— Эричуь дузи, песой юре негуфдири туь эхи?

— У орине, — мугу ох кешире Гьуьзуьлгуьл, — лелей Ёвдо гуфдири эз бебейму дировуним энгуьшдери нишон

дим гуфдире. Дедейму э ме гуфдиренге, ме рази небисдорум.

— И эриме тозе кори, эз ме не пуьрсире чуьтам гуфдири у, мере хэберсуьз эвленмиш сохде игьо мере?! —

— Туь рази небисдори? Оммо ме пешму бирем эри рази небиреи.

— Нисе дануьсденуьм. Белки небисдорумгеш, чуьнки э ме эз зуревоз мэглуьми, ки гье имбуруз-себэхь биё бурам гуфдире.

Товуш себэхь сер гирдебу эри очмиш бире, угьо эз дерьёгь вероморуьтгьо. Гьетте э диш хунешу расире, Шолум миденишуь мивинуь дедешу не холей Мирвори э сер тукуinei нуьшдет.

— Дирей, — мугу у эз Гьуьзуьлгуьл, — дедейгьо нэхисирет шову, э иму дениширет...

— Туь эзже дануьсде нэхисиреире. Белки гьеймогьой вэхишдет ведироморе.

— Михисируьтге эзини ширине мэхьэл хов вэхиште ниведироморуьт.

Шолум эдембу дузире гуфдире. Мирвори не Сенем неки, Ёвдо не Нисимиш у шев нэхисиребируьт. Гье эз сер шев Ёвдо не Сенем дироморуьт э хуней Нисимигьо. Угьо хэйли нуьшдуьт жуьр-бежуьре ихдилотгьо сохдуьт. Песде Ёвдо гене гоф веровунд э товун энгуьшдери доноре э дес Гьуьзуьлгуьл. Нисим гьеле-меле жугьоб недо. Хэйли фикир сохде бэгьдо, мугу:

— Виниш, Ёвдо бирор, ме не туьни чуьш миданим сохде, оммо белки гьилгьоре рази небу. Биё ижире игьорол сохим. Чуьтам гьилгьоре воисдге, гье гьечу ми-сохим...

Шев эз ниме гирошдебу, мердгьо ихдилоте варасде, дарафдуьтгьо эри хисире. Оммо Мирвори не Сенеме дие хов неомо. Угьо ведироморуьт э пушой гьопу, нуьшдуьт э сер тукуinei, э гьилгьо денишире. Энжэгь Шолум не Гьуьзуьлгуьл эз диш куче ведиромореире диренге, угьо зу дарафдуьт э хуне, гьилгьоре гьэйб неёв гуфдире.

ЖЕЙЛЕИ

У шев э хунешу биригъо ихдилоте, себэхъимуьн Мир-
вори эрию ихдилот сохденге, Гъуьзуьлгуьл е лугъонде
ох кеши эз кон дуьл.

— Охув догълере дегсуьн, хэлефме! И чуй охи?

— У кор эз сер нирав, дедей.

— Эйчуь, хэлефме?

— Ме шову гоф дешновундем э у. Шолум рази нисе
бире. У дузи, дедей.

— Эричуь, хэлефме? Беге эз туь хъэз нисе оморе уре?

— Чуь, гуфдири туь? Хъэз нисе оморе гуфдири? Гъуь
хъэз нисе оморе... У мере эз дуьли хосде, дедей, эз жун
хуьшдеш у мере омбар хосде...

— Дие чуьни беге? Эйчуь рази нисе бире? Ингъэде
эзунигъо биретки, нишон сохде, э солдати рафдетгъо.
Гъеле увэхдигъо, кейки ченд салгъо мундембируьт э сол-
дати. Оммо имогъой чуьни гъеме тегъеме дуь сал бэгъэй
нисди, эзило мирав, эзулойге могошду миёв...

— НэгI, дедей, гъечу нисди. Михъило мисохи, туь нисе
варасире дорун энун коргъоре. Шолум бэхдевере куки.
Дуьл энун темизи, гъобгъой кешонире хуно. — Гъуьзуьл-
гуьл гоф сохде нисе дануьсдембу эз гъирке. Гъирке
эдембу тасунде бугъоз энуре. У гъе хъэрекет мисохд
эри гъиркере эз хуьшде дур сохде. Оммо гъе сер мигирд-
ки эри гоф сохде, гене гъирке миомо мивепичи э ю. —
У эз ме мугу: «Овхъолет гъуьлом зобуни, номусме гъо-
бул нисоху эри туьре э хуьшде богъолуь сохде гъишде.
Гъе имбуруз-себэхъ довгIо мибу, — мугу, — гъе... бе-
белки... ме ни... се вогошдембируьм...» — Дие Гъуьзуьл-
гуьл гъиркере гирде недануьсде, зар дено гирисд ве руе-
зофруво дегешд э сер нимдер.

— Гъэдой рихде гIэрсгъойтуь биёво э дедей. Хуби
мегирис, хэлефме, одохлуш нисдиге, одохлу хъисоби.
Одохлуйтуь э сер рэхъ вери, гирисде, гIэрс рихунде э
сер рэхъ одоми хубе кор нисди, хэлефме. Гъисмет туь

гъисдиге, гъэрд хуьшдере э никиревоз мидуь, согъ саламет мивогорду миёв. Вэхи ебо руй туьре шу...

Гъетте дедешу и гофгьоре гуфдире, гьиркей Гъуьзуьлгуьле, мигуиге кулок берд. У зури-зури вадарафд э гьейву эри чумгьой хуьшдере глов зере.

Песини се-чор руз пушой рафде, Шолум не хьэрмэхьгьой ю, комигьоки миёсд э юревоз э солдати рафде, дие э кор нерафдуьт. Угьо э руз ю э хуней еки минуьшдуьт э межлуьс. Э межлуьсгьо угьо тэхьно нисе бирембируьт. Э угьоревоз эеки кура мибисдо эри межлуьс гирде хьовир-хьэрмэхь, дусд-шинох, хэгьер-бирор ведиеш. Увэхдигьо гIэилгьоре э солдати э рэхь сохдеки, пушоте гуфдире оморигьоре хуно, бебегьо-дедегьо чен е келе суьгIуьдо межлуьс нуьшундембируьт. Хьэрмэхьгьой Шолум уре тэхьно огол нисе зерембу э межлуьс, Гъуьзуьлгуьлеш огол зерембу.

Суьфдеи руз угьоре э межлуьс огол зереbugьо, Мирвори гьевел рази небисдо эри э Шолумевоз э межлуьс рафдей Гъуьзуьлгуьл. Оммо шохьонгум пушой э межлуьс рафде биренге, Мирвори денишире, диренге чутьам Гъуьзуьлгуьл могьбул нуьшдиге, гирисденире хуно бири мундиге, мугу:

— Вэхи воку партал туьре, хэлефме.

Гъуьзуьлгуьле пар вероморере хуно, зури-зури сергирд эри партал хуьшдере вокурде.

Мирвори дениши э балай духдер, суьпуьле хэнде сохде, э дуьл хуьшде мугу: «Кире чуй воисдге гуюгу, дерд гуфди-мугуй энигьо гирди мере, негирдигеш. Э сереботи гуфди-мугуй делилое зугьунгьо гIэил мере чумгIэрси эйчуй битгьилуьм?! Зугьу э нерме жиге дери, гьерчуй-бисдош гуфдирени, оммо эз дуьл одоми екиреш хэбер нисе бире. ГIэилгьойме э нике гъисмет расо, эри нисдие гофгьоре гуфдирегоргьо энжэгъ сиегьруи мимуну мирав...»

Гьер шев эз межлуьс оморенге, Шолум не Гъуьзуьлгуьл минуьшдуьт э пушой гьопу э сер тукуinei. Угьо ми-

денишируйт э сифет еки, ох микешируйт, оммо гьичиш нигуфдируйт. Угьоре эри э еки гуфдире гоф омбар бу. Оммо угьо терсирембируйт гоф сохде, гьечи дануьсдембируйт гоф сохдуйтге, вэхд зу мигирору гуфдире, оммо угьоре воисдембу вэхд дураз кешуь, гьич себэхь небу гуфдире. Оммо вэхд эз инсонгьо нисе пуьрсире, у эдее пушо рафде гьич непоисде. Эге вэхд, непоисде, пушово нирафдге, белки и гьуьломиш гуьнжо ниомо.

Э гьисмет Шолум межлуьс кура сохден офдоребу песини шев. Э хуней энугьо, эз хьовир-хьэрмэхь хэгьербирор ю бэгъэй корсохгьой согъэ бригад ишу оморебируйт. Бригадир энугьо тар хуьшдереш вегирдебу оморе.

Бэхдевере мерд бу Авдалим, дусдихогь бу. У гьем хубе дананменде бригадир бу, гьемиге хуьрметлуье темизедуьле хьовир бу. Эри членгьой бригад хуьшде гьичиреш гьимиш нисе сохдембу. У эз гьэилиревоз хуте биребу э тар зере. Уре екиш, евэгьдош невинири э гьэруьсигьо бурав эри тар зере, оммо э хуней хьовир-хьэрмэхь, членгьой колхоз е шори, е межлуьс мибисдоге, гьич огол незерекиш тар хуьшдере мивегирд мирафд.

Увэхдигьо э коми хуне гьэруьс-духдер мидебисдоге, у кифлете ёгьин тефд бирембу. Меселен, духдергьо э сэгьдуши мирафдуйтге э гьэруьсихунегьо енебуге гьэревоигьо мигирдуйтге, екишу тефд мизеруйт, угьониге э лэгьэревоз мугьум мизеруйт. Э ижире тегьеревоз угьо гьовогьо мизеруйт, гьем мивежегьисдуйт, гьемиге мэгьинигьош михундуйт. Авдалим э межлуьсгьо таре мио-вурдки, гьемме шор бирембируйт. Угьо миофдуйт е тефд зере дануьсденигьо денилере ве мигьишдуйт э Авдалимевоз гьовогьо зере. Э гьечиревоз межлуьс мэгьрифетлуь бирембу. Эге э е межлуьс е хубе мэгьини хундегориш гьисмет мибисдоге, меселен, Хьизгьийё Эми (Дадашев) енебуге Ёвдо, уш омбаре мэгьинигьо ве овосунегьой хэлгьини дануьсдембу, у межлуьс диеш мэгьрифетлуь бирембу. Угьо эз сер межлуьс сер гирде дуз те эхир межлуьс ми-

хундуът раче мэгІнигьой хэлгъире, эз комигьоки гьем хундегоргьоре хьэз оморембу, гьемиге шиновусдегоргьоре.

У руз Авдалим э хуней Ёвдойгьо оморенге, Гъуьзуьлгуьле э пушой гьопу диренге, мугу:

— Тефд туь эжи?

— Э хуне де. Мере тефд биреире эзже дануьсденит ишму?

— Дануьсденуьм дие, нидануьсдуьмге, нигуфдируьмки. Тефд туьре веги диловун э лой лелей Ёвдойгьо. Имишев туь тефд мизени э меревоз. Лелей Ёвдоре мигьилим хубе мэгІнигьо хунде.

— Ме имишев унжо нисе дироморе, — мугу Гъуьзуьлгуьл, лове э назушмендие, гІэйбкешие хэнде веберде.

— Хуби, хуби, наз месох, мидирой, ёгъин мидирой...

Нисе дироморенуьм гуфдире Гъуьзуьлгуьл, гьелбет э вогънеки гуфдиребу. Гьеле хэлгъ бегьем кура небиребу, Гъуьзуьлгуьл не хэгьергилию тефд э дес дери дироморуьтгьо. Гъуьзуьлгуьл э гуш-гуши Ифрод, хэгьергили хуьшде мугу:

— Ме эри тефд зере нинуьшуьм. Тефде веги туь нуьш эри тефд зере. Эвелимуьнжи эзме туь рач зере тефде, дуьимуьнжи... — У домунд э хуьшде.

— Дануьсденуьм, варасируьм, хуби, ме мизенуьм, туь олхоин бош.

Ифрод вегирд тефде, гъич гоф несохде, рафд нуьшд э ён Авдалим, комики эдембу таре куьк сохде. У хэйли совусд тефде э кеф десевоз, пезде чуйниге гуфди э гуш-гуши Авдалим. Авдалим асдалей сере жумунд ве сер гирд эри зере гьовой мэгІлуьмлуье мэгІни Миши Бахшиеве, Ифрод сер гирд эри хунде:

«Бура рэхъ ник, шор биёвош туь ёрме,
Э туьревоз эдее рафдени жунме.
Пэхъни мебош э песогьо, э куьнжгьо,

Эйтуь Ватан жумек мибу э унжо.
Мере имиди туь могорди гуфдире,
Игид бегем эз муьшд дуьшме офдоре?!..»

ЕгІэлмиш небире мибу гуфдиреки и мэгІнире Миши Юсупович у салгьо нуьвуьсдебу гуфдире эри э ижире межлуьсгьо хунде. Э солдати э рэьх сохдеки е межлуьсиш нисе гирошдембу и мэгІнире не хунде.

Суьфде Ифрод эдембу тэьхно хунде мэгІнире, эз песи гьемме э межлуьс дебирегоргьо э е лэгІэ сер гирдуьт эри уре гьувот доре, мэгІни хунде.

Омбаре гофгьо гуфдире омо у шев э товун Шолум, омбаре мэгІнигьо хунде омо, Ёвдош тоб недо не хунде. У омбариш хунд эз мэгІнигьой «Ошугь Гьэриб». Межлуьс варасденге, э вадарафдеки Авдалим пуьрси эз Ёвдо:

— Туь ченд мэгІни дануьсде эз «Ошугь Гьэриб».

— Ченд чуьтам? Гьеммере дануьсденуьм. Ихдилотеш, мэгІнигьореш эз сер те эхир гьеммере дануьсденуьм.

— И дес э межлуьс гьисмет биреки, мигьилим гьеммере хунде э ихдилотевоз.

— Э сер чумгьойме!

— Дорд недуь, согь бошит.

Э межлуьс кура бирегоргьо рафденге, Шолум не Гьуьзуьлтуьл гене нуьшдебируьт э сер тукунеи.

— Ини омо песини шевиш, — мугу Шолум. — Себэьх «дуду», дие мере нивини...

— Эйчуь нивинуьм дуьргердо? Шор мирай, шор миёй. Дуьлме герми, чуьтам имишев Ифрод э мэгІни гуфдиге: «Мере имиди! туь могорди гуфдире».

Дургу гуфдирембу Гьуьзуьлтуьл. У эдембу Шолуме дуьл доре. Оммо гьетте ижире гофгьо вероморе, дуьл эну гьэребечдоре хуно лерзирембу. Кими мэхьэлгьо эри эну гьечи оморембу ю дие Шолуме гьич нивинуь гуфдире...

— Гьетте оморе э жигейтуь расире когъоз нуьвуьс-о. Ме и шевгъо гъич нэхисирем. Нисе дануьсденуьм туь рафде бэгъдош мере хов миёвге енебуге нэгI, мере чумэрэхь мегъил, когъоз омбар нуьвуьс. Эри гьер гоф туь тешне мибошум.

— Меш нэхисирем, оммо эриме гъечи оморени, туь мере зу фурмуш мисохи гуфдире...

— Туь белки сохди, ме нэгI. Эри мердгъо чуьни, э метелегъо гуфдиренигъоре хуно: «И мебугу, у бугу».

— Эйчуь гъечу гуфдире, Гъуьзуьлгуьл? Туь беге э дуьлмедарафдей ведироморе?

— Эри дарафдем. Нидарафдуьмге, гъечи хосдеш нихосдум.

— Олхоин бош, ме э туь гъич хогъин ниведиром.

— Бебейме муно, ме эз туь лап олхоинуьм. Токи туь фикир омбар мекеш, дор хуьшдере, имидлуь ве дуьлшор бош...

Угъоре гъеле гофгъо омбар бируьт эри гуфдире эеки, оммо очмиш биребугъо бур себэхь ве сесгъой суьфдеи хурузгъо мэгIлуьм сохд э угъо, ки дие вэхд гоф сохде нисди гуфдире.

— Чуь зу себэхь бисдо, — мугу Шолум, ох кешире.

— Себэхь зу небири, у эриму оморе зу бири гуфдире себэхь. Себэхь вэхд хуьшдере дануьсдени кей веровге. Энжэгъ муьгъбет дуьлгъойму зу варасунд вэхд имуре.

Уре дуз гуфди Гъуьзуьлгуьл, шев соймишигъо гъеммише кутэхь бире, угъоре гъич вэхд вес нисе сохде. Муьгъбетлуье дуьлгъо гъичвэхд сирои нисе биренуьт эз еки.

Хурузгъо эдембируьт дуь э песой еки гIуьгIуь зере, эз куче веди биребируьт суьфдеи рэхьгироргъо э кор рафдегоргъо, Шолум не Гъуьзуьлгуьл эз еки согъбоши гуфдире, жейле бисдоруьтгъо.

Э вокзал Дербенд омбаре одомигъо кура биребируьт. Гъемме оморебируьт эри гIэилгъоре э солдати рэхь сох-

де. Сенем э е гъирогъ поисде, чемодан Шолумеш э ён хуышде норе, эдембу гуым-гуьми сохде. Екем дурте поисдебируьт Шолум, хьэрмэхьгьой энугъ, Ёвдо, Нисим, Гъуьзуьлгуьл... Гуьм-гуьми сохдей Сенеме шиновусде, е командир, комики оморебу эри Шолумигьоре рэхь сохде, жуьнд бире эзу мугу э зугъун уруси:

— Гирисде герек нисди дедей, кук ишму командир мибу...

— Согъбоши, хэлефме, жун ишму согъ гердо, э сер дес ишму дес меево, бедигьоре худо дур сохо.

Гьелбет командир е гофиш невараси эз гофгьой Сенем, оммо у дануьсдембу зен эдее эришу лово хосде гуфдире. У гъэл гирд Сенеме, согъбоши гуфди.

Ивэхд поезд диромо э перрон ве гьер командир, сер гирд жейле-жейле эри э вагонгьо венуьшунде десдегьошуре.

СУЬФДЕИ БЕДИГЬОЙ ХУНЛУЬЕ ДОВГЮ

Гьеле се мегъиш небу Шолум э солдати рафде, руз гьеминон бу, эз герми чуьшме одоми эдембу серине жиге гешде. Шевеньё не Содугъ, каникулгьош буге, гьемме руз рафдембируьт э хуней пионергьо. У руз угьо эз хуней пионергьо э омореки, гьовой шохьонгум бу, миденишуьт мивинуьт э пушой кинотеатр лап омбаре хэлгъ кура бири. Инжо гьемме шохьонгумгьош одомигьо омбар кура бирембируьт. Оммо имбуруз лап зурбое жэгмет кура биребу, оморегоргьо дие эзунжо нисе рафдембируьт, поисде гуш дошдембируьт радиоре. Эз радио эдембу оморе жуьргъатлуье сес. Гьемме унжо бирегоргьо бируьт могъбул ве гъичиш нисе гуфдирембируьт, э дуьекиревозиш гоф нисе сохдембируьт. Угьо екем гуш дошденге радиоре, Шевеньё э гуш-гуши Содугъ мугу:

— Довгюи, довгю сер гирди...

— Эри, — мугу Содугъиш евошллей.

Сифетгъой эн гьердуй энугъо бисдо тор ве могъбул-луь. Угъо поисдуьт гъе э у жигешу, сес несохде. Угъо, неки гоф сохде, жуьмуьсдеш нисе жуьмуьсдембируьт, мигуиге киниге угъоре шириш зеребу э у жигей куче вогосунде. Сес эн э радио гоф сохдембугъо мерд поисденге, могълугъ сер гирд эри еки-еки лов бире, келе-келе гоф сохде-сохде. Еки эдембу гуфдире: «Омбар никешуь, тембихьи куксеге фашистгъоре лешгер Совети зу мидуь», еккегъойге дорун коре варасирегоргъо мигуфдируьт: «И келе довгюи, у э асантиревоз варасденигъо нисди». Гьерки ежире гоф эдембу гуфдире. Екем поисде бэгъдо Шевеньё не Содугъиш рафдуьт рэхъ хуьшдере. Рэхъ рафдей энугъо гъечу буки, мигуиге угъо согъ руз гурунде кор сохдебируьт ве изму эз хэсдеи рэхъ рафде нисе дануьсдембируьт.

Чуьтами кор бисдоге, угъо недануьсдуьт, оммо, эжигей э хуне рафде, оморуйт э контор колхоз. Хьэёт контор колхоз одоми пур бу. Инжо кура биребируьт, неки мердгъо ве зенгъо — членгъой колхоз, гъемчуьн глэйгъош, лап пире мердгъо ве зенгъош. У руз Ёвдо э кор бу э хьэёт колхоз э гъэреули: Шевеньё не Содугъ эз глэрелугъ кура бирегоргъо гьер-чуьтариш бисдо гиросде, рафде поисдуьт э пушой Ёвдо, сергъоре гъуз гирде, эзи «Гювункоргъоре» хуно, гуйге ишу эри чуь кориге тэхсиркор бирере хуно. Шевеньё эз зир чум дениши э сифет бебешу ве вини чуьтам у могъбул буге, чумгъой энугюв-гюви биребу мунде. Инжош гьерки эдембу е гоф гуфдире, э эгъуьл ки чуь оморембуге. Шевеньё нисе дануьсдембу комини энугъо дузире гуфдиреге. Энжэгъ у дануьсдембу, ки довгю сер гирди ве унжо э дуригъо одомигъо эдете пуч биренуьт, муьрденуьт гуфдире.

Руз э шев гъэриш бире-небире бу, сернуьш колхоз э линейке вери омогъо. У, э линейке бегъем поисдеш неденишире, шенд хуьшдере эз линейке, диromo э миглей жэгмет. Гьетте уре дире, гъемме поисдуьт сессуьз, гуш

доше чуй тозе гоф мигуюге у. Сернуыш колхоз кутэхэ жире мэгІлуым сохд э кура бирегоргьо э 'сер Ватан беде душме омореире ве гуфди ки хуышдере дуыл доре гереки гуфдире, гъувотгьоре гуьрд сохде эри душмере бесгъун доре. Песде у хунд фамилегьой одомигьоре, комигьоки себэхь ёгъин биё буравт э военкомат эри э довгІо рафде.

— Имогьойле, — мугу у э эхир гоф хуышде, — бригадиргьо поит, угьониге бурайт э хунегьошму. Эз ишму инжо поисде эри е кориш е кумеки нибу...

ЖэгІмет сер гирд евош-евош эри э хуне рафде. Хэлгъэ нисе воисдембу э хуне рафде, мигуиге ишу инжо лап герекинуыт гуфдире. Ехэйлигьо рафде бэгъдо, сернуыш колхоз кура сохд бригадиргьоре ве гуфди ки зу э гІэсбгьо венуышде, буравт гуфдире э дигьгьо эри повесткагьоре бэхш сохде ве бирмунд ки э коми дигь биё буравге.

— Повесткагьоре э контор диройт вегирит, — мугу у эз пилонконгьой контор э варафдеки.

Эз дегь-паздегь минутиге бэгъдо, бригадиргьо э кул гІэсбгьо венуышде, эз хьэёт контор вадарафде, чопологъэ хуно гьей сохдуыт гІэсбгьоре. Э хьэёт контор дебрирегоргьош евош-евош, сере гъуз гирде, думитлуь, гьошгьобогълуь, рафдуыт э хунегьошу. Ёвдо э сифет Шевеньё денишире, мугу:

— Чуй сохденит инжо поисде, хэлефме, дедейгьо дуылпесо мибошут, бурайт э хуне...

Шевеньё не Содугъ, гъичиш негуфдире, сергьоре гъуз гирде, рафдуыт э хуне. Угьо, гьелбет, гьеле нисе дануысдембируыт биней коргьоре ве 'бегьем нисе варасирембируыт чужире бедигьоре миёруге довгІо. Оммо гьердуый энугьо лап хуб варасирембируыт, ки келе беди омири гуфдире э сер хэлгъ

— Шиновусди? — мугу Шевеньё, — омбаре бомбгьо шенди, мугу э сер Киев ве де омбаре шегьергьойге...

— Эри, фэгъире одомигъо, чуйтам мибошут угъо э зир бомбгъо...

Эже рафдуът шоре возигъой гІэилгъо, хэндее зарифетгъой энугъо, фикирсуьзе гъэйгъусуьзе зиндегуни гІэили. Неки келегъо, гІэилгъош биребируът фикирлуь-думитлуь. Мигуиге э гъэриш е руз угъоре бердебируът еккейгегъоре овурде. Мигуиге э гъэриш е руз угъо рэхь сохдуът, неки вэхд гІэилире, гьемчуьн вэхд жовониреш ве, зу вероморе, келе бисдоруът.

Экуьнди гьемме руз Содугъ не Шевеньё мирафдуът э кино. Е руз Шевеньё михосд эз Ёвдо пул, е рузиге Содугъ эз Нисим эри э кино рафдешу. Нисим не Ёвдо угъоре пул мидоруът, неки эри э кино рафде, гьемчуьн эри хурузгъой гъэнфити восдореш. Омбаре вэхдгъо Ёвдо енебуге Нисим, гъич гІэилгъо пул нэхосдекиш, огол мизеруът угъоре ве мигуфдируът:

— Ги, хэлефме, эри киношму...

Гье эз суьфдеи руз довгІо сер гирдеиревоз угъо дие кино чуьниге недануьсдуът, дие дуьл кино винире небу угъоре, э дуьл энугъо де фикиргъойге дебируът. Оммо гьердуьй энугъо гьемме руз пушой шохьонгумгъо мирафдуът э пушой кинотеатр э у вэхд, кейки доре оморембируът мэгІлуьметигъой Информбюрой Совети ве гьетте э хуне оморе чуь унжо шиновусдембируътге ихдилот сохдембируът эри бебегъо. Гьелбет, омбаре гофгъой урусире угъо гьеле хуб нисе варасирембируът, оммо мэгІэной мэгІлуьметире варасирембируът.

Хэбергъо руз-беруз эдембируът зобу бире. Сеимумьн июль И. В. Сталин, экин хэлгъ совети руй бире, э радио гоф сохденге, эз сер те эхир гьемме гофгъой энуре гуш дошде бэгъдо, Шевеньё не Содугъ зури-зури оморуът э хуне. Нисим не Ёвдо нуьшдебируът э зир тут-дор эдембируът гозит хунде ве э дуь-еки андуьрмиш сохде мэгІэной э гозит вебируътгъо гофгъоре.

— Бебе, — мугу Шевеньё, шор бирере хуно, — дануьсдени чуьниге?

— Чувни, хэлефме?

— Э радио Сталин гоф сохди. У мугу: «Кор иму дузини, иму ёгъин бесгъун мидим душмере! Гуьрд бошит, хьовиргъо эри беде душмере бесгъун доре!»

— У дузи, хэлефме, ёгъин бесгъун мидим. Э сер Ватан иму Наполеониш омори, шведгъош омори, Австро-Германиеш омори. Гьеммей энугъо э шугъомо венгесде оmore, сергердехуьрд вогордунде оmoreт эз хори Ватан иму. Э сер жовоне хуькуьмет Совети экуьнди гьемме вилеетгъой капиталисти оmoreбируьт, э угъо гъеле гъобонешуьгъэмгъош, хун имуре ченд садсалигъо кеширетгъош кумеки сохдембируьт. Гьеммей энугъо гъовол зерезере оmoreт, вой зерезере вогошдет. Олхоин бошит, вэхъшие фашистгъош гъечу мибошут!..

Шолум э шегьер Гомель гьуллугъ сохдембу. Дуьимуьн орине бу довго сер гирде эзу когъоз омо. Суьфде рафдебугъо мэхьэл эзу когъозгъо омбар оmoreмбируьт. У эй Нисим жейле, эй Гъуьзуьлгуьл жейле, эй Ёвдо жейле ве гьемчуьн эй Шевеньё жейле нуьсвуьсдембу когъозгъоре. Оммо эз довго сер гирде эйлоревоз и суьфдеи когъоз бу эзу оmoreбугъо. У омбаре гоф нунуьвуьсдебу э когъоз. У, кутэхъэ жире мэглуьм сохде э товун согъи-саламети нуьвуьсдебу: «Дануьсденуьм, бебе, туь беде дире одомини гуьфдире. Унегуьре ме эз туь гъичиреш пэхъни нисе сохденуьм. Эйме оmoreенигъо туьш вараширени овхьолете. Беде женг эдег гирошде. Имуш хьозур бирейм, гъе имбуруз-себэхъ э женг мидарайм. Мере имидики гьемме хуб мигирору гуьфдире, дуьлме герми, бебе. Дуьл дит хуьшдере.»

Гъе у руз шохьонгум Нисим э лой Ёвдойгъо диromoренге гуьфдики эришуш когъоз омори гуьфдире ве э когъоз ишуш е зиёдие гоф невери гуьфдире, эз согъи-саламети бэгъэй. Екем нуьшде бэгъдо, Нисим э сифет Ёвдо тиж денишире, мугу:

— Эдем рафде, Ёвдо.

— Эже?

— Э довго.

— Эритуыш повестке омери беге?

— НэгI. Ме хуышдениме рафдем хосде. Нисе дорем-бируыт, и се руз гье бердет, гье оворде мере, эхириш имбуруз доруыт. Персебэхь биё бурам...

Ёвдо, диеш фикирлуй бире, эз кон дуыл ох кеши.

— Туь ох эйчуь кешери?

— Чуьтам ох некешуым?!. Туре кифлети, гIэйилгьои... Угьо чуьтам мибошут песде?

— Чуьтам и хэлгъ бисдоге, угьош гье гьечу мибошут. Е лугъэ нун эришу гьер-чуьтар бисдош миофут. Гьуьзуьлгуьл эдей э госпитал дарафде эри кор сохде; сер гирдет яралуьгьоре овордеире. Мирвориш мирав э колхоз кор мисоху э и зенгьойгеревоз. Е Содугьи? Эри е тэхьно Содугъ дуьдуьй энугьо е лугъэ нун нерасунде нибошут. Гьечиниге, туьш э гIэйилгьо мидениши дие...

— Эзу кор олхоин бош.

— Е жогьиле гIэйилгьойму эдете рафде, жун хуыш-дере норе. Дие ме эри коми руз мундем. Кумеки сохде гереки э гIэйилгьо. Олхоин бош, дуьшмере бесгьун мидим, мивогошдим. Гьеле омбаре вэхдгьо минуьшим ме не туьни эри чой хурде ве ихдилотгьо сохде...

Себэхьимуьн Ёвдо э гьэреули бу э контор колхоз. Шохьонгум Сенем до э Швеньё нун не гьофун эри бебешу беруь гуфдире. Шевеньё эри бебешу хурек оворденге, миденишуь мивинуь у нуьшди э будкей гьэреули хуыш-де, э сер зани энугьо верэгъ когьоз вери ве эз чумгьой ю эдее тигьле-тигьле гIэрс оморе...

— Чуьни бебе, туь эдее гирисдеки?

— Хьэим, — мугу у... Гене э ю гьирке величире, дие гоф сохде недануьсд. У вегирд когьозе до э Шевеньё.

Шовеньё хунд когьозе. Еки эз хьэрмэхьгьой Хьэим, э уревоз э солдати гьуьллуьгь сохдембугьо эри е хьэрмэхьигешу нуьвуьсдебу: «Беде женг эдее гирошде. Ди э сер иму суруй гуьргьоре хуно дуьшмегьо оморебируыт. Келе женг гирошд. Дуьшмере поюндим, гирошде негьиш-

дим, оммо омбаре хьовиргьойму жун хуьшдере норут э мейдуй женг, э гIэрей энугьо Хьэим бирор имуш. Суьфде ме омбар гешдуйм уре э гIэрей зинде мунде солдатгьо, оммо не офдум. Себэхьмунде иму муьрдегьоре кура сохде э гьоврей бирори э гьовре сохдеки, э гIэрей энугьо Хьэимеш дириуьм...»

И гофгьоре э хундеки Шевеньёре хэбер небисдо, кей эз чумгьой ю сер гирдге эри гIэрс тигьи бире.

— Мегирис, хэлефме, — мугу Ёвдо. — Веги бер хуреке э хуне, мере дие гисне нисд. Гу э дедешму бурав э лой Хьэимигьо. Лелей Шемерьё гьеймогьой миёв эжигейме мипою, меш мирам унжо...

Шевеньё э хуне оморенге, гирисдеи энугье гьечу мэгIуьм бу. Сенем терсире, пуьрсидзу:

— Чуьни? Ки зери туьре, хэлефме?

— Екиш, дедей. Метерс, мере екиш не куфди. Бебе мугу э лой Хьэимигьо бура мугу эз туь.

— Эйчуь, хэлефме, чуьни бега?

— Хьэ-и-м.. — мугу Шевеньё ве дие гоф сохде недауьсд, э у гьирке вепичире, зар дено гирисд...

Сенем вараси, сер гирд эри гьутинегьоре векенде ве е сие сефгире э сер хуьшде дегирде, рафд видов-видов.

Сенем тозе гIэруьс бугьо вэгIдо, шебирор энугье э гражданди довгIо куьшде оморенге, хьомбожуй энугье дуь гIэилгьоре шенде, рафдебу э шуьвер э е гьуьбеи. Ёвдо не Сенем гIэилгьоре экишу дировунде, келе сохдебируьт. ГIэилгьо э руй вероморенге, чуьклеи, Миши, нум хуьсуьр Сенем рафдебу эй хунде. Хундеире варасденге, уре фуьрсоребируьт эри кор сохде э хоригьой Киев. Хьэиме Ёвдо эвленмиш сохде, жейле сохдебу... Чуьтам гурунд ниёсд оморе эри Сенем, эхи ю дошдей. Гьелбет кеме догь нисди, Хьэимиш бебере хуно э мейдуй довгIо мунди...

Сес гирисдей Сенеме шиновусденге, э лой энугьо зур-зури дироморуьт Мирвори не Содугь. Мирвори гьэ-гьигьэт коре дануьсденге, дарафд э хуне, уш сие сефги дегирде, видовусд.

Шевеньё э юревоз Содугъиш э хуней кукГэмлей хуыште оморенге, миденишуь мивинуь хьэёт одоми пури. Хьэёт келе бу, е ченд кифлет дерие хьэёт бу. Эзуни келе хьэётгьо э Дербенд гьевел омбар бируьт, кимигьошу гьеймогьоиш мундет. Оммо генеш э хьэёт эри дарафде жиге небу эз одоми. Омбардеки хэлгъиш зенгьо бируьт. Ченд зен э хьэёт дебируьтге, гьемме зар деноре эдем-бируьт гирисде. Э Дербенд когъоз э довгю муьрдеи суьфде эз Хьэим оморебу. Унегуьре лап омбаре одоми-гьо кура биребируьт. Суьфдеи мегьгьой довгю ижире когъозгьо миомоге, экуьнди гьемме жэгмет Дербенд кура бирембу. Оммо песде ижире когъозгьо сер гирденге дуй э песой еки эри оморе, дуьл хэлгъ сэхд биребу рафде, хэлгъ хуте биребу э ижире когъозгьо ве унегуьре дие унгъэде одомигьо кура нисе бирембируьт.

Э е куьнж хьэёт мердгьо дуразе тэхдегьоре э сер куьрсигьо веноре, скамейкере хуно, норе нуьшдебируьт. Э минжи хьэёт зенгьо э пой поисде эдембируьт гьейвой-гъызар сохде, гирисде. Е зен мигуфди е ченд келме гофе ве гьейвой-гъызар мисохд, песде э уревоз гьейвой-гъызаре гьемме зенгьо вогогьруш мисохдуьт...

Шевеньё не Содугъ чумгьошу гюв-гюви бире, поисде-бируьт э е гъирогъле, хэйли гЭилгьой мэхьэлеш кура бире, поисдебируьт э ён энугьо. Гьеммей энугьо могьбул бируьт, гъэгьр вечире одомигьоре хуно, тиж денишире-бируьт э лой зенгьо.

Ки дануьсде чуй зенде оморембуге увэхди э дуьл энугьо возигьой гЭилире эз вэхд зуте фурмуш сохде гЭилгьо? Гьебелкине угьо эдембируьт гуфдире э дуьл хуыште, эйчуй ишу чуйкелелеют гуфдире небуге мирафдуьт эри гъэгьре ведешенде эз нэглетлуье дуьшменгьо...

Эз миглей эни жевгъ ве гьейвой-гъызар э гуш Шевеньё эдембу дарафде сес дедешу, комики эдембу гуфдире:

— Бел залуме дедее гирде, э песой дедей видовусде, юре пиш сохде, э чул мунде Хьэимлей Менешир. Эри зенгЭимле менэхьэфи сохде-сохде, келе бире Хьэимлей

Менешир. Бебе э писеревоз э жергей келе пулк солдат поисде, э залуме душмеревоз женг берде, хъэрекет сохде эри пушово рафде, э шугъомо офдоре Менеширле, Хъэмлейме гъейвой-гъызар... ивой-гъызар!..

— Хъэм э беберевоз гъейвой-гъызар!.. — эдембируът вогогъруш сохде гъемме зенгъо э е лэгІэ.

ВИРИХДЕГОРГЪО

Гъе эз суьфдеи орине довгІо сер гирдебугъо, э Дербенд сер гирдуът эри овурде яралуьгъоре. Эшелонгъой яралуьгъо эз станци Дербенд гиросдембируът гІэре недоре. Эз гьер эшолон е ченд яралуьре фуравундембируът э Дербенд. Кими взхдгъо согъэ эшолон яралуьгъоре фуравундембируът ве тие эшолон гъе эз Дербенд мивогшд э довгІо гене эри яралуьгъоре овурде.

Эн суьфде школей Шевеньейгъоре сэхд сохде, гІэилгъоре гировундебируът эри хунде э училищей тербидорегоргъо, школере чарундебируът э госпиталь. Песде э госпитал чаруьсдуът хуней пионери, гъуногъхоне, комики гъисди э кучей Ленин, школей рэхъ гъовуни ве де дуьруьжде хунегъойгей шегъериш. Оммо эз екемиге училищей тербидорегоргъош биребу госпиталь. Е ченд школгъоре гуьрд сохдебируът ве гировундебируът э екимуьн школей шегъер, эжеки хундеи гиросдембу э се сменагъо.

Э мегъ сентябрь э школегъо хундеи сер гирденге, Гъуьзуьлгуьл дие э школе нерафд. Оммо гъемме шохъонгум у, е дефдерлере вегирде, мирафд эжеиге. Дедей энугъо, Мирвори егиле уре диренге, дефдере вегирде э рафдеки, пуьрси эзу:

— Имэхъэли эже рафде туь, хэлефме?

Гъуьзуьлгуьл домунд э хуьшде, недануьсде чуь гуюге. Э военкомат Дербенд гуьнжо овурде оморебируът се мегъине курсгъой медсестрагъо эри э госпиталгъо кор сохде. Гъеле э мегъ август сервор пионергъой школей Гъуьзуьлгуьлигъо кура сохденге хундегоре духдергъой

нуьгьимуьн ве дегьимуьн классгьоре ве гуфдиренге, ки угьо э хогьиши ве разимендишуревоз мидануьт нуьвуьсде гуфдире хуьшдере э курсгьой медсестрагьо, Гьуьзуьлгуьл, шор бире, эз гьемме пушоки нуьвуьсдебу хуьшдере. Суьфдеи оринегьо, диренге Гьуьзуьлгуьл шохьонгумгьо эжеиге рафдеире, Мирвори гьечи дануьсдембу, ки у э репитициегьой драмкружок рафде гуфдире э клуб колхоз. Оммо гІэйлгьо э школе рафдере сер гирде бэгьдо, Гьуьзуьлгуьл э школе нерафдеире виниренге, у бисдо дуьлпесо ве унегуьре уре воисд пуьрсуь дануь ёгьи ни коре.

Гьуьзуьлгуьл гьечи дануьсдембу, ки дедешу рази нибу гуфдире эри э курсгьой медсестраи рафдеи ю. У нисе дануьсдембу чуй гуюге э дедешу. Эз елойге у мугу эри хуьшде, ки гьергой бисдош дедешу и коре мидануь, коргьой гуфдиренигьо «Беге гьуигьэ э туморе пэхьни сохде бире». Хубтеики ме хуьшдениме гуюмгьо...

— Э курсгьой медсестраи эдее рафденуьм, дедей, — мугу у, хэйли фикир сохде бэгьдо, сере гьуз гирде, гІэйбе-гІэйб, эз зир чум денишире э дедешу.

— Медсестраи чуйни, хэлефме?

— Се мегь михунум, песде э госпиталь кор мисохум...

— Дедей миро туьре, хэлефме, туь той кор сохдеи?

— Эри, дедей, омбардекиш чуйнтойгьойменуьт э госпитальгьо кор сохденуьтгьо. Иму недениширимге э яралуьгьо, иму небесдимге лербегьой энугьоре, дие ки биё бесдуь, дедей?! Келете медсестрагьо, омбардекиш, рафдет э довгІо эри яралуьгьоре эз зир гуниле-барут ведировунде, жогьилтегьоре э довгІо нисе гьишденуьт рафде, угьоре э госпитальгьо кор доренуьт. «Эришму, — мугу эз иму военком, — инжош кор омбари, олхоин бошит, хэвлет нимунит...»

— Бебешму эз дуь рузиге эдее э довгІо рафде, у дануьсдге и коре, лап дуьлпесо мибу.

И гофгьоре шиновусденге, Гьуьзуьлгуьл лове э хэнде веберде, мугу:

— Бебе дануьсдени, ме эзу меслэхьэти вегирдем, уре лап разини...

— Дие эме эричуь негуфдиребири, хэлефме, теимэхьэли ме гьечи дануьсдембируьм туь шохьонгумгьо э репитициегьо рафде гуфдире...

— Ой дедей, эзини дердлуье вэхд дуьл э драмкружокгьо рафде киреи. Кружок иму гье эз суьфдеи рузгьой довгЮревоз лов бисдо рафд. Наринегьо гьемме рафдет э довгЮ, денилегьо э кор дарафдет, екигьо э завод, екигьойге э фабрик, кимигьойге э колхоз рафденуьт эри кор сохде. Мозол не Шушен э госпиталь кор сохденуьт...

Мозол не Шушен бируьт пушолуье артисткагьой драмкружок энугьо. Угьоре гЭилгьош бируьтге, гене те довгЮ сер гирде угьо кружоке нешендебируьт. Оммо шуьвергьошу, комигьоки гьемчуьн бируьт бэхшвегиргьой драмкружок, э довгЮ рафденге, угьо гьердуьшу дарафдебируьт эри кор сохде э госпиталь.

Себэхьимуьн шохьонгум гьердуь кифлетгьо кура бибериуьт э хуней Нисимигьо, эзугьо бэггэьй гене куьнде хэгьер-бирориш оморебируьт. Гьеммишеире хуно, Содугь не Шевеньё нуьшдебируьт э е куьнжле, эдембируьт евошлей эеки меслэхьэт сохде. Гьемме кура бирегоргьо нуьшдебируьт сергьуз, фикирлуь гоф несохде. Беге гоф небу угьоре эри гуфдире? Гьелбет бу, бедигьой хунлуье довгЮ дуь э песой-еки эдембируьт бирмунде хуьшдере. Чуь мигуи эзини вэхд, беде жэгИметини, гьеммере е дерди, е фикири... Чуьжире дуьлтеселимие гоф мибу гуфдире э ижире вэхд, кейки е екелуье мерд, сэхьиб кифлет, ю э хогьиши хуьшдеревоз эдее рафде эри женг берде э гьэршуй нэгИлетлуье, вэхьшии дуьшме. Гереки ми уре гьеймогьой рэхьнорение гофгьо. Гьелбет нэгИ. У дануьсдени довгЮ гешдеигьо нисдигьоре. Унжо уьлуьми, гуниле-барути, эжеки эз сад еки мидануь согь мунде. Оммо генеш у эдее рафде, чуьнки у дануьсдени, ки и кор ёгьин герекини эри хэлгь ю, эри Ватан ю, эри овурде

динже рузгьой зиндегунире эри гьемме могьлугъгьо, эри биёвгьой одомигьо, эри биёвгьой кифлет ю ве гьеле бегьем зиндегунире нисе дануьсденуьтгьо гІэилгьой ю.

Сессуьзире суьфде бурри Авдалим, бригадир эн Нисимигьо.

— Дуй-се руз пушоте эрзо мидорумге, — мугу у — ме не туьни эеки мирафдим, Нисим.

— Чуй, чуй? Чуй гуфдири туь? — мугу Ёвдо, — Туьш рафдени беге?

— Эри, меш эрзо дорем, — жугьоб до Авдалим, сере гьуз гирде, гуйге гьер-чуй бисдош е тэхсире кор сохде одомире хуно.

Эже рафдуьт зарифетие, хэндее гофгьой Авдалим. Эге э у мэГіреке Авдалим мидебисдоге, е дэгьдэгьэш нисе гирошдембу хэндесуьз. Оммо изму у нисе дануьсдембу чуй гуюге, э комини гофевоз веровунуге дуьл э мэГіреке кура бирегоргьоре.

— Дие кор ки биё соху? — мугу Ёвдо, тиж денишире э сифет Авдалим. — Гьеммешму эдее рафденит, дие одоми немундики э богъгьо эри кор сохде, нуьгь-дегь келе мердгьой, угьош кефсуьзгьо, э е тэхное зенгьоревоз чуй мибу сохде?!

Авдалим жугьоб недо, сере диеш гьуз гирд. У дануьсдембу Ёвдо эдее дузире гуфдири. Оммо чуй соху, гьемме хьэрмэхьгьой энур афдет... Эз довгІо сер гирде рузевоз е шевиш бегьем нэхисири. Согъ шев э пушой энур чигьрет хьовиргьой юни. Эз кимигьо хэбер омори пуч бирет гуфдири, кимигьойге яралуьнуьт. Э пушой энур оморени шекуьлгьой бомбгьо тигьи бирен, гунилегьо шендеи, дуре ве лепуьр довгІои, лешгьо офдореи... Беге у недири чуйжире гьэзобгьо биренуьтге э довгІо. У гьеле лап жогьилиш буге, гене винири чуйтам одомигьо пуч биретге э салгьой граждански довгІо. Дур рафде герек нисди, гье э хуьшдени гьэдимие шегьер Дербенд. Беге мибу фурмуш сохде э жофокеше могьлугъгьо биретгьо гужгьоре: Деникинцигьо, Бичераховгьо, англичангьо, туьрк-

гъо, Аллагъвердигъо... Киш диромори, э хэлгъ гуж сохди те воисде, песде вадарафде. Оммо куксеге вэхъшие фашистгъо лап хунхуруйт. Беге эзини вэхд э дуьлдинжиревоз кор сохде мибу?

— Бэхшлемиш сох, Ёвдо бирор, дуьлме нисе ветовусде. Пери шохъонгум э сиро нуьшдебируьм, е келе зен эшгенези, гъул дуь чуькле гІэиллегъоре гирде, гирисде-гирисде омо диромэ э хьэёт иму. «Е куьнже э киро дит, — мугу, — э иму эри зигъисде. Эз е хуне-хизунме и дуь невеле согъ мундет, угъониге гьемме пуч бирет». Дуь кукгъой ю э довгІои, гІэруьсгъой ю не чор невегъой ю э зир бомбгъо домунде, пуч бирет, гьевдегъ салеле гъисдигъо духдерлей юш, туфенг вегирде, э довгІо дери. Мибу ми эзини мэхьэл тоб доре нуьшде, чуьжире дуьл миё бу имуре?..

— У дузи, Авдалим бирор, оммо богъгъо селт кур мибошут, — мугу Ёвдо, ох кешире.

Хэйли фикир сохде, бэгъдо, ох кешире, Авдалим мугу:

— Гьеле кидан мигъилуьгеш рафде, военком недуьлнедуьл вегирд эрзой мере, мугу: «Туь имуре инжош ге-реки». Песде ме руй доноренге, мугу: «Ни эрзоре гьери мивиним...» Мере гьеле имид нисди, мере мигъилуьт гуфдире э довгІо рафде, эн суьфде э гъэршуй энугу кор сернуьш колхоз мипою...

— Лап хубиш мисоху, — мугу Ёвдо, э имидлуьиревоз.

— Пой ебо, зене чуь бисдо, жиге дорит? — пуьрси Нисим, э ихдилот гъэриш бире.

— Элле! Эзунире эз хуней хуьшде миведекинуь одоми?! Хунеигъойму мугу эз зен: «Зигъит э имуревоз, мерд имуш эдее э довгІо рафде, имуре пул ишмуш нисе воисде, чуь иму хурдимге, ишмуш михурит, э рэхъ мирайм, жиге эри гьеммеш вес мисоху...» Хьово овурд дес-пой гІэилгъоре шушд, нуьшунд, эз дес вероморе косибире но э пушошу. Езугъэ гІэиллегъо хурекиш бегъем нэхурдуьт, гьетте нуьшде хисируьт рафд. Фэгъиргъо е согъэ

мегь гІэзиет кеширет. Зен екемлей жавуьсд, оммо чум-гьой ю э хифлет рафде, хурде недануьсд. Хьово зури-зури хьэлов дешенди, дегердунди косибгьоре, дуз те ди пишнеи хисирет, вэхуьшденгеш, хэхэ-хэсдере хуно би-руьт, энжэгь имбуруз екемлей э хуьшде дироморет...

— Эзуні фэгьир-фугьорере жиге доре воисде, — мугу Нисим, — вохурдге инжош биёрит жиге дит, бигьил зигьуьт косибгьо, мисвое кори...

Ивэхд э хуне диромо эз дерсдорей санитари вогош-дебугьо Гьуьзуьлгуьл. У, шев эхэйрбу доре нуьшдегор-гьоре, рафд нуьшд э ён дедешу.

— Э сер тукунеиму, — мугу у лап евошлей э гуш-гуши Мирвори, — е зен нуьшди э духдерлеревоз. Эрме оморенигьо угьо эдете гиристенуьт...

Гьуьзуьлгуьл лап евошлейш гуфдиге гоф хуьшдере, гофгьой энугьемме дарафдуьт э гуш Нисим.

— Эжей? — пуьрси у гьеебо, гоф Гьуьзуьлгуьле бурра.

— Э сер тукунеиму нуьшдет.

Нисим вэхуьшд, зури-зури вадарафд эз хуне. Э песой энугьадарафдуьт Содугь не Шевеньёш, песде Сенем, Мирвори, Гьуьзуьлгуьл, гьеммееки.

— Ишму кинит, хэгьерме, инжо эйчуь нуьшдейт? — пуьрси Нисим эз зен.

— ГІэмел ниёв? — пуьрси э нубот хуьшде зен, тэх-сиркоре одомире хуно.

— Эри энугьнисе гуфдиренуьмгьо, бэхшлемиш сохит, гІэмел эйчуь нисе оmore, гьелбет оморени. Беге ишмуре жиге нисди, хуне нисди инжо эри нуьшде?

— Э хунегьойму гІэтош дери, хьовир, жигегьойму зирпоют э зир мэхьсгьой хунхуре вэхьшие фашистгьо... Э е ченд хуне дарафдейм, гьемме вегирдет вирихдегор-гьоре. Дие мере имид небисдо жиге миофим гуфдире, мугум инжо шеве себэхь мисохим, себэхь гьисмет бис-доге белки е куьнж офдим эри зигьисде, имуре екем пул имуш гьисд эри хуне э киро гирде. Эзунбэгьдойге

кор мисохим мизигым гьер-чуьтам бисдо, белки гьергой бисдо эримуш миёв е товуше руэ.

Зен и гофгьоре э гуфдиреки, эдембу тигъле-тигъле гIэрс рихунде. Духдерле, гъуьж дироморе, сере э гъул-тугъ зен вогосунде, э терслуье чумгьоревоз эдембу денишире э нуботевоз э сифетгьой эн нешинохэ одомигьо.

— Инжо менуьшит, хэгьерме, кешит э хуне, — мугу Нисим эз гъул духдерле гирде, имуре жиге гьисди, э киро нэгI, кифлет иму гъолинд нисди, мизигьит эеки.

Зен вегирд э ён ю бугьо чуькле бухчелере, гIэрсгьой хуьшдере покурде, дарафд э хуне э песой Нисим.

— Дес-руй ишмуре шушденит? — пуьрси Мирвори эз зен, э хуне дироморе бэгъдо.

— Эри, гIэмел миёвге?! Омбар согъбошит! Чуьтам нишуру, е мегъ зиёди э рэхъ дерим...

— Кешит э сиро, шурит дес-руй ишмуре. — Э сиро вадарафденге, Мирвори огол зере Гъуьзуьлгуьле, мугу, — ведировун, хэлефме е темизе десмол, и косибгьо руй ишуре покунут, песде биёр суьфре деше, имуш е лугъэ нун хурим, игьош хурут...

Мирвори дировунд зен не духдере, нушунд э ён хуьшде. Гъуьзуьлгуьл, суьфре дешенде, хурек норе бэгъдо, омо нуьшд э ён духдер.

— Кифлет ишму, гьечинигеш келе кифлети, — мугу зен эз Мирвори, — имуш э сер ишму оморейм офдоре...

— Игьо кифлет иму нисдуьт, гъуншигьоймунуьт, хэгьер-бирор имунуьт. Кифлет иму чор одомилеи, угьо дирте миравт, жигейму фирегъуни, олхоин бошит...

Э могъбулиревоз хурек хурдеи одомигьоре диренге, зен дениши э нуботевоз э сифетгьой нуьшдегоргьо ве песде пуьрси эз Мирвори:

— Эйчуь кура бирет хэгьер-бирор ишму, кидан эз фронт зобуне хэбер вегирдейтге?

— Зобуне хэбергьо оморенуьт, — мугу Мирвори, бегьем неварасире мэгIэной гофгьой зене, — оммо эри энү кура небирет, мерд иму себэхъ эдей э довгIо рафде.

— Эри кифлет ишмуш омори эз фронт хэбер?

— НэгI, эриму неомори, — изму вараси Мирвори мэгIэной пуьрсуыш зене, — оммо эри чендигьо омори.

— Себэхь рафде мерд ишму?

— Эри.

Зен ох кешире, сер гирд гIэйбе-гIэйб эри нун хурде.

— ГIэйб меёвгу ишмуре, — мугу Мирвори, — хурек эн хурдегори, гьеле кор иму зобу нисди, эзунбэгьдойгеш худо кумеки.

Гьуьзуьлгуьл миденишуь мивинуь духдерле нун нисе хурде, у «бугунее вечелере хуно», гьуьж дироморе эдембу э нуботевоз сифет нуьшдегоргьоре томоше сохде. Ки дануьсде чуь гирошдембуге увэхд эз дуьл гьеле энжэгь дуваздегь салале биребугьо духдерле, комики э чумгьой хуьшдеревоз дирербу гьемме бедигьой хунлуье довгIоре. У виниребу чуьтам одомигьо эз зир бомбгьо, эз гьэриш вачаруьсде хунегьо вирихдембириуьтге, эз ченди-чендигьо энжэгь еки-дуьдуь согь мундембириуьтге. Чуьтам екикуьши биребуге э станци шегьер ишу, э Уман, угьо э вагон э венуьшдеки. Эз ело, гIэре недоре, самолетгьой дуьшме эдембириуьт бомбгьо шенде, эз елойге хэлгь, дуь-екире гьуьл додоре-додоре, эдембириуьт э вагонгьо венуьшде. Омбаргьо мундуьт унжо э зир гуниле-барут нен бомбгьо. Эгенер е солдат, гьеммере гьуьл додоре, ю не дедешуре э вагон нивебердге, ишуш мимундуьт унжо ве кидан чуь мибисдоге ишуре. Эзунбэгьдойге э рэхьгьо беге кеме бедигьо дири у, вачаруьсде хунегьо, лешгьо-лешгьо, меитгьо, ченд ве чендигьо... Гисне-тешне, гIэзиетгьо кешире-кешире, эзи вагон э у вагон вирих-вирихигьо. Белки ижире бедигьоре дире, гIэзиетгьо кешире . духдерле, э сифет э и хуне нуьшдебириуьтгьо одомигьо э нуботевоз денишире, гуфдирембу э дуьл хуьшде: «Чуьжире хубе одомигьоют и одомигьо, ишуре жигеш дорет, хурекиш дорет...» Белки у мэхьтели эзу товуне, ки уре дие имид небири э рэхь зиндегунию мивохурут гуфдире хубе, нике одомигьо.

Эжзе биё дануь дуваздегь сале гІэилле, бегьем гьеле зиндегунире недиригьо, нисе шинохденигьо, ки хубе никидоре одомигьо чендгъэдериш омбартеют гуфдире эз бедихогье одомигьо ве угьо гьисдуьт гуфдире бинелуье сутун зиндегуни гІуьлъм...

ГІожизи гІэиле дирейге, ГІуьзуьлгуьл пуьрси эзу:

— Туьре чуй нуми?

— Рита.

— Риточка веги ху, гІэйб меёвгу туьре.

— НэгІ, — мугу Рита, — мере гІэйб нисе оmore. Хов дери мере... гисне нисд...

— Дедей, — мугу ГІуьзуьлгуьл эз Мирвори, — ме деберуьм Ритаре дегердунум э кроватме?

— Бигьил нун хуьшдере хуру, хэлефме.

— Нисе хурде, вомундем, мугу.

— Бошгу, вэхи, эеки михисит...

ИМИДЛУЬИ

Эз бебешу э довгІо рафде эйлоревоз Содугъ лап дуьлмогьбул биребу. У гьеммише ох микеши. Гьелбет, гьеммеш дуьлмогьбул бируьт, оммо Содугъ лап ежирейге могьбул бу, лап дердименде одомире хуно гешдембу. Ки дануьсде, гьебелкине у эри хуьшде фикир сохде, гуфдирембу, ки ю э кифлет е тэхное нарине дери гуфдире, фикир кифлете дошдеире ю биё кешуь гуфдире. Эз Нисим рафдебу, Шевеньё гьич е шевиш э хуне нисе хисирембу, э Содугъэвоз хисирембу э хуней энугьо. Е шев угьо нуьшдебируьт э хуней Содугъигьо, эдембируьт нубогьошуре сохде, э гуш энугьо дарафд сес гоф сохдей Рита:

— Дедей, ме э школе ние хунум имогьой?

— Михуни, хэлефме, — мугу гъэрибе зен.

— Эз расдекиш гІэиле э школе зричуь нисе норе? — мугу Мирвори, э гоф энугьо гъэриш бире.

И гофгьоре шиновусденге, Содугъ не Шевеньё, ну-

богьоре гьише, э буруни хуне ведироморе, гьердуй э е лэгIэ гуфдируйт:

— ГIэмел миёвге, холей София, себэхь иму берим Ритаре э школейму ним? Э коми класс хунде туй Рита?

— Э пенжимуьн.

— Лап хуб, э класс иму михуни.

Содугъ не Шевеньёре лап езугъ оморембу э гъэриби-гьо. Угьо эри гьичиш хотур Ритаре нисе гьишдембируйт. Рита эри энугьо ихдилот сохдебу, чужире гъозиегьо омориге э сер кифлет ишу. Бебей Ритайгьо, э Западни Украина э серхъэд гъуллугъ сохдембу. ДовгIо сер гир-де бэгъдо, еки эз хьэрмэхгьой бебешу нувьуьсди эри энугьо, ки ишу эз вадабурраи ведироморенге Максиме — бебей Ритайгьоре не офдуйт гуфдире...

— Дие имуре имид нисди, — мугу Рита, гирисде-гирисде, — у согъи гуфдире...

— Мегирис, Риточка, — мугу Шевеньё, гьеле белки согъи, белки э вишегьо партизани. Уни э дигъне гозит вебу, ки э вишегьой Украина сер гирдет гуфдире эри гъовхо берде э гъэршуй дуьшме тозе гуьнжо оmore десдегьой партизани.

— Келеи бирорме э зир эз бомб вачаруьсде хуне домунди. Имуре оmore нисе воисдембу, дедейму мигуфди: «Иму рафдимге, дие эз бебейму е хэбер ниданим». Оммо э шегьер иму гьич е согъэ хуне недомунди. Дуьшме лап куьнд оmoreнге эз шегьер, дие чоре небу невирихде...

Ижире ихдилотгьо Рита омбар сохдембу эри Содугъ нен Шевеньё. Чуйтам ишу э рэхь э вагонгьо верики диретге бомбгьо шендеире, поезд поисде, ишу вирихде э више пэхьни биретге, песде гене э пееде оmoreтте те станци. Э станцигьо эз е поезд э е поездиге э венуьшдеки чужире гIэзиегьо кеширетге. Чуйтам э оринегьоревоз э пушой вокзолгьо хисиретге те ишуре поезд бире...

Рита чуйклелеш буге, келете одомире хуно гоф сох-

дембу, э дананменди ве фегьмгериревоз. Омбаре вэхдгьо у минуьшд сергъуз, гьич гоф несохде, фикирлуь. Ки дануьсде чужьире фикиргьо гирошдембируьтге эзини вэхдгьо эз дуьл энун. Гьебелкине у фикир сохдембу э товун себэхьине руз, кей миварасуьге и хунлуье довго ве ишу мивогошдуьт э хуне, ю мивохуру э хьэрмэхгьой школеи хуьшдеревоз, михуну гене э школе, мирав э хуней пионери. Эже мирав? Эжи школе, эжи хуней пионери? Э коми хуне, э коми шегьер?! Шегьер нисди, хунегьо нисди, гьемме вачаруьсди. Кидан хэгьергилигьой энунш эжеютге, кими согьи, кимигьо нэги. Согь гьисдуьтгьош, юре хуно, гьерки э е эзини шегьер э гьэрибни.

Имогьой дусдгьой энун Содугь не Шевеньёи. Угьо чуьш сохденуьт эри юре эз фикиргьо тоймиш сохде. Возигьо нэги, возигьо дие немундет. Угьо селт фурмуш бирет. Пери эдембируьт хуьзуьм венжире. Содугь огол зе Ритаре, гьишд э ишу кумеки соху гуфдире эри хуьзуьмгьоре деберде э сарай дечире. Бега угьо Ритасуьз нидануьсдуьт деберде хуьзуьмгьоре? Гьелбет мидануьсдуьт. Энжэгь угьоре воисдени у дорихмиши некешуь. Э ишу кумеки сохдге, э кор муьхшул бисдоге, дуьл ю миверов, эз фикир-хэёлгьо тоймиш мибу.

Гьемме шев, нубогьоре сохде варасде бэгьдо, угьо гьерсееки мидарафдуьт экин Ёвдо, минуьшдуьт э пушой энун. Содугь, сере гьуз гирде, гьэйбе-гьэйб мигуфди:

— Ё овосунеле хун дие, лелей Ёвдо.

— Нуьшит, хэлефме, михунум, пой э ёрме биёв. Хэйли фикир сохде бэгьдо, у сер мигирд эри хунде:

— Бири-небири е беде гьождогьо бири...

Ве Ёвдо, когьли несохде, михунд эри энугьо овосунегьо. Гьеммише э овосунегьой энун косибе могьлугьгьо бесгьунбер ведироморембируьт, жовонгьо игидигьо бирмундембируьт, э метлебгьошу расирембируьт. Е шев Ёвдо хундебу ужире овосуне, э комики гьождогьо нуьшдебу э лов нуькерей дигь ве екиреш нисе гьишдембу эз

нуькере глов вегирде. Эри зигьисдегоргьой дигь у норебу ужире гьэдэгъэ, э руз ю эрию овурдени е жогьиле духдере, э сер ю вери е сини глош руьгъэни э е биржунде гусбендевоз. Эге дигьигьо и игърол энуре бегьем мисохдге, у руз у мигьишд дигьигьоре эз нуькере глов вегирде, небуге нэгI. У гьевел михурд глош не гусбенде, пезде те шохьонгум вози мисохд э духдеревоз ве гьовой шохьонгум духдереш мифуберд.

Э и дигь дебу е жогьиле кук, комики ошугъ биребу э еки эз духдергьой дигь. Духдериш омбар хосдембу кукке. Э одохлуй кук нубот расиренге эри экин гьождогьо рафде, кук неветовусд. У мугу эз дигьигьо себэхь ю мирав гуфдире экин гьождогьо, бигьил юре хуру гьождогьо, оммо муьгьбет юре нэгI. И гофгьой кукке шиновусденге, гьемме жогьиле кукгьой дигь кура бире гуфдируьт, ки себэхь ишуш эдете оморенуьт гуфдире эри женг берде э гьождогьоревоз. У шев те себэхь екиш э дигь нэхиси. Зенгьо, ехэре вокурде, э «худо» минет сохде, лово хосдуьт эри гIэилгьошу кумек бошу гуфдире, мердгьо шимшилгьо, хэнжелгьоре тиж сохдуьт. Себэхьимуьн э лов нуькере келе женг гирошд, оммо дигьигьо, борж берде, тике-тике венжируьт гьождогьоре. Эз хун гьождогьо дуь руз глов нуькере гьирмизи биребу ве энжэгъ э сеимуьн руз глов палаш бисдо.

— Ишмуш жогьилгьой энуг дигье хуно э говлеи вадаравошит, э метлебгьой дуьл ишму расошит, — мугу Ёвдо, овосунере варасде, — имогьой дарайт хисит.

Овосунегьой энуг гьеммише э ижире нике гофгьоревоз варасдембируьт.

— Гитлериш гьечу венжире миёв, — мугу Содугъ э хуне э дарафдеки.

— Уре гьечу венжире гIэмел ниёв, — мугу Шевеньё, — уре э дорэгъэж кешире гереки, чуйтам куксеге немцгьо тэхсирсуьзе одомигьоймуре дуьлу сохденуьтге.

— НэгI, гьечу ние бу, — мугу Рита, — уре биё гердуну эз шегьер те шегьер, эз дигь те дигь, одомигьо

гьерки биё эз сер энү зенуът е сенгъ... Гъэгър хуышдере ведешенуът эзу...

Оморе-оморе Рита хуте бисдо э гІэилгьоревоз. Угьо эеки мирафдуът э школе, эеки мивогошдуът э хуне.

Богъчирегьо сер гирденге, гьерсе зенгьо рафдуът э богъчирегьо эри онгур чире. Ёвдо э гъэреули бирембу э хъэът контор колхоз. Гъуъзуългуыл эз госпиталь дир миомо, кими вэхдгьо шевгьош нисе оморембу. ГІэилгьо эз школе миоморуът, хунегьо-жигегьоре мивечируът, гІов миовурдуът (увэхди гьеле э омбаре хъэътгьо билоггьо недебируът), чой мивоноруът, песе минуышдуът эри нубогьоре сохде. Гьетте эз школе оморе, Рита, книгьоре норе, мигуфди:

— ГІэилгьо, ишму гІов биёрит, гІэтош венит ме хунегьоре жару зенуъм...

Энжэгъ шохьонгум торики миоморуът дедейгьо эз богъчирегьо, эз екемиге Ёвдош миомо эз гъэреули. Гурунде овхьолет довгІои гьечи куынд сохдебу одомигьой эни се кифлете, угьо, э е кифлет зигьисденигьоре хуно, зигьисдембируът. Эри энугьо гьичиш жейле небу, хурдешу-вегирдешу эеки бу.

Е руз э хунегьоре вечиреки, Рита мивинуъ э куынж хуне гьисдигьо шкафле е ченд книггьо деруът. У книгьоре покурде, туз ишуре э темиз сохдеки мивинуъ э гІэрей энугьо книг Николай Островскиш дери «Чуьтам муьхькем бириге пулат». Гъозией эни книге Рита екем шиновусдебу, оммо уре нэхундебу. У чарунд руи гьолуб книге ве хунд э десевоз нуьвуьсде оморембугьо гофгьоре: «Гъуъзуългуыл и книг е тэхьное бэхши ме эритуъ гьишденуъмгьо. Дор и книге ве ме э ёртуъ биёмгьо вэхд, хун эз верэггьой энү». Хэтгьоре нуьвуьсдегор гьулиш жеширебу.

У шев эри хисире дегешденге, Рита, гІэйбе-гІэйб пуьрси эз Гъуъзуългуыл:

— Книггьо э шкаф деригьо эн туьни?

— Эри. Чуь бу?

— Книг Островскиш?

— У бэхши, — мугу Гъуьзуьлгуьл, ох кешире.

Екем фикир сохде бэгъдо у ихдилот сохд эри Рита э товун дусдию нен Шолум.

— Э довго дери, и се мегъи когъоз нисди, — мугу у э эхир гоф хуьшде ве гене ох кеши.

— ГӀэмел миёв ме хунум у книге?

— Гьелбет, миёв, эричуь нисе оmore?!

Себэхъимуьн Рита бирмунд э Шевеньё не Содугъ книге ве ихдилот сохде ю чуй дануьсдембуге э товун энугу книг, гуфди ки уре хунде гереки гуфдире.

Эз у рузевоз сер гирде, Ёвдо э хуне дебирембугьо шевгьо, гӀэилгьо мигъишдуьт уре овосунегьо хунде. У эри энугьо неки овосунегьо михунд, омбаре ихдилотгьош мисохд эз гьозиегьой довгои, жомигьоки омори э сер энугу нен хьовиргьой довгоию э рузгьой суьфдеи довгой гуьломи, эз гьозиегьой четине рузгьой суьфдеи салгьой девр Совети, колхозгьоре бине норей ведиеш. Ёвдо э гьэреули бирембугьо шевгьо, угьо нубогьоре сохде бэгъдо э е куьнж минуьшдуьт ве Рита михунд эри энугьо книг Оостровскире.

Гьер риз, гьер верэгъ эни книг э пушой гӀэилгьо вокурдембу тозе рэхъ гьовхо бердеире эри хилоси, эри биёвгьо зиндегуни. Э дуьл гӀэилгьо руз-беруз эдембу муьхкем бире имидлуьи экин бесгьуни, экин биёвгьо шолумие рузгьой гуьлишонлуье зиндегуни. Ве угьо эдембируьт варасире, ки эри энугу рузгьо оmore эдее гирошде гуфдире келе зурбос гьовхогьо э гьэршуй дуьшменгьо. Ве, гьелбет угьо, ишуш, гьэрхундуьт эри кумеки сохде э келетегьо эй куьнд овурде у буьзуьрге руз бесгьунире. Оммо угьо гьеле нисе дануьсдембируьт чуьтам кумеки сохутге. Угьо кими вэхдгьо, эеки нуьшдеки, меслэхьэт сохде, фикир мисохдуьт, чуьтам кумеки сохутге эри бесгьун доре дуьшмере. Оммо зиндегуни омбар негъишд угьоре фикир кешире э товун чуьтам кумеки сохутге э келетегьо. У руз омо угьоре хэберсуьз, ю эз хуьшде.

СУЪФДЕИ РУЗ ЖОФОИ

Суъфдеи сал довгӀо сер гирдебугъо, омбардеки колхозчигъо рафдебируйтгеш э довгӀо, бегъер онгур э вэхд ю вечире омо эз гьемме богъгъо. Поиз зу оморебугеш, гьемме богъгъо гӀов доре оморебируйт. Келе мердгъо сер гирдебируйт богъ бурраре. Э эхир мегъ ноябрь сер гирд эри верф оморе ве э у сер гирдеиревоз верф эз хори вегирде неомо. Зигъисдегоргъой гъэдимие шегъер Дербенд песени дегъ-бисд сал недиребируйт гъечи зу зимисду сер гирдеире ве унгъэдер верф омореире. Э омбаре жигегъо гъолинди верф эз е метрош гиросдебу.

Онгурбогъдоргъо эз омбаресаллуе синогъишу да-нуъсденуът, ки верф нуъшуьгъо сал бегъерлуе сал бире гуфдире, чуьнки гъевелимуьнжи верф пичундени тегъенгъоре ве э угъо бееигъо кори нисе сохденуът, дуьимуьнжи хори нерм бире ве неми кумеки сохдени э тегъенг эри жонлуь бире ве эзу кор хушегъой онгур дуьруьжд биренуът гуьлегъошу пурлуь, гурунд биренуът, сеимуьн верф нуъшуьгъо сал гӀэзоргъо кем биренуът.

Мегъ март офтои сер гирд эри фуьрсоре герме ригазгъой хуьшдере ве хъэл сохде тегъер жилид сэхд бире э хори вогосиребируйтгъо верфгъоре. Эзуш бэгъэй гужлуе кулокгъой гуьлевор зу хъэл сохде верфгъоре, сер гирд эри хуьшг сохде хорире.

Гъеле э минжи мегъ март, хори унгъэдер хуьшг небиребугеш, колхозчигъо сер гирдуът эри бурра тегъенгъоре ве вечире шивгъой энугъоре. Сер гирде омо гьемчуьн бил зереш. Богъгъоре буррай ве тегъенгъоре вечиреи зу варасд. Оммо лап гурунде кор богъдори гъисдигъо бил зереи лап эдембу дир-дир гиросде. Те довгӀо сер гирде зенгъо бил нисе зерембируйт. Мердгъо нисе гъишдембируйт зенгъоре бил зере, чуьш бисдоге денилеи, бил зере эри энугъо гурунди. Угъо мигъишдуът зенгъоре сохде сукте жоргъоре: тегъенг вечирере варасденге, зенгъо сер мигирдуът гъупи зерере — хоке гъи-

ребир сохдеире. Оммо имисал суьфдеи хьэрекети бу бил зерей. Дерд гьупи зере кире гирдебу, гьемме зен-зоре эдембируьт бил зере эз дес ишу вероморере хуно, генеш эз се бэхш е бэхш богьгьош бил зере не оморобируьт.

Э мегь апрель офтои сер гирд эри э хьэрекетлуьире-воз герм веровунде хорире. Гьелэгьи хориргьой Дербэнд сер гирденуьт эри ешемиш бире (э кор оmore) э мегь март, оммо сэхде зимисду биренигьо сал э мегь апрель. Сэхде зимисдуш буге, верф омбар оmoreбугеш, э мегь апрель 1942-муьн сал гермигьо омбар бисдоруьт ве хори зу э кор оmore, ешемиш бисдо. Ологьгьо сер гирдуьт эри жуьл зере вероморе ве сигьмиш сохде тегьенгьоре. Серворгьой колхоз денишире диренге, ки гьечиш-гьечуш гьемме богьгьоре бил зере варасде нибу, бил зерейре поюнде, гьеммере дешендуьт эри гьупи зере.

Тегьенгьо сер гирдебируьт эри чуйме лов сохде. Тегьенг э чуйме дореки лап хэтолуье вэхди. Увэхди э гьэд богь дарафдеи лап секонелуьни эри тегьенг. Эзини вэхд гьетте э тегьенг расире, чуймегьой энуну туьр-туьр бире, тигьи биренуьт э хори. И кор хэто зерени, неки э бегьер имисали, гьемчуьн э бегьергьой биьвгьо салгьош, чуьнки ижире тегьенг неки бегьерсуьз мунде, гьемчуьн шивсуьзиш мундени. Кими тегьенгьо, меселен, хэтми, огьизюм, кишмиши ве чендигьойгеш, онгур комигьоки зуте расирени, зу чуйме лов сохде, оммо кими гьойге, меселен, нерме, гуьлоби, огьодой, комигьоки дирте расиренуьт, екем дирте чуйме доренуьт. Эз вэхд чуйме дорейш лап назушменде вэхд тегьенг гуьл доренигьо вэхди. Эзини вэхд шивгьой энуну гьеле унгьэдер дураз нисе биренуьт, тегьенг рач вараюсде бире хунчере хуно. Хьэз оmore одомире эзуну вэхд тегьенге томоше сохде, оммо эзуну вэхд дес расире неки ворворилеш ние расуь э тегьенг, чуьнки гьетте у еттелей семе жуьмуьсде, гуьлгьой энуну тигьи бире, уре гьишденуьт бегьерсуьз. Э эзини тегьенг бегьериш вебисдоге, хушегьой ю «жундуре» хуно, кем гуьлегьо вери биренуьт.

Онгурбогъдоргъо лап хуб дануьсденуьт, ки эз чуме-
гъой тегъенг сер гирдеи эй лов бире, дуз тейте тегъенг
эз гуьл неведиров, э богъ дарафде тIэмел нисе оморе
гуфдире, чуьнки эз чуьме дорей те гуьл дорей тегъенг
унгъэдер омбар нисе кешире. Эз ело сер гирдени чуьме
дорей зу расиренуьтгъо онгургъо, эз екемиге дир раси-
ренуьтгъо онгургъо, ве гъич хэбериш нисе бире, кей те-
гъенггъо сер гирденуьтге дуь э песой еки эри гуьл доре.
Э гъечиревоз экуьнди дуь-се орине э богъ дарафдени
нисе бире ве коргъо мундени не сохде. Унегуьре чуьме
дорей тегъенггъоре дирe сэгIэт, колхозчигъо межбур
бисдоруьт эри поюнде гъемме коргъой богъире.

Э суьфдеи рузгъой мегъ май, гъетте тегъенггъо эз
гуьл ведироморе, сер гирде омо гене гъупи зерей. И сал-
гъойге те мегъ май эз богъгъо варасдембинуьт экуьнди
гъемме коргъо ве суьфдеи гъупи зерейгъош. Оммо ими-
сал эз чор бэхш е бэхш богъгъо бил зере оморебинуьт,
е бэхшиге энжэгъ гъупи. Ниме зиёдте богъгъо не бил
зере оморебинуьт, не гъупи. И салгъойге эз бил зерей
бэгъэй гъемме богъгъо се бо гъупи зере оморембинуьт,
омммо имисал хъэрекети бу ебо семе гъупи зере биёвт
гуфдире, уш бил зере не оморе богъгъо. «Бил зере омо-
ретгъо богъгъо, — мугу сернуьш колхоз э правление, —
гъупи незерекиш э рэхъ миравт, ебо у богъгъойгере эз
ологъгъо хилос сохде гереки...»

Гъевелгъо омбаре зенгъой колхозчигъо э богъгъо э
кор нисе рафдембинуьт, энжэгъ э вэхд богъчирегъо ми-
рафдуьт эри онгур чире. Оммо имисал гъемме зенгъой
колхозчигъош ведироморебинуьтгеш эри гъупи зере,
очугъ мэгIлуьм бу, ки омбаре богъгъо мимунуьт гуфдире
гъупи незере. Увэхди кор бирембу лап четин, чуьнки,
неки богъгъо кур мибошут, гъемчуьн имисалине бегъе-
реш, эз ологъгъо жейле сохде, вечире нибу. Уш ижире
сал, кейки э богъгъо немуйши омбар дарафдебу, ологъ-
гъо эдембинуьт э зурие тегъеревоз шишире вероморе ве
батмиш сохде гъемме тегъенггъоре.

Овхьолет лап четин бу, рэхьбергьой колхозгьо меж-
бур бисдоруыт эри руй бире экин зверте идорегьо ве
расунде овхьолете э угьо. Гьэрор норе оморебу, ки сал
хундеире зуте варасдени ве хундегоргьой эз пенжимуын
класс зверте классгьоре фуьрсорени эй жумеки сохде
э колхозчигьо.

У рузгьо Мирвори не Сенем себэхь торики-товуши
мирафдуыт э боггьо, шохьонгум торики мивогошд.
Гьемчуын э угьоревоз эеки эри гьуипи зере э боггьо
рафдембу э хуней Мирворигьо зигьисдембугьо гьэрибие
зен — Софияш.

У руз шохьонгум Ёвдо нуьшдебу э сиро эдембу тем-
боку венжире, Сенемиш суьфделе эз боггь оmore, дес-руй
хуьшдере эдембу шушде, Шевеньё омо поисд э пушой
сиро ве келегедикимиси, мугу:

— Себэхь имуш эдее э боггь рафденим эй гьуипи зере.

— Чув? Эже рафденит? — пуьрси Ёвдо, бегьем нева-
расире мэгIэной гофгьой Шевеньёре.

— Э боггь эдее рафденим.

— Э боггь эйчув? Эй тут хурде?!

— Эй гьуипи зере.

Ёвдо тиж дениши э балай Шевеньё ве томоше сохде
эз сер те пойгьо жендек энуре, э энгуьшдевоз бирмунде
э тараф синей энугу, мугу:

— Туь?! Э боггь гьуипи зеренини?!

— Ме тэхьно нэгI, гьемме школеигьо...

Ивэхд э ён Шевеньё оmore поисдуытгьо Содугь не
Риташ, э е лэгIэ гуфдируыт:

— Имуш эдее рафденим гьеммееки...

Хэйли томоше сохд балай энугьоре Ёвдо, песде эз кон
дуыл е келе ох кешире, мугу:

— Гьеммере бэгIэ-бэгIэ мисохит, хэлефме.

ГIэилгьо сере гьуз гирде, мигуиге эзи е ГIовунлуье
кор сохутгьо тэхсиркоре одомигьоре хуно, вадарафдуыт
э куче.

— Шиновусди, духдер, чуй гүфдиренуьтге гІэилгьо?
— мугу Ёвдо эз Сенем, гІэилгьо вадарафде бэгъдо.

— Эри, ме дануьсденуьм, имбуруз Авдалим — бригадириш гүфди, себэхь школеигьо эдете оморенуьт гүфдире э иму эри кумеки сохде...

— Гьечу гьисдиге э хуьшдеревоз беритгьо хубики гІэилгьоре. Э ишмуревоз миравт, э ишмуревоз миёвт.

— Иму э десе дерим эхи, зенгьо беге рази мибошут?

— Э деседей Гуьлбогьор недерит беге?

— Дерим.

— У эзуни зен нисди, у гоф нисоху эри гІэилгьоре омурдеи, диеш шор мибу, чуйш бисдоге кор екем семе пушово мирав дие. Оммо гьупигьош миёсд бире эри гІэилгьо...

— Гьупигьо гьисдуьт, лелей Мирзоре гьупигьо омбаруьт, токи гьупи зерегоргьо бу.

Мирзо не кифлет ю эз колхоз бине норе оморевоз зигьисдембируьт э богъгьой колхоз. Унжо колхозе бу гьомбор шороби. У гьэреул сохдембу гьомборе. Песе гье э унжиге вокурде омореву завод шороби ве есиёв эри гІорд кешире. Гьеммей энугьоре гьэреул сохдембу лелей Мирзо. Эзуш бэгъэй у есиёвчиш мисохд герек бирембугьо вэхд, гІорд микеши гьем эри колхоз, гьемиге эри колхозчигьо.

Те довгІогьо бил-дуьмбиле, гьупигьоре ве де карасдигьойгей жорире колхозчигьо гьер мерд ишу гьуьч сохдембируьт эришу. Оммо э вэхд довгІо гьемме корсохгьо зенгьо не гІэилгьо бируьт ве унегуьре кор карасдигьоре гьуьч сохдеи гурунд бу. Правлений колхоз гьэррор но, ки муьзд жофой лелей Мирзоре зиёд сохдени ве э сер энугьорени гьэрхунди карасдигьоре гьуьч сохдеире: бил-дуьмбиле, гьупи-лапаткере ве диеш.

Шевеньё не Содугъ э богъгьо омбар рафдет: э рузгьой мигІидгьо, рузгьой выходнойгьо эри тут-бэгІли хурде... Гьеммише у шев пушой себэхьимуьн э богъ рафде угьоре эз шори хов нисе оморембу, чуйнки угьо дануьс-

дембируът себэхь шоре рузи гуфдире. Оммо себэхь угьо эдембируът э богъ эри кор сохде рафде. Генеш не Шевеньёре, не Содугъэ имишев гъеле-меле хов неомо. Шор бу ми дуъл энугьо, гъевелинегьоре хуно? Эз ело эри, эз елойге нэгI. Дуъл энугьо, э хотур хосиет гIэили вебиреи ишуре, шор бирембу эзу товуне, ки эз себэхъэвоз сер гирде ишу кумеки мисохут гуфдире э келетегьо, кемден-омбарден эри куьнд овурде бесгъунире ве нисд сохде дуьшменгьой Ватане. Оммо эз елойге дуъл энугьо лап могъбул бирембу, чуьнки угьо дануьсдембируът те чоре гъисдигьо колхозчигьо гIэилгьоре э кор ниберд э богъгьо ве унегуьре веди бу, ки кор-овхьол богъгьо хуб нисди гуфдире, эге кумеки школейгьо герек бириге жолхозе. Эзуш бэгъэй угьо гъеле нисе дануьсдембируът чуьтам мигироруге хьол ишу э гъупи зерегьо, миверовге эз дес ишу согъ руз э зир гъизгъине офтои эри гъупи зере. Ченд ве ченд жире фикиргьо-хээлгьо омо имишев э дуъл Шевеньё, ченд жире шекуьлгьо омуруът поисд э пушой чумгьой эну. Шев эз ниме ченгъэдериш зиёд giroшдебу, чум эну э хов варафдгьо. Гъетте чум эну э хов варафде, э пушой эну омо поисд нимелит вокурде рэхь гьовуни. Э уревоз бу Содугъиш. Гьердуьй энугьо, лапаткегьо э дес дери, эдембируът хорире дуз сохде. Хори бее зере бу, верф пур бу. Верфе темиз мисохдуът, песе сер мигирдуът эри хорире векенде. Рита, гъирмизине бейдогъэ э штык туфенг бесде, туфенге э дес гирде, эдембу гуфдире: «Пушово, хьовиргьо, песо мемунит, зури геш-дит...»

— Вэхи, хэлефме, — мугу Сенем, евошлей душ Шевеньёре шувунде, — вэхд э кор рафдеи.

Шевеньё чумгьоре вокурд ве сер гирд эри фикир сохде и чуь ховиге ю диригьо, песеде вараси, ки Рита эз книг Островский эришу хундигьо гъозие омори гуфдире э пушой ю э хов. У вэхишд зури-зури, дес-руй хуьшдере шушде, сер гирд эри партал хуьшдере вокурде.

— Э дедешмуревоз мирай, э дедешмуревоз миёй, —

мугу Ёвдо, десе э душ Шевеньё веноре, — небу нединжи сохи, э гоф денишит, гъупигьо лелей Мирзо мидуь иш-муре...

— Э дедеевоз эйчуй? Ме э школеревоз...

— Э школе ме мэгІлуьм мисохум, туь э дедешмуревоз э кор рафдей гуфдире, э туь гоф ниёв, олхоин бош.

Шевеньё э хуьшде домундебу чуй сохуге, Содугъ э хьэёт энугьо дироморе, э пушой гъейву поисде, гуфдигьо:

— Э холей Сенем, дедейгьо э ишму дениширет, кеш Шевеньё.

— Туьш э дедейгьоревоз? — пурси Шевеньё.

— Эри! Чуй бешгъэи? Э колхоз иму бураймгьо хуби дие...

Гьетте э богъ оморе, угьо гьеммееки рафдуьт экин завод шороби, эри гъупигьо вегирде эй гІэилгьо. Лелей Мирзо гІэилгьоре диренге, лап могъбул бире, ох кеши. Песде сер гирд эри вихде кутэхъэ дуьмгьо дерие гъупигьоре ве доре э гІэилгьо. У дануьсдембу, ки имбуруз гІэилгьо миё биёвт гуфдире эри кор сохде, унегуьре чуйкле дуьмгьо дерие гъупигьо хьозур сохдебу гьишде. Лелей Мирзо азербайджаниш буге, зугьун татире лап хуб дануьсдембу. Чуйтам ние дануь, ченд салгьои эдее э гІэрей татгьо кор сохде, э угьоревоз нун хурди, эз гІэилиревоз э гІэрей энугьо келе бири веромори. Неки ю, бебе-келебебей юш э гІэрей татгьо зигьисдет, бирор еки бирет.

— Гирит, хэлефме, худо кумек гердо эришму, худо гъувот дешено э гъулгьошму, — мигуфди лелей Мирзо э гъупигьоре э гІэилгьо дореки, — гъэйгъу нисди, жонум, гІуьмуьр эзини рузгьо кутэхьи, «Етим дуьруьлуьр, — гуфдири э метелегьо, — шерменделугъ молкомуте гьолур»...

Шевеньёйгьо э жиге кор оморебируьтгьо мэхьэл миденишуьт мивинуьт унжо хэйли одомини. Омбариш небуге е бисд одоми бу. Хьофд-хьэшд огьиле зенгьо, е ченд гІэруьс-дуьхдер, угьониге гьемме. гІэилгьо бируьт.

Эзир эн келе тутдор веноре оморебу шэгмелее гІэтош, элов комики эдембу варасде. Гьетте элов шэгмеле по-исде, е зен э гьупиревоз кура сохд гІэтошгьоре ве э минжи гІэтош вено келе чойник гІове. Се-чор минутиш не-гирошд, чойник сер гирд эри гуьж-гуьж сохде. Е гьуьндуре зен ведешенд эз тогьор хуьшде дуь егегьоре ве э хори дезере угьоре, мугу:

— Еге зенит, зен-зоре, гьупигьошмуреш эн гІэилгьореш, нешдовишмуре сохит, хурит косиби-гІюнишмуре, вэхд вэхишдеи.

У песде нуьшд екем эз гІэтош дурте ве гуйге, нишоне бирмундере хуно, сер гирд эз тогьор хуьшде эри ведешенде нун не гьофуне. Э у гуьре гьемме зенгьо нуьшдуьт, гІэилгьоре нуьшунде э ён ишу. Дуь зенгьо вегирдуьт егегьоре ве сер гирдуьт эри э угьоревоз гьупигьоре совусде. Угьонигеи сер гирдуьт эри нун хуьшдере хурде. Егегьо эз дес э дес гешдуьт. Э Сенем нубо расиренге, Шевеньё хосд эз дедешу егере ве еге зе гьупигьошуре. Шевеньё рач еге зерембу гьупигьоре. Э дананмендиревоз еге зерей Шевеньёре диренге, гьуьндуре зен эз Сенем мугу:

— Ведини, гІэил небелед нисди?!

— Бебешу хуте сохди уре, жон Гуьлбогьор, богъчей хьэёте э гьупи зереки, — жугьоб до Сенем.

Гьетте нум Гуьлбогьоре шиновусде, Шевеньё серетик гирде дениши э сифет зен, гуйге уре суьфделе дирере хуно. Э товун Гуьлбогьор Шевеньё омбаре ихдилотгьо шиновусдебу, жоборде хьуьрметлуье зени гуьфдире. Оммо имбуруз диренге э чум хуьшдеревоз, чуьтам у э тегьними ве дананмендиревоз, тэгІди несохде коре рэхь-бери сохдениге, Шевеньё шор бисдо э звеной энугу эри гьисмет биреи.

Чойник э сер гІэтош вебугьо сер гирдебу сэхд гуьж-гуьж сохдеире, веди бу, ки пушой дуьшире бу гуьфдире.

— Э Мазалту, — мугу Гуьлбогьор эз чойнике э сер

ГІэтош веноробугьо зен, — э чойник ранг деки, фурмуш месох.

— Гьеймогьой мидекинуьм, — зен вэхуьшд рафд эз э гьирогъ хиёвон вебируьтгьо жура бэгІлидоргьо е ченд шивгьоре бурри, овурд дешенд э чойник.

Эз е дэгъдэгъэйге чой дуьши. Гуьлбогьор ю хуьшдению вегирд чойнике эз сер гІэтош но э гьирогъ ве суьфде декирде э пейлей хуьшде, мугу:

— Декинт хурит е пейле чой ишмуре, эдее вэхишденим.

Гьеммееки, кимигьо э пейлегьоревоз, кимигьо э кружкегьоревоз куьнд бисдоруьт эз чойник.

Эриме оморенигьо, гІэзизе хундегор, туь варасири эричуь декирдебуге Мазалту э чойник шивгьой жура бэгІлидоре. Э салгьой довгІо чой эзже оморобу эри ранг вегирде. Эз шивгьой жура бэгІлидор раче ранг ведироморембу. Эзуш бэгъэй «чой» энугьо еттеле туьршмезе бирембу, тешнеире зу хуьрд сохдембу.

— Еххудой, худо кумек, — мугу Гуьлбогьор, гьеммееки чой хурде варасденге, — вэхизит гьери, нуьшдениуьшде михою, вэхизимгьо хубтеи.

Гьеммееки вэхишдуьт ве Гуьлбогьор э пушо, угьониге риз энуре гирде оморуйт э гьирогъ богъ.

— Туь э и гьирогъ вер пой, — мугу у эз Мазалту, — у гьирогъ вере ме миберуьм. — Веди бу, ки у не Мазалту эз зуревоз хэгьергилигьой еки бируьт ве унегуьре у э Мазалту келе ихьдибори сохдембу. — Денишит, зенгьо, — мугу у зиёд сохде гоф хуьшдере, — гІэилгьоре поюнит э гІэрелугъ ишму, эзилош-эзулош пушой гІэилгьоре вегирит, песо немунут, небуге эришу гурунд оmore, зу хэсде мибошут...

Чуьтам командир эз сер десде те эхир десде солдатгьоре фегьм сохдениге, Гуьлбогьориш гье гьечу эзи гьирогъ вер сер гирде те у гьирогъ вер вадарафде фегьм сохд чуьтам поисдетге зенгьо не гІэилгьо э сер вер, песде дуьлдинж бирере хуно, мугу:

— Гуш венит, зенгъо, тэгІди несохде ебо бирмунит э гІэйлгъо чуйтам тегъенге эз ологъ жейле сохде герекиге ве ологъгъой зир тегъенге э десевоз векеңде герекиге, песеде коре сер гирит, — ве ю суьфде сер гирд эри бирмунде э ён ю поисдебугъо Шевеньё фенд коре, — тэгІди месох, ебо фенд юре дан...

Э и тарафигей Шевеньё поисдебу дедешу. Гьетте Гуьлбогъор коре сер гирде, Сенемиш сер гирд эри шивгъой тегъенггъоре эз логъгъо жейле сохде.

Шевеньё э хьэёт ишу чендгъэдериш гъупи зери: гІэрегъой локгъоре, зиргъой тегъенггъо доргъоре. Оммо ижире зурбо муьгІуужуьзе ологъгъоре у суьфделе эдембу винире. Тегъенггъо не шивгъошу селт веди небируьт эз ологъгъо. Угъо, тасунде тегъенггъоре, шиширебируьт э зир, ишу шив кенде вероморебируьт зверо. Энжэгъ тек-тук велгъой тегъенггъо эз минжилугъ ологъгъо веди биренге, бирембу дануьсде, инжо тегъенг вери гуьфдире. Шевеньё екем дениши э ологъгъо, мэхьтел бирере хуно, песеде дениши э дедешу не Гуьлбогъор, чуйтам угъо э фендевоз, ологъгъоре пенже зере, тегъенггъоре очмиш сохденуьтге, юш э чепи десевоз гъупире гирде, э расди десевоз сер гирд эри пенже зере эз ологъгъо ве кура сохде угъоре, векеңде э зарбевоз. Э ило бугъо тегъенгеш, э уло бугъо тегъенгеш э десевоз эз ологъгъо темиз сохде, миглелугъэ зе э гъупиревоз.

— Гъо, гъечу зе, хэлефме, гъэдой туьре вегиро холе, — мугу Гуьлбогъор эз Шевеньё, хъэрекетлуьи энуре дир. — ТэгІди месох, евош-евош, небуге зу мемуни, руз гъеле дурази, хэлефме, — у гъупи хуьшдере тик ведоре э е тегъенг, ю рафд евеш-евош эри фегъм сохде чуйтам гъупи зеренуьтге угъониге. Песеде вогошде, гъупи хуьшдере вегирде, э разииревоз зиёд сохд гоф хуьшдере, — хуби, хуби, темиз эдете кор сохденуьт гІэйлгъо...

Шевеньё дениши э лой Гуьлбогъор ве, гуйге, юш эз гофгъой энугу рази бирере хуно, э диеш эшгълуьиревоз сер гирд кор сохдере.

Чендгъэдериш хъэрекет сохдембугеш Шевеньё эри пушово рафде, генеш у эдембу дире, ки ю песо нисе мунденигъо энжэгъ э хотур энуг кори, ки холей Гуьлбогъор не дедешу омбардекиш э пушой Шевеньё офдорембугъо тегъенгъоре ишу темиз сохдембируйт эз ологъгъо ве эри энуг энжэгъ мимунд гӀэрелугъгъой тегъенгъоре гъупи зерей. Э гъупи зерей кими вэхд эри Шевеньё гъечи миомо, ки ю э довгӀо дери, ологъгъо фашистгъоют ве ю э кул гӀэсб венушьде эдее угъоре э шимшилевоз гъирмиш сохде гуфдире. Кими вэхдиге эри энуг гъечи миомо, ки ю э богъ недери, э ён рэхъ гъовунини, эдее э лапаткеревоз верфгъоре шенде, хорире дуз сохде эри гъитгъой рэхъире норе ве и э ён ю кор сохденигъо зен, егӀни, холей Гуьлбогъор нисди, Ритаи ве бейдогъэ э штык туфенг бесде, эдее гуфдире: «ТэгӀди сохит, пушово биёт». Песде ебойге уре эз ижире фикиргъою гӀэйб оmore э ёр энуг миомо, ки эз расдекиш Риташ гъе э и десде дери гуфдире ве уш, юре хуно, эдее э гъупиревоз ологъгъоре венжире. Гъечи ижире фикиргъо э дуьл дери Шевеньёре хэбер небисдо, чуйтам эз эшгъ кор сохде не гъызгъине герми эн офтои жендек ю эрэгъ вешендге. У поисд, векенд эз тен хушьде руи шеире.

— Ме э туь негуфдируьм тэгӀди месох. Э тэгӀдириевоз кор нибу, хэлефме, э тегъними ве фегъмгериревоз кор сохдиге, кор гъеммише пушово мирав, — мугу Гуьлбогъор шеире векендеи Шевеньёре диренге ве песде виники у шеире э минжи богъ шенди, зиёд сохд гоф хушьдере, — унжо мени шеире, бер э гъирогъ вер ни, небуге песде э гешду-гешду мимуни...

Мигуиге э десде дебируйтгъо гӀэйлгъо э Шевеньё шеире векенде дениширебируйт, гъеммей энугъо екиеки шейгъошуре векенде, овурде норуьт э гъирогъ хиёвон.

— ГӀэйлгъо вомундет, — мугу Гуьлбогъор евошлей, эри хушьде гуфдирере хуно, — екемлейге мунди, вере варасим, хэвлети вегирим.

Омбар некеши эз Гуьлбогьор и гофе гуфдире, эхир вер веди бисдо ве корсохгьо э хьэвесевоз дуь пушой екире гьупи зере, ведироморуьт э у хиёвониге. Дир енебуге зу варасдеи вер, иллогьки э гьупи зереки, бенди эзу кор, чьутам э гьирогъ поисдегор вере бурриге. Гуьлбогьор э негьогъ непоисдебу э гьирогъ вер. Э гьирогъ вер поисдегоре воисдге, вере гьечу мибу бурра, ки лап дураз микешуь, оммо уре воисдге лап кутэхьиш мибу. Унегуьре Гуьлбогьор, денишире диренге гІэилгьо вомундет, вере бурри деберд гьечу, ки гІэилгьо форигъэти вегируь гуфдире. Гьелбет, Шевеньё гьингІой эни коре у руз невараси, уре у варасирени энжэгъ эз е ченд салиге бэгъдо, кейки юш еботот хуте бирени кор онгурбогьдорире.

— Гьери имогьой денишит э сохде кор ишму, — мугу Гуьлбогьор вере варасде бэгъдо, — дирейт чьуь рач вараюсдиге гьупи зере жигей богъ, оммо э илойгеш денишит, вэхьшие ологъгьо фубердет тегьенгьоре, тасунде э гІэрелугъ ишу, вэхьшие фашистгьош гье э и тегьер шиширет оморе э хоригьойму. Иму и ологъгьоре мивенжиним, тегьенгьоре хилос мисохим, нэгІлетлуье дуьшмегьош е дир — е зу гье гьечу гьирмиш сохде, нисд сохде миёвт. Энжэгъ ини кор ишмуре сохит тэгІди несохде, э тегьними ве фегьмгериревоз, ебо гуфдируьм, садбо гуфдируьм, чьутам э метелегьо гуфдиренуьтге: «Эз видовусде энжэгъ тирох мидуру», де хэйриге нибу. Кешит форигъэти вегирим.

Гьетте эзир тутдор оморе жем-жогьил рафдуьт э ён бедрей гІов эри гІов хурде.

— Поит, — мугу Гуьлбогьор, — эрэгъэлуь хинике гІов мехурит, бигьил екем эрэгъ жендек ишму нуьшуь, оммо хубтеики чой хуритгьо, тешнеишму зу хуьрд мибу. Вохорунит гІэтоше, чое герм сохит гьери.

Шевеньё ижире гофгьой Гуьлбогьоре шиновусденге мэхьтел бирембу мунде, эзже дануьсдембуге у гьеммей эни коргьоре. Гьеле Гуьлбогьор, эз руй келе веди бирем-

бугеш, веди бу, ки эз г1уьмуьр унгъедер келе небу. Оммо гуфдиренуьт, ки и зен кеиге сернуьш колхоз зенунеш бири гуфдире. Эзже миёсд дануьсде Шевеньё, ки и эз вэхд зуте пир веди бирембугьо жогъиле зен согъ г1уьмуьр хуьшде гье «болелуь бош» бири, э дерд ве гъэме-воз келе бири гуфдире, эз гьеммей энугъ «тургьо» гирошди ве у ю гуфдиренигъо гофгьоре гьеммере эз э сер ю оmore гъозиегъо вегирди гуфдире. Гьелбет, Шевеньё, гьеле увэхди уреш нисе дануьсдембу, ки омбар нэг1, шеш салиге гирошде бэгъдо эри веровундеи ве вечиреи буьлуьнде бегьер онгуре и зене доре миёв гуфдире буьлуьнде нум Игид Жофой Социалисти ве гье э и богъгъо гировунде миёв г1уьзетлуье гуьрдлеме э хуььрмет дореи колхозчигьошуре нумгъой игиди, орденгъо ве медалгъо ве гьемин ю не Содугъиш бэхш мивегируьт э у гуьрдлеме ве мивинуьт чуьтам Сернуьш Президиум Верховни Совет Догъисту ю э десдин дес хуьшдеревоз дезерениге э синей Гуьлбогъор орден Ленин ве пенж куьнжие медал суьрхире. Оммо гьеймогъой э гуш энугъ дарафд сес гуьм-гуьми сохдей Гуьлбогъор. Шевеньё дениши э иловле, мивинуьт г1эилгъо гьемме дегешдет, энжэгъ зенгъо нуьшдебируьт ве эдембируьт гъупигьоре еге зере. Веди бу, ки вомундеи г1эилгьоре диренге, дуьл Гуьлбогъор гурунд биребу ве эзу эдембу гуьм-гуьми сохде.

— Е-дугъ гоф гу гьери, г1эруьс дедей Довид, — мугу Мазалту, чорзани зере, нуьшд э ён Гуьлбогъор.

— Г1эруьс дедей Довид гъурбу гердо эри э пой вехуьшде, э шугъомо офдоре домор дедейтуь, жон Мазалту.

Зенгъо гьеммеекеи э иловлей Гуьлбогъор нуьшде, уре вадабурра, гьерки эз ело гуфдируьт:

— Эз расдекиш е-дугъ гоф гу жон Гуьлбогъор. — Веди бу, ки дуьлгъой гьеммей энугъо имбуруз ежирейге гурунд биребу диренге, чуьтам назушменде духдерлегъо, энжэгъ той возигъо сохде гьисдугъгъо г1эиллегъо, межбур биретге эри понсде э десдей келегъо ве жофо кеши-

ре э зир гъызгъине офтои., чуйтам гъугъ сергьой энугьо эз асму сукденуьтге, назушменде деслегьошу эз телуьгьой ологъгьо сула-сула биренуьтге.

— Чуй гуом эришму, шелей шуьверле-хэлефе э кул хуьшде вегирде гІэруьсу, шелей бибеле-бирор э кул верие духдери, буй шир деден гъеле эз лэгІэ оморенигьо гІэиллегьоре э пушо дешенде, э богъ колхоз эри зэхьмет кешире овурде дедейлову, мермекином, нум ишу э ники гирде биёво. Шев те себэхъ хов нисе оmore мере, гьердуь сироте норенуьм, гирисденуьм те вомунде, пезде ведироморенуьм э сиро, нуьшденуьм, гье вогогьруш сохденуьм эриме. ГІэйб месохит хэгьеру, гІэрс недомунди э чумгьойме. «Даш улсейдуьм, — мугу, — эруьлейдуьм, турпогъ улдум доендум». Дедей миро Рувине, э гофме недениши, э вэхд ю е гІэруьсле хосде неовурд эри дедей. Мермекином, нум ишу э ники гирде биёво, эн гьемме рафдегоргьой жэгІметевоз эеки. Дуьл гІэилгьо гурунд мибу, вэхизит э кор муьхшул бошим. Гьери, гІэилгьо, шеигьошмуре вокунит. Э майкеревоз кор сохдитге, гевелимуьнжи мур-мужак михуру гьулгьошмуре, дуьимиуьнжи гьулгьошму эз офтои мисухут, шев эз дорд дореи хисире ниданит.

Нун пишнеинере хурде, вэхуьшде бэгъдо, гьово екем серин биребу, кор хуб эдембу рафде. Угьо е богъэ вараде, сер гирдуьт эри гъупи зере дуьимиуьн богъэш. Шохьонгум э хуне э рафдеки, Гуьлбогьор, диренге эз дуьимиуьн богъ эри себэхьи энжэгъ е вер мунди, шор бире, мугу:

— Хубе кор сохдейм имбуруз, экуьнди дуь гектар гъупи зере омори, кешит евош-евош э хуне бурайм.

Шевеньёре хъэз омо эз гофгьой Гуьлбогьор, чорей эну мибисдоге, у гьич э хуне нирафд, шохьонгум э серини кор э хъэвесевоз эдембу сохде оmore. Оммо шев сер гирдебу ранг хуьшдере эри гъэриш сохде э руз.

Гьетте э хуне оmore, Шевеньё, дес-руй хуьшдере шушде, нуьшд э гьейву ве мугу э дуьл хуьшде: «Екем

хэсдеи мере вегируым, песе дарам э лой Содугъигъо». Оммо гьетте нушде гьулгъо-занигъой энусер гирдуэт эри жуыз зере, хэсдеи согъ руз гьупи зерей изму эдембу бирмунде хушдере ве уре гьич хэбер небисдо, кей чум ю э хов варафдге. Чуыш сохд Сенем эри уре хэбер сохде, вэхизуь хурек шевинере хуру гуфдире, оммо Шевеньё чумиш невокурд ве уре гьич хэбериш небисдо, кей дедешу парталгъой юре векеде, дегердундге уре э хьэлов.

Шевеньё чум вокурде, э лой пенжере дениширенге, эз тирак лет пенжере ве ди бу, себэхь сер гирди гуфдире эй очмиш бире. У вэхушд э пой, жумунд гьулгъоре: нэГ, жендек энусе дигьнере хуно жуыз нисе зерембу, оммо бесдере хуно бу. У сер гирд эри жумунде гьулгъоре, пойгъоре, сере берд-овурд, жендеке э кор овурде-овурде, рафд эри хэбер сохде дедешуре.

ЧУЬКЛЕ КОЛХОЗЧИГЪО

Гьечи е орине бирени, белки зиёдтеш рафдуэт Гэилгъо э гьупи зерегъо. Угъо лап хуб хуте биребируэт тегьергъо ве фендгъой гьупи зерейре, э тегьенгъо хэто незере угъоре эз ологъгъо жейле сохдеире. Дие гьулгъо, десгъой энугъо не дордиш нисе дорембируэт, не жуызиш нисе зерембируэт суьфдеи рузгъоре хуно...

Е руз Шевеньёйгъо эри нун пишнеинере хурде нушденге, гьеммишеинере хуно, экин энугъо гозит э дес дери омо бригадир энугъо. У, руз эхэйрбу доре, нушд ве сер гирд эри гозит хунде ве андурмиш сохде ю хунде келмегъоре. Овхьолет э фронт лап зобу бу, немцгъо, экуьнди немей Кавказе вегирде, эдембируэт хьэрекет сохде эй э Боку расире. Руз-беруз оморембируэтгъо зобуне хэбергъо диеш зиёд сохдембируэт догъиногъи дуьлгъой одомигъоре. Эз гозит хундей Авдалим мэГлуьм бисдо, ки и рузгъо довГю эдее гиросде гуфдире э хоригъой Кабардино-Балкария, э куьндигъой шегьер Нальчик.

Гозите хунде варасде бэгъдо, Авдалим хэйли нуьшд гоф несохде. Э у гуьре гьеммееки нуьшдебируьт могъбул, сере гъуз гирде.

— Чутьтам оmore эйтуь, Авдалим, текей мибу гьечи, — мугу Гуьлбогъор, — эз Нальчик те инжо е зиёдие рэхь недерики?

— Те инжо нигьилуьт оmore угьоре, эзу кор олхоин бошит.

Екиш невараси Авдалим эз дуьли гуфдирембуге у гофгьоре енебуге эдембу угьоре дуьл дореге.

— Гу-гу, — мугу комини-буге, — «Эз хурде имид хуби».

— НэГІ, ме недануьсде нисе гуфдиренуьм. Ме эхи эрзо доребируьм эри э фронт рафде. Пери экин военком дарафденге, жугьоб эрзой мере эри дануьсде, военком эрзой мере вогордунде, мугу: «Иму унгъэдеш кемгъувот небирейм чуйнтойгьошмуре эри э фронт фуьрсоре». Мугум: «Ме чендгъэдеинуьм беге, гьеле пенжогъиш небирем». «Бисдогеш, — мугу, — герек бисдоге, сал ишмуре огол зеримге, ишмуреш мифуьрсим». Ме гъэгъри бире, э хьюьршевоз мугум: «Нуьшим поим те немцгьо оmore имуре зирпой сохдени?..» Военком виники ме эдее гъэгъри биренуьм, вэхуьшд эз жигей хуьшде, омо нуьшд э ён ме, десе вено э душеме ве ихдилот сохд эриме, ки гьеймогъой эдее гировунде оmore гуфдире хьозурлугъи, неки эри поюнде дуьшмере, гьемчуьн эри сер гирде селт пиш сохдеи угьоре эз гьемме вегирде хоригъойму. «Олхоин бош, — мугу, — гье имбуруз-себэхь сер мигирим эри пушово рафде...»

И гофгъой Авдалиме шиновусденге, гьеммееки, имидлуь бирере хуно, ох кешируьт.

— Кей варасденит гъупи зереире? — пуьрси Авдалим, руй бире экин Гуьлбогъор.

— Себэхь суьфдеи гъупи зерере миварасим, персебэхь сер мигирим дуьимуьн гъупире.

— Дуймуын гьупи нэгI, — мугу Авдалим, — персебэxь гугурт шенит, песде гьеммееки э Араблинск эри зими дурунде.

Зимигьо не бисдугьо гьевелиш кошдембу колхоз Шевеньейгьо. Эз колхоз дорембугьо тэхуыл экунди согъ салиней кифлетгьой колхозчигьоре вес сохдембу. Оммо э 1942-муын сал, гьэрор норе оморевугьоре хуно, зимигьо эз и салгьойге чендгьэдер омбарте коште оморобируйт, чуьнки пуьрсуыш тэхуули эри фронте ве жэгI-миете нун доре чаруьсдебу э суьфдеине гьэрхунди рузине. Чуьтам ниьсд бире суьфдеине гьэрхунди, эхи хоригьой Украина, Белоруссия, Краснодар, Ставрополь..., лап омбаре тэхуыл вероморембируйтгьо хоригьо э дес дуьшме дебируйт..

— Чуь? — мугу Гуьлбогьор, — инжо зими дурунде дануьсдегор ки дери. Меш, дуь-се зенигеш мидуруним, чуьнки хутеиним, угьониге божэxьэт мидануьт.

— Хуте сохде гереки, Гуьлбогьор, де чорейге нисдигьоре туьш дануьсдени. Иму имисал тэхуыл омбарте кошдеймгьо эз и салгьойге э ишму мэгIлуьми, оммо зимигьоре эри дурунде не комбайни, не бичинчие мердмулле. Чоре энжэгъ эз зенгьо не гIэлгьои. Е гиле капарус шендейм, дие шенде ниданим, капарусчигьо рафдет эри зими дурунде. Ишмуш гугурте шенит, гьеммееки э зимигьо. Шову правление биригьоре шиновусдей?

— Шиновусдем, оммо чуь пуьрсуыш фегьм сохде омориге нисе дануьсденуьм.

— Сернуыш комитет гьэлхэнди шегьериш омореву э правление. «Тэхууле, — мугу, — те е донле вечире гереки. Эй тум ишмуре ихдиёр доригьо гьэдере бигьилит, унигере гьеммере дит э хьуькуьмет. Гьер дон гендуьм гьеймогьой э е гунилеревоз той». Оммо тэхуылгьойму э е-дуь оринейге дурунде неоморуьтге, гьемме туьр-туьр мибу э хори тигьи мибу...

Себэхьимуын сэгIэтгьой чоригьо десдей Шевеньейгьо гьупи зерейре варасунденге, Гуьлбогьор мугу:

— Гьеммееки биёйт себэхь гугурте шеним. Гьеммееки оморитге, себэхь имэхьэлигьо гугурт шендере миварасуним...

Себэхьимуьн Гуьлбогьор гІэилгьой наринере но эри эз завод шороби гугурте оворде ве гъэриш сохде гугурте э богъ дебегде, дуь зене но эри гугурте гъэриш сохде, угьонигере гьеммере но эри гугурте э сер тегьенггьо шенде. Гугурте э богъгьо шенденуьт э онгур гІэзор «сиегье оло» не офдону гуфдире. Эзи гІэзор онгур бирени жуьлесуьз, хуьрделе ве вешендени сиегье кара. Ижире онгур не эри хурде гІэмели бире, не эри жарунде. У гІэзор оморени эз неми хори. Неми хори э онгур кори несоху гуфдире шенде оmore гугурт э богъгьо. Оммо гугурте тэхьно шенде гІэмел нисе оmore, чуьнки эз тие гугурт велггьо суьхденуьт, хэзон бире. Невэхсунде хьэке э офтои е-дуь руз гьишдге, у бирени сов, гІорде хуно, ве уре э гугуртевоз гъэриш сохде шендге, гьем немуьши хори зу вегирде оmore, гьемиге велггьой тегьенггьо согъ мунденуьт.

Гуьлбогьор е дуь-се метро бирени жоноре, э хуьш-деревоз овордебуьгоре, бурри сохд кесег-кесег ве э гьерки е кесеге доре, мугу:

— Ебо тейте э гугуртевоз коре сер гирде, сер-сифот ишмуре, чумгьоре депучунит э жоноревоз, э ловгьошму ве эн суьфде э чумгьошму туз гугурт недарав. Э чумгьошму еттеле семе гугурт расиге, имишев эз дорд дорей хисире ниданит...

Гьелбет, гьеймогьой ужире коргьоре э сохдеки чешмекгьо веноренуьт. Эже оmoreбу умэхьэли ужире чешмекгьо, уш эри унгъадер одоми.

— Тейте гугурте шенде неварасим, нун пишнеинерене хурим, — эдембу зиёд сохде несигІэт дорей хуьш-дере Гуьлбогьор, — гьеммере мишеним миварасим, песде дес-руй имуре мишурим ве э тегьнимиревоз нун имуре михурим...

Суьфде Шевеньё невараси эйчуь гуфдиге Гуьлбогьор и гофгьоре. Оммо екем кор сохде бэгъдо, э гьеммей жендек ю туз гугурт нен хъж нуьшде бэгъдо, у вараси, ки гьетте и коре варасде, дес-руе неки, тенеш шушде гереки гуфдире.

Гугурт шендере варасденге, гьеммееки варафдуьт э келе ерх. Унжо оморенге, угьо эз еки жейле бире, гьерки рафдуьт э ело: гІэилгьо рафдуьт э ело, жогьиле гІэруьс-духдер э ело, зенгьо э елойге. Угьо парталгьошуре хуб тур-тур сохде, дес-руй ишуре шушде, оmore суьфделе нуьшдебируьт эри нун пишнеинере хурде, сернуьш колхоз не бригадир энугьо э линейке вери оморуйтгьо. Угьо эз линейке фураморе, руз эхэйрбу доре, нуьшдуьт э хори э рачей Гуьлбогьор. Уш, сере тик гирде, дениши э сифет энугьо, соки пуьрсирере хуно: «Гуит, чуьниге гуфдиренишмуре».

— Гугурте шендит варасдит? — пуьрси сернуьш.

— Эри, — мугу Гуьлбогьор.

— Себэхь гьеммееки хъэлов-болуш ишмуре вегирит, биёйт э хъэйт контор колхоз. Эзунжо э автомашиневоз миберим ишмуре э Араблинск. Эри шевхисишму жигегьо хьозури...

— Имуки миёйм, — мугу Гуьлбогьор, гоф сернуьше бурра, — гІэилгьо чуьтам биренини??

— Гьеммееки биё биёвт. Эйчуь, чуьтам биренини? Эри гьеммеш унжо кор офд миёв. Хуте мисохит гІэилгьоре э дерз бесде. Ишму мидурунит, угьо дерз мибесдуьт. Нун буржундегориш, хурек сохдегориш хьозуруьт. Сери корсох ним кило нуш мидим, шохьонгумгьо герме хурекиш мидим, лэгъэ-бишгьоб ишмуреш вегирит... — Хэйли фикир сохде бэгъдо, сернуьш колхоз, руй бире экин гьемме, пуьрси, — гьери гуит зенгьо, гІэилгьо, дуруним гендуьме небуге нэгІ?

— Эз дес иму вероморере хуно, мидуруним, — гуфдируьт гьерки эз ело.

— Омбар согъбошит, лап рази бисдорум эз гоф ишму, — мугу сернуыш, вэхуышде эз жигей хуышде.

У руз шохъонгум э пушой кино э кучей Ленин э гешдеки Шевеньё эз Содугъ мугу:

— Чумгъойтуъ жуыз зеренуыт?

— Жуыз чуытам? Дорд эдете доре, мигуиге сухдере хуно.

— Эри, эри эн меш гьечуни.

Эз екемиге дорд дорей чумгъой энугъо гужлуъ бире, дие угъо гешде недануысде, оморуыт э хуне. Гьетте э хьэът дироморе, Шевеньё рафд эри чумгъой хуышдере Гюв зере э ён логон дес-руй шушденигъо.

— Гюв мезе, — мугу Ёвдо, — диеш дорд мидуыт, руге кулок ги, хуышг сох чумгъоре. Хуышг бисдоге, кем дорд мидуы. Эз гьемме хуби нун туыре ху хис. Хисириге эз ер туъ фурмуш мибу мирав, себэхъ дие дорд нидуыт, олхоин бош.

Эзи шевгъойге зутеш дегешдебуге Шевеньё, уре гьеле-меле хов неомо. У гогъ мичаруысд э и пэхьлуъ, гогъиге э у пэхьлуъ, гогъиге руйзеверо, оммо генеш уре хов нисе оморембу. Эз ело чумгъо нисе гышдембириуыт, угъо эдембириуыт су гирде сухде, мигуиге э пушой элов келе глэтош поисдере хуно, эз елойге э фикир энугъо эдембириуыт оморе жуыр-бежуыре хэългъо, чуытам мигироруге себэхьине руз жофои ю. Не зимиреш, эз кино не шекуылгъой книггъо бэгъэй, не бичин сохдереш, не дерз бесдереш у э чум хуышдеревоз не винири. Чуытам биё дуруну, чуъ кори дерз бесде?! Э ижире фикиргъоревоз энжэгъ шев эз ниге гиросде бэгъдо, юре хэберсуыз чум ю э хов варафд. Гуйге у гьеле суыфделе хисиребу, дедешу уре хэбер сохдгъо:

— Вэхи, хэлефме, вэхд рафдеи...

Шевеньё вэхуышд ве сер гирд эри партал хуышдере вокурде.

— Чуытами чумгъойтуы? — пуырси эзу Ёвдо.

— Гуйге дорд нисе доренуыт, — мугу у сере жумунде.

— Дие дорд нидуът, оммо небу э чумгьо глов зени, небуге гене дорд мидуът.

— Дие чуй сохум? Руй нешурум?!

— Е руз руй нешушдиге, гъичиш нибу, — мугу Сенем, — меш нешушдем, елтеле глов зерем э сифет, э чумгьо нерасиреки, туыш гъечу веги глов зе.

Э хъэът контор колхоз хэйли одомигьо кура биребируът эри э зимигьо рафде, оммо автомашин екиллей бу. Уш чуйкле мошин «ГАЗ». Э буйругъи сернуыш колхозевоз, суьфде звеной Гуьлбогьоре гъишдуът э мошин венушынде. Веди бу, ки уре неки корсохгьо, гьемчуьн рэхьбергьой колхозиш хъуьрмет гирдембируът.

Э Араблински оморенге, Шевеньё миденишуь мивинуь э хозяйствой колхоз гьеме те гьеме е хунелеи эз е ченд утоггьо. Хунеш бу е тебэгъэи, оммо э зир ю гьомбор дери. Дузи э хозяйство бируът е ченд говдугьо, овхургьой глэсби ведиеш. Бригадир зимигьо э угьо дуй утоггьоре бирмунде, мугу:

— И эри зенгьои, униге эри мердгьо. Нит хъэловболуш ишмуре, кешит коре бирмунум.

Десдей эн Шевеньёйгьо эз дигъне екем кем биребу. Лап жогъиле духдергьо, э у глэре Риташ неоморобируът. Ритаре Евдо негъишд берде: «Лап глэили, — мугу, — у зими нидануь, «дуьргердо», кемер глэйил «жейле» мибу мирав...»

Эз хозяйство е верс зиьдте рэхь рафде бэггьо, бригадир э гъирогъ зими поисде, мугу:

— Нешдовишмуре сохит, гье эзи гъирогъ сер гирит кор ишмуре, уни глэребе эдее оmore, чингьош вери унжо, пичинкей гловиш. Дие, «худо» кумек эришму, ме бурам десдейгере э зимиге беруьм...

Нун нешдовире хурде бэггьо, Гуьлбогьор поюнд зенгьоре э вер ве сер гирд эри бирмунде чуйтам жер суьмбуьле э чеппи десевоз гирде ве э расдиревоз екем зофруте чин кешире герекиге ве бурра суьмбуьлгьоре жере-жер э сер еки веноре герекиге. Гьеме те гьеме би-

руът хъэшд дурундегоре зенгьо, гІэилгьо хьофд бируът. Экуьнди сери дурундегор е дерз бесдегор бу. Дурунде суьмбуьлгьо э гъэдер дерз биренге, Гуьлбогьор бирмунд э гІэилгьо чуьтам дерзе бесде герекиге. Екем кор сохде бэгъдо, мэгІлуьм бисдо, ки дерз бесдегоргьо эри эн ижире гъэдер дурундегоргьо лап омбаруът гуфдире. ГІэилгьо экуьнди гъеммешу хэвлет бируът. Зенгьо дурунде суьмбуьлгьоре угьо э е дэгъдэгъэ кура сохде мибесдуът ве эзу овло хэвлет мипоисдуът.

Дуьдуьшму бурайт эз гъирогъ энугь ерх, — мугу Гуьлбогьор эз гІэилгьо, — шохгьо — луьгегьой доргьо бурит биёрит э сер пичинкей гІоввенит небуге гІов дуьш-дуьши мибу, хурдени нимуну.

Гьеле дуьдуьй энугьо рафденгеш, эри мундебугьо гІэилгьо кор бегъем небу эри сохде. Пишнеи эри ну хурде нуьшденге, сере гъуз гирде, Шевеньё, гІэйбе-гІэйб мугу:

— Эримуш чингьо вегирде воисдембу, ненге чуьни, иму корсуьзе хуноим.

— Миданит дурунде? — мугу Гуьлбогьор.

— Хуте мибошим евош-евош, чуь сохде воисде, корсуьз нипоимки, эз корсуьз поисде, кем-кемиш дурундимге, е кумекини.

Инжо доргьо небируът, энжэгъ э гъирогъ зими саре кулелугъгьо вебируът. Нун пишнеинере хурденге, зенгьо э биней кулегьо дегешдуът екем эри форигъэти вегирде. Дегешдей энугьоре диренге, Шевеньё гІэилгьоре чумзе «вэхизим» гуфдире. Угьо евошлей вэхуьшде, чингьоре вегирде поисдуът э тозе вер эри бичин сохде.

— Э бесде мемунит, — мугу Шевеньё, — песде мибесдим, ебо дурунит нит...

Ним сэгІэтиш негирошд, зенгьо куьнд оморенге, гІэилгьо вере варасунде, чингьоре доруът э угьо ве сер гирдуът эри бесде ишу дурунде дерзгьоре.

— Тпу, тпу, машаллагъ, — мугу Гуьлбогьор, шор бире, себэхъ эришмуш чингьо мивегирим.

Себэхьимуьн у поюнде гІэилгьоре, э гьупи зереки поюндебугьоре хуно, э гІэрелугъ зенгьо, мугу:

— Гьевелимуьнжи генеш гуюм э ишму, коре э тэгІ-дириревоз месохит. Э тэгІдириревоз кор пушово нирав, энжэгъ хэсде мибошит, коре диеш пес мишенит. Евош-евош сохдитге, вомундеш нивомунит, кориш э эшгъэвоз пушово мирав. Бичин де коригере хуно нисди, инжо дор-дурьохиш нисди эри э серини нуьшде хэвлети вегирде, согъ руз гье биё кеши и чине. Унегуьре э тэгІдириревоз кор нисе бире, энжэгъ э фегьмгери ве тегьнимиревоz. Дуюмуьнжи гьер мерд дуруним, дерзеш бесдим, вере варасденге кура мисохим дерзгьоре...

Эй Шевеньё не хьэрмэхьгьой ю бичин сохде ченд-гъедер асант оморембу эз гьупи зере. Энжэгъ у бу, ки кемер дорд дорембу, уш суьфдеи рузгьо. Оморе-оморе хуте бисдоруьт, дие кемер унгъедер дорд недо. Оммо и бу, ки рузгьо зурбо герм бируьт, согъ руз э зир гьиз-гьине офтои, оммо угьо вердиш биребуьруьт э е майкеревоz кор сохдере, жендек ишу евош-евош гъэреёз вешенде, биребу сип-сиегъ ве унегуьре гьизгьине офтои э угьо кори нисе сохдембу.

Кор эдембу хуб пушово рафде. Оммо зенгьоре е зобуне хосиет вебу, угьо чуьш сохдембируьт, рузгьой шоботгьо кор сохдере э герде нисе вегирдембируьт. «Гьечинигеш гІовунгьойму омбари э пушой бэхдевере худо, — мигуфдируьт угьо, — шуьвергьо, гІэилгьойму э пушой гІэжел деруьт, дервозей худо очмиш биренигьо рузиш гІовун сохим беге?»¹ Унегуьре рузгьой оринегьо, сэ-гІэтгьой сеигьо мибисдоге, зенгьо коре шенде, мирафдуьт э хуне.

Суьфдеи руз орине пишнеи э зими экин Шевеньёйгьо

1. Э гуфдирей туро нен рабигьоревоз рузгьой шоботгьо «дервозей худо очмиш бире», у руз хунде биёвгьо нимазе худо эз дуьли гьобул сохде, оммо эз елойге у руз ки «гІовун» сохдге, дуввойне гІовункор хьисоб бире.

омо бригадир. У омбар минет сохд э зенгьо поют гуфдире эри кор сохде руз шоботиш. Оммо зенгьо гофгьой энуре эзи гуш дешендуът эзу гушиге ведешенд. Увэхди бригадир сер гирд эри минет сохде э гІэилгьо, э зенгьо гуьре угьош коре шенде неравт гуфдире.

— Ишму рафденит-рафденит, гІэилгьо семе поютгу кор сохутгу дие, — мугу бригадир, минет сохде, песде э лой гІэилгьо чаруьсде, зиёд сохд, — ишму мерайт, хэлефме, ме ишмуре жейлее зими мидуьм эри руз шоботишму. Ишму кор сохит, у «ГІовун» ишму сохитгьо э меревоз гердо. Тэхуьл «берекети», хэлефме ве берекете э вэхд-ю эз хори вечирен келе мисвое кори, гІовун нисди. — Песде чаруьсд гене э лой зенгьо, — э гІэилгьо семе гуит поют кор сохут.

— ГІэилгьоре воисдениге, поютгу, — мугу Гуьлбогьор, э лой зенгьо денишире, синемиш сохдере хуно, гьери угьо чуй мигуютге, рази мибошутге небуге нэгл. Уре юреш нисе воисдембу рафде э хуне. Эй гьемме коргьо зенгьо э гоф энудениширембируът, оммо угьоре межбур эй сохде рузгьой шоботгьо кор сохут гуфдире у э вихьтей энугьо вадарафде нисе дануьсдембу ве унегуьре чорей энунисе бирембу, юш межбур бирембу рузгьой шоботгьо эри кор несохде, э хотур энукор, ки эз хэгьергилигьой ю жейле небошу гуфдире.

Э гоф Гуьлбогьор, гІэилгьо поютгу гуфдире эй кор сохде, гьемме зенгьо рази бисдоруът ве угьо сер гирденге эри кура сохде шеле-шултуй ишуре эй э хуне рафде, бригадир берд гІэилгьоре э е зимиге ве мугу:

— Инжо сер гирит кор сохит...

Эз умогьоевоз сер гирде, гІэилгьо жейле бисдоруът эз зенгьо, неки э вэхд бичингьо, гьемчуьн э вэхд де коргьой-гереш сохдеи. Э гьечиревоз гІэилгьо, дуваздегь-сиздегь салегьош бируьтгеш, ишуре хэберсуьз, бегьем жовонире недире, келе бире, бисдоруът гьэгьигьэте колхозчигьо. Зимигьо дурундеире варасденге, угьо сер гирдуът эри дечире дерзгьоре э гІэребегьой гомиши ве берде э хэр-

мон, екигъойге, гомишгъоре э жутон небесде сер гирдуът эри зимигъоре кутон зере эй тум э поиз кошденигъо тэ-хуъле шенде. Эхирки э гьечиревоз угъо евош-евош эдем-бируът хуте бире гьеммежире коргъой богъдори ве ранж-берире. Ихдилот хуреки суьфдегъо хуб бу, гьер себэхь сери корсох дорембируът ним кило нун не е нимлитире бонкей масд, шохъонгум е бишгъоб гъингъэр э е чуькле тикей гушдевоз. Оммо эз екемиге сер гирдуът эри доре сесад грам нун ве песдегъо дивисд грамм ве гьемчуьн селт буррируът масд не гъингъэр дорейреш. Оммо генеш екяш эз г1эилгъо, вэхд э школе рафде оморенге, кор колхозе шенде, э школе нерафдуът.

ГЪЭЧЭГЪГЪО

Пушой довг1о сер гирде гъэдер э диндог1от бовор сохдегоргъо лап кем биребируът, чуьнки пропагандей атеисти гировунде оморембу э келе эшгълуьйривоз ве э ченд жире жуьр-бежуьре тегьергъоревоз. Ижире пропагандаре гировундембируът активистгъой колхозии, гозитгъо, театргъо, драмкружокгъо ведеш. Оммо довг1о сер гирденге эз екемиге театр хуьькуьмети тати лов бисдо, чуьнки экуьнди гьемме артистгъо — мердгъо, унжо кор сохдембируътгъо, рафдебируът э довг1о. Активистгъой колхозииш гьемме э довг1о дебируът, драмкружокгъош дие кор нисе сохдембируът. Энжэгъ бу е гозит. Уш омбардеки хъэрекети хуьшдере дорембу эри гуьрд сохде могълугъэ экин жоборде жофо кешире. Дузи, гозит фурмуш нисе сохдембу пропагандей атеистире, оммо пушотейнере хуно эри гировунде ижире пропагандаре, уре гьеймогъой минкини небу.

Довг1о эз ело бирмунд лап очугъ, чуьтам гьемме хэлгъгъой буьзуьрге вилеет иму эз дуьли-жунишу хосденуьтге Ватан Советире, хьозуруьтге эри доре эй азади, ешемиши ве мозол энун, неки гьемме гъувот ве жофой хуьшдере, гьемчуьн жун хуьшдереш. Э гьозоргъоревоз

солдатгьойму э фронт, фэхълегьо ве колхозчигьо э тыл бирмундембируйт келе игидигьо ве гьинормендигьоре. Эз елойге довгӀо, мигуиге, дер бедкорисохгьо пэхьни биреbugьо гьомборе вокурде, ведировундебу эзунжо э очугьи жуър-бежуъре шефдгьо ве бедкоргьоре: зиѐд биребируйт гьэдер алишверишчигьо, жуър-бежуъре фолчигьо, «тас» дешендегоргьо, э туро денишире, гьисмет одомигьоре дануьсдегоргьо, жеррэхьгьо ведиеш.

Суьфдеи вэхдгьо эз довгӀо хэбер миомоге пуч бири гуфдире, гьемме бовор сохдембируйт, овил-хьофд руз нуьшундембируйт. Оммо эз песигьо бирембируйт ижире гьозиегьо: когьоз миомо, «мэгӀлуьмсуьз пуч бири» гуфдире, оммо эз е-дуь мегьиге гье эзу одоми миомо э госпиталь дери гуфдире, енебуге офдоребируйт э вадабур-ран, имогьой хилос бирет, гене э довгӀо дереуьт. Нишонегьой эзини гьозиегьоре омбар мибу овурде. Энжэгь у бу, ки ижире гьозиегьо фолчигьо ве «тас» вешендегоргьоре дорембируйт «хурек» эри гуфдире, ки у одоми согьи гуфдире, неденишире э у кор, ки эзу хэбер оморигеш у пуч бири гуфдире. Э товун киш фол мивешендуьтге, фолчигьо ёгьин мигуфди у согьи гуфдире, е э довгӀо дери, енебуге э есири дери э и зуригьо хилос мибу, ененге гурунде яралуьни э госпитал дери ве омбар никешуь соф мибу миѐв э хуне...

Меселен, вегирим виним «тас» дениширеире. Фолчигьо мигуфдируйт, ки э «тас» у одомире, э товун комики э тас дешендени, бирмундени гье гьечу, чуь сохдениге у одоми э увэхд, кейки «тас» дешенде оморени. Угьо мигуфдируьтки «тас» дузире бирмундени энжэгь увэхди, кейки э зир перде, «тас» дешенде оморенигьо дебисдоге духдер батула (духдер хуне) енебуге энжэгь «тас» вешенденигьо фолчи э тэхьнои. Оммо эз елойге сес дешендебируйт, ки эге духдер батула э «тас» денишиге, гьисмет зиндегуни эну бирени лап беде гьисмет, у гьич э шуьвер рафде нидануь ве унегуьре, гьелбет, екиш нисе гьишдембу духдергьошуре э зир перде «тас» дешендени-

гъо дарафде. Э гъечиревоз э «тас» миёсд денишире эн-жэгъ хуышдени фолчи — сэхьиб «тас» ве уре бирембу минкини эри гуфдире гьерчуь юре воисд. Фолчи михосд эз эри э «тас» дешенде экин энун оморевугъо одоми сирот энун одомире, э товун комижи э «тас» дешенде оморени, соки э «тас» дениширеки, ю эз гІэрей чендигъо эри шинохде у одомире, песде мидарафд эзир перде ве мигуфди э эгъул ю оморере. Э товун киш э «тас» дешенде миомоге, гъемме согъ-саламети гуфдире миведиромо ве оморегоргъо, шор бире, э ветрониревоз рази сохдембу фолчире.

Ижире фолчигъо, жэррэхъгъо, хэлгъэ фурмундегоргъо лап омбар лов биребируът. Ве сервор эн гъеммей энун коргъо бируът рабигъо, моллагъо ве кешуышгъо, комигъоки неки э дургуни гуфдиреиревоз булут венгесдембируът э мувэхъ хэлгъ, гъемчуьн э сер жэгІмет венорембируът тозе герексуьзе гъэрхундигъо. Меселен, э нимаз гъэрор норе омореву, ки рузгъой дуьшоботгъо ве першоботгъо гъеммееки тэгІнит гируът гуфдире, соки у келе мисвой эри э довгІо дебирегоргъо. Эзуш бэгъэй угъо гъэрор миноруът, ки филон руз гъеммееки эз дес ишу вероморе мисворе дуът гуфдире э нимаз эри хэржигъой «хуней худо». Ки мундебируът э шегьер? Гъемме келе мердгъо не зенгъо, омбардеки бэхш комигъоки гирдембируът тараф диндогІоте. Иллогъки зенгъо гьерчуь-бисдош мифурухдуът эз хуне, оммо рабигъо гуфдире гофгъоре мисохдуът ве мигуфдируът, ки, соки, «мисвой» гуфдире эри э пушой гІэтош, эзир гуниле-барут деруътгъо шуьверле-бирор, шуьверле-хэлефгъошу...

Гъеле гъеммей эни коргъо кем (бу, гъэгъри-гъэзоб сес ведиромореву, ки э богъгъо ве вишегъо гъэчэгъгъо пуруът гуфдире, руз пишнеи, соки, э богъ енебуге э зими оморенуът, гирденуът унжо кор сохдегоргъоре, тембирэхъне сохде, парталгъошуре талаш сохденуът берде гуфдире.

Омбаргъо ве эн суьфде жогъиле гІэйлгъо э у гофгъо

бовор нисе сохдембируйт. Э десдей Шевеньёйгьо э товун гъэчэгъгьо гоф вероморенге, еки эз гІэилгьо мугу:

— Беге гъечиш хэре гъэчэгъгьои игьо, и куьгъне парталгьоймуре эри векенде берде, эри энижире шеи-шовол иму угьоре е кепикиш дорегор нибу.

Гьелбет не Шевеньёш, не Содугъиш, не у гІэилгьойгеш, белки гъич бовор нисохдуйт э у гофгьо э товуней гъэчэгъгьо, эге ижире кор небисдоге. Е шев нимешевеи, гьемме э сэхде хов дебиренигьо мэхьэл, гІэилгьо гьеебо хэбер Ысдоруьт эз хов э сес гунилегьо шенде, беде жире равуьсдей сеггьо не фите-фитгьо зере. Гьелэгъи шев шобот бу, келе мердгьо не зенгьо рафдебируйт э хуне эри шобот ишуре гирде, э хозяйство мундебируйт энжэгъ гъэреулчигьо не гІэилгьо. ГІэилгьо гьетте хэбер бире, лампере дегесундуьт ве сер гирдуьт эри зури-зури партал ишуре вокурде. Ивэхд э утогъ зури-зури дироморе еки эз гъэреулчигьо мугу:

— Метерсит, хэлефме, куьшит лампере, дегешдит э жигегьошму, небу вэхизит, гьеймогьой пиш мисохим у сеггьоре, угьоре э ишмуревоз кор нисди, токи мевэхизит...

Мерд и гофгьоре гуфди ве видов-видов вадарафд эз утогъ. ГІэилгьо векендуьт парталгьошуре, дегешдуьт э жигегьошу. Эз екемиге гене оморуйт сесгьой гунилегьо шенде, равуьсдей сеггьо, фитгьо зере ве чопологъэ хуно видовусдей гІэсбгьо. Дие сес небисдо. Энжэгъ, гуйге эз дур Ыиёвгьоре хуно, эдембу оморе сес гофе-гоф сохдеи гъэреулчигьо. Оммо гІэилгьоре дие хов неомо, угьо гьеммеки дегешдебируйт э жигегьошу гоф несохде, гьерки эдембу э дуьл хуьше ежире фикир сохде. Суьфделе себэхь очмиш бире сэгІэт, угьо еки-еки сер гирдуьт эри партал хуьшдере вокурде ве ведироморе э буру. Хозяйство мигуиге э жигей ю бу, гъичиш небирере хуно, дуь келе сеггьо, жомигьожи бируйт э хозяйство, нуьшдебируйт эзир чордогъ гъэреулчи ве, гуйге, эдембируйт э хифлет рафде. ГІэилгьо оморуйт экин чордогъ. Э у екиш невебу. Песде вадарафдуьт э у тарафигей хунегьо, унжош екиш

небу. Э гьечиревоз угьо гьичиш недануьсде, дес-руй хуьшдере шушде, гьер мерд рафдуьт э кор ишу.

Шевеньё не Содугъ э хэрмон кор сохдембируьт. Угьо э хэрмон оморенге, миденишуьт мивинуьт гьемме гьэреулчигьо, бригадир ве е ченд одомигеш унжо жура бире, нуьшдет э ён чордогъ гьэреулчи. Угьо эдембируьт эки келе-келе гоф сохде. Шевеньё не Содугъиш себэхь эх-эйрбу доре кура бирегоргьоре, нуьшдуьт э ён энугьо. Эз гофгьой унжо нуьшдегоргьо гІэйилгьо варасируьт, ки шову э сер хэрмон гьэчэггьо оморет гуфдире эри гендуьмгьоре талаш сохде, оммо гьуьнер ишу нерафди эз гьэреулчигьо эри борж берде.

Гьэчэггьоре имид бири э хэрмон е гьэреулчини гуфдире. Угьоре воисди уре бесдуьт ве гІэребере пур сохут гендуьм берут. И метлеб э дуьл дери угьо гьеле руз вери, екиреш хэбер нисди, гІэребей нарговире овурдет пэхьни сохдет э куьндигьой хозяйство.

Оммо э хэрмон руз бирембу е гьэреулчи, шев бирембу дуьдуь. Е гьэреулчи гешде бири э е тараф хэрмон, екиге — э у тарафиге. Э сер э зофруи тараф хэрмон биригьо гьэреулчи гьэчэггьо эз пэхьники оморенге, угьо гьеебо э десмолевоз лэгІэй энуре бесдуь гуфдире, у дануьсди хьэрой сохде. Сес хьэрой энуре шиновусденге, у гьэреулчиге сер гирди фит зере ве туфенг шендере. Гьемчуьн э хозяйствош шевгьо бирембируьт дуь гьэреулчигьо. Сес туфенг шендеире шиновусденге, еки эзугьо э гІэсб венуьшди рафди э воински часть, екиге рафди эри кумеки сохде э гьэреулчигьой хэрмон. Оммо у гьевел диромори э утогъ гІэйилгьо, угьоре олхоин сохди нетерсуьт гуфдире, песде фурамори э хэрмон.

Э куьндигьой хозяйством колхоз Шевеньёйгьо бу е чуькле воински часть. Э ён энучасть, комики дебу э палаткегьо, норе оморебируьт келе булуллуье лампегьо, комигьоки шевгьо товуш сохдембируьт.э дуразе ризгьой товушевоз асмуре. Ки дануьсдембу эричуь буге у товушгьо? Оммо омбаргьо мигуфдируьт, ки угьо асмуре гьэре-

ул сохде гуфдире, самолетгьой дуьшме э лой Боку негироруйт гуфдире.

Гъэреулчи экин солдатгьо оморе сэгIэт, угьо венуьшдет э гIэсбгьо, оморет э хэрмон. Гъэчэггьо, гьетте сес пое-пой гIэсбгьо омореире шиновусде, гIэребей нарговиреш шендет, вирихде.

— Шапи, — мугу бригадир эз е гъэреулчи, — венуьш э гIэсб, бура э шегьер, ихдилот сох и гъозиере эри сернуьш колхоз.

Эз пишнеи бэгъдо омо сернуьш колхоз. У кура сохд гъэреулчигьоре э хэрмон ве пуьрси эзугьо:

— Ченд бируьт гъэчэггьо?

— Қидан, — мугу е гъэреулчи.

— Э серме дуьдуь оморебируьт, — мугу бесде оморебугьо гъэреулчи, — угьонигере ме недирем.

— Эз хэрмон тэхуьл берде омори?

— НэгI, е донлеш, угьоре ужире муьгьлет небири, — мугу бригадир. — Не э хэрмон темиз сохде тэхуьлиш небу шову, куфде тэхуьл бу екем, темиз небире. Э уш дес расире неомори.

— Э екиш зарали-чи нерасирики?

— НэгI, гьич э екиш, — мугу еки эз гъэреулчигьо.

Эз чор-пенж рузиге бэгъдо, пушой э хэрмон коргьо варасде, пишнеи корсохгьо эри нун хурде нуьшдебируьтгьо вэхд, сернуьш колхоз эз линейке фураморе, э хэндеревоз мугу:

— Бошореи мере, э сер ишму оморебируьтгьо гъэчэггьоре гирдет...

— Эзже гирдет? Қи гирди? Кей гирдет? — пуьрсируьт гьерки эз ело э гIэжонбиревоз.

Сернуьш э тегьнимиревоз ихдилот сохд, ки э вишегьой Самур гирдет гуфдире хъэшд одомире, комигьоки гьисдуьт кукгьой куьгьне гIоширгьой зевердигьго, э довгIо неравт гуфдире, вирихдет э вишегьо пэхьни бире. Угьо эз гиснеи рафденуьт э хозяйствогьо, дуьздиренуьт тэхуьл ве де хурекгьойгере, эге эз дес ишу веремогьо...

СУЬФДЕИ ШОРЕ ХЭБЕРГЬО

Э поиз 1942-муьн сал сер гирд эз фронт эри хубе хэбергьо оmore. Лешгергьойму сер гирдебируьт эри пиш сохде дуьшмегьоре эз хоригьой Кавказ. Оммо эз лешгергьойму сер гирде эйлоревоз эри пушово рафде яралуьгьо оmoreиш омбар биребу. Корсохгьой госпитальгьо шев э рузевоз кор сохдембируьт.

Серебой э госпиталь, Гьуьзуьлгуьл кор сохдембугьо, тозе яралуьгьоре овурде, у, тейте гьемме яралуьгьоре э палатагьо деберде динж несохут, фамилегьо нумгьой энугьоре недануь э хуне нисе рафдембу. Чуйтам невинуь Гьуьзуьлгуьл э тигьэтевоз яралуьгьоре, гье белки е Шолум енебуге бешу оmoreмбируьт гьисмет бире. Э Дербенд эзун коргьо чендиш биребируьт, кейки дербендгьо ярауь биренге э госпиталгьой Дербенд гьисмет биребируьтгьо. Ки дануьсде, гье белки оmoreмбу е шинох гисмет бирембу... Оммо чендгьэдериш э тигьэтевоз фегьм сохдембугеш Гьуьзуьлгуьл, гьелемиш э у е шинох гьисмет небиребу, не вохурдебу. Эз елойге и песини вэхдгьо не эз бешу не эз Шолум чуйниге когьозиш нисе оmore. Чуйниге дуьл энуп лап герми, мигуиге уре имиди, угьо ярауь бире экин ю э госпиталь гьисмет мибу гуфдире.

У руз яралуьгьоре э фушендеки, е солдат лап гурунде ярауь бу, мигуиге у э лап келе «тонуй гIэтоши» дарафдебу-ведироморе, не э жендек ю, не э сер-сифет ю согьэ жиге недебу, гьеммею э жонегьоревоз пичунде бу. Гьуьзуьлгуьл ижире э жонегьоревоз пичире жендек солдата диренге, гиридени биребу мунде. И солдат гьисмет биребу э палате, комиреки гьуллугь сохдембу Гьуьзуьлгуьл. Когьозгьой ярауьре хунденге, фомиле не нум энуп эри Гьуьзуьлгуьл лап шинох омо. У сер гирд эри фикир сохде эже винири енебуге хунди ю ижире нум не фамилере. «Семенов Максим, — мигуфди у э дуьл хуьшде, — эже дирем, эже хундем...» У руз согь руз и фикир эз дуьл

Гъуэуэуьгуэуь тоймиш небисдо. У э ёр овурд гьемме хунде книгьоре, гьемме шинохгьой юре, генеш э ёр ю неомо, эже хундиге енебуге вохурдиге э ю ижире нум не фомиле. Оммо лап шинохэ нуми, ёгъин эжеиге винири енебуге хунди у э товун эни одоми...

Руз поизиш буге, гьово герм бу, не немиш небу. Офтои суьфделе пэхъни биребу э песой догъгьо. Гъуэуэуьгуэуь, фикир сохде-сохде эдембу эз кор э хуне оморе. Эз кучешу гиросше сэгIэт, Гъуэуэуьгуэуь миденишуь мивинуь Рита э пушой гьопу поисди. Рита уре диренге, зури-зури сер гирд эри оморе э тараф энугу. Гъуэуэуьгуэуь зури-зури оморей Ритаре диренге, дуьлпесо бире, сер гирд эй пой вечире. «Е кор бири, — мугу у э дуьл хуьшде, — небуге Рита э пушорэхъиме ниведиромо». Э гъэриш эн е дэгъдэгъэ эз дуьл энугу ченд жире фикиргьо-хэьлгьо гиросшд.

— Бошорей мере, — мугу эз дуриней Рита, хэндугьсде-хэндугьсде.

Гъуэуэуьгуэуь и гофгьоре шиновусденге, олхоин бире, поисд гье э у ю бугьо жиге, мигуиге кибуге уре гье э унжо шириш зе вогосунд ве у, эзи лап хэсдее одомигьоре хуно, мугу:

— Гу бура чуйниге-о?

— Когъоз эз Шолум, — мугу Рита ве до э у се куьнже когъоз солдатире.

— Чуй вери? — мугу Рита, Гъуэуэуьгуэуь когъозе хунде варасденге, виники шор бирей энугу.

— Согъи-саламети, яралуьни эз пой, э госпиталь дери. Риточка, яралуь бире хуби. Дануьсдени туь у коре? Яралуь гьисдиге — согъи, варасири?!

ГIэзизе хундегор, белкине туь мэхьтел мунди, хунденге, ки Гъуэуэуьгуэуь эдее шори сохде, дануьсденге эз пой яралуь бирей одохлуй хуьшдере. Неки Гъуэуэуьгуэуь гьеммеш келе шор бирембириуьт мишиновусдугьте, ки е одомишу э женг бердеки э дуьшмеревоз, куьшде неомори, энжэгъ яралуь бири гуьфдире. Зенгьо, э «худо» минет

сохдекиш, лово хосдекиш мигуфдируйт: «Дуь десдечуле э дес дери семе биёвош, хэлефме, руе дедей...»

— Гьелбет хуби, — мугу Рита, гьэл гирде Гьуьзуьлгуьле, — келе никини яралуь бирен, — уре воисдембу эз шори моч соху Гьуьзуьлгуьле, оммо у сар бу. Гьуьзуьлгуьл вараси метлеб гIэиле, гьуз бисдо, моч сохд уре эз гьердуь гьутине. Э Ритаре моч сохдеки чумгьой энугьо вохурдуьт эеки ве энжэгь изму омо э ёр Гьуьзуьлгуьл, ки Семенов Максим бебей Ритайгьои гуфдире. У генеш моч сохд Ритаре, тиж дениши э сифет энугьо. Уре воисдембу гуь эз духдерле: «Бибешмуш яралуьни» гуфдире, оммо негуфди, домунд э хуьшде.

— Чуьни? Туь гене могьбул бисдори? — мугу Рита, фикирлуь бирей Гьуьзуьлгуьле диренге.

— Дануьсдени э дуьлме чуь омоге гьеймогьой?

— Чуь омо?

— Мугум лап хуб мибисдо бибешму — лелей Максимиш яралуь мибисдоге, токи согь муну.

— Токи мибисдо, — мугу Рита, ох кешире.

— Белки эз расдекиш у яралуьни, оммо адрес ишму-ре нисе дануьсде эри нуьвуьсде, э ишму мэгIлуьм сохде яралуь бирей хуьшдере...

Гьуьзуьлгуьл эз Рита и гофгьоре эдембу гуфдире, оммо э дуьл ю е фикиргьойге дебируйт: «Гуьом бу небуге не гуьом?! Белки у нисди?! НэгI, гьечу гIэмел ниёв. Фомиле не нум ежире биренуьтгьо омбар бире. Суьфде ёгьинире дануьсде воисде...»

У шев Гьуьзуьлгуьле хов неомо. У ченд жире фикиргьо-хэёлгьо сохд, чуьтам сохуге, чуьтам дануьге, яралуь солдат бебей Ритайгьо гьисдиге небуге нэгI. Ченд жире рэхьгьо но у эри хуьшде, оммо екиш уре хьэз неомо. Энжэгь пушой себэхь у эри хуьшде но, ки бигьил яралуь екем э хуьшде дилов, сер гируь эри соф бире ве те увэхди е кор-чи мэгIлуьм небире нибу... Оммо лап хуб мибисдо эз расдекиш и солдат бебей эн Ритайгьо мибисдоге ве у соф биренге келе шори мибисдо эри эни косиб-

гъо... Гъуъзуългуъл гъечи дануьсдембу эз фикир эни кор юре хов нисе оmore гуфдире, оммо и кориш нибисдоге, божэхьэт уре имишев хов миомоге, чуьнки эз довгЮ сер гирде эйлоревоз, у гъечи имбурузинере хуно шор небири. Эз довгЮ сер гирде эйлоревоз и сеимуьн гилеи Шолум, яралуь бире э госпиталь дарафденигъо. Оммо и гиле эзу лап дир когъоз омори. Чор мегь зиёд бу эзу когъоз небу. Суьфдеи гиле у бири суке яралуь эз расди дес гье э у куьндигъой фронт биренигъо госпиталь соф бири, гене дарафди э довгЮ, дуьимуьн гиле у яралуь бири эз чепи гъуъл, дуь мегь демунди э госпиталь э Кисловодск, гене рафди э довгЮ, и сеимуьн гилеи, и дес нуьвуьсди, ки эз чепи пой яралуьни гуфдире. Оммо эз елойге дуьл Гъуъзуългуъл шор небу, пенж мегь зиёди бебей энугъо рафде, оммо эзу гьеме те гьеме е когъозле омори, уш эзи се мегь пушо, э комики Нисим нуьвуьсдебу эдете хьозур биренуьт гуфдире эри э довгЮ дарафде. Гье у оморигъо дие когъоз нисди...

Себэхьимуьн хирург ярагъой Максиме фегьм сохденге, мугу:

— Эз зурбое «гъэрбол» гирошди и гъучогъ. Э ижире хьолевоз согъиш мунди. Гъечу бире бэгъдо эри эни гъовхо берде гереки эй э пой вэхизунде. Оммо дие эзи довгЮ сохдегор нибу, кориш божэхьэт сохде дануьге...

Гъуъзуългуъл нум бебей Максимигьоре дануьсденге, ёгъин имидлуь бисдо, ки у бебей Ритайгъой гуфдире, оммо генеш у гьеле терсирембу э хуне мэгЮлуьм сохде э товун эни жор. Оmore-оморе Максим сер гирдебу эри чум вокурде, э хуьшде диromore бегьем гоф сохде нисе дануьсдембугеш, э кими пуьрсуьшгъо жугъоб дорембу ве юш гIэре-гIэре гьерчуь бисдош мипуьрси эз медсестра. Е-дуь оринейгеш гъечи гирошд, Максим сер гирдебу варасирение тегьер гоф сохдеире. Е руз Гъуъзуългуъл нуьшд э ён энуге э мигьревуниривоз мугу:

— Лелей Максим, белки ишмуре э хуне когъоз нуь-

вуьсде воисдембу. Эге ишмуре разиниге, ишму гуит, ме нуьвуьсуьм когъоз эз нуминешму.

— Эрики нуьвуьсуьм, духдерме?

— Чуьтам эрики? Беге ишмуре екиш нисди?

— Белки гьисдигеш, белки нисдигеш... Оммо, дузире гүфдиге, гьеймогьой мере екиш нисди. Не бебе, не дедеи, екиш нисди, — мугу Максим, ох кешире, дуьл энугурунд бисдо.

— Ме гоф ишмуре нисе варасиренуьм, лелей Максим, беге ишмуре зениш нисд, гІэилиш нисди.

— Нисе дануьсденуьм гьисдигеш енебуге нисдигеш, те довгІо сер гирде бу, зениш, дуь гІэилиш. Изму кидан согьиге угьо енебуге нэгІ. Эге согьиш гьисдуьтге, жи дануьсде эжеютге угьо гьеймогьой...

Максим ихдилот сохд эри Гьуьзуьлгуьл, чуьтам юре се мегь мунде тейте довгІо сер гирде фуьрсоребируьтге эри гьуьллуьгь сохде э серхьэд ве юре воисдембу кифлетеш беруь э ён хуьшде, оммо командир ишу негьишд уре кифлете э серхьэд оворде: «ТэгІди месох, Максим, — мугу эзу командир, — гьовогьо хуб нисдуьт, виним гьери чуьтам мибошутге коргьо, песде миёри...» Ве песде довгІо сер гирденге, чуьтам часть ишу домундебуге э гІэрелугь пушово рафде гьушунгьой гитлери ве офдоребируьтге э вадабуррай. Эз вадабуррай, э гужгьо-болонгьоревоз хилос биренге, у гьисмет бирени э е частиге ве э гьовхогьоревоз песово оморе, расирени дуз те Кавказ...

— Э песово омореки, рэхь иму бу эз шегьер Уман. Эри шегьер се руз се шев гьовхо гирошд, песде межбур бисдорим эри гьишде шегьере, песово рафде. Увэхди рафдебируьм э хуне. Мивинуьм э жиге хунейму вачаруьсде диворгьо бэггьэй гьичиш нисди. Э гьечирево...

— Вессит, лелей Максим, унгьэдер гоф сохде эришму хуб нисди, форигьэти вегирит екем, — мугу Гьуьзуьлгуьл ве зури-зури вадарафд эз палата. У дие тоб доре недануьсд, гьетте эз палате ведироморе, эз чумгьой энугу сер гирдуьт эри шур-шур гІэрсгьо тигьи бире. ГІэрсгьоре

докурде-покурде, у э дежурный духдир дебиренигьо утогъ дироморенге, духдир эзу гьеебо мугу:

— Чувни? Чув бири? Эйчув гирисде?

— Гьичиш, эз шори эдее гирисденуым?

— Чувтам эз шори, — э гӀэжойбиревоз пуърси гене духдир.

Гъуьзуьлгуьл ихдилот сохд эри энугу э товун Максим ве гуфдики зен не духдир энугу э ишуревоз зигьисде гуфдире ве ю нисе дануьсде чувтам и коре э угьо мӀгӀлуьм сохуге...

Духдир эри энугу рӀхь но, ки бурав огол зенув биӀру гуфдире зен не духдире. Гъуьзуьлгуьл халате векеде, рафд э хуне. Оммо э рӀхь у гене фикир сохде, домунд э хуьшде, чувтам гьеебо и коре мӀгӀлуьм сохуге э Рита не холей София. Воруше руз поиз бу, гьеммееки э хуне дебируьт. Гъуьзуьлгуьл эри хуьшде но, ки суьфде и коре ихдилот соху гуфдире эри лелей Ёвдо ве у чув меслӀхьэти ноге уре соху. У э хуней Ёвдойгьо дироморенге, мивинуь Сенем не Ёвдо нуьшдет эдете сирот Шолуме томоше сохденуьт. У угьоре руз эхӀйрбу доре, дешиши э сирот.

— Гьеймогьойле омори, — мугу Сенем, сироте э Гъуьзуьлгуьл доре. Ижире сирот Шолуме у гьеле невегирди. Шолум бу э халат госпиталиревоз, дуь десдечугьо э зир гьултугъ ю дери.

— Белки эймуш омори, — мугу Гъуьзуьлгуьл, сироте вогордунде э Сенем. У дануьсдембу, ки Шолум эриу не эри хунеигьошу гье э е руз когьоз фуьрсорембугьоре. — Оммо ме гьеле э хуне недарафдем, дуз эз госпиталь дироморем экин ишму.

— Эйчув? Чув бири беге, хӀлефме? — пуърси Ёвдо.

— Гьичиш небири-о. Инжо ижире ихдилоти...

Гъуьзуьлгуьл ихдилот сохд эри энугу чув ю шиновусдиге эз Максим ве э эхир гоф хуьшде мугу:

— Имогьой нисе дануьсденуьм чувтам мӀгӀлуьм сохумге и коре э угьо...

— Данусдени чуй сохиге? — мугу Евдо хэйли фикир сохде бэгъдо, — э гофме денишириге, суьфде Ритаре бер э хуьшдеревоз, бирмун мерде, пезде у ихдилот мисоху эри дедешу, бебере дири гуфдире...

Гъуьзуьлгуьл гьетте э хуне дироморе, Рита шори-шори доре э у когъозе, эз Шолум оморебугъоре, мугу:

— Эйме оморенигъо сиротиш дери.

Сироте фегъм сохде бэгъдо, э Рита дореки, Гъуьзуьлгуьл, евошлей мугу эзу:

— Мере э туревоз гъуллугъи, эге туре вэхд гъисдиге, кеш э меревоз э е жиге бурайм.

Эз хуне ведироморенге, Гъуьзуьлгуьл генеш нисе дануьсдембу чуйтам гофе сер гируьге. Рита, диренге, ки Гъуьзуьлгуьл чуйниге гене фикирлуьни, пуьрси:

— Туь гене фикирлуьни?! Чуй бири беге?

— Гъичиш небири? Риточка, бебешмуре винириге, мишинохи?

— Чуй? Бебеймуре? — У поисд гье э у жиге ве эри энугъечи омо, ки, мигуиге киниге гъеебо гирд юре бесд э расеревоз.

— Эри, эри, бебешмуре?

— Туь чуй гуфдире? Туь бебеймуре эже дирей? Ме бебеймуре эйчуй нишинохум? Гълбет мишинохум.

Угъо э палата дироморебириуьтгъо мэхьэл, Максим хисиребу, Рита хэйли дениши э сифет энугу, пезде дениши э лой Гъуьзуьлгуьл, сере жумунд, гуфдирере хуно: «НэгI, бебешу нисди гуфдире». Эзже миьсд шинохде Рита уре, кейки э сифет энугу эз жиге сухдеигъо гъич е согъэ жигелеш недомундебу. Сухдеигъо соф биребириуьтгеш, гене локогъой энугъо лап ежирейге дегиш сохдебириуьт сифет Максиме. Гъуьзуьлгуьл дениши э сифет Максим ве вара си эйчуй Рита нешинохдге бебешуре. У мугу э гушгуши Рита:

— ТIэгIди месох, локогъо э сифет энугу веруьтгъо нишонегъой сухдеигъои, хуб дениш...

Рита, диеш куьнд оморе, э тигъэтевоз дениши э сифет

Максим, оммо генеш нешинохд бешешуре. Ивэхд Максим хэбер бисдо ве дениши э сифет Рита. Э чумгьой хуыште бовор несохде, у покурд э десевоз чумгьоре, гене дениши э сифет духдер. У гьечи дануьсд ю эдее хов диде...

— Максим Гаврилович, хов нисди, эвреини, — мугу Гьуьзуьлгуьл, гьовой энуре варасире.

— Эвреини? — пуьрси Максим э гIэжоибиревоз ве дениши э лой Гьуьзуьлгуьл, пезде дениши гене э сифет Рита ве гьебо, хьэрой сохде, мугу, — Ри-точ-ка... — Уре воисд вэхизуь гьэл гируь духдере, оммо Гьуьзуьлгуьл эз душгьой энуре гьэл гирде, мугу:

— Лелей Максим, эйшму вэхисде гIэмел ниёв...

— Бебе, — мугу Рита, гьэл дешенде э герден бешешу ве сер гирд эри уре моч сохде эз пушони, эз гьутинегьо... Энжэгь сес Максиме шиновусденге, шинохд духдер бешешуре.

УГЬОШ ОДОМИГЬОЮТ

Руз зимисду бу, хоригьо сип-сипи бируьт эз верфгьо. Имисалиш верф омбар оморембу. Эз фронт оморембируьтгьо хэбергьо зобуне хэбергьо небируьт, лешгергьойму эдембируьт руз-беруз пушово рафде. Эз Нисим когьоз оморебу, ки ишу э куьндигьой Ростовуьт гуфдире, гье имбуруз-себэхь Ростове мивегируьт. Шолумиш нуьвуьсдебу, ки пой ю соф бири э и зуригьо гене мирав э фронт. У гене сиротиш фуьрсоребу, оммо игиле сирот зеребу десдечугьосуьз.

Шевеньё не Содугь и рузгьо гьеммише эз куче шоришори миоморуьт ве ихдилот мисохдуьт эри Евдо чуй шиновусдембируьтге эз радио. Е руз шохьонгум угьо эз куче оморуьтгьо лап шор бируьт ве гьетте оморе ихдилот сохдуьт чуйтам э хоригьой Сталинград гьовхобергьойму, дуьшмере бесгьун доре, омбаре гьэдер фашистгьоре, э

гІэрешу е генералеш вегирдегте э есири. ГІэилгьо э хуне диромогьо вэхд, Ёвдо эдембу русмуй пешмире эз дуьк э туп пичунде.

Эз 1942-муьн салевоз сер гирде э шегьер вожурде оморбу цех журуббофи. И цехэ корсохгьой ю небируьт. Эзу цех русмуй пешмире дорембируьт э зенгьо эри э хунегьо, хэвлете вэхд ишу журубгьо ве элжеггьо бофде эй солдатгьо. Э гьеммей согъэ шегьер энжэгъ тек-туке кифлетгьо офд миомо, зенгьо не гІэруьс-духдер комигьоки нисе бофдембируьт журубгьо енебуге элжеггьой пешмире эри солдатгьо. Мирвори, Сенем ве Софияш, гьерсешу вегирдембируьт эзи цех русмуй пешмире эри журубгьо ве элжеггьо бофде. Русмугьо угьо вегирдембируьтгьо вебирембируьт э дуькгьо. Гье эз дуьк эри бофде четин бирембу эри бофдегор, русму э русму пичире, бирембу кункол. Русму кункол бире бофдегор эглен небу гуфдире, русмуре эз дуькгьо мипучундуьт э тупгьо. Эз тупгьо эри бофде эй зенгьо чендгъэдериш асанти бирембу ве угьо кор сохдембируьт эглен небире. Э кифлетгьо демундебируьтгьо мердмуле ве гІэилгьой нарине хэвлете вэхд ишу, э зенгьо кумеки эй сохде русмуре эз дуькгьо мипичундуьт э тупгьо.

Зенгьо э кор бирембируьтгьо рузгьо, гьетте эз кор оmore, минуьшдуьт эри журуб бофде ве кими шевгьо дуз те себэхъ гьич нэхисире кор мисохдуьт. Зенгьой колхози воруше рузгьо ве рузгьой зимисду шевиш-рузиш журубгьо ве элжеггьо бофдембируьт.

Неки Ёвдо, Шевеньё не Содугъиш кумеки сохдембируьт эри русмугьоре э тупгьо пичунде.

Ёвдо, туп русмуре э гъирогъ норе, э тигъэтевоз гуш дошд гофгьой гІэилгьоре. Угьо, дуь гоф екире бурра, эдембируьт гуфдире:

— Э пушой кино гозит вери, — мугу Шевеньё, — э гозит сирот генерал немцгьо нен солдатгьой энугьо, э есири вегирде оморетгьо вери. Эз гозит кьунд рафде нисе

баре ингъедер одоми кура бири сироте эри томоше сохде.

— Гъуъзуългуъл имид дори, — мугу Содугъ, — имбуруз шохъонгум эз госпиталь эри оворде ужире гозите.

— Гъич гозите недирекиш, — мугу Ёвдо, — ме дануъсденуъм эхир эн гъеммей гъушун нэглетлуе фашистгъо гъечу мибугъоре...

Эз расдекиш у руз шохъонгум Гъуъзуългуъл оворд сирот э есири вегирде немцгъо верие гозите. Сершев гьерсе кифлет кура бисдоруът э хуней Шевеньёйгъо. Ижире шевгъой зимисду угъо гъеммееки минуышдуът дуз те нимешевеи, кими шевгъо эз нимешевеиш дирте. Денилегъо мибофдуът журубгъо енебуге элжегъо, наринегъо русму мипучундуът э тупгъо. Гозит, Гъуъзуългуъл овордебугъо, эз дес э дес гешд у шев. Угъо сироте томоше мисохдуът ве гьерки е гоф мигуфдируът.

— Игъош э одомигъо ухшеш зеренуътки, — мугу Мирвори, э ю нубо расире, гозите э дес вегирденге.

— Дие чуйтам оморембу эри туь? — мугу Ёвдо, — туь гъчи дануъсдебири угъо эз расдекиш вэхъшие хъэйвонетгъоют?

— Угъо лигъоб инсонире э сифет ишу веноре гуьргъоют, — мугу э гъэгъревоз София.

— НэгI, хэгьерме, угъош одомигъоют, — мугу Ёвдо, — ме бирем э хоригъой энугъо, дирем угъоре суьфдеи келе довгIо биренге, э угъоревоз гоф сохдем, нун хурдем. Ишму гъечи дануъсденит одомигъой энугъоре, хэлгъ энугъоре воисдени довгIо сохде? Кире мою э довгIо дарафде э зир гуниле-барут эри муьрде, пуч-гъич бире? Кире мивою дору келе соху, песде ферзендгъошуре э пушой уьлуъм фуьрсуь. Гъелбет екиреш нивою не ю, не ферзендгъою пуч биреире. ДовгIоре хэлгъ невэхизунди, довгIоре куксеге Гитлер не гIоширгъо-хэзинечигъой Германе вэхизундет. Угъоре имиди э гъуьнер довгIоревоз мивегируът гъеммей гIуьломе, сэхъйби мисохут, игъониге гъемме эришу мибошут гъулгъо. Э у метлебезов дешен-

дет могьлугьгьоре э гъэсоб довгЮи. Угьо суьфде довгЮре сер гирдет э чъккле вилеетгьой Европаревоз, эжеки хуь-куьмьети дери э дес девлетмендгьо. Девлетмендгьой энупилеетгьоре имид бу, ки Гитлериш мигьилуь гуфдире сэхьиб сохде ишуре, чуйтам гьишдембуге падшогьетишу. Унегуьре екиш эзу вилеетгьо э гъэршуй Гитлер невэхидет эри довгЮ сохде. Оммо имогьой диренге, ки Гитлер эдее талаш сохде мол-девлет ишуре ве эзуш бэгъэй эдее талаб сохде гьушунгьой энупилеетгьош довгЮ сохут гуфдире э гъэршуй Союз Совети, варасирет чуй метлебиге Гитлере. Дузи, генеш Юширгьой энупилеетгьо пешмуни нисе кеширенуьт, эдете те эз дес ишу вероморе кумеки сохденуьт э фашистгьо эри тасунде большевикгьоре. Оммо жофокеше могьлугьгьо дануьсденуьт э тараф киниге дузи ве унегуьре угьо нисе гирденуьт тараф фашизмаре. Куксеге Гитлер гьечи дануьсди, ки Урусие-теш ю, гьовол зерезере, мидануь вегирде гуфдире, вилеетгьой Европаре вегирдигьоре хуно. НэГІ, хэлгьгьой Урусие, гьич вэхдиш э герде нивегируьт эри хуьшдере эзир гьульети фашистгьой Гитлери венгесде. Хэлгьгьой Урусие ебош ниветовут ишу эзир муьрскеши ёдгьо дебирире, не гьич евэхдиш неветовусдет. Омбаргьо оморет э сер Урусие: французгьо, туркгьо, англичангьо... Оммо екиш эзугьо недануьсдет вегирде хоригьой Урусие-те ве гьул хуьшде сохде одомигьой энуре. Гьеле э у девргьош, кейки омбардеки хэлгь э зир муьрс девлетмендгьо дебируьт, жофокеше могьлугь софой хуьшдере нисе винирембу, хэйре мивинируьт энжэгъ ёдгьо, жофокешгьо э михьтожи не зир зэхьмет дебируьтгьо вэхдгьош. Изму, кейки жофокеше могьлугьгьой вилеет иму азад бирет, кейки жофокеш бири сэхьиб жофой хуьшде, беге мигьилуьт хэлгьгьой вилеет иму хунхуре талавурчигьой гитлере зирпой сохут гуфдире хоригьоймуре, талаш сохут гуфдире мол-девлет хэлгьире, гуж сохут э одомигьо, тэхсирсуьзгьоре куьшуьт гуфдире. Беге мидегьилуьт и гьэгьргьо и зулумгьоре э угьо лешгерчигьойму. Энжэгъ

ини лап омбаре заралигьоре овурди и довгю эри вилеет иму, оммо омбар никешу, те ебо сер гирдеи. Ебо сер гирдуьтге эри пиш сохде душьмере, увэхди кор зу пушово мирав ве тейте взэхшие нэглетуье душьмере селт пиш несохут эз хоригьойму гьовхобергьойму евош нибошут...

Эз расдекиш гье гьечу бисдо, мигуиге гьовхой Сталинград бисдо дервокуй дуь эз еки дуьруьждте бируьтгьо бесгьунигьой Армией Совети.

ГУРУНДЕ ЯРАЛУЬ

Согь зимисду, песде э васалиш эз фронт хубе хэбергьо оморембируьт, лешгергьойму гье эдембируьт пушово рафде ве дуь э песой-еки хилос сохде эз дес душьме шегьергьо ве дигьгьоре. Ярай Шолум соф биренге уре фуьрсоребируьт э хоригьой Курск. У нуьвуьсдебу эри Ёвдо, ки э и зуригьо сер гирде миёв гуфдире селт нисд сохде ве пиш сохдеи дуьшменгьоре эз хоригьойму. Омбар негирошд эз Шолум и когьоз оморе э гозитгьо нуьвуьсде оморуьт мэглуьметигьо э товун зурбое гьовхогьо, гиросдебируьтгьо э хоригьой Курск.

Э мегь февраль 1943-муьн сал эз Шолум когьоз омо, ки ю гене яралуь бире, э госпиталь дери гуфдире. Игиле у яралуь биребу эз расди пой.

Е руз пишнеигьо Шевеньё э хуне оморенге, Ёвдо мугу эзу:

— Шолум эдее оморе...

— Чуьтам оморе? У яралуьники?!

— Ги хун, — мугу Ёвдо ве до э у телеграммаре.

Эз телгерамма Шевеньё варасики Шолуме э поезд санитариревоз эдете берденуьт э лой Боку.

— Инжо оморе неверики?!

— Чуьтам невери?

— Эдее э лой Боку гировунде, кей гировундегеш невери.

— Гировунугу дие, гоф мисохим, дануьсдимге инжо мифушеним.

— Чутьтам, мифушенит? Беге э дес ишму дери ихдиёри? — мугу Шевеньё э мэхьтелиревоз лове э суьпуьле хэнде веберде.

— Виним гьери, Гъуьзуьлгуьл чуй хэбер овордеге, у рафди экин желеишу эри пуьрсире-дануьсде мибуге уре инжо фушенде небуге нэГ.

Эз екемиге Гъуьзуьлгуьл, шори-шори оmore, мугу:

— Келеиму дарафди экин начальник госпитальгьой Дербенд. У гуфдири, ки имбуруз шохьонгум сэгГэтгьой пенжигьо эзинжо гирошденини поезд санитари, комики биё бурав те Тифлис. Имуре эри шеш одоми бэгъэй жиге нисди. Унегуьре шеш яралуьгьоре мифушеним инжо. Эге э у поезд Шолум вебисдоге, начальник гуфдирики эзу шеш одоми еки у мибу гуфдире. Эри энугьо чуй бешгъэй киреш фушендге? «Эге э у поездевоз неомоге, э е поездигеревоз омоге, — гуфдири начальник, — дие иму уре инжо фушенде нисе дануьсденим, чуйнки имуре дие жигегьо нисди...»

— Эге гьечи эз фронт дур бердениге уре, — мугу Ёвдо, ох кешире, — веди бирени, ки у гурунде яралуьни гуфдире...

— Туь чуй гуфдире, мерд? — мугу Сенем, — туьре дерд гурунди-суки гирди, токи ебо биёв, гГэилме э никиревоз! — Веди бу, ки дуьл энуге герм бу, уре ёгъин имид бу Шолум э Дербенд мифурав гуфдире.

Дуьл дедеини дие, гьич дуьл екиш унгъэдер хэбердорлуь нисе бире, чутьтам биренуьтге дуьлгьой дедейгьо. Белки унгъэдер хэбердорлуьш нисе бире, чендгъэдер воисдениге гьечу бошу гуфдире.

СэгГэт чориш небиребу гьеле, угьо гьеммееки э вокзол оmoreбириуьтгьо. Угьоре э вокозл диренге е саре мерд Евдоре руз эхэйрбу доре, дес юре гирде, пуьрси:

— Хэйр гердо, ишму гьеммееки оmoreйт?

Шевеньё шинохд у саре мерде, у бу ИлГэзор, комики

зигьисдембу э зофруй мэхъэлей знугы. ИлгIэзор гъеле эз жовониревоз кор сохдембу э рэхъ гъовуни. Гуфдирембируйт, ки у бири гуфдире еки эз бэхшвегиргьой гъолхмишигьой фэхълеи те Революцией Социалисти Буьзуьрге Октябрь бире. Изму э рэхъ гъовуни, неки у кор сохдембу, гьемчуьн дуь кукгьой энущ унжо кор сохдембируйт. Э товун желеи кук энэ — Шомоил пушой довгIо бире э гозитгъо омбаре тэгIрифигьо нуьвуьсдебируйт. Шомоил машинист паровоз бу, у келе жобордигьо бирмундебу гуфдире уре ордениш дорет...

Ёвдо ихдилот сохд э товун ишу вегирдигьо телеграмма ве э эхир ихдилот хуьшде мугу:

Имогьой оморейм, кей миёвгеш-ниёвгеш нисе дануьсденим.

— Пой, ме гьеймогьой мидануьм, — мугу ИлгIэзор ве зури-зури дарафд э вокзол. Эз екемиге у эз вокзол ведироморе, шор бирере хуно эз Ёвдо мугу, — эз е чуьл минутиге поезд инжо мидебу.

Е ним сэгIэт гирошде бэгъдо э пушой вокзол омо поисд автомашин санитары. Эз автомашин ведиромруйт чор санитаргьо, Гъуьзуьлгуьлиш э ишуревоз, сипре халатгьо э тен ишу вери. Угьо эз мошин вегирдуьт дуь несилкегьоре варафдуьт э перрон.

Несилкегьоре диренге Ёвдо, ох кешире, евошлей эри хуьшде гуьгьоре хуно, мугу:

— Ме дануьсдуьм гурунде яралуьни гуфдире, уни э несилкегьоревоз оморет эри берде.

Ёвдо евошлейш гуфдиге и гофгьоре, ИлгIэзор шиновусд. У э лой Ёвдо чаруьсде, уре дуьл дорере хуно, мугу:

— Белки у эри гIэил нисди. Угьо эн суьфде эз поезд гурунде яралуьгьоре фушенденуьт, чуьнки дур рафде-рафде хьол энугьо диеш гурунд бире эхи...

Эз кабинкей автомашин ведиромо е гъуьндуьре жонлуье мерд парталгьой полковники э теню вери. У бу полковник Шварц. Уре экуьнди гьеммей Дербенд шинохдембу. У э Дербенд омореху суьфдеи мегь довгIо сер гир-

дебугьо. Сербэрэхьи госпитальгьой Дербенде гьеммере у сохдембу. Шварц огол зе Гъуьзуьлгуьле чуьниге гуфди э у. Гъуьзуьлгуьл экин Шевеньёйгьо омо мугу:

— Гьетте поезд оморё гешдит вагонгьоре, пуьрсит Шолум вериге, вебисдоге зу екишму э иму мэгІлуьм сохит.

— Мерд ю хуьшдению оморики, — мугу Ёвдо.

— Инжо яралуьгьо фушендени биренге, гьеммише ю оморё, — мугу ИлГэзор, — омбар «бэхдевере» мерди...

— Веди бирени, гьемме эдее тэгІриф доре.

Поезд эз дуриней веди бире сэгІэт, угьо гьеммеекі лов бисдоруьт э перрон. Суьфделе торики шев гъэриш бирёбу э руз. Увэхди э вокзолгьо товушгьо нисе сухдембируьт, чуьнки терсирембируьт эз самолетгьой дуьшме. Дузи э Дербенд у коргьо небирёбу, оммо буйругь коми-тет гъэлхэндире неверовунде гІэмел нисе оморё. Унегуьре гьеёбо одомире эри шинохе асанти небу. Ёвдо э пушой вагон оморенге, мивинуь е солдат дуь десдечугьо э гьултугь дери эдее фураморе эз зофруи пилонкон вагон.

— Шолумов вери, хэлефме, экишу? — пуьрси Ёвдо эз солдат, сифет энуре бегьем фегьм несохде.

Солдат, сере тик гирде, дениши э сифет Ёвдо.

— Бебе, — мугу у э хьэроевоз.

— Гъэдой туьре вегиро бебе, хэлефме, — мугу Ёвдо, уре гъэл гирде. Уре эз шори дие дерд гьичиш негирд. У селт фурмуш сохд, ки э Гъуьзуьлгуьл мэгІлуьм сохде гереки гуфдире э товун Шолуме офдеишу. Уре эз шори хэбер небисдо, чуьтам э хьэрой ишу бебе-писер э е дэгь-дэгьэ одомигьо кура бисдоруьтге. Санитаргьо, солдатгьо ве гьемме хэгьер-бирор инжо бируьтгьо. У гьемчуьн нешиновусд чуьтам Рита эз Содугь не Шевеньё гуфдиге:

— Ме видовум э Гъуьзуьлгуьл гуьом.

Гьемме кура бирегоргьо поисдебируьт эдембируьт томоше сохде, чуьтам угьо бебе-писер, дуь-екире гъэл гирде, сине-сов биренуьтге. Шевеньёреш воисдембу гъэл гируьмоч соху Шолуме, оммо дерд энукіре гирдебу э и те-

ретэгИди. Чорей энү небире, у поисдебу э лой кемер Шолум ве гъэл гирдебу эз занигьой энү. Ёвдо гъебо эз душгьой Шолум гирде, жейле сохд уре эз хуьшде, торикиш буге томоше сохде эз сер те пойгьо ве вини экуьнди дуьгъэди бугьо ве э хори нерасире дуллу бугьо расди пой энуре, гене гъэл гирд уре моч сохд. Сенемиш поисдебу э ён энугьо ве дениширебу э Шолум не Ёвдо, комигьоки гъеле-меле эз еки жейле нисе бирембируьт. Эз чумгьой энү эдебу тигъле-тигъле гIэрс тигьи бире. Эхириш Ёвдо Шолуме хьэрзо до ве, эз куьф ейлугъэ ведешенде, сер гирд эри чумгьой хуьшдере покурде. Шолум дениши э кура бирегоргьо ве Сенеме гъэл гирде, мугу:

— Дедей, гирисде эйчуь? — Оммо уре хэбер небу эз хуьшде, чуьтам эз чумгьой ю гIэрсгьо тигьи бирембируьтге.

— У эз шорини, жон дедей, жун дедей.

Ивэхд е капитан экин Шолум оморе мугу эзу:

— Хьовир Шолумов, коргьо лап хуби, веде биреники иму телеграммаре э негьогьи недорейм. Телеграммаре вегирденге, одомигьой туь хэвлет ненуьшдет ве вэхдеш э негьогьи пуч несохдет. Гьетте начальник госпиталь мере дире, суьфде туьре пуьрси: «Эге Шолумов вериге, — мугу, — уре инжо фуше». Ме гуьфдиренге эдем фушенде, лап шор бисдо. Ини юш эдее оморе.

Полковник дес Шолуме гирде, уре хош омори сохде, мугу:

— Кешит, э мошин дуь гурунде яралуьгьо веруьт, эри поисде вэхд нисди...

Шолум дедешуре гъэл гирде поисдебугьо, энжэгъ изму варасики ю десдечугьоре шенди гуьфдире ве дениши э иловле. Е солдат, чепи дес комики бесде бу ве дуллу сохде оморебу э пушой синей ю десдечугьой Шолуме э расди дес хуьшде гирде поисдебу э ён энү. У десдечугьоре доре э Шолум, гъэл гирде уре, мугу:

— Согъ боши, Шолум, зури-зури соф бош...

— Согъ боши, Сережа, рэхъник, — мугу Шолум, песе у гъэл гирд капитана, — омбар согъ боши, Гриша...

— Согъ боши, Шолум, когъоз нуувуьс, фурмуш месох имуре.

— Ёгъин минуувуьсуьм, гъич согъ гъуьмуьрмеш фурмуш нисохум.

— Қини у капитан? — мугу Ёвдо эз перрон э ведиромореки.

— У начальник поезди, гъил гуьржини, е хубе куки, гъетте мере э поезд дире, шинохд Кавкази биреире, омори нуьшди э кинме, пуьрсири жусди ве дануьсденге, ки ме дербендиуьм гуфдире эз ме мугу: «Эге е одомилеш э Дербенд фушндени бисдоримге, у туь мибоши». Телеграммареш ю дори, мере хэбериш небири. Телеграммаре доре бэгъдо диромо гуфди э ме: «Белки угъош дануьсдуьт е хэрекети сохде». Веди бирени у э и жоргъо хутеини, эз расдекиш ишмуш хэрекет сохдейт дие...

— Иму хэрекет несохдейм, Гъуьзуьлгуьл хэрекет сохди, — мугу Ёвдо ве дениши э иловле, Гъуьзуьлгуьле гешдере хуно. Шолумиш сер гирд эри иловлере гешде. Угъо эдембируьт куьнд оморе эз автомашин.

— Уни Гъуьзуьлгуьл, — мугу полковник, гуйге у васи, кире гешдембируьтге Ёвдо не Шолум, э иловле денишире.

Шолум дениши э лой автомашин ве мивинуь Гъуьзуьлгуьл, сипре халат э тен ю вери поисди э ён дер автомашин ве денишири, кей ишу миёвт мирасуьтге э автомашин.

— Хош оморей, — мугу Гъуьзуьлгуьл эзу, угъо э ён дер автомашин оморе расиренге, ве десе кешире, зиёд сохд, — ди десдечугъоре, евошлей вара э мошин...

— Согъ боши, — мугу Шолум, денишире э десдечугъо не яралуье пой хуьшде, соки гуфдирере хуно: «Дениш чуьжире оморемге».

И чоримуьн гиле яралуьш бириге у, гъич ебош гъечи эри к гурунд неомори, гъеймогъой, омогъоре хуно. Гъелбет

дуьл энү лап шор бу, чуьнки э ижире гъэзоблуье довгЮ у лап келе бэхди, яралуь бире, э шегьер дедеи хуьшде гъисмет бирей. Оммо эз елойге дуьл энү эдембу гурунд бире эзу товуне, ки у гъечи дануьсдембу ю нимелите одо-мини гуфдире, чуьнки дуь десдечугьо дери э гъултугъ. У орине хирург фегъм сохденге ярай энуре, мугу:

— Туь гъеле омбаре немцгьоре гъирмиш мисохи, хьовир Шолумов...

Оммо пой энү шефди, дуз нисе бире, духдиргьоре имиди хуб мибу гуфдире ве гене у биё бурав э довгЮ. ДовгЮ гъеле не варасди, довгЮ гъеле э пушо дери...

— Эки дениширей, — мугу Гъуьзуьлгуьл, — ди десдечугьоре, вени евошлей пой туьре э мошин.

Эз фикиргьой хуьшде тоймиш бире, Шолум дуь десдечуре эеки вогосунде, до э Гъуьзуьлгуьл, десе э душ энү веноре, чепи пое вено э пилонкон автомашин. Дуь медсестрагьо, э автомашин вебируьтгьо эз гъулгьой энү гирде вебердуьт уре э автомашин. Полковник, комики дениширебу кей Шолум миваравге э мошин, эз Гъуьзуьлгуль мугу:

— Туь эки дениширей, зу-зу, — у венуьшунд Гъуьзуьлгуьле э автомашин, сэхд сохд дер энуре, песе дениши э, могьбул бире, поисдечугьо Ёвдо ве гуфди э гуш-гуши энү, — эдее тэгди сохденим, бэхшлемиш сохит, е яралуь дир, несохде, биё операция сохде биёв...

У шев екиреш хов неомо, угьо дуз те пушой себэхь нуьшдуьт э хуней Шевеньёйгьо, энжэгъ пушой себэхь очмиш бире дарафдуьт гъуншигьо эри хисире. Гъуьзуьлгуьл гъелемиш не оморебу эз госпиталь. Ёвдо дегешд е миж хов мисоху гуфдире, оммо хисире недануьсд. Песини гофгьой полковник гъич эз ёр энү нисе вадарафдембируьт ве у гъе эдембу гуфдире э дуьл хуьшде: «Чуьтам бисдо бу у косибе солдат?..» Гъетте эз тирак лет пенжере ригаз товуш рузине веди бире, у вэхуьшд вокурд партал хуьшдере, вадарафд э хьэёт, хэйли гешд, песе вадарафд э куче, уре воисдембу дарав Гъуьзуьлгуьл омориге, пуьр-

суь чуьтам гиросдиге операция. Э куче ведироморенге, мивинуь гьеле лап зунь, хуб нисди гьечи зу эри хэбер сохде хэлгъэ. У суьфделе нуьшдебу э сер тукунеи, мивинуь эз диш куче Гьуьзуьлгуьл эдее оmore. Веди бу, ки уш гьич нэхисиребу, эз оmoreмуниш, у эдембу хэсдее одомире хуно пое норе.

— Себэхь эхэйрбу, лелей Ёвдо, — мугу Гьуьзуьлгуьл, куьнд оmoreнге, — ишму нэхисирейт, гьечи зу эйчуь вэхишдейт?

— Чуьтам бисдо? — мугу Ёвдо.

— Шолуме э госпиталь иму нефушенд, — мугу Гьуьзуьлгуьл, — ме нисе дануьсде...

— Шолум нэгI-о, у солдат чуьтам бисдо?

— Коми солдат? — пуьрси э гIэжоибиревоз Гьуьзуьлгуьл.

— У солдат, комиреки операции биё соху?

— Гьо.. гьо, — мугу Гьуьзуьлгуьл, — хуб гиросд операция, хисире гьеймогьой.

Эри Ёвдо гьовой Гьуьзуьлгуьл ежире омо. «Белки эз хэсдеини, — мугу у э дуьл хуьше, — денилее гIэили дие, текей миверов». Оммо, неденишире э у кор, ки Гьуьзуьлгуьл омбаре ихдилолтгьо сохдембу э товун э госпиталь ишу гиросдембириуьтгьо коргьо, веди бу, ки Ёвдо фурмуш сохдебу, жи эзунь операциегьо эз пушой чумгьой Гьуьзуьлгуьл гьемме руз эдете гиросденуьт гуьфдире.

Гьуьзуьлгуьл дарафде бэгьдо, Ёвдо хэйли нуьшд э сер тукунеи, олхоин бире одомире хуно, песеде виниренге, ки чумгьой ю эдете э хифлет рафденуьт, вэхуьшд дарафд э хуне.

ГЬУЛБУРРА

Гьуьзуьлгуьле имид бу, ки чуьтамиш бисдоге, белки Шолум э ю гьуллугь сохденигьо палата гьисмет бисдо. Оммо э палатей энунь неки, э госпиталь, у кор сохдембугьош, гьисмет небисдо Шолум. У кор сохдембу э гос-

питаль, комики бу э жиге училищей тербидорегорго, оммо Шолум гъисмет биребу э госпиталь, комики бу э гъуногъхоне. Оммо Шолум деbugъо госпиталь эз хуней энугъо куьнд бу. Шевеньё, Содугъ не Рита зкуьнди гъемме руз оморембируйт экин энугъо эри сер кешире. Келетегъош, хэгъер-бирориш, шинохгъош, гIэре недоре оморембируйт экин Шолум эри сер кешире, пуьрсире-жусде хьол энуре. Оммо экин энугъо екиреш нисе дегъишдембируйт. У э суьфдеи тебэгъэ дегешдебу.

У эз пенжере сере миведешенд, ихдилот мисохд э оморегоргоферовоз.

Сеимуйн руз бу Шолум оморе, Гъуьзуьлгуьл эз хэгъергили жори хуьшде руьхсет хосде, зуге эз кор ведироморе, омо экин Шолум. Гуьзуьлгуьл поисдебу э ён пенжере, эдембируйт эеки ихдилот сохде, Гъуьзуьлгуьл гъебо мугу:

— Лелей Максим не Рита эдее оморе.

— Максим кини?

— Бебей Ритайгъо, ме эритуь нуьвуьсдебируьм, ки э хунейму э имуревоз вирихдегорго зигъисденуьт гуьфдире. Холей София не Рита, духдер ю, чуьтам бебей Ритайгъо, яралуй биренге, э палатейме гъисмет бириге. Имогъой, ярай ю соф бире, и дуь ориней эз госпиталь ведиромори, э десдечугъоревоз гешде.

— Гъо, Рита диш инжо буки, э руз ю дуьбош оморенуьт угъо.

— Шохьонгум ишму эхэйрбу, мугу Максим, куьнд оморенге.

— Эгъибет ишму, эхэйрбу, мугу Гъуьзуьлгуьл, — Шолум, шинох бош э лелей Максимевоз.

Шолум, эгъибеттуь эхэрбуй Максиме вогордунде, гирд дес энуре.

Хэйли гоф сохде бэгъдо, гъозие-гъэдер екире пуьрсире-жусде бэгъдо, ки э коми фронт бириге меслэхьэт сохде бэгъдо, Максим мугу:

— Э кулме келе гъэрдиго вери, ме Гъуьзуьлгуьле лап

омбар гъэрхундуым. У нибисдоге, у хъэрекет нисохдге, кифлете миофум гуфдиреш имид небу мере.

— Ме гъич е зиёдие кор несохдем, лелей Максим, у энжэгъ гъисмети, не ишму мере гъич гъэрхундиш нисдит, эжигейме киш мибисдоге гъе гъечу мисохд...

— НэгI, гъечу мегу. Ченд шевгъо, нэхисире, нуьшдей э бонилейме те ме чум вокурде? Бега ме нисе дануьсденуым, — мугу Максим, энгуьшде тик гирде.

— У гъэрд мени...

— Гъэрд туь бисдогеш, туь эриме сохдегъоре, ме гъич гIуьмуьрлугъиш фурмуш нисохум. Туь э гоф эну медениш, Шолум, у гуфдигеш-негуфдигеш, ме лап хуб дануьсденуым ме уре гъэрхунд гъисдуьмгъоре. Туь ебо зури-зури соф бош, эришму гIэруьси сохим, екем семе гъэрдилегъой мере вогордунум э Гъуьзуьлгуьл те гене э фронт рафдени бирей ме...

— Гъо, э товуней эну гуфдиренит ишму?! — мугу Гъуьзуьлгуьл, сере гъуьз гирде, гIэйбе-гIэйб.

— Ме, белки, эз ишму зуте рафдуьм э фронт, Максим Гаврилович, — мугу Шолум, — Гъеле те гIэруьсигъо дистри, ебо Гитлере нисд сохде гереки.

Максим гъечи дануьсд Шолумиш эдее зарифет сохде гуфдире, юре хуно, э товун э фронт рафдеи... Э товун гIэруьси, гъелбет, у эдембу зарифет сохде. У лап хуб дануьсдембу, ки гъеймогъой екиреш дуьл гIэруьсигъо сохде нисди гуфдире.

— Ме не туьни, — мугу у, — э десдечугъоревоз омбаре фашистгъоре миданим къушде.

— Ме эз расдеки эдее гуфдиренуьм, — мугу Шолум, — мере хирург имид дори, эз дуь мегъиге мигъилуь гуфдире э фронт рафде.

— Гъечу мереш имид дори. Эз ме мугу: «Дуь-се мегъирошде бэгъдо биё э комиссие, мивиним, гъеле фори-гъэти веги эри туь...»

Хэйли ихдилотгъо, зарифетгъо сохде бэгъдо, Максим

не Рита, согъбоши гуфдире, рафдуът. Екем гиросде бэгъ-до, Гъуъзуългуъл, ох кешире, мугу:

— Уре имиди гъеле э довгю мирав гуфдире, э жендеку е согъэ жиге недери, гъемме сула-сулаи эз жиге тилишгъой тупи. Дуь бо операция сохдет, гене гъемме тилишгъоре темиз сохде небири. Хирург мугу у биё гене операция сохде биёв эз дуь-се мегъиге, экин ю нисе гуфдиренуът, юре дуъл доренуът. Оммо чорей ю буге гъе имбуруз э довгю мирав. «Мере, — мугу, — э немцгъоревоз жейлее гъэгъ-хъисоб мени, ёгъин гъеммере биё рашут сохум...» Дуь бироргъой ю, кук ю, бебе-дедей ю гъемме пуч бирет. Хунегъошуш, мол-девет ишуш... Зурбое гъэзоб бири э хэлгъ...

— Туь уре гуфдире, гъеммеймуш гъечу биреним, яра-луь бире э госпиталь офдоренге, те соф бире тэгъди сохденим эри э фронт вогошде, гъэгър дуъл имуре ведешенде. Туь гъеле э чум туьревоз недиреки эдее гуфдире, иму чуйтам биё бошим дие, кейки э чум имуревоз дирейм, согъэ дигъгъо-шегъергъоре вачарунде оморетгъоре, согъэ могоьлугъгъой дигъгъо селт нисд сохде оморетгъоре...

— Кей э хуьшде мидиров и могоьлугъ? — мугу Гъуъзуългуъл, — Дегъ салигъош вес нисоху.

— Омбаре хэлгъ пуч бири, бинелуье гъувот жофокеширение могоьлугъ пуч бири... Оммо генеш ебо довгю варасуьге увэхди кор зобу нйбу. Хэлгъгъойму хутеинуът э вачарундеигъоре оводу сохде... Оммо гъисмет кини эри дире у рузе, — мугу ох кешире, Шолум.

Гуниле расиребу э ён сугърезани Шолум. Ярай энусоф биренге, мэгълуьм бисдо, ки расди пой энусоф кутэхь бири гуфдире эз чепа. Унегуьре комиссие гъэрорноробу, ки пой энусоф биё э зенжил доноре биёв гуфдире. «Э зенжил доноре биёв» гуфдиренге эри одоми асант омореп, оммо вегирде виниримге чуй кориге у эри одоми келе муьгуьжуьзире хуно миёв. Э серэгъови уютгъ бесдебу черх гъовунире, э черх дешендебу зенжиле, э е гъирогъ зенжил бесдебу гурунде гуьрвенкегъоре, у гъиро-

гъигей зенжиле бесебу э пой Шолум ве юре руйзеверо дегердундебу э сер кровать. Э ижире тегьер дегешде Шолум мундебу дуз е мегь. Эз е мегьиге бэгъдо пой энуре доноребируйт э гипс ве песде векендебируйт эз зенжил, Э гипсезов е мегь зиёдтеш мибисдо гешдгьо Шолум. Гипсе векенденге, мэгІлуым бисдо, ки пой энудуз бири гуфдире, оммо эри энуде не зури-зури гешде, не видовусде гьеле гІэмел нисе оморе гуфдире ве эзуш бэгъэй у гьеле миёсд э гешдеки э расди дес хуыше десдечу гирде, пой энугуж нэхуру гуфдире. Унегуьре комиссией духдири гъэрор норобу, ки уре фуьрсорени э военни санаторие эри селт соф бире э шегьер Кутаиси. Пушой э Кутаиси рафде, уре ихдиёр доребируйт дуь орине эри э хүне зигьисде.

Е руз пушой шохьонгумигьо Шолум нуьшдебу э сер тукунейшу, эдембу книг хунде, Гъуьзуьлгуьл эз кор омогьо. У шохьонгум эхэйрбу доре Шолуме, нуьшд э ён энуде.

— Чуьни туь хунденигьо? — пуьрси Гъуьзуьлгуьл, гьолуб киниге вокошире ве виниренге «ДовгІо ве шолуми» эн Толстой, зиёд сохд, — хубе книги.

— Туь гьечи могьбул эйчуьни? — мугу Шолум э сифет энуденишире.

— Эз чуь биё шори сохум ме? Эз одохлуйме, тэгІди сохденигьо эз кинме эри вирихде, енебуге эз бейейму эзи дуь мегь пушо е когьозле нуьвуьсди, яралуьнуьм гуфдире, дие не хэбер не когьоз нисдигьо?..

— Веди бирени ме эдем вирихде эз кин туь, — мугу Шолум ловгьоре э суьпуьле хэнде веберде.

— НэгІ, бейейме муно, эдее зарифет сохденуьм, туьлугь чуьни, туь солдати, эйтуь нерафде гІэмел нисе оморенигьоре ме беге нисе дануьсденуьм? Оммо и бейейму эйчуь когьоз нисе нуьвуьсдеге мэхьтел бирем мунде.

Эри энуде кор Гъуьзуьлгуьл дуз эдембу гуфдире. Эзи дуь мегь пушо эз Нисим когьоз оморобу яралуьнуьм э госпиталь деруьм гуфдире, оммо чуь жигей юни яралуь,

эже дери э больница э когъоз невебу, дие эзу эй-ло не когъози, не хэбер.

— Максим эдее оmore, — мугу Шолум, э чумевоз э тараф диш куче бирмунде.

— Эже бу у?

— Э комиссия, вэхд энү варасди, уре имиди себэхь-персебэхь э фронт мирав гуфдире.

— Шохьонгум ишму эхэйрбу, — мугу Максим, нушьде э ён энугъо. Максим изму десдечугъоре шендебу, оммо чуйниге эз комиссие могъбул оmoreбу.

— Чуй гуфди, — мугу Шолум.

— Э операция дегешде воисде мугу, небуге хьол ишму зобу мибу: «Ишму эз фронт дие дурит, — мугу, — эн суьфде э товун жунсогъишму фикир сохит»... Мугу: «Ме лап хуб жунсогъум». «У эритуь оmore, — мугу, — тилишгъоре темиз мисохим, песде туьре соф мисохим, песде мирай э фронт...» Варасири?!

— Угъо дузуйт, лелей Максим, — мугу Гъуьзуьлгуьл, — эришму фронт гIэмел ниёв, жендек ишму лап хэтолуьни.

— Уре меш дануьсденуьм, духдерме, — мугу Максим, ох кешире, — оммо и дуьл мере чуй сохум.

— Тоб доре воисде, — мугу Шолум, — чуй мисохи? Ини, мере нисе воисде рафде, оммо эдете фуьрсоренуйт, уш э фронт нэгI, э «курорт».

Э и гофгъой Шолум гьерсей энугъо хэндуйсдуйт.

— Дануьсденуьм, — мугу Максим, — туьре чуйтам нисе воисдеге рафде, чорей туь буге, е рузлеш инжI нинуьши...

— Бурайт-бурайт, гьердуйшму э фронт бурайт, — мугу Гъуьзуьлгуьл, эз жигей хуьшде вэхуьшде ве лове э суьпуьле хэнде веберде, — оммо эзу гофгъошму хубтеи ме дарам чой-чи венуьмгъо те дедейгъо оmore.

И рузгъо зенгъо не гIэйлгъо э богъгъо бирембируьт эри гъупи зере. Угъо эз кор оmoreмбируьт шев э руз гъэриш бире-небире.

— Кеш имуш бурайм екем гешдим, — мугу Шолум, вэхуышде эз жигей хуышде. У огол зе Гъуызуылгуыле ве доре э у книге, гуфдики те ю чой-чи хьозур сохде екем мигешдуът миёвт гуфдире.

Гьердуый энугьо, сере гъуз гирде эз диш куче э куынд биреки, невинируът кей е огыле мерд партал-гьой солдати э тен ю вери ве вешмешок э кул ю дуллу гьисди, эз диш куче ведироморе э лой энугьо омогьо. Мерд хуб томоше сохде балай гьердуый энугьоре, мугу:

— Шолум, туь хэлгъэш нисе шинохде?!

Шолум сере тик гирденге мивинуь Нисим чеи гъул ю невери, поисди э пушошу.

— Лелей Нисим, — мугу у гъэл гирде мерде. — Максим и бебей Гъуызуылгуылигьои, гуфди у э Нисимевоз сине-сов бире варасде бэгъдо.

Максим шор бире, гирд дес Нисиме хош омори сохд уре. Шолум руй бире экин Нисим, мугу:

— И Максими, лелей Нисим, э товун энугьо Гъуызуылгуыл эришму ненуыуьсде нибу?!

— Бебей Ритайгьо?! Гьелбет нуыуысди, — мугу Нисим, гъэл гирде Максиме, — лап хуб, лап хуб...

Угьо вогошдуът руе хуне. Шолум не Нисим эдембируът пуырсире хьол-руз дуь-екире, оммо Максим пой вечи рафд эри Гъуызуылгуыле бошорей доре.

У шев гьеммееки кура биребируът э хуней Нисимигьо. Хэгьер-бирор, дусд-дусдгориш оморебируът эри Нисиме хошомори сохде. Нисим нуышдебу э гьэрелугь Ёвдо нен Авдалим. Э синей энугьо ченд орденгьо ве медалгьо вебируът. У эдембу ихдилот сохде эри кура бирегоргьо э комини жигегьо бириге, эже довго сохдиге ве э орденгьо не медалгьо бирмунде, эдембу гуфдире:

— И эри Моздоки, и эри Ростови...

СЕРНОМЕ

Пушойгофц	3
Дуьм гъупии	7
Кемедиё эжигей нимаз	10
Гимет эн се 'эульче	15
Э школа	18
Книг енебуге туро	22
Гювчигъо	27
Э гъэновгъо	30
МигИид	33
Э рэхь Масков	40
Рушбурра	45
ЗэгИифи	49
Гъэреулчи	54
Э рэхь жофо	58
Дусди	62
Богъбур	72
Эз асму буй дуре эдее оmore	78
Муьгъбетлуье дуьлгъо	84
Жейлеи	92
Суьфдеи бедигъой хунлуье довгъо	98
Вирихдегоргъо	106
Имидлуьи	114
Суьфдеи руз жофои	120
Чуькле колхозчигъо	134
Гъэчэгъгъо	144
Суьфдеи шоре хэбергъо	150
Угъош одомигъоют	157
Гурунде яралуь	161
Гъулбурра	168

Беньямин Сафанов •

ВИНОГРАДАРИ

На татаском языке

Редактор **Х. Авшалумов**

Художник **В. Комаров**

Художественный редактор **В. Логачев**

Технический редактор **В. Гаджиева**

Корректор **А. Симандуев**

Сдано в набор 20.04.81. Подписано в печать 20.02.82. Формат 70×108^{1/32}. Бумага типографская №2. Гарнитура «Литературная». Печать высокая. Усл. печ. л. 7,7. Уч.-изд. л. 7,9. Тираж 1000 Заказ 948
Цена 60 к.

Дагестанское книжное издательство Государственного комитета Дагестанской АССР по делам издательств, полиграфии и книжной торговли.

367025, Махачкала, ул. Маркова, 55

Типография им. С. М. Кирова Государственного комитета Дагестанской АССР по делам издательств, полиграфии и книжной торговли.

367025, Махачкала, ул. Маркова, 51.

60 коп

Бенъямин Сафанов

ВИНОГРАДАРИ

На татском языке